

श्री स्वाभिनारायणो विजयतेतराम्

वेद

कृष्णायजुर्वेद

तैत्तरीयसंहिता

## तैत्तिरीयसंहिता

### प्रथमं काण्डम्

अथ प्रथमकाण्डे प्रथमः प्रपाठकः १

इषे त्वो जे त्वा वायवः स्थोपायवः स्थ देवो वः सविता प्रार्पयतु  
श्रेष्ठतमाय कर्मण आ प्यायध्वमघ्निया देवभागमूर्जस्वतीः पर्यस्वतीः  
प्रजावतीरनमीवा अयुद्धमा मा वः स्तेन ईशत माघशंसो रुद्रस्य हेतिः  
परि वो वृणक्तु ध्रुवा अस्मिन्गोपतौ स्यात ब्रह्मी र्यजमानस्य पशून्पाहि  
॥१॥

यज्ञस्य घोषदसि प्रत्युष्टरक्षः प्रत्युष्टा अरातयः प्रेयमगाद्धिषणा बर्हिरच्छ  
मनुना कृता स्वधया वितष्टा त आ वहन्ति कवयः पुरस्ताद्देवेभ्यो  
जुष्टमिह बर्हिरासदे देवानां परिपूतमसि वर्षवृद्धमसि देवबर्हिर्मा  
त्वान्वङ्गा तिर्यक्पर्व ते राध्यासमाच्छेत्ता ते मा रिषं देवबर्हिः शतवल्शं  
वि रोह सहस्रवल्शा वि वयंसं रुहेम पृथिव्याः सम्पृचः पाहि  
सुसम्भृता त्वा संभराम्य दित्यै रास्त्रासीन्द्रायै सन्नहनं पूषा तै ग्रन्थिं  
ग्रन्थातु स ते मास्थादिन्द्रस्य त्वा ब्राह्म्यामुद्यच्छे बृहस्पतेर्मूर्धा  
हराम्यु वन्तरिक्षमन्विहि देवं गममसि ॥२॥

शुन्धध्वं दैव्याय कर्मणे देवयुज्यायै मातरिश्चनो घर्मोऽसि  
द्यौरसि पृथिव्यसि विश्वधाया असि परमेण धाम्ना दृहस्व मा  
ह्वा वसूनां पवित्रमसि शतधारं वसूनां पवित्रमसि सहस्रधारंसं हुतः  
स्तोको हुतो द्रप्सोऽग्र्यै बृहते नाकाय स्वाहा द्यावापृथिवीभ्यांसं सा  
विश्वायुः सा विश्वव्यचाः सा विश्वकर्मा सं  
पृच्यध्वमृतावरीरूमिणीर्मधुमत्तमा मन्द्रा धनस्य सातये सौमेन त्वा

तन्चमीन्द्राय दधि विष्णो हव्यं रक्षस्व ॥३॥

कर्मणो वां देवेभ्यः शक्यं वेषाय त्वा प्रत्युष्टं रक्षः प्रत्युष्टा अरातयो  
धूरसि धूर्व धूर्वन्तं धूर्व तं योऽस्मान्धूर्वति तं धूर्व यं वयं धूर्वाम् स्त्वं  
देवानामसि सस्त्रितमं पप्रितमं जुष्टतमं वह्नितमं देवहृतममहुतमसि  
हविर्धानं दृहंस्व मा ह्या मित्रस्य त्वा चक्षुषा प्रेक्षे मा भेर्मा सं विक्था  
मा त्वा हिंसिष मुरु वाताय देवस्य त्वा सवितुः प्रसवेऽश्विनोर्बाहुभ्यां  
पूष्णो हस्ताभ्यामग्रये जुष्टं निर्वपाम्य ग्रीषोमाभ्या मिदं देवाना मिदं मु  
नः सह स्फात्यै त्वा नारात्यै सुवर्भि वि ख्येषं वैश्वानरं  
ज्योतिर्दृहन्तां दुर्या द्यावापृथिव्यो र्वन्तरिक्षमन्विह्य दित्यास्त्वोपस्थे  
सादयाम्य ग्रै हव्यं रक्षस्व ॥४॥

देवो वः सवितोत्पुनात्वच्छिद्रेण पवित्रेण वसोः सूर्यस्य रश्मिभि रापो  
देवीरग्रेपुवो अग्रेगुवोऽग्रं इमं यज्ञं नयताग्रे यज्ञपतिं धत्त  
युष्मानिन्द्रोऽवृणीत वृत्रतूर्ये यूयमिन्द्रमवृणीध्वं वृत्रतूर्ये प्रोक्षिताः  
स्थाऽग्रये वो जुष्टं प्रोक्षाम्यग्रीषोमाभ्यां शुन्धध्वं दैव्याय कर्मणे  
देवयज्याया अर्धधूतं रक्षोऽर्धधूता अरातयोऽदित्यास्त्वर्गसि प्रति त्वा  
पृथिवी वैत्त्व धिषवणमसि वानस्पत्यं प्रति  
त्वादित्यास्त्वर्गैत्त्व ग्रेस्तनूरसि वाचो विसर्जनं देववीतये त्वा  
गृह्णाम्य द्रिरसि वानस्पत्यः स इदं देवेभ्यो हव्यं सुशर्मि शमिष्वेषुमा  
वदोर्जमा वद द्युमद्वदत वयं संङ्घातं जेष्म वर्षवृद्धमसि प्रति त्वा  
वर्षवृद्धं वेत्तु परापूतं रक्षः परापूता अरातयो रक्षसां भागोऽसि  
वायुर्वो वि विनक्तु देवो वः सविता हिरण्यपाणिः प्रति गृह्णातु ॥५॥



श्रंपयतु वर्षिष्ठे अधि नाके ऽग्निस्ते तनुवं माऽति धागग्ने हव्यं रक्षस्व सं  
ब्रह्मणा पृच्यस्वै कृताय स्वाहा द्विताय स्वाहा त्रिताय स्वाहा ॥८॥

आ दद इन्द्रस्य बाहुरसि दक्षिणः सहस्रभृष्टिः शततेजा वायुरसि  
तिग्मतेजाः पृथिवि देवयजन्योषध्यास्ते मूलं मा  
हिंसिष्य मपहतोऽरुः पृथिव्यै वृजं गच्छ गोस्थानं वर्षतु ते  
द्यौर्बधान देव सवितः परमस्यां परावति शतेन पाशैर्योऽस्मान्द्वेष्टि यं च  
वयं द्विष्मस्तमतो मा मौग पहतोऽरुः पृथिव्यै देवयजन्यै वृजं गच्छ  
गोस्थानं वर्षतु ते द्यौर्बधान देव सवितः परमस्यां परावति शतेन  
पाशैर्योऽस्मान्द्वेष्टि यं च वयं द्विष्मस्तमतो मा मौग पहतोऽरुः पृथिव्या  
अदेवयजनो वृजं गच्छ गोस्थानं वर्षतु ते द्यौर्बधान देव सवितः  
परमस्यां परावति शतेन पाशैर्योऽस्मान्द्वेष्टि यं च वयं द्विष्मस्तमतो मा  
मौग ररुस्ते दिवं मा स्कान्वसवस्त्वा परि गृह्णन्तु गायत्रेण च्छन्दसा  
रुद्रास्त्वा परि गृह्णन्तु त्रैष्टुभेन च्छन्दसादित्यास्त्वा परि गृह्णन्तु जागतेन  
च्छन्दसा देवस्य सवितुः सवे कर्म कृणवन्ति वेधसं  
ऋतमस्य तसदनमस्य तश्रीरसि धा असि स्वधा अस्युर्वी चासि  
वस्वी चासि पुरा क्रूरस्य विसृपो विरप्शित्नु दादाय पृथिवीं  
जीरदानुर्यामैर्यञ्चन्द्रमसि स्वधाभिस्तां धीरासो अनुदृश्य यजन्ते ॥९॥

प्रत्युष्टं रक्षः प्रत्युष्टा अरातयो ऽग्नेर्वस्तेजिष्ठेन तेजसा निष्टपामि  
गोष्ठं मा निर्मृक्षं वाजिनं त्वा सपत्नसाहं सं माज्मि वाचं प्राणं चक्षुः  
श्रोत्रं प्रजां योनिं मा निर्मृक्षं वाजिनीं त्वा सपत्नसाहीं सं  
माज्मियां शासाना सौमनसं प्रजां सौभाग्यं तनूम् । अग्नेरनुव्रता भूत्वा

सं नह्ये सुकृतायु कम् ॥  
सुप्रजसस्त्वा वृयं सुपत्नीरुप सेदिम ।  
अग्रै सपत्नदम्भनमदब्धासो अदाभ्यम् ॥  
इमं वि ष्यामि वरुणस्य पाशं यमबन्धीत सविता सुकेतः ।  
धातुश्च योनौ सुकृतस्य लोके स्योनं मे सह पत्या करोमि ॥  
समार्युषा सं प्रजया समग्रे वर्चसा पुनः ।  
सं पत्नी पत्याऽहं गच्छे समात्मा तनुवा मम ॥  
महीनां पयोऽस्योषधीनां रसस्तस्य तेऽक्षीयमाणस्य निर्वपामि महीनां  
पयोऽस्योषधीनां रसोऽदब्धेन त्वा चक्षुषाऽवैक्षे सुप्रजास्त्वाय तेजोऽसि  
तेजोऽनु प्रेह्य गिस्ते तेजो मा वि नैदु ग्रेर्जिह्वासि सुभूर्देवानां धाम्नेधाम्ने  
देवेभ्यो यजुषेयजुषे भव शुक्रमसि ज्योतिरसि तेजोऽसि देवो वः  
सवितोत्पुनात्वच्छिद्रेण पवित्रेण वसोः सूर्यस्य रश्मिभिः शुक्रं त्वा  
शुक्रायां धाम्नेधाम्ने देवेभ्यो यजुषेयजुषे गृह्णामि ज्योतिस्त्वा  
ज्योतिष्यर्चिस्त्वाऽर्चिषि धाम्नेधाम्ने देवेभ्यो यजुषेयजुषे गृह्णामि ॥१०॥

कृष्णोऽस्याखरेष्टोऽग्रये त्वा स्वाहा वेदिरसि बर्हिषे त्वा स्वाहा बर्हिरसि  
स्रुग्भ्यस्त्वा स्वाहा दिवे त्वाऽन्तरिक्षाय त्वा पृथिव्यै त्वा स्वधा  
पितृभ्य ऊर्भव बर्हिषद्भ्य ऊर्जा पृथिवीं गच्छत विष्णोः  
स्तूपोऽस्यू र्णाम्रदसं त्वा स्तृणामि स्वासस्थं देवेभ्यो गन्धर्वोऽसि  
विश्वारवसुर्विश्वस्मादीषतो यजमानस्य परिधिरिड ईडित इन्द्रस्य बाहुरसि  
दक्षिणो यजमानस्य परिधिरिड ईडितो मित्रावरुणौ त्वोत्तरतः परि धत्तां  
ध्रुवेण धर्मणा यजमानस्य परिधिरिड ईडितः सूर्यस्त्वा पुरस्तात्पातु  
कस्याश्चिदभिशस्त्या वीतिहौत्रं त्वा कवे द्युमन्तुं समिधीमह्यग्रे

बृहन्तमध्वरे विशो यन्त्रे स्थो वसूनाँ रुद्राणांमादित्यानाँ सदसि सीद  
 जुहूँ रुपभृद्ध्रुवाऽसि घृताची नाम्ना प्रियेण नाम्ना प्रिये सदसि सीदैता  
 असदन्त्सुकृतस्य लोके ता विष्णो पाहि पाहि यज्ञं पाहि यज्ञपतिं पाहि  
 मां यज्ञनियम् ॥११॥

भुवनमसि वि प्रथस्वाग्ने यष्टरिदं नमः ।  
 जुह्वेह्यग्निस्त्वा ह्वयति देवयज्याया उपभृदेहि देवस्त्वा सविता ह्वयति  
 देवयज्याया अग्नाविष्णू मा वामव क्रमिषं वि जिहाथां मा मा सं तां  
 लोकं मे लोककृतौ कृणुतं विष्णोः स्थानमसी त इन्द्रो अद्गोद्वीर्याणि  
 समारभ्योर्ध्वो अध्वरो दिविस्पृशमहुतो यज्ञो यज्ञपतेरिन्द्रावान्त्स्वाहा  
 बृहद्वाः पाहि माऽग्ने दुश्चरितादा मा सुचरिते भज मुखस्य शिरोऽसि सं  
 ज्योतिषा ज्योतिरङ्गाम् ॥१२॥

वाजस्य मा प्रसवेनौद्ग्राभेणोदग्रभीत् ।  
 अथा सपत्नाँ इन्द्रो मे निग्राभेणार्धराँ अकः ॥  
 उद्ग्राभञ्च निग्राभञ्च ब्रह्म देवा अवीवृधन् ।  
 अथा सपत्नानिन्द्राग्नी मे विषूचीनान्व्यस्यताम् ॥  
 वसुभ्यस्त्वा रुद्रेभ्यस्त्वा दित्येभ्यस्त्वा ऽक्तँ रिहाणा वियन्तु वयः ।  
 प्रजां योनिं मा निर्मृक्ष्णमा प्यायन्तामाप ओषधयो मरुतां पृषतयः स्थ दिवं  
 गच्छ ततो नो वृष्टिमेरय । आयुष्पा अग्नेऽस्यार्युर्मे पाहि चक्षुष्पा  
 अग्नेऽसि चक्षुर्मे पाहि ध्रुवाऽसि यं परिधिं पर्यधत्था अग्ने देव  
 पणिभिर्वीयमाणः । तं त एतमनु जोषं भरामि नेदेष त्वदपचेतयातै  
 यज्ञस्य पाथ उप समितँ सँस्त्रावभागाः स्थेषा बृहन्तः प्रस्तरेष्ठा

बर्हिषदश्च देवा इमां वाचमभि विश्वे गृणन्त आसद्यास्मिन्बर्हिषि  
मादयध्वम् ग्रेवामपन्नगृहस्य सदसि सादयामि सुम्नाय सुम्निनी सुम्ने मा  
धत्तं धुरि धुर्यौ पातु मग्रेऽदब्धायोऽशीततनो पाहि माऽद्य दिवः पाहि  
प्रसित्यै पाहि दुरिष्ट्यै पाहि दुर्द्वयै पाहि दुश्चरितादविषं नः पितुं कृणु  
सुषदा योनिं स्वाहा देवा गातुविदो गातुं वित्त्वा गातुमित् मनसस्पत  
इमं नो देव देवेषु यज्ञं स्वाहा वाचि स्वाहा वाते धाः ॥१३॥

उभा वामिन्द्राग्नी आहुवध्या उभा राधसः सह मादयध्वै ।  
उभा दाताराविषां रयीणामुभा वाजस्य सातये हुवे वाम् ॥  
अश्रवः हि भूरिदावत्तरा वां विजामातुरुत वां घा स्यालात् ।  
अथा सोमस्य प्रयती युवभ्यामिन्द्राग्नी स्तोमं जनयामि नव्यम् ॥  
इन्द्राग्नी नवतिं पुरो दासपत्नीरधूनतम् । साकमेकैः कर्मणा ॥  
शुचिं नु स्तोमं नवजातमद्येन्द्राग्नी वृत्रहणा जुषेथाम् । उभा हि वां  
सुहवा जोहवीमि ता वाजं सद्य उशते धेष्ठा ॥  
वयमु त्वा पथस्पते रथं न वाजसातये । धिये पूषन्नयुज्महि ॥  
पथस्पथः परिपतिं वचस्या कामेन कृतो अभ्यानडर्कम् ।  
स नो रासच्छुरुधश्चन्द्राग्ना धियं धियं सीषधाति प्र पूषा ॥  
क्षेत्रस्य पतिना वयं हितेनैव जयामसि ।  
गामश्वं पोषयित्वा स नो मृडातीदृशौ ॥  
क्षेत्रस्य पते मधुमन्तमूर्मि धेनुरिव पयौ अस्मासु धुक्व ।  
मधुश्रुतं घृतमिव सुपूतमृतस्य नः पतयो मृडयन्तु ॥  
अग्ने नय सुपथा राये अस्मान्विश्वानि देव वयुनानि विद्वान् ।  
युयोर्ध्वस्मज्जुहराणमेनो भूयिष्ठां ते नमउक्तिं विधेम ॥



आ देवानामपि पन्थामगन्म् यच्छक्नवाम तदनु प्रवौढुम् ।  
अग्निर्विद्वान्त्स यज्जात्सेदु होता सो अध्वरान्त्स ऋतून्कल्पयाति ॥  
यद्वाहिष्ठं तद्ग्रयै बृहदर्च विभावसो । महिषीव त्वद्रयिस्त्वद्वाजा  
उदीरते ॥

अग्ने त्वं पारया नव्यो अस्मान्स्वस्तिभिरति दुर्गाणि विश्वा । पूषं पृथ्वी  
बहुला न उर्वी भवा तोकाय तनयाय शं योः ॥  
त्वमग्ने व्रतपा असि देव आ मर्त्येष्वा । त्वं यज्ञेष्वीड्यः ॥  
यद्वौ वयं प्रमिनाम व्रतानि विदुषां देवा अविदुष्टरासः ।  
अग्निष्टद्विश्चमा पृणाति विद्वान्येभिर्देवाँ ऋतुभिः कल्पयाति ॥१४॥

इति प्रथमकारण्डे प्रथमः प्रपाठकः १

अथ प्रथमकारण्डे द्वितीयः प्रपाठकः २

आप उन्दन्तु जीवसे दीर्घायुत्वाय वर्चसु ओषधे त्रायस्वैनँ स्वधिते  
मैनँ हिँसी देवश्रूरेतानि प्र वपे स्वस्त्युत्तरायशीया पौ अस्मान्मातरः  
शुन्धन्तु घृतेन नो घृतपुवः पुनन्तु । विश्वमस्मत्प्र वहन्तु रिप्रमु दाभ्युः  
शुचिरा पूत एमि सोमस्य तनूरसि तनुवं मे पाहि महीनां पर्योऽसि  
वर्चोधा असि वर्चो मयि धेहि वृत्रस्य कनीनिकासि चक्षुष्पा असि  
चक्षुर्मे पाहि चित्पतिस्त्वा पुनातु वाक्पतिस्त्वा पुनातु देवस्त्वा सविता  
पुनात्वच्छिद्रेण पवित्रेण वसोः सूर्यस्य रश्मिभि स्तस्य ते पवित्रपते  
पवित्रेण यस्मै कं पुने तच्छकेयुमा वौ देवास ईमहे सत्यधर्माणो अध्वरे  
यद्वौ देवास आगुरे यज्ञियासो हवामह इन्द्राग्नी द्यावापृथिवी आप  
ओषधीस्त्वं दीक्षाणामधिपतिरसीह मा सन्तं पाहि ॥१॥

आकूत्यै प्रयुजेऽग्रये स्वाहा मेधायै मनसेऽग्रये स्वाहा दीक्षायै तपसेऽग्रये  
 स्वाहा सरस्वत्यै पूष्णेऽग्रये स्वाहा पो देवीर्बृहतीर्विश्वशम्भुवो  
 द्यावापृथिवी उर्वन्तरिक्षं बृहस्पतिर्नो हविषा वृधातु स्वाहा विश्वे देवस्य  
 नेतुर्मर्तो वृणीत सख्यं विश्वे राय इषुध्यसि द्युम्नं वृणीत पुष्यसे  
 स्वाहा कर्षामयोः शिल्पे स्थस्ते वामा रभे ते मा पातमाऽस्य यज्ञस्योदृचं  
 इमां धियं शिक्तमाणस्य देव क्रतुं दक्षं वरुण स शिशाधि ।  
 ययाऽति विश्वा दुरिता तरैम सुतर्माणमधि नावं  
 रुहेमो र्गस्याङ्गिरस्यूर्णमदा ऊर्जं मे यच्छ पाहि मा मा मा  
 हिंसी विष्णोः शर्मासि शर्म यजमानस्य शर्म मे यच्छ नक्षत्राणां  
 माऽतीकाशात्पाहीन्द्रस्य योनिरसि मा मा हिंसीः कृष्यै त्वा  
 सुसस्यायै सुपिप्पलाभ्यस्त्वौषधीभ्यः सूपस्था देवो वनस्पति रूध्वो मा  
 पाह्योदृचः स्वाहा यज्ञं मनसा स्वाहा द्यावापृथिवीभ्यां  
 स्वाहोरोरन्तरिक्षात्स्वाहा यज्ञं वातादा रभे ॥२॥

दैवीं धियं मनामहे सुमृडीकामभिष्टये वर्चोधां यज्ञवाहसं सुपारा नो  
 असद्वशै । ये देवा मनोजाता मनोयुजः सुदक्षा दक्षपितारस्ते नः पान्तु  
 ते नोऽवन्तु तेभ्यो नमस्तेभ्यः स्वाहा मे त्वं सु जागृहि वयं सु  
 मन्दिषीमहि गोपाय नः स्वस्तये प्रबुधे नः पुनर्ददः । त्वमग्ने व्रतपा  
 असि देव आ मर्त्येष्वाम् । त्वं यज्ञेष्वीडयः ॥

विश्वे देवा अभि मा मार्ववृत्रन्पूषा सन्या सोमो राधसा देवः सविता  
 वसोर्वसुदावा रास्वेयत्सोमा भूयो भर मा पृणन्पूर्या वि राधि माहमायुषा  
 चन्द्रमसि मम् भोगाय भव वस्त्रमसि मम् भोगाय भवो स्राऽसि मम्  
 भोगाय भव हयोऽसि मम् भोगाय भव छागौसि मम् भोगाय भव

मेषोऽसि मम भोगाय भव वायवे त्वा वरुणाय त्वा निर्ऋत्यै त्वा रुद्राय  
 त्वा देवीरापो अपां नपाद्य ऊर्मिर्हविष्य इन्द्रियावान्मुदिन्तमस्तं वो माऽव  
 क्रमिषु मच्छिन्नं तन्तुं पृथिव्या अनु गेषं भद्रादभि श्रेयः प्रेहि बृहस्पतिः  
 पुरेता तै अस्त्वथेमव स्य वर आ पृथिव्या आरे शत्रून्कृणुहि सर्ववीर  
 एदमगन्म देवयजनं पृथिव्या विश्वे देवा यदजुषन्तु पूर्व ऋक्सामाभ्यां  
 यजुषा सन्तरन्तो रायस्पोषेण समिषा मदेम ॥३॥

इयं तै शुक्र तनूरिदं वर्चस्तया सं भव भ्राजं गच्छ जूरसि धृता मनसा  
 जुष्टा विष्णावे तस्यास्ते सत्यसंवसः प्रसवे वाचो यन्त्रमशीय स्वाहा  
 शुक्रमस्यमृतमसि वैश्वदेव हविः सूर्यस्य चक्षुरारुहमग्नेरक्षणः कनीनिकां  
 यदेतशेभिरीयसे भ्राजमानो विपश्चिता चिदसि मनासि धीरसि दक्षिणासि  
 यज्ञियासि क्षत्रियास्यदितिरस्युभयतः शीष्णी सा नः सुप्राची सुप्रतीची सं  
 भव मित्रस्त्वा पदि बंधातु पूषाऽध्वनः पात्विन्द्रायाध्यक्षायानु त्वा  
 माता मन्यतामनु पिताऽनु भ्राता सगर्भ्योऽनु सखा सयूथ्यः सा दैवि  
 देवमच्छेहीन्द्राय सोम रुद्रस्त्वा वर्तयतु मित्रस्य पथा स्वस्ति सोमसखा  
 पुनरेहि सह रय्या ॥४॥

वस्व्यसि रुद्रास्य दितिरस्या दित्यासि शुक्राऽसि चन्द्रासि  
 बृहस्पतिस्त्वा सुप्ते रणवतु रुद्रो वसुभिरा चिकेतु पृथिव्यास्त्वा मूर्धन्ना  
 जिघर्मि देवयजन इडायाः पदे घृतवति स्वाहा परिलिखित रक्षः  
 परिलिखिता अरातय इदमह रक्षसो ग्रीवा अपि कृन्तामि योऽस्मान्द्वेष्टि  
 यं च वयं द्विष्म इदमस्य ग्रीवा अपि कृन्ताम्य स्मे राय स्त्वे राय स्तोते  
 रायः सं दैवि देव्योर्वश्या पश्यस्व त्वष्टीमती ते सपेय सुरेता रेतो दधाना

वीरं विदेय तव सदृशि माहँ रायस्पोषेण वि योषम् ॥५॥

अँशुना ते अँशुः पृच्यतां परुषा परुर्गन्धस्ते काममवतु मदाय रसो  
अच्युतोऽमात्योऽसि शुक्रस्ते ग्रहो ऽभि त्यं देवँ सवितारमूरयोः  
कविक्रतुमर्चामि सत्यसवसँ रत्नधामभि प्रियं मतिमूर्ध्वा यस्यामतिर्भा  
अदिद्युतत्सवीमनि हिरण्यपाणिरमिमीत सुक्रतुः कृपा सुवः ।  
प्रजाभ्यस्त्वा प्राणाय त्वा व्यानाय त्वा प्रजास्त्वमनु प्राणिहि  
प्रजास्त्वामनु प्राणन्तु ॥६॥

सोमं ते क्रीणाम्यूर्जस्वन्तं पर्यस्वन्तं वीर्यावन्तमभिमातिषाहँ शुक्रं ते  
शुक्रेण क्रीणामि चन्द्रं चन्द्रेणामृतममृतेन सम्यत्ते गोरस्मे चन्द्राणि  
तपसस्तनूरसि प्रजापतेर्वर्णस्तस्यास्ते सहस्रपोषं पुष्यन्त्याश्चरमेणं पशुना  
क्रीणाम्यस्मे ते बन्धुर्मयि ते रायः श्रयन्ता मस्मे ज्योतिः सोमविक्रयिणि  
तमौ मित्रो न एहि सुमित्रधा इन्द्रस्योरुमा विश दक्षिणमुशन्नुशन्तँ  
स्योनः स्योनँ स्वानु भ्राजाङ्घ्रिरे बम्भारे हस्त सुहस्त कृशानवेते वः  
सोमक्रयणास्तान्नक्षध्वं मा वो दभन् ॥७॥

उदायुषा स्वायुषोदोषधीनाँ रसेनोत्पर्जन्यस्य शुष्मेशोदस्थाममृताँ अनु  
। उर्वन्तरिक्षमन्विह्य दित्याः सदोऽस्य दित्याः सद आ  
सीदा स्तभ्नाद्द्यामृषभो अन्तरिक्षममिमीत वरिमाणं पृथिव्या  
आसीदद्विश्वा भुवनानि सम्राड्विश्वेत्तानि वरुणस्य वृतानि वनेषु  
व्यन्तरिक्षं ततान वाजमर्वत्सु पर्यो अघ्नियासु हत्सु क्रतुं वरुणो विद्वर्षिं  
दिवि सूर्यमदधात्सोममद्रा वुदु त्यं जातवेदसं देवं वहन्ति केतवः ।

दृशे विश्वायु सूर्यम् ॥

उस्रावेतं धूर्षादावनश्रू अवीरहणौ ब्रह्मचोदनौ वरुणस्य स्कम्भनमसि  
वरुणस्य स्कम्भसर्जनमसि प्रत्यस्तो वरुणस्य पाशः ॥८॥

प्र च्यवस्व भुवस्पते विश्वान्यभि धामानि मा त्वा परिपरी विदन्मा त्वा  
परिपन्थिनौ विदन्मा त्वा वृका अघायवो मा गन्धर्वो विश्वावसुरा  
दधच्छयेनो भूत्वा परा पत यजमानस्य नो गृहे देवैः संस्कृतं  
यजमानस्य स्वस्त्ययन्यस्यपि पन्थामगस्महि स्वस्तिगामनेहसं येन  
विश्वाः परि द्विषो विणक्ति विन्दते वसु नमो मित्रस्य वरुणस्य चक्षसे  
महो देवाय तदृतं संपर्यत दूरेदृशौ देवजाताय केतवे दिवस्पुत्राय सूर्याय  
शंसत वरुणस्य स्कम्भनमसि वरुणस्य स्कम्भसर्जनमस्युन्मुक्तो  
वरुणस्य पाशः ॥९॥

अग्नेरातिथ्यमसि विष्णावे त्वा सोमस्यातिथ्यमसि विष्णावे  
त्वा तिथेरातिथ्यमसि विष्णावे त्वा अयै त्वा रायस्पोषदावने विष्णावे  
त्वा श्येनाय त्वा सोमभृते विष्णावे त्वा या ते धामानि हविषा यजन्ति  
ता ते विश्वा परिभूरस्तु यज्ञं गयस्फानः प्रतरणः सुवीरोऽवीरहा प्र चरा  
सोम दुर्यानदित्याः सदोऽस्यदित्याः सद आ सीद वरुणोऽसि धृतव्रतो  
वारुणमसि शंयोर्देवानां सुख्यान्मा देवानामपसशिष्ठत्स्मह्यापतये त्वा  
गृह्णामि परिपतये त्वा गृह्णामि तनूनज्रै त्वा गृह्णामि शाक्वराय त्वा  
गृह्णामि शक्मन्नोजिष्ठाय त्वा गृह्णाम्यनाधृष्टमस्यनाधृष्यं  
देवानामोजोऽभिशस्तिपा अनभिशस्तेऽन्यमनु मे दीक्षां  
दीक्षापतिर्मन्यतामनु तपस्तपस्पतिरञ्जसा सत्यमुपगेष सुविते मा धाः  
॥१०॥

अ॒ँशु॒र॒ँशु॒स्ते दे॒व सो॒मा प्या॒यता॒मिन्द्रा॒यैक॒धन॒विद् आ तु॒भ्यमिन्द्रः  
प्या॒यता॒मा त्वमिन्द्रा॒य प्या॒य॒स्वाप्या॒यय॒ सखी॑न्त्स॒न्या मे॒धया॑ स्व॒स्ति तै  
दे॒व सोम॑ सु॒त्याम॑शी॒ये ष्टा॒ रायः॑ प्रेषे॒ भगा॑य॒र्तमृ॑तवा॒दिभ्यो॑ नमो॒ दि॒वे  
नमः॑ पृथि॒व्या अ॒ग्रे व्र॑तप॒ते त्वं व्र॑तानां व्र॒तप॑तिरसि॒ या मम॑ त॒नूरे॑षा सा  
त्वयि॒ या तव॑ त॒नूरि॒यँ सा मयि॑ स॒ह नौ व्र॑तप॒ते व्र॒तिनो॑र्व्र॒तानि॒ या तै  
अ॒ग्रे रु॒द्रिया॑ त॒नूस्त॑या नः पाहि॒ तस्या॑स्ते॒ स्वाहा॒ या तै अ॒ग्रेऽया॑श॒या  
र॒जाश॑या ह॒राश॑या त॒नूर्व॑र्षि॒ष्ठा ग॒हरे॑ष्ठोऽग्रं व॒चो अ॒पाव॑धीं त्वेषं व॒चो  
अ॒पाव॑धीँँ स्वाहा ॥११॥

वि॒त्ताय॑नी मेऽसि॒ ति॒क्ताय॑नी मेऽस्य॒ व॒तान्मा॑ नाथि॒त म॑व॒तान्मा॑ व्यथि॒तं  
वि॒दे॒र॒ग्नि॑र्नभो॒ नामा॑ग्रे अ॒ङ्गि॒रो योऽस्यां॑ पृथि॒व्याम॑स्यायु॒षा नाम्ने॑हि  
यत्ते॑ऽना॒धृष्टं॑ नाम॒ यज्ञि॑यं तेन॒ त्वाद्द॒धेऽग्रे॑ अ॒ङ्गि॒रो यो द्वि॑तीयस्यां  
तृ॒तीय॑स्यां पृथि॒व्याम॑स्यायु॒षा नाम्ने॑हि यत्ते॑ऽना॒धृष्टं॑ नाम॒ यज्ञि॑यं तेन॒  
त्वाऽऽद॑धे॒ सिँँही॑रसि॒ महि॑षी॒रस्यु॒रु प्र॑थस्वो॒रु तै य॒ज्ञप॑तिः प्रथतां  
ध्रु॒वाऽसि॑ दे॒वेभ्यः॑ शु॒न्धस्व॑ दे॒वेभ्यः॑ शु॒म्भस्वे॑न्द्रघोषस्त्वा॒ वसु॑भिः  
पु॒रस्ता॑त्पातु॒ मनो॑जवास्त्वा॒ पितृ॑भिर्दक्षि॒णतः॑ पातु॒ प्रचै॑तास्त्वा॒ रुद्रैः  
प॒श्चात्पा॑तु॒ विश्व॑कर्मा॒ त्वादि॒त्यैरु॑त्तर॒तः पा॑तु॒ सिँँही॑रसि॒ सप॑त्नसा॒ही  
स्वाहा॑ सिँँही॒रसि॑ सु॒प्रजा॑वनिः॒ स्वाहा॑ सिँँही॒रसि॑ रा॒यस्पो॑ष॒वनिः  
स्वाहा॑ सिँँही॒रस्यादि॑त्य॒वनिः॑ स्वाहा॑ सिँँही॒रस्या॑ व॒ह दे॒वान्दे॒वय॑ते  
यज॑मानाय॒ स्वाहा॑ भू॒तेभ्य॑स्त्वा॒ विश्वा॑यु॒रसि॑ पृथि॒वीं दृँँह  
ध्रु॒व॒क्षि॑द॒स्यन्त॑रि॒क्षं दृँँहा॑ च्यु॒तक्षि॑द॒सि॒ दि॒वं दृँँहा॑ग्ने॒र्भस्मा॑स्य॒ग्नेः  
पु॒री॑षमसि ॥१२॥

युञ्जते मन उत युञ्जते धियो विप्रा विप्रस्य बृहतो विपश्चितः ।  
 वि होत्रा दधे वयुनाविदेक इन्मही देवस्य सवितुः परिष्टुतिः ॥  
 सुवाग्देव दुर्याँ आ वद देवश्रुतौ देवेष्वामा नो वीरो जायतां  
 कर्मण्यौ यँ सर्वेऽनुजीवाम् यो बहूनामसद्दुशी ।  
 इदं विष्णुर्वि चक्रमे त्रेधा नि दधे पदम् । समूढमस्य पाँसुर इरावती  
 धेनुमती हि भूतँ सूयवसिनी मनवे यशस्यै ।  
 व्यस्कभ्नाद्रोदसी विष्णुरिते दाधार पृथिवीमभितो मयूखैः ॥  
 प्राची प्रेतमध्वरं कल्पयन्ती ऊर्ध्वं यज्ञं नयतं मा जीह्वरत् मत्र रमेथां  
 वर्ष्मन्पृथिव्या दिवो वा विष्णावुत वा पृथिव्या महो वा विष्णावुत  
 वान्तरिक्षाद्धस्तौ पृणस्व बहुभिर्वसव्यैरा प्र यच्छ दक्षिणादोत सव्यात् ॥  
 विष्णोर्नुकं वीर्याणि प्र वौचं यः पार्थिवानि विममे रजाँसि यो  
 अस्कभायदुत्तरँ सधस्थं विचक्रमाणस्त्रेधोरुगायो विष्णो रराटमसि  
 विष्णोः पृष्ठमसि विष्णोः शन्यज्रै स्थो विष्णोः स्यूरसि विष्णोर्ध्रुवमसि  
 वैष्णवमसि विष्णावे त्वा ॥१३॥

कृणुष्व पाजः प्रसितिं न पृथ्वीं याहि राजेवामवाँ इभैन ।  
 तृष्वीमनु प्रसितिं दूणानोऽस्तासि विध्य रक्षसस्तपिष्ठैः ॥  
 तव भ्रमास आशुया पतन्त्यनु स्पृश धृषता शोशुचानः ।  
 तपूँष्यग्ने जुहा पतङ्गानसन्दितो वि सृज विष्वगुल्काः ॥  
 प्रति स्पशो वि सृज तूर्णितमो भवा पायुर्विशो अस्या अदब्धः ।  
 यो नो दूरे अघशँसो यो अन्त्यग्ने मार्किष्टे व्यथिरा दधर्षीत् ॥  
 उदग्ने तिष्ठ प्रत्या तनुष्व न्यमित्राँ ओषतात्तिग्महेते ।

यो नो अरातिँ समिधान चक्रे नीचा तं ध्वयत्सं न शुष्कम् ॥  
 ऊर्ध्वो भव प्रति विध्याध्यस्मदाविष्कृणुष्व दैव्यान्यग्ने ।  
 अवं स्थिरा तनुहि यातुजूनां जामिमजामिं प्र मृणीहि शत्रून् ॥  
 स ते जानाति सुमतिं यविष्ठ य ईवते ब्रह्मणे गातुमैरत् । विश्वान्यस्मै  
 सुदिनानि रायो द्युमन्युर्यो वि दुरो अभि द्यौत् ॥  
 सेदग्ने अस्तु सुभगः सुदानुर्यस्त्वा नित्येन हविषा य उक्थैः ।  
 पिप्रीषति स्व आयुषि दुरोणे विश्वेदस्मै सुदिना सासदिष्टिः ॥  
 अर्चामि ते सुमतिं घोष्यर्वाक्सं ते वावाता जरतामियं गीः । स्वश्वास्त्वा  
 सुरथा मर्जयेमास्मे क्षत्राणि धारयेरनु द्यून् ॥  
 इह त्वा भूर्या चरेदुप त्मन्दोषावस्तर्दीदिवाँ समनु द्यून् ।  
 क्रीडन्तस्त्वा सुमनसः सपेमाभि द्युम्ना तस्थिवाँ सो जनानाम् ॥  
 यस्त्वा स्वश्वः सुहिरण्यो अग्न उपयाति वसुमता रथेन ।  
 तस्य त्राता भवसि तस्य सखा यस्त आतिथ्यमानुषगजुजौषत् ॥  
 महो रुजामि बन्धुता वचोभिस्तन्मा पितुर्गोतमादन्वियाय ।  
 त्वं नो अस्य वचसश्चिकिद्धि होतर्यविष्ठ सुक्रतो दमूनाः ॥  
 अस्वप्रजस्तरणयः सुशेवा अतन्द्रासोऽवृका अश्रमिष्ठाः ।  
 ते पायवः सधिर्यञ्चो निषद्याग्ने तव नः पान्त्वमूर ॥  
 ये पायवो मामतेयं ते अग्ने पश्यन्तो अन्धं दुरितादरक्षन् ।  
 ररक्ष तान्सुकृतौ विश्ववेदा दिप्सन्त इद्रिपवो ना ह देभुः ॥  
 त्वया वयँ सध्न्यस्त्वोतास्तव प्रणीत्यश्याम् वाजान् ।  
 उभा शँसा सूदय सत्यतातेऽनुष्ठुया कृणुह्यहयाण ॥  
 अया ते अग्ने समिधा विधेम प्रति स्तोमँ शस्यमानं गृभाय ।  
 दहाशसौ रक्षसः पाह्यस्मान्द्रुहो निदो मित्रमहो अवृद्यात् ॥



रक्षोहणं वाजिनमा जिघर्मि मित्रं प्रतिष्ठमुप यामि शर्म ।  
 शिशानो अग्निः क्रतुभिः समिद्धः स नो दिवा स रिषः पातु नक्तम् ॥  
 वि ज्योतिषा बृहता भात्यग्निराविर्विश्वानि कृणुते महित्वा ।  
 प्रादेवीर्मायाः संहते दुरेवाः शिशीते शृङ्गे रक्षसे विनिक्षे ॥  
 उत स्वानासो दिवि षन्त्वग्नेस्तिग्मार्युधा रक्षसे हन्तवा उ ।  
 मदे चिदस्य प्र रुजन्ति भामा न वरन्ते परिबाधो अदेवीः ॥१४॥

इति प्रथमकारण्डे द्वितीयः प्रपाठकः २

अथ प्रथमकारण्डे तृतीयः प्रपाठकः ३

देवस्य त्वा सवितुः प्रसवैऽश्विनौर्बाहुभ्यां पूष्णो हस्ताभ्यामा  
 ददे ऽभ्रिरसि नारिरसि परिलिखितं रक्षः परिलिखिता अरातय इदमहं  
 रक्षसो ग्रीवा अपि कृन्तामि योऽस्मान्द्वेष्टि यं च वयं द्विष्म इदमस्य ग्रीवा  
 अपि कृन्तामि दिवे त्वा न्तरिक्षाय त्वा पृथिव्यै त्वा शुन्धतां लोकः  
 पितृषदंनो यवोऽसि यवयास्मद्वेषो यवयारातीः पितृणां  
 सदनमस्युद्विवं स्तभानान्तरिक्षं पृण पृथिवीं दृहं द्युतानस्त्वा मारुतो  
 मिनोतु मित्रावरुणयोर्ध्रुवेण धर्मणा ब्रह्मवनिं त्वा क्षत्रवनिं सुप्रजावनिं  
 रायस्पोषवनिं पर्यूहामि ब्रह्मं दृहं क्षत्रं दृहं प्रजां दृहं रायस्पोषं दृहं  
 घृतेन द्यावापृथिवी आ पृणेत्या मिन्द्रस्य सदोऽसि विश्वजनस्य च्छाया  
 परि त्वा गिर्वणो गिरं इमा भवन्तु विश्वतो वृद्धायुमनु वृद्धयो जुष्टा भवन्तु  
 जुष्टय इन्द्रस्य स्यूरसी न्द्रस्य ध्रुवमस्यै न्द्रमसीन्द्राय त्वा ॥१॥

रक्षोहणो वलगहनो वैष्णवान्खनामी दमहं तं वलगमुद्वपामि यं नः  
 समानो यमसमानो निचखानेदमैनुमधरं करोमि यो नः समानो

योऽसमानोऽरातीयति गायत्रेण च्छन्दसाऽवबाढो वलगः किमत्र भद्रं तन्नौ  
सह विराडसि सपत्नहा सम्राडसि भ्रातृव्यहा स्वराडस्यभिमातिहा  
विश्वाराडसि विश्वासां नाष्ट्राणां हन्ता रक्षोहणो वलगहनः प्रोक्षामि  
वैष्णवान्रक्षोहणो वलगहनोऽव नयामि वैष्णवान्यवोऽसि यवयास्मद्द्वेषो  
यवयाराती रक्षोहणो वलगहनोऽव स्तृणामि वैष्णवान्रक्षोहणो  
वलगहनोऽभि जुहोमि वैष्णवान्रक्षोहणो वलगहनावुप दधामि वैष्णवी  
रक्षोहणो वलगहनो पर्युहामि वैष्णवी रक्षोहणो वलगहनो परि स्तृणामि  
वैष्णवी रक्षोहणो वलगहनो वैष्णवी बृहन्नसि बृहद्ग्रावा  
बृहतीमिन्द्राय वाचं वद ॥२॥

विभूरसि प्रवाहणो वह्निरसि हव्यवाहनः श्वात्रोऽसि प्रचेता स्तुथोऽसि  
विश्ववेदा उशिर्गसि कविरङ्घारिरसि बभ्रारिरवस्युरसि  
दुर्वस्वान्छुन्ध्यूरसि मार्जालीयः सम्राडसि कृशानुः परिषद्योऽसि पवमानः  
प्रतक्वाऽसि नभस्वानसंमृष्टोऽसि हव्यसूदं ऋतधामाऽसि  
सुवर्ज्योतिर्ब्रह्मज्योतिरसि सुवर्धामाऽजोऽस्येकपादहिरसि बुध्नियो  
रौद्रेणानीकेन पाहि माग्ने पिपृहि मा मा मा हिंसीः ॥३॥

त्वँ सोम तनूकृद्ध्यो द्वेषोभ्योऽन्यकृतेभ्य उरु यन्तासि वरूथँ स्वाहा  
जुषाणो अमुराज्यस्य वेतु स्वाहाऽयं नो अग्निर्वरिवः कृणोत्वयं मृधः पुर  
एतु प्रभिन्दन् ।

अयँ शत्रूञ्जयतु जर्हषाणोऽयं वाजं जयतु वाजसातौ ॥

उरु विष्णो वि क्रमस्वोरु क्षयाय नः कृधि । घृतं घृतयोने पिबु प्रप्र  
यज्ञपतिं तिर ॥ सोमो जिगाति गातुविद्वेवानामेति निष्कृतमृतस्य

योनिमासदम दित्याः सदोऽस्य दित्याः सद आ सीदेष वो देव सवितुः  
सोमस्तं रक्षध्वं मा वो दभदे तत्त्वं सोम देवो देवानुपागा इदमहं  
मनुष्यो मनुष्यांसह प्रजया सह रायस्पोषेण नमो देवेभ्यः स्वधा पितृभ्यः  
इदमहं निर्वरुणस्य पाशात्सुवरभि वि ख्येषं वैश्वानरं ज्योति रग्रे व्रतपते  
त्वं व्रतानां व्रतपतिरसि या मम तनूस्त्वय्यभूदियं सा मयि या तव  
तनूर्मय्यभूदेषा सा त्वयि यथायथं नौ व्रतपते व्रतिनोर्व्रतानि ॥४॥

अत्यन्यानगां नान्यानुपागाम्वाक्त्वा परैरविदं पुरोऽवरै स्तं त्वा जुषे  
वैष्णवं देवयज्यायै देवस्त्वा सविता मध्वाऽनक्त्वो षधे त्रायस्वैनं  
स्वधिते मेनं हिंसी दिवमग्रेण मा लैखीरन्तरिक्षं मध्येन मा हिंसीः  
पृथिव्या सं भव वनस्पते शतवल्शो वि रोह सहस्रवल्शा वि वयं  
रुहेम यं त्वाऽयं स्वधितिस्तेतिजानः प्रणिनाय महते  
सौभगाया ऽच्छिन्नो रायः सुवीरः ॥५॥

पृथिव्यै त्वा ऽन्तरिक्षाय त्वा दिवे त्वा शुन्धतां लोकः पितृषदंनो  
यवोऽसि यवयास्मद्द्वेषो यवयारातीः पितृणां सदनमसि  
स्वावेशोऽस्यग्रेगा नैतृणां वनस्पतिरधि त्वा स्थास्यति तस्य  
वित्ता देवस्त्वा सविता मध्वाऽनक्तु सुपिप्पलाभ्यस्त्वौषधीभ्य उद्विं  
स्तभानान्तरिक्षं पृण पृथिवीमुपेण दृह ते ते धामान्युश्मसी गमध्ये  
गावो यत्र भूरिशृङ्गा अयासः ।

अत्राह तदुरुगायस्य विष्णोः परमं पदमव भाति भूरैः ॥

विष्णोः कर्माणि पश्यत यतो व्रतानि पस्पशे । इन्द्रस्य युज्यः सर्वा ॥  
तद्विष्णोः परमं पदं सदा पश्यन्ति सूरयः । दिवीव चक्षुराततम् ॥

ब्रह्मवनिं त्वा क्षत्रवनिं सुप्रजावनिं रायस्पोषवनिं पर्यूहामि  
ब्रह्म दृहं क्षत्रं दृहं प्रजां दृहं रायस्पोषं दृहं परिवीरसि परि त्वा  
दैवीर्विशौ व्ययन्तां परीमं रायस्पोषो यजमानं मनुष्या अन्तरिक्षस्य त्वा  
सानावव गूहामि ॥६॥

इषे त्वो पवीरस्यु पो देवान्दैवीर्विशः प्रागुर्वह्नीरुशिजो बृहस्पते धारया  
वसूनि हव्या ते स्वदन्तां देव त्वष्टर्वसु रगव रेवती  
रमध्वम् ग्रेर्जनित्रमसि वृषणौ स्थ उर्वश्यस्या युरसि पुरुरवा घृतेनाक्ते  
वृषणं दधाथां गायत्रं छन्दोऽनु प्र जायस्व त्रैष्टुभं जागृतं छन्दोऽनु प्र  
जायस्व भवतं नः समनसौ समौकसावरेपसौ ।  
मा यज्ञं हिंसिष्टं मा यज्ञपतिं जातवेदसौ शिवौ भवतमद्य नः ॥  
अग्नावग्निश्चरति प्रविष्ट ऋषीणां पुत्रो अधिराज एषः ।  
स्वाहाकृत्य ब्रह्मणा ते जुहोमि मा देवानां मिथुया कर्भाग्धेयम् ॥७॥

आ दद ऋतस्य त्वा देवहविः पाशेना रभे धर्षा मानुषान् द्यस्त्वौषधीभ्यः  
प्रोक्षाम्य पां पेरुरसि स्वात्तं चित्सदैवं हव्यमापौ देवीः स्वदतैनं सं ते  
प्राणो वायुना गच्छतां सं यजत्रैरङ्गानि सं यज्ञपतिराशिषा घृतेनाक्तौ  
पशुं त्रायेथां रेवतीर्यज्ञपतिं प्रियधा विशतो रौ अन्तरिक्ष सजूर्देवेन  
वातेनाऽस्य हविषस्त्मना यज्ञ समस्य तनुवा भव वर्षीयो वर्षीयसि यज्ञे  
यज्ञपतिं धाः पृथिव्याः सम्पृचः पाहि नमस्त आताना नुवा प्रेहि घृतस्य  
कुल्यामनु सह प्रजया सह रायस्पोषेणा पौ देवीः शुद्धायुवः शुद्धा यूयं  
देवा ऊर्द्वं शुद्धा वयं परिविष्टाः परिवेष्टारौ वो भूयास्म ॥८॥

वाक्त् आ प्यायतां प्राणस्त आ प्यायतां चक्षुस्त आ प्यायतां श्रोत्रं त  
 आ प्यायतां या तै प्राणाञ्छुग्जगाम या चक्षुर्या श्रोत्रं यत्तै क्रूरं यदास्थितं  
 तत् आ प्यायतां तत् एतेन शुन्धतां नाभिस्त आ प्यायतां पायुस्त आ  
 प्यायतां शुद्धाश्चरित्राः शमद्भ्यः शमोषधीभ्यः शं पृथिव्यै  
 शमहोभ्या मोषधे त्रायस्वैनं स्वधिते मैनं हिंसी रक्षसां  
 भागौऽसीद महं रक्षौऽधमं तमौ नयामि यौऽस्मान्द्वेष्टि यं च वयं द्विष्म  
 इदमैनमधमं तमौ नयामी षे त्वा घृतेन द्यावापृथिवी प्रोणर्वाथाम च्छिन्नो  
 रायः सुवीर उर्वन्तरिक्षमन्विहि वायो वीहिं स्तोकानां स्वाहोर्ध्वनभसं  
 मारुतं गच्छतम् ॥६॥

सं ते मनसा मनः सं प्राणेन प्राणो जुष्टं देवेभ्यो हव्यं घृतवत्स्वाहैन्द्रः  
 प्राणो अङ्गैः अङ्गे नि दैध्यदैन्द्रोऽपानो अङ्गैः अङ्गे वि बोभुवद्देव त्वष्टर्भूरि ते  
 संसमेतु विषुरुपा यत्सलक्ष्माणो भवथ देवत्रा यन्तमवसे सखायोऽनु  
 त्वा माता पितरौ मदन्तु श्रीरस्यग्निस्त्वा श्रीणात्वापः समरिणन्वार्तस्य  
 त्वा ध्रज्यै पूष्णो रं ह्या अपामोषधीनां रोहिष्यै घृतं घृतपावानः पिबत  
 वसां वसापावानः पिबतान्तरिक्षस्य हविरसि स्वाहा त्वान्तरिक्षाय दिशः  
 प्रदिश आदिशो विदिश उद्दिशः स्वाहा दिग्भ्यो नमो दिग्भ्यः ॥१०॥

समुद्रं गच्छ स्वाहा न्तरिक्षं गच्छ स्वाहा देव संवितारं गच्छ  
 स्वाहा होरात्रे गच्छ स्वाहा मित्रावरुणौ गच्छ स्वाहा सोमं गच्छ स्वाहा  
 यज्ञं गच्छ स्वाहा छन्दांसि गच्छ स्वाहा द्यावापृथिवी गच्छ स्वाहा  
 नभौ दिव्यं गच्छ स्वाहा ग्निं वैश्वानरं गच्छ स्वाहा द्यस्त्वोषधीभ्यो  
 मनो मे हार्दि यच्छ तनू त्वचं पुत्रं नप्तारमशीय शुगसि तमभि शौच

योऽस्मान्द्वेष्टि यं च वयं द्विष्मो धाम्नो धाम्नो राजन्नितो वरुण नो मुञ्च  
यदापो अघ्निया वरुणेति शर्षामहे ततो वरुण नो मुञ्च ॥११॥

हविष्मतीरिमा आपौ हविष्मान्देवो अर्ध्वरो हविष्माँ आ विवासति  
हविष्माँ अस्तु सूर्यः ॥

अग्नेर्वोऽपन्नगृहस्य सदसि सादयामि सुम्राय सुमिनीः सुम्रे मां  
धत्ते न्द्राघ्नियोर्भागधेयीः स्थ मित्रावरुणयोर्भागधेयीः स्थ विश्वेषां देवानां  
भागधेयीः स्थ यज्ञे जागृत ॥१२॥

हृदे त्वा मनसे त्वा दिवे त्वा सूर्याय त्वोर्ध्वमिममर्ध्वरं कृधि दिवि  
देवेषु होत्रा यच्छ सोमं राजन्नेह्यव रोह मा भेर्मा सं विक्था मा त्वा  
हिँसिषं प्रजास्त्वमुपावरोह प्रजास्त्वामुपावरोहन्तु शृणोत्वग्निः समिधा  
हवं मे शृणवन्त्वापौ धिषणाश्च देवीः ।

शृणोत ग्रावाणो विदुषो नु यज्ञँ शृणोतु देवः सविता हवं मे ।  
देवीरापो अपां नपाद्य ऊर्मिर्हविष्य इन्द्रियावान्मदिन्तमस्तं देवेभ्यो देवत्रा  
धत्त शुक्रँ शुक्रपेभ्यो येषां भागः स्थ स्वाहा कार्षिरस्यपापां मृध्रँ  
समुद्रस्य वोक्षित्या उन्नये ।

यमग्ने पृत्सु मर्त्यमावो वाजेषु यं जुनाः । स यन्ता शश्वतीरिषः ॥१३॥

त्वमग्ने रुद्रो असुरो महो दिवस्त्वँ शर्धो मारुतं पृक्ष ईशिषे ।  
त्वं वातैररुणैर्यासि शङ्गयस्त्वं पूषा विधतः पांसि नु त्मना ॥  
आ वो राजानमध्वरस्य रुद्रँ होतारँ सत्ययज्ञँ रोदस्योः ।  
अग्निं पुरा तेनयितोरचित्ताद्धिरणयरूपमवसे कृणुध्वम् ॥

अग्निर्होता नि षसादा यर्जीयानुपस्थै मातुः सुरभावं लोके ।  
 युवा कविः पुरुनिष्ठ ऋतावा धर्ता कृष्टीनामुत मध्य इद्धः ॥  
 साध्वीमर्कदेववीतिं नो अद्य यज्ञस्य जिह्वामविदाम् गुह्याम् ।  
 स आयुरागात्सुरभिर्वसानो भद्रामर्कदेवहूतिं नो अद्य ॥  
 अक्रन्ददग्निः स्तनयन्निव द्यौः क्षामा रेरिहद्वीरुधः समञ्जन् ।  
 सद्यो जज्ञानो वि हीमिद्धो अख्यदा रोदसी भानुना भात्यन्तः ॥  
 त्वे वसूनि पुर्वणीक होतर्दोषा वस्तोरेरिरे यज्ञियासः ।  
 क्षामैव विश्वा भुवनानि यस्मिन्त्सँ सौभगानि दधिरे पावके ॥  
 तुभ्यं ता अङ्गिरस्तम् विश्वाः सुक्षितयः पृथक् । अग्ने कामाय येमिरे ॥  
 अश्याम् तं काममग्ने तवोत्यश्याम् रयिँ रयिवः सुवीरम् ।  
 अश्याम् वाजम्भि वाजयन्तोऽश्याम् द्युम्रमजराजरं ते ॥  
 श्रेष्ठं यविष्ठ भारताग्ने द्युमन्तमा भर । वसो पुरुस्पृहँँ रयिम् ॥  
 स श्वितानस्तन्यतू रोचनस्था अजरैभिर्नानदद्भिर्यविष्ठः ।  
 यः पावकः पुरुतमः पुरुणि पृथून्यग्निरनुयाति भवन् ॥  
 आयुष्टे विश्वतो दधद्यमग्निर्वरेणयः ।  
 पुनस्ते प्राण आयति परा यक्ष्मँँ सुवामि ते ॥  
 आयुर्दा अग्ने हविषो जुषाणो घृतप्रतीको घृतयौनिरेधि ।  
 घृतं पीत्वा मधु चारु गव्यं पितेव पुत्रम्भि रक्षतादिमम् ॥  
 तस्मै ते प्रतिहर्यते जातवेदो विचर्षणे । अग्ने जनामि सुष्टुतिम् ॥  
 दिवस्परि प्रथमं जज्ञे अग्निरस्मदिद्धतीयं परि जातवेदाः ।  
 तृतीयमप्सु नृमणा अजस्रमिन्धान एनं जरते स्वाधीः ॥  
 शुचिः पावक वन्द्योऽग्ने बृहद्वि रोचसे । त्वं घृतेभिराहुतः ॥  
 दृशानो रुक्म उर्व्या व्यद्यौहुर्मर्षमायुः श्रिये रुचानः ।

अग्निर्मृतौ अभवद्वयोभिः यदेनं द्यौरजनयत्सुरेताः ॥  
 आ यदिषे नृपतिं तेज आनट् छुचि रेतो निषिक्तं द्यौरभीकै ।  
 अग्निः शर्धमनवद्यं युवानं स्वाधियं जनयत्सूदयञ्च ॥  
 स तेजीयसा मनसा त्वोत उत शिञ्ज स्वपत्यस्य शिञ्जोः ।  
 अग्ने रायो नृतमस्य प्रभूतौ भूयाम ते सुष्टुतयश्च वस्वः ॥  
 अग्ने सहन्तमा भर द्युमस्य प्रासहा रयिम् ।  
 विश्वा यश्चर्षणीरभ्यासा वाजेषु सासहत् ॥  
 तमग्ने पृतनासहं रयिं सहस्व आ भर ।  
 त्वं हि सत्यो अद्भुतो दाता वाजस्य गोमतः ॥  
 उक्षान्नाय वशान्नाय सोमपृष्ठाय वेधसै । स्तोमैर्विधेमाग्रयै ॥  
 वद्या हि सूनो अस्यद्यसद्वा चक्रे अग्निर्जनुषाज्मानम् । स त्वं न ऊर्जसन  
 ऊर्जं धा राजैव जेरवृके क्षैष्यन्तः ॥  
 अग्र आयूँषि पवसु आ सुवोर्जमिषं च नः । आरे बाधस्व दुच्छुनाम् ॥  
 अग्ने पवस्व स्वपा अस्मे वर्चः सुवीर्यम् । दधत्पोषं रयिं मयि ॥  
 अग्ने पावक रोचिषा मन्द्रया देव जिह्वया । आ देवान्वद्वि यक्षि च ॥  
 स नः पावक दीदिवोऽग्ने देवाँ इहा वह । उप यज्ञं हविश्च नः ॥  
 अग्निः शुचिर्व्रततमः शुचिर्विप्रः शुचिः कविः । शुची रोचत आहतः ॥  
 उदग्ने शुचयस्तव शुक्रा भ्राजन्त ईरते । तव ज्योतीँष्यर्चयः ॥१४॥

इति प्रथमकारण्डे तृतीयः प्रपाठकः ३

अथ प्रथमकारण्डे चतुर्थः प्रपाठकः ४

आ ददे गावांस्यध्वरकृद्देवेभ्यो गम्भीरमिममध्वरं कृद्ध्युत्तमेन पविनेन्द्राय  
 सोमं सुषुतम्मधुमन्तम्पर्यस्वन्तं वृष्टिवनिमिन्द्राय त्वा वृत्रघ्न इन्द्राय



त्वा वृत्रतुर इन्द्राय त्वाभिमातिघ्न इन्द्राय त्वादित्यवत इन्द्राय त्वा  
 विश्वदैव्यावते श्वात्राः स्थं वृत्रतुरो राधौगूर्ता अमृतस्य पत्नीस्ता  
 देवीर्देवत्रेमं यज्ञं धत्तोपहृताः सोमस्य पिबतोपहृतो युष्माकँ सोमः  
 पिबतु यत्ते सोम दिवि ज्योतिर्यत्पृथिव्यां यदुरावन्तरिक्षे तेनास्मै  
 यजमानायोरु राया कृध्यधि दात्रे वोचो धिषणे वीडू सती वीडयेथामूर्जं  
 दधाथामूर्जमे धत्तं मा वाँ हिँसिषम्मा मा  
 हिँसिष्टम्प्रागपागुदगधराक्तास्त्वा दिश आ धावन्त्वम्बु नि ष्वर ।  
 यत्ते सोमादाभ्यं नाम जागृवि तस्मै ते सोम सोमाय स्वाहा ॥१॥

वाचस्पतये पवस्व वाजिन्वृषा वृष्णो अँशुभ्यां गर्भस्तिपूतो देवो  
 देवानाम्पवित्रमसि येषां भागोऽसि तेभ्यस्त्वा स्वांकृतोऽसि मधुमतीर्न  
 इषस्कृधि विश्वेभ्यस्त्वेन्द्रियेभ्यो दिव्येभ्यः पार्थिवेभ्यो  
 मनस्त्वाष्ट्रं वन्तरिक्षमन्विहि स्वाहा त्वा सुभवः सूर्याय देवेभ्यस्त्वा  
 मरीचिपेभ्य एष ते योनिः प्राणाय त्वा ॥२॥

उपयामगृहीतोऽस्यन्तर्यच्छ मघवन्प्राहि सोममुरुष्य रायः समिषो  
 यजस्वान्तस्ते दधामि द्यावापृथिवी अन्तरुर्वन्तरिक्षँ सजोषा देवैरवरैः  
 परैश्चान्तर्यामे मघवन्मादयस्व स्वांकृतोऽसि मधुमतीर्न इषस्कृधि  
 विश्वेभ्यस्त्वेन्द्रियेभ्यो दिव्येभ्यः पार्थिवेभ्यो मनस्त्वाष्ट्रं वन्तरिक्षमन्विहि  
 स्वाहा त्वा सुभवः सूर्याय देवेभ्यस्त्वा मरीचिपेभ्य एष ते योनिरपानाय  
 त्वा ॥३॥

आ वायो भूष शुचिपा उप नः सहस्रं ते नियुतो विश्ववार । उपो ते

अ॒न्धो म॒द्यम॒यामि॒ यस्य॑ दे॒व दधि॑षे पू॒र्व॒पेय॑म् ॥

उ॒प॒या॒म॒गृ॒ही॒तोऽसि॑ वा॒यवे॒ त्वेन्द्र॑वायू इ॒मे सु॒ताः । उ॒प॒ प्र॒यो॒भिरा॑  
ग॒त॒मि॒न्द॒वो वा॒मु॒श॒न्ति॒ हि ।

उ॒प॒या॒म॒गृ॒ही॒तोऽसी॑न्द्रवा॒यु॒भ्यां त्वै॒ष ते॒ यो॒निः स॒जोषा॑भ्यां त्वा ॥४॥

अ॒यं वां मि॒त्रा॒वरु॑णा सु॒तः सोम॑ ऋ॒तावृ॑धा । म॒मेदि॑ह श्रु॒तं ह॒वम् ॥

उ॒प॒या॒म॒गृ॒ही॒तोऽसि॑ मि॒त्रा॒वरु॑णा॒भ्यां त्वै॒ष ते॒ यो॒निर्ऋ॑ता॒यु॒भ्यां त्वा ॥५॥

या वां क॒शा म॒धु॒म॒त्यश्वि॑ना सू॒नृता॑वती । त॒या य॒ज्ञ॒मि॒मि॒क्षत॑म् ॥

उ॒प॒या॒म॒गृ॒ही॒तोऽस्य॑श्चि॒भ्यां त्वै॒ष ते॒ यो॒निर्मा॑ध्वी॒भ्यां त्वा ॥६॥

प्रा॒तर्यु॑जौ वि मु॒च्येथा॑मश्चि॒ना॒वेह॑ गच्छ॒तम् । अस्य॑ सोम॒स्य पी॒तये॑ ॥

उ॒प॒या॒म॒गृ॒ही॒तोऽस्य॑श्चि॒भ्यां त्वै॒ष ते॒ यो॒निर्श्चि॑भ्यां त्वा ॥७॥

अ॒यं वे॒नश्चौ॑द॒य॒त्पृ॒श्नि॑ग॒र्भा ज्यो॑तिर्ज॒रायू॑ रज॒सो वि॒माने॑ । इ॒म॒म॒पां॑

सं॒ग॒मे सू॒र्य॑स्य॒ शिशुं॑ न वि॒प्रा म॒ति॒भी रि॑हन्ति ॥

उ॒प॒या॒म॒गृ॒ही॒तोऽसि॑ श॒र॒डा॒य त्वै॒ष ते॒ यो॒निर्वी॑रता॒म्पा॒हि ॥८॥

त॒म्र॒त्तथा॑ पू॒र्वथा॑ वि॒श्वथे॑मथा ज्येष्ठ॒ताति॑म्बर्हि॒षदं॑ सु॒व॒र्वि॒दं प्र॒तीची॑नं

वृ॒जनं॑ दो॒हसे॑ गि॒राशुं॑ ज॒यन्त॑म॒नु या॒सु वर्ध॑से ॥

उ॒प॒या॒म॒गृ॒ही॒तोऽसि॑ म॒र्का॒य त्वै॒ष ते॒ यो॒निः प्र॒जाः पा॑हि ॥९॥

ये दे॒वा दि॒व्येका॑द॒श स्थ॑ पृथि॒व्याम॑ध्येका॒द॒श स्था॑प्सुष॒दो महि॑नैका॒द॒श

स्थ ते देवा यज्ञमिमं जुषध्वमुपयामगृहीतोऽस्याग्रयणोऽसि स्वाग्रयणो  
जिन्व यज्ञं जिन्व यज्ञपतिमभि सर्वना पाहि विष्णुस्त्वाम्पातु विशं  
त्वम्पाहीन्द्रियेणैष ते योनिर्विश्वेभ्यस्त्वा देवेभ्यः ॥१०॥

त्रिंशत्त्रयंश्च गणिनो रुजन्तो दिवं रुद्राः पृथिवीं च सचन्ते ।  
एकादशासौ अप्सुषदः सुतं सोमं जुषन्तां सर्वनाय विश्वे ॥  
उपयामगृहीतोऽस्याग्रयणोऽसि स्वाग्रयणो जिन्व यज्ञं जिन्व यज्ञपतिमभि  
सर्वना पाहि विष्णुस्त्वाम्पातु विशं त्वं पाहीन्द्रियेणैष ते  
योनिर्विश्वेभ्यस्त्वा देवेभ्यः ॥११॥

उपयामगृहीतोऽसीन्द्राय त्वा बृहद्वते वयस्वत उक्थायुवे यत्त इन्द्र  
बृहद्वयस्तस्मै त्वा विष्णावे त्वैष ते योनिरिन्द्राय त्वोक्थायुवै ॥१२॥

मूर्धानं दिवो अरतिमृथिव्या वैश्वानरमृताय जातमग्निम् । क्विं  
सम्राजमतिथिं जनानामासन्ना पात्रं जनयन्त देवाः ॥  
उपयामगृहीतोऽस्यग्रयै त्वा वैश्वानराय ध्रुवोऽसि ध्रुवक्षितिर्ध्रुवाणां  
ध्रुवतमोऽच्युतानामच्युतक्षित्तम एष ते योनिरग्रयै त्वा वैश्वानराय ॥१३॥

मधुश्च माधवश्च शुक्रश्च शुचिश्च नभश्च नभस्यश्चो षश्चो र्जश्च सहश्च  
सहस्यश्च तपश्च तपस्यश्चोपयामगृहीतोऽसि संपोऽस्य हस्पत्याय त्वा  
॥१४॥

इन्द्राग्नी आ गतं सुतं गीर्भिर्नभो वरैरयम् । अस्य पातं धियेषिता ॥

उ॒प॒या॒म॒गृ॒ही॒तोऽ॒सी॒न्द्रा॒ग्नि॒भ्यां॑ त्वै॒ष ते॒ यो॒नि॒रि॒न्द्रा॒ग्नि॒भ्यां॑ त्वा ॥१५॥

ओ॒मा॒सश्च॑र्षणीधृतो विश्वे देवासु आ गत । दा॒श्वाँ॑सो दा॒शु॒षः सु॒तम् ॥  
उ॒प॒या॒म॒गृ॒ही॒तोऽ॒सि विश्वे॑भ्यस्त्वा दे॒वेभ्य॑ ए॒ष ते॒ यो॒नि॒र्विश्वे॑भ्यस्त्वा  
दे॒वेभ्यः॑ ॥१६॥

म॒रु॒त्वन्तं॑ वृषभं वावृ॒धान॑मक॒वारिं॑ दि॒व्यँ॑ शा॒समि॒न्द्रम् ।  
वि॒श्वासा॑ह॒मव॑से नू॒तना॑योऽग्रँ॑ स॒होदा॑मि॒ह तँ॑ हु॒वेम ॥  
उ॒प॒या॒म॒गृ॒ही॒तोऽ॒सी॒न्द्राय॑ त्वा म॒रु॒त्वत॑ ए॒ष ते॒ यो॒नि॒रि॒न्द्राय॑ त्वा म॒रु॒त्वते॑  
॥१७॥

इ॒न्द्रं म॒रु॒त्व इ॒ह पा॑हि॒ सोमं॑ यथा॒ शाय॑ति अ॒पिबः॑ सु॒तस्य॑ । तव॑ प्र॒णीती॑  
तव॑ शू॒र श॑र्म॒न्ना वि॑वासन्ति क॒वयः॑ सु॒य॒ज्ञाः ॥  
उ॒प॒या॒म॒गृ॒ही॒तोऽ॒सी॒न्द्राय॑ त्वा म॒रु॒त्वत॑ ए॒ष ते॒ यो॒नि॒रि॒न्द्राय॑ त्वा म॒रु॒त्वते॑  
॥१८॥

म॒रु॒त्वाँ॑ इ॒न्द्र वृ॒षभो॑ र॒णाय॑ पि॒त्रा सोम॑मनु॒ष्वध॑म्मदाय । आ सिञ्च॑स्व  
ज॒ठरे॑ म॒ध्वं ऊ॒र्मि त्वँ॑ रा॒जासि॑ प्र॒दिवः॑ सु॒ताना॑म् ॥  
उ॒प॒या॒म॒गृ॒ही॒तोऽ॒सी॒न्द्राय॑ त्वा म॒रु॒त्वत॑ ए॒ष ते॒ यो॒नि॒रि॒न्द्राय॑ त्वा म॒रु॒त्वते॑  
॥१९॥

म॒हाँ॑ इ॒न्द्रो य॑ ओ॒जसा॑ प॒र्जन्यो॑ वृ॒ष्टिमाँ॑ इ॒व । स्तोमै॑र्व॒त्सस्य॑ वावृ॒धे  
॥

उपयामगृहीतोऽसि महेन्द्राय त्वेष ते योनिर्महेन्द्राय त्वा ॥२०॥

महाँ इन्द्रो नृवदा चर्षणिप्रा उत द्विबर्हा अमिनः स सहैभिः ।  
अस्मद्रियग्वावृधे वीर्यायोऽरुः पृथुः सुकृतः कर्तृभिर्भूत् ॥  
उपयामगृहीतोऽसि महेन्द्राय त्वेष ते योनिर्महेन्द्राय त्वा ॥२१॥

कदा चन स्तरीरसि नेन्द्रं सश्चसि दाशुषे । उपोपेनु मघवन्भूय इनु ते  
दानं देवस्य पृच्यते ॥

उपयामगृहीतोऽस्यादित्येभ्यस्त्वा कदा चन प्र युच्छस्युभे नि पासि  
जन्मनी । तुरीयादित्य सर्वनं त इन्द्रियमा तस्थावमृतं दिवि ॥  
यज्ञो देवानाम्प्रत्यैति सुम्रमादित्यासो भवता मृडयन्तः । आ वोर्वाची  
सुमतिर्वृत्यादँहोश्चिद्या वरिवोवित्तरासत् ॥  
विवस्व आदित्येष ते सोमपीथस्तेन मन्दस्व तेन तृप्य तृप्यास्म ते वयं  
तर्पयितारो या दिव्या वृष्टिस्तया त्वा श्रीणामि ॥२२॥

वाममद्य सवितर्वाममु श्वो दिवेदिवे वाममस्मभ्यँ सावीः । वामस्य  
हि क्षयस्य देव भूरैया धिया वामभाजः स्याम ॥  
उपयामगृहीतोऽसि देवाय त्वा सवित्रे ॥२३॥

अदब्धेभिः सवितः पायुभिष्ट्वँ शिवेभिरद्य परि पाहि नो गयम् ।  
हिरण्यजिह्वः सुविताय नव्यसे रक्षा माकिर्नो अघशँस ईशत ॥  
उपयामगृहीतोऽसि देवाय त्वा सवित्रे ॥२४॥

हिरण्यपाणिमूतयै सवितारमुप ह्वये । स चेत्ता देवता पदम् ॥  
उपयामगृहीतोऽसि देवाय त्वा सवित्रे ॥२५॥

सुशर्मासि सुप्रतिष्ठानो बृहदुक्ते नम एष ते योनिर्विश्वेभ्यस्त्वा देवेभ्यः  
॥२६॥

बृहस्पतिसुतस्य त इन्दो इन्द्रियावतः पत्नीवन्तं ग्रहं गृह्णाम्य ग्रा३इ  
पत्नीवा३ः सजूर्देवेन त्वष्ट्रा सोमम्पिब स्वाहा ॥२७॥

हरिरसि हारियोजनो हर्योः स्थाता वज्रस्य भर्ता पृश्नेः प्रेता तस्य ते देव  
सोमेष्टयजुषेः स्तुतस्तोमस्य शस्तोक्थस्य हरिवन्तं ग्रहं गृह्णामि हरीः स्थ  
हर्योर्धानाः सह सोमा इन्द्राय स्वाहा ॥२८॥

अग्र आयूँषि पवस आ सुवोर्जमिषं च नः । आरे बाधस्व दुच्छुनाम्  
उपयामगृहीतोऽस्यग्रयै त्वा तेजस्वत एष ते योनिरग्रयै त्वा तेजस्वते  
॥२९॥

उत्तिष्ठन्नोजसा सह पीत्वा शिप्रे अवेपयः । सोममिन्द्र चमू सुतम् ॥  
उपयामगृहीतोऽसिन्द्राय त्वौजस्वत एष ते योनिरिन्द्राय त्वौजस्वते  
॥३०॥

तरणिविश्वदर्शतो ज्योतिष्कृदसि सूर्य । विश्वमा भासि रोचनम् ॥  
उपयामगृहीतोऽसि सूर्याय त्वा भ्राजस्वत एष ते योनिः सूर्याय त्वा

भ्राजस्वते ॥३१॥

आ प्यायस्व मदिन्तम् सोम् विश्वाभिरुतिभिः । भवा नः सुप्रथस्तमः  
॥३२॥

ईयुष्टे ये पूर्वतरामपश्यन्व्युच्छन्तीमुषसम्मर्त्यासः । अस्माभिरु नु  
प्रतिचक्ष्याभूदो ते यन्ति ये अपरीषु पश्यान् ॥३३॥

ज्योतिष्मतीं त्वा सादयामि ज्योतिष्कृतं त्वा सादयामि ज्योतिर्विदं त्वा  
सादयामि भास्वतीं त्वा सादयामि ज्वलन्तीं त्वा सादयामि  
मल्मलाभवन्तीं त्वा सादयामि दीप्यमानां त्वा सादयामि रोचमानां त्वा  
सादयाम्यजस्रां त्वा सादयामि बृहज्ज्यौतिषं त्वा सादयामि बोधयन्तीं  
त्वा सादयामि जाग्रतीं त्वा सादयामि ॥३४॥

प्रयासाय स्वाहायासाय स्वाहा वियासाय स्वाहा संयासाय  
स्वाहो द्यासाय स्वाहावयासाय स्वाहा शुचे स्वाहा शोकाय स्वाहा  
तप्यत्वै स्वाहा तपते स्वाहा ब्रह्महत्यायै स्वाहा सर्वस्मै स्वाहा ॥३५॥

चित्तं संतानेन भवं यक्ना रुद्रं तनिम्ना पशुपतिं स्थूलहृदयेनाग्निं  
हृदयेन रुद्रं लोहितेन शर्वम्मर्तस्राभ्याम्महादेवमन्तःपार्श्वेनौषिष्टहनं  
शिङ्गीनिक्रोश्याभ्याम् ॥३६॥

आ तिष्ठ वृत्रहन्त्रथं युक्ता ते ब्रह्मणा हरी । अर्वाचीनं सु ते मनो ग्रावा

कृणोतु वृमुना ॥

उपयामगृहीतोऽसीन्द्राय त्वा षोडशिन एष ते योनिरिन्द्राय त्वा षोडशिनै  
॥ ३७ ॥

इन्द्रमिद्धरी वहतोऽप्रतिधृष्टशवसु मृषीणां च स्तुतीरुप यज्ञं च  
मानुषाणाम् ॥

उपयामगृहीतोऽसीन्द्राय त्वा षोडशिन एष ते योनिरिन्द्राय त्वा षोडशिनै  
॥ ३८ ॥

असावि सोम इन्द्र ते शविष्ठ धृष्णावा गहि । आ त्वा पृणक्त्वन्द्रियं  
रजः सूर्यं न रश्मिभिः ॥

उपयामगृहीतोऽसीन्द्राय त्वा षोडशिन एष ते योनिरिन्द्राय त्वा षोडशिनै  
॥ ३९ ॥

सर्वस्य प्रतिशीवरी भूमिस्त्वोपस्थ आर्धित । स्योनास्मै सुषदा भव  
यच्छास्मै शर्म सप्रथाः ॥

उपयामगृहीतोऽसीन्द्राय त्वा षोडशिन एष ते योनिरिन्द्राय त्वा षोडशिनै  
॥ ४० ॥

महाँ इन्द्रो वज्रबाहुः षोडशी शर्म यच्छतु । स्वस्ति नो मघवा करोतु  
हन्तु पाप्मानं योऽस्मान्द्वेष्टि ॥

उपयामगृहीतोऽसीन्द्राय त्वा षोडशिन एष ते योनिरिन्द्राय त्वा षोडशिनै  
॥ ४१ ॥



सृजोषा इन्द्र सगणो मरुद्भिः सोमम्पिब वृत्रहञ्छूर विद्वान् । जृहि  
 शत्रूँरप मृधो नुदस्वाथाभयं कृणुहि विश्वतो नः ॥  
 उपयामगृहीतोऽसीन्द्राय त्वा षोडशिन एष ते योनिरिन्द्राय त्वा षोडशिनै  
 ॥४२॥

उदु त्यं जातवेदसं देवं वहन्ति केतवः । दृशे विश्वायु सूर्यम् ॥  
 चित्रं देवानामुदगादनीकं चक्षुर्मित्रस्य वरुणस्याग्नेः । आऽप्रा  
 द्यावापृथिवी अन्तरिक्षं सूर्य आत्मा जगतस्तस्थुषश्च ॥  
 अग्ने नय सुपथा राये अस्मान्विश्वानि देव वयुनानि विद्वान् ।  
 युयोध्यस्मञ्जुहुराणमेनो भूयिष्ठां ते नमउक्तिं विधेम ॥  
 दिवं गच्छ सुवः पत रूपेण वो रूपमभ्यैमि वयसा वयः ।  
 तुथो वो विश्ववेदा वि भजतु वर्षिष्ठे अधि नाके ।  
 एतत्तै अग्ने राध ऐति सोमच्युतं तन्मित्रस्य पथा नयर्तस्य पथा प्रेतं  
 चन्द्रदक्षिणा यज्ञस्य पथा सुविता नयन्ती ब्राह्मणमद्य  
 राध्यासमृषिमार्षेयम्पितृमन्तम्यैतृमृत्यं सुधातुदक्षिणं वि सुवः पश्य  
 व्यन्तरिक्षं यतस्व सदस्यैरस्मद्वात्रा देवत्रा गच्छत मधुमतीः प्रदातारमा  
 विश्तानवहायास्मान्देवयानेन पथेत सुकृतां लोके सीदत तन्नः  
 सँस्कृतम् ॥४३॥

धाता रातिः सवितेदं जुषन्ताम्प्रजापतिर्निधिपतिर्नो अग्निः । त्वष्टा विष्णुः  
 प्रजया सँरराणो यजमानाय द्रविणं दधातु ॥  
 समिन्द्रणो मनसा नेषि गोभिः सँ सूरिभिर्मघवन्त्सँ स्वस्त्या ।

सम्ब्रह्मणा देवकृतं यदस्ति सं देवानां सुमत्या यज्ञियानाम् ॥  
सं वर्चसा पयसा सं तनूभिरगन्महि मनसा सशिवेन । त्वष्टा नो अत्र  
वरिवः कृणोत्वनुं मार्ष्टुं तनुवो यद्विलिष्टम् ॥  
यद्य त्वां प्रयति यज्ञे अस्मिन्नग्ने होतारमवृणीमहीह ।  
ऋधंगयाड्धंगुताशमिष्ठाः प्रजानन्यज्ञमुप याहि विद्वान् ॥  
स्वगा वो देवाः सदनमकर्म य आजग्म सर्वनेदं जुषाणाः ।  
जद्धिवांसः पपिवांसश्च विश्वेऽस्मे धत्त वसवो वसूनि ॥  
यानावह उशतो देव देवान्ताम्रेयु स्वे अग्ने सुधस्थे । वहमाना  
भरमाणा हवींषि वसुं घर्मं दिवमा तिष्ठतानुं ॥  
यज्ञं यज्ञं गच्छ यज्ञपतिं गच्छ स्वां योनिं गच्छ स्वाहैष ते यज्ञो यज्ञपते  
सहसूक्तवाकः सुवीरः स्वाहा देवां गातुविदो गातुं वित्त्वा गातुमित्  
मनसस्पत इमं नो देव देवेषु यज्ञं स्वाहा वाचि स्वाहा वातै धा :  
॥४४॥

उरुं हि राजा वरुणश्चकार सूर्याय पन्थामन्वेतवा उं । अपदे पादा  
प्रतिधातवेऽकरुतापवक्ता हृदयाविधश्चित् ॥  
शतं ते राजन्भिषजः सहस्रमुर्वी गम्भीरा सुमतिष्ठे अस्तु । बाधस्व द्वेषो  
निर्ऋतिम्पराचैः कृतं चिदेनः प्र मुमुग्ध्यस्मत् ॥  
अभिष्टितो वरुणस्य पाशोऽग्नेरनीकमुप आ विवेश । अपां  
नपात्प्रतिरक्षन्नसुर्यं दमेदमे समिधं यद्यग्ने । प्रति ते जिह्वा  
घृतमुच्चरयेत्समुद्रे ते हृदयमप्स्वन्तः । सं त्वां विशन्त्वोषधीरुतापो  
यज्ञस्य त्वा यज्ञपते हविर्भिः । सूक्तवाके नमोवाके विधेमा वभृथ  
निचङ्कुण निचेरुरसि निचङ्कुणाव देवैर्देवकृतमेनोऽयाडव

मर्त्यैर्मर्त्यकृतमुरोरा नो देव रिषस्पाहि सुमित्रा न आप ओषधयः सन्तु  
दुर्मित्रास्तस्मै भूयासुर्योऽस्मान्द्वेष्टि यं च वयं द्विष्मो देवीराप एष वो  
गर्भस्तं वः सुप्रीतं सुभृतमकर्म देवेषु नः सुकृतौ ब्रूतात्प्रतियुतो वरुणस्य  
पाशः प्रत्यस्तो वरुणस्य पाश एधोऽस्येधिषीमहि समिदसि तेजोऽसि  
तेजो मयि धेह्यपो अन्वचारिषं रसेन समसृद्धमहि पर्यस्वां अग्र  
आगमं तम्मा सं सृज वचसा ॥४५॥

यस्त्वा हृदा कीरिणा मन्यमानोऽमर्त्यम्मर्त्यो जोहवीमि । जातवेदो यशो  
अस्मासु धेहि प्रजाभिरग्रे अमृतत्वमश्याम् ॥

यस्मै त्वं सुकृतै जातवेद उ लोकमग्रे कृणवः स्योनम् । अश्विनं स  
पुत्रिणं वीरवन्तं गोमन्तं रयिं नशते स्वस्ति ॥

त्वे सु पुत्र शवसोऽवृत्रन्कामकातयः । न त्वामिन्द्राति रिच्यते ॥

उक्थउक्थे सोम इन्द्रम्ममाद नीथेनीथे मघवानं सुतासः । यदीं  
सबाधः पितरं न पुत्राः समानदक्षा अवसे हवन्ते ॥

अग्रे रसेन तेजसा जातवेदो वि रौचसे । रक्षोहामीवचातनः ॥

अपो अन्वचारिषं रसेन समसृद्धमहि । पर्यस्वां अग्र आगमं तम्मा  
सं सृज वचसा ॥

वसुर्वसुपतिर्हिक्रमस्यग्रे विभावंसुः । स्याम ते सुमतावपि ॥

त्वामग्रे वसुपतिं वसूनामभि प्र मन्दे अध्वरेषु राजन् । त्वया वाजं  
वाजयन्तौ जयेमाभि ष्याम पृत्सुतीर्मर्त्यानाम् ॥

त्वामग्रे वाजसातमं विप्रां वर्धन्ति सुष्टुतम् । स नो रास्व सुवीर्यम् ॥

अयं नो अग्निर्वरिवः कृणोत्वयम्मृधः पुर एतु प्रभिन्दन् । अयं  
शत्रूञ्जयतु जर्हषाणोऽयं वाजं जयतु वाजसातौ ॥

अग्निनाग्निः समिध्यते क्विर्गृहपतिर्युवा । हव्यवाङ्जुह्वास्यः ॥  
त्वँ ह्यग्ने अग्निना विप्रो विप्रैण सन्त्सता । सखा सख्या समिध्यसे ॥  
उदग्ने शुचयस्तव वि ज्योतिषा ॥४६॥

इति प्रथमकारण्डे चतुर्थः प्रपाठकः ४

अथ प्रथमकारण्डे पञ्चमः प्रपाठकः ५

देवासुराः संयत्ता आसन्ते देवा विजयमुपयन्तोऽग्नौ वामं वसु सं  
न्यदधतेदमुं नो भविष्यति यदि नो जेष्यन्तीति तदग्निर्न्यकामयत्  
तेनापाक्रामत्तद्देवा विजित्यावरुरुत्समाना अन्वायन्तदस्य सहसादित्सन्त  
सौऽरोदीद्यदरोदीत्तद्द्रुस्य रुद्रत्वं यदश्वशीयत् तद्रजतँ  
हिरण्यमभवत्तस्माद्रजतँ हिरण्यमदक्षिरण्यमश्रुजँ हि यो बर्हिषि  
ददाति पुरास्य संवत्सराद्गृहे रुदन्ति तस्माद्बर्हिषि न देयँ  
सौऽग्निरब्रवीद्भाग्यसान्यथ व इदमिति पुनराधेयं ते  
केवलमित्यब्रुवन्नृध्रवत्वलु स इत्यब्रवीद्यो मद्देवत्यमग्निमादधाता इति  
तम्पूषार्धत् तेन पूषार्धोत्तस्मात्पौष्णाः पशव उच्यन्ते तं त्वष्टार्धत् तेन  
त्वष्टार्धोत्तस्मात्त्वाष्ट्राः पशव उच्यन्ते तम्मनुरार्धत् तेन  
मनुरार्धोत्तस्मान्मानुव्यः प्रजा उच्यन्ते तं धातार्धत् तेन धातार्धोत्संवत्सरो  
वै धाता तस्मात्संवत्सरम्प्रजाः पशवोऽनु प्र जायन्ते । य  
एवम्पुनराधेयस्यर्द्धिं वेदध्नौत्येव योऽस्यैवं बन्धुतां वेद बन्धुमान्भवति  
भागधेयं वा अग्निराहित इच्छमानः प्रजाम्पशून्यजमानस्योप दोद्रावोद्वास्य  
पुनरा दधीत भागधेयेनैवैनँ समर्धयत्यथो शान्तिरेवास्यैषा पुनर्वस्वोरा  
दधीतैतद्वै पुनराधेयस्य नक्षत्रं यत्पुनर्वसू स्वायामेवैनं देवतायामाधाय  
ब्रह्मवर्चसी भवति दुर्भैरा दधात्ययातयामवाय दुर्भैरा दधात्यद्भ्य

एवैनमोषधीभ्योऽवरुध्याधत्ते पञ्चकपालः पुरोडाशौ भवति पञ्च वा ऋतव  
ऋतुभ्य एवैनमवरुध्या धत्ते ॥१॥

परा वा एष यज्ञम्पशून्वपति योऽग्निमुद्वासयते । पञ्चकपालः पुरोडाशौ  
भवति पाङ्क्तौ यज्ञः पाङ्क्तौ पशवौ यज्ञमेव पशून्व रुद्धे । वीरहा वा एष  
देवानां योऽग्निमुद्वासयते न वा एतस्य ब्राह्मणा ऋतायवः पुरान्नमक्षन् ।  
पङ्क्त्यौ याज्यानुवाक्या भवन्ति पाङ्क्तौ यज्ञः पाङ्क्तः पुरुषो देवानेव वीरं  
निरवदायाग्निम्पुनरा धत्ते शताक्षरा भवन्ति शतायुः पुरुषः शतेन्द्रिय  
आयुष्येवेन्द्रिये प्रति तिष्ठति यद्वा अग्निराहितो नर्ध्यते ज्यायौ भागधेयं  
निकाम निकामयमानो यदाग्नेयं सर्वम्भवति सैवास्यर्द्धिः सं वा एतस्य  
गृहे वाक्सृज्यते योऽग्निमुद्वासयते स वाचं संसृष्टां यजमान ईश्वरोऽनु  
पराभवितोर्विभक्तयो भवन्ति वाचो विधृत्यै यजमानस्यापराभावाय  
विभक्तिं करोति ब्रह्मैव तदकरु पांशु यजति यथा वामं वसु  
विविदानो गूहति तादृगेव तद् अग्निम्रति स्विष्टकृतं निराह यथा वामं  
वसु विविदानः प्रकाशं जिगमिषति तादृगेव तद्विभक्तिमुक्त्वा प्रयाजेन  
वषट्करोत्यायतनादेव नैति यजमानो वै पुरोडाशः पशव एते आहुती  
यदभितः पुरोडाशमेते आहुती जुहोति यजमानमेवोभयतः पशुभिः परि  
गृह्णाति कृतयजुः सम्भृतसम्भार इत्याहुर्न सम्भृत्याः सम्भारा न यजुः  
कर्तव्यमित्यथो खलु सम्भृत्या एव सम्भाराः कर्तव्यं यजुर्यज्ञस्य  
समृद्ध्यै पुनर्निष्कृतो रथो दक्षिणा पुनरुत्स्यूतं वासः  
पुनरुत्स्यूष्टौऽनुड्वान्पुनराधेयस्य समृद्ध्यै सप्त तै अग्ने समिधः सप्त जिह्वा  
इत्यग्निहोत्रं जुहोति यत्रयत्रैवास्य न्यक्तं तत एवैनमव रुद्धे वीरहा वा एष  
देवानाम्योऽग्निमुद्वासयते तस्य वरुण

एवर्णयादाग्निवारुणमेकादशकपालमनु निर्वपेद्यं चैव हन्ति  
यश्चास्यर्णयात्तौ भागुधेयेन प्रीणाति नार्तिमाच्छति यजमानः ॥२॥

भूमिर्भूम्रा द्यौर्वरिणान्तरिक्षम्महित्वा । उपस्थे ते  
देव्यदितेऽग्निर्मन्नादमन्नाद्याया दधे ॥  
आयं गौः पृश्निरक्रमीदसनन्मातरम्पुनः । पितरं च प्रयन्त्सुवः ॥  
त्रिंशद्धाम वि राजति वाक्पतङ्गाय शिश्रिये । प्रत्यस्य वह द्युभिः ॥  
अस्य प्राणादपानत्यन्तश्चरति रोचना । व्यख्यन्महिषः सुवः ॥  
यत्त्वा क्रुद्धः परोवप मन्युना यदवर्त्या । सुकल्पमग्ने तत्तव  
पुनस्त्वोद्दीपयामसि ॥  
यत्ते मन्युपरोप्तस्य पृथिवीमनु दध्वसे । आदित्या विश्वे तद्देवा वसवश्च  
सुमाभरन् ॥  
मनो ज्योतिर्जुषतामाज्यं विच्छिन्नं यज्ञं समिमं दधातु ।  
बृहस्पतिस्तनुतामिमं नो विश्वे देवा इह मादयन्ताम् ॥  
सप्त तै अग्ने समिधः सप्त जिह्वाः सप्तर्षयः सप्त धाम प्रियाणि । सप्त  
होत्राः सप्तधा त्वा यजन्ति सप्त योनीरा पृणस्वा घृतेन ॥  
पुनरूर्जा नि वर्तस्व पुनरग्र इषायुषा । पुनर्नः पाहि विश्वतः ॥ ॥  
सह रय्या नि वर्तस्वाग्ने पिन्वस्व धारया । विश्वप्त्रिया विश्वतस्परि ।  
लेकः सलैकः सुलेकस्ते न आदित्या आज्यं जुषाणा वियन्तु केतः  
सकैतः सुकैतस्ते न आदित्या आज्यं जुषाणा वियन्तु विवस्वां  
अदितिर्देवजूतिस्ते न आदित्या आज्यं जुषाणा वियन्तु ॥३॥

भूमिर्भूम्रा द्यौर्वरिणेत्याहाशिषैवैनमा धत्ते सर्पा वै जीर्यन्तोऽमन्यन्तस एतं

कसृर्णीरः काद्रवेयो मन्त्रमपश्यत्ततो वै ते जीर्णास्तनूरपाघ्नत सर्पराज्ञिया  
 ऋग्भिर्गार्हपत्यमा दधाति पुनर्नवमेवैनमजरं कृत्वा धत्तेऽथो पूतमेव  
 पृथिवीमन्नाद्यं नोपानमत्सैतं मन्त्रमपश्यत्ततो वै  
 तामन्नाद्यमुपानमद्यत्सर्पराज्ञिया ऋग्भिर्गार्हपत्यमादधात्यन्नाद्यस्यावरुद्ध्या  
 अथो अस्यामेवैनम्प्रतिष्ठितमा धत्ते यत्त्वा क्रुद्धः परोवपेत्याहाप हुत  
 एवास्मै तत्पुन स्त्वोदीपयामसीत्याह समिन्द्र एवैनं यत्ते  
 मन्युपरोप्तस्येत्याह देवताभिरेवैनं सम्भरति वि वा एतस्य यज्ञश्छिद्यते  
 योऽग्निमुद्वासयते बृहस्पतिवत्यर्चोप तिष्ठते ब्रह्म वै  
 देवानाम्बृहस्पतिर्ब्रह्मणैव यज्ञं सं दधाति वि च्छिन्नं यज्ञं समिमं  
 दधात्वित्याह सन्तत्यै विश्वे देवा इह मादयन्तामित्याह सन्तत्यैव यज्ञं  
 देवेभ्योऽनु दिशति सप्त तै अग्ने समिधः सप्त जिह्वा इत्याह सप्तसप्त वै  
 सप्तधाग्नेः प्रियास्तनुवस्ता एवाव रुन्धे पुनरूर्जा सह रय्येत्यभितः  
 पुरोडाशमाहुती जुहोति यजमानमेवोर्जा च रय्या चौभयतः परि  
 गृह्णात्या दित्या वा अस्माल्लोकादमुं लोकमायन्तेऽमुष्मिल्लोके  
 व्यतृष्यन्त इमं लोकम्पुनरभ्यवेत्याग्निमाधायैतान्होमानजुहवुस्त आर्धुवन्ते  
 सुवर्गं ल्लोकमायन्यः पराचीनम्पुनराधेयादग्निमादधीत स  
 एतान्होमाञ्जुहयाद्यामेवादित्या ऋद्धिमार्धुवन्तामेवध्नोति ॥४॥

उपप्रयन्तो अध्वरम्मन्त्रं वोचेमाग्रये । अरे अस्मे च शृणवते ॥  
 अस्य प्रतामनु द्युतं शुक्रं दुदुहे अहयः । पर्यः सहस्रसामृषिम् ॥  
 अग्निर्मूर्धा दिवः ककुत्पतिः पृथिव्या अयम् । अपां रेतांसि जिन्वति  
 ॥

अयमिह प्रथमो धायि धातृभिर्होता यजिष्ठो अध्वरेष्वीडयः । यमप्रवानो

भृगवो विरुचुर्वनेषु चित्रं विभुवं विशेविशे ॥  
 उभा वामिन्द्राग्नी आहुवध्या उभा राधसः सह मादयध्वै । उभा  
 दाताराविषाँ रयीणामुभा वाजस्य सातयै हुवे वाम् ।  
 अयं ते योनिर्त्रृत्वियो यतो जातो अरोचथाः । तं जानन्नग्र आ रोहाथा नो  
 वर्धया रयिम् ।

अग्र आयँषि पवस आ सुवोवोर्जमिषं च नः । अरे बाधस्व दुच्छुनाम् ॥  
 अग्ने पवस्व स्वपा अस्मे वर्चः सुवीर्यम् । दधत्योषँ रयिं मयि ॥  
 अग्ने पावक रोचिषा मन्द्रया देव जिह्वया । आ देवान्वन्धि यक्षि च ॥  
 स नः पावक दीदिवोऽग्ने देवाँ इहावह । उप यज्ञँ हविश्च नः ॥  
 अग्निः शुचिव्रततमः शुचिर्विप्रः शुचिः कविः । शुची रोचत आहुतः ॥  
 उदग्ने शुचयस्तव शुक्रा भ्राजन्त ईरते । तव ज्योतीँष्यर्चयः ॥  
 आयुर्दा अग्नेऽस्यायुर्मे देहि वर्चोदा अग्नेऽसि वर्चो मे देहि तनूपा  
 अग्नेऽसि तनुवम्मे पाह्यग्ने यन्मै तनुवा ऊनं तन्म आ पृण ।  
 चित्रावसो स्वस्ति तै पारमशीये न्धानास्त्वा शतँ हिमा द्युमन्तः  
 समिधीमहि वयस्वन्तो वयस्कृतं यशस्वन्तो यशस्कृतँ सुवीरासो  
 अदाभ्यम् । अग्ने सपत्नदम्भनं वर्षिष्ठे अधि नाके ।  
 सं त्वमग्ने सूर्यस्य वर्चसागथाः समृषीणाँ स्तुतेन सम्प्रियेण धाम्ना ।  
 त्वमग्ने सूर्यवर्चा असि सम्मामायुषा वर्चसा प्रजया सृज ॥५॥

सम्पश्यामि प्रजा अहमिडप्रजसो मानवीः । सर्वा भवन्तु नो गृहे ॥  
 अम्भः स्थाम्भो वो भक्षीय महः स्थ महौ वो भक्षीय सहः स्थ सहौ वो  
 भक्षीयोर्जः स्थोर्ज वो भक्षीय रेवती  
 रमध्वमस्मिल्लोकैऽस्मिन्गोष्ठैऽस्मिन्द्वयेऽस्मिन्योनाविहैव स्तेतो माप गात



ब्रह्मीर्मे भूयास्त सँहितासिं विश्वरूपीरा मोर्जा विशा गौपत्येना  
 रायस्पोषेण सहस्रपोषं वः पुष्यासम्मयि वो रायः श्रयन्ताम् ॥  
 उप त्वाग्ने दिवेदिवे दोषावस्तर्धिया वयम् । नमो भरन्त एमसि ॥  
 राजन्तमध्वराणां गोपामृतस्य दीदिविम् । वर्धमानँ स्वे दमे ॥  
 स नः पितेव सूनवेऽग्रै सूपायनो भव । सचस्वा नः स्वस्तये ॥  
 अग्ने त्वं नो अन्तमः । उत त्राता शिवो भव वरूथ्यः । तं त्वां शोचिष्ठ  
 दीदिवः । सुम्नाय नूनमीमहे सखिभ्यः । वसुरग्निर्वसुश्रवाः । अच्छा  
 नक्षि द्युमत्तमो रयिं दाः ॥  
 ऊर्जा वः पश्याम्यूर्जा मां पश्यत रायस्पोषेण वः पश्यामि रायस्पोषेण मा  
 पश्यतेडाः स्थ मधुकृतःस्योना माविशतेरा मदः । सहस्रपोषं वः  
 पुष्यासं मयि वो रायः श्रयन्ताम् ॥  
 तत्सवितुर्वरेण्यम्भर्गो देवस्य धीमहि । धियो यो नः प्रचोदयात् ॥  
 सोमानँ स्वरणं कृणुहि ब्रह्मणस्पते । कक्षीवन्तम्य औशिजम् ॥  
 कदा चन स्तरीरसि नेन्द्रं सश्चसि दाशुषे । उपोपेनु मघवन्भूय इनु ते  
 दानं देवस्य पृच्यते ॥  
 परि त्वाग्ने पुरं वयं विप्रँ सहस्य धीमहि । धृषद्वर्णं दिवेदिवे  
 भेत्तारम्भङ्गुरावतः ॥  
 अग्रै गृहपते सुगृहपतिरहं त्वया गृहपतिना भूयासँ सुगृहपतिर्मया त्वं  
 गृहपतिना भूयाः शतँ हिमास्तामाशिषमा शासे तन्तवे ज्योतिष्मतीं  
 तामाशिषमा शासेऽमुष्मै ज्योतिष्मतीम् ॥६॥

अयज्ञो वा एष योऽसामोपप्रयन्तौ अध्वरमित्याह स्तोममेवास्मै  
 युनक्त्यु पेत्याह प्रजा वै पशव उपेमं लोकम्प्रजामेव पशूनिमं

लोकमुपैत्यस्य प्रत्नामनु द्युतमित्याह सुवर्गो वै लोकः प्रत्नः सुवर्गमेव  
लोकं समारोहत्यग्निर्मूर्धा दिवः ककुदित्याह मूर्धानमेवैनं समानानां  
करोत्यथो देवल्लोकादेव मनुष्यलोके प्रति तिष्ठत्ययमिह प्रथमो धायि  
धातृभिरित्याह मुख्यमेवैनं करोत्युभा वामिन्द्राग्नी आहुवध्या इत्याहौजो  
बलमेवाव रुद्धेऽयं ते योनिर्ऋत्विय इत्याह पशवो वै रयिः पशूनेवाव  
रुद्धे षड्भिरुप तिष्ठते षड्वा ऋतव ऋतुष्वेव प्रति तिष्ठति  
षड्भिरुत्तराभिरुप तिष्ठते द्वादश सम्पद्यन्ते द्वादश मासाः संवत्सरः  
संवत्सर एव प्रति तिष्ठति यथा वै पुरुषोऽश्वो गौर्जीर्यत्येवमग्निराहितो  
जीर्यति संवत्सरस्य परस्तादाग्निपावमानीभिरुप तिष्ठते पुनर्नवमेवैनमजरं  
करोत्यथो पुनात्येवोप तिष्ठते योग एवास्यैष उप तिष्ठते दम एवास्यैष  
उप तिष्ठते याञ्चैवास्यैषोप तिष्ठते यथा पापीयाञ्छरेयस आहत्य नमस्यति  
तादृगेव तदा युदा अग्नेऽस्यायुमे देहीत्याहायुदा ह्येष वर्चोदा अग्नेऽसि  
वर्चो मे देहीत्याह वर्चोदा ह्येष तनूपा अग्नेऽसि तनुवम्मे प्राहीत्याह तनूपा  
ह्येषोऽग्ने यन्मे तनुवा ऊनं तन्म आ पृणेत्याह यन्मे प्रजायै पशूनामूनं तन्म  
आ पूरयेति वावैतदाह चित्रावसो स्वस्ति ते पारमशीयेत्याह रात्रिवै  
चित्रावसुरव्युष्ट्यै वा एतस्यै पुरा ब्राह्मणा अभैषुव्युष्टिमेवाव रुद्ध  
इन्धानास्त्वा शतं हिमा इत्याह शतायुः पुरुषः शतेन्द्रिय आयुष्येवेन्द्रिये  
प्रति तिष्ठत्येषा वै सूर्मी कर्णकावत्येतया ह स्म वै देवा असुराणां  
शततर्हां स्तृहन्ति यदेतया समिधमादधाति वज्रमेवैतच्छतघ्नीं यजमानो  
भ्रातृव्यायु प्र हरति स्तृत्या अच्छम्बट्कारं सं त्वमग्ने सूर्यस्य वर्चसा  
गथा इत्याहैतत्त्वमसीदमहम्भूयासमिति वावैतदाह त्वमग्ने सूर्यवर्चा  
असीत्याहाशिषमेवैतामा शास्ते ॥७॥

सम्पश्यामि प्रजा अहमित्याह यावन्त एव ग्राम्याः पशवस्तानेवाव  
 रुद्धेऽम्भः स्थाम्भो वो भक्षीयेत्याहाम्भो ह्यैता महः स्थ महो वो  
 भक्षीयेत्याह महो ह्यैताः सह स्थ सहो वो भक्षीयेत्याह महो ह्यैता  
 ऊर्जस्थोर्ज वो भक्षीयेत्याहोर्जो ह्यैता रेवती रमध्वमित्याह पशवो वै  
 रेवतीः पशूनेवात्मन्नमयत इहैव स्तेतो माप गातेत्याह ध्रुवा एवैना  
 अनपगाः कुरुत इष्टक्चिद्वा अन्योऽग्निः पशुचिदन्यः संहितासि  
 विश्वरूपीरिति वत्समभि मृशत्युपैवैनं धत्ते पशुचितमेनं कुरुते प्र वा  
 एषोऽस्माँल्लोकाञ्चयवते य आहवनीयमुप तिष्ठते गार्हपत्यमुप  
 तिष्ठतेऽस्मिन्नेव लोके प्रति तिष्ठत्यथो गार्हपत्यायैव नि हुते गायत्रीभिरुप  
 तिष्ठते तेजो वै गायत्री तेज एवात्मन्धत्तेऽथो यदेतं तृचमन्वाह संतत्यै  
 गार्हपत्यं वा अनु द्विपादो वीराः प्र जायन्ते य एवं  
 विद्वान्द्विपादाभिर्गार्हपत्यमुप तिष्ठत आस्य वीरो जायत ऊर्जा वः  
 पश्याम्यूर्जा मा पश्यतेत्याहाशिषमेवैतामा शास्ते तत्सवितुर्वरेण्यमित्याह  
 प्रसूत्यै सोमान् स्वरणमित्याह सोमपीथमेवाव रुद्धे कृणुहि ब्रह्मणस्पत  
 इत्याह ब्रह्मवर्चसमेवाव रुद्धे कदा चन स्तरीरसीत्याह न स्तरी रात्रिं  
 वसति य एवं विद्वानग्निमुप तिष्ठते परि त्वाग्ने पुरं वयमित्याह  
 परिधिमेवैतम्परि दधात्यस्कन्दाया ग्रे गृहपत इत्याह  
 यथायजुरेवैत च्छत हिमा इत्याह शतं त्वा हेमन्तानिन्धिषीयेति  
 वावैतदाह पुत्रस्य नाम गृह्णात्यन्नादमेवैनं करोति तामाशिषमा शासे  
 तन्तवे ज्योतिष्मतीमिति ब्रूयाद्यस्य पुत्रोऽजातः स्यात्तेजस्व्यैवास्य  
 ब्रह्मवर्चसी पुत्रो जायते तामाशिषमा शासेऽमुष्मै ज्योतिष्मतीमिति  
 ब्रूयाद्यस्य पुत्रो जातः स्यात्तेज एवास्मिन्ब्रह्मवर्चसं दधाति ॥८॥

अग्निहोत्रं जुहोति यदेव किं च यजमानस्य स्वं तस्यैव तद्रेतः सिञ्चति  
 प्रजनने प्रजननं हि वा अग्निरथौषधीरन्तगता दहति तास्ततो भूयसीः  
 प्रजायन्ते यत्सायं जुहोति रेत एव तत्सिञ्चति प्रैव प्रातस्तनेन जनयति  
 तद्रेतः सिक्तं न त्वष्ट्राविकृतम्प्र जायते यावच्छो वै रेतसः सिक्तस्य त्वष्ट्रा  
 रूपाणि विकरोति तावच्छो वै तत्प्र जायत एष वै दैव्यस्त्वष्ट्रा यो यजते  
 ब्रह्मीभिरुप तिष्ठते रेतस एव सिक्तस्य बहुशो रूपाणि वि करोति स प्रैव  
 जायते श्वःश्चो भूयान्भवति य एवं विद्वानग्निमुप  
 तिष्ठतेऽहर्देवानामासीद्रात्रिरसुराणां तेऽसुरा यद्देवानां वित्तं वेद्यमासीत्तेन  
 सह रात्रिम्प्राविशन्ते देवा हीना अमन्यन्ततेऽपश्यन्नाग्नेयी रात्रिराग्नेयाः  
 पशव इममेवाग्निं स्तवाम स नः स्तुतः पशून्पुनर्दास्यतीति  
 तेऽग्निमस्तुवन्त्स एभ्यः स्तुतो रात्रिया अर्ध्यहरभि पशून्निरार्जते देवाः  
 पशून्वित्त्वा कामां अकुर्वत य एवं विद्वानग्निमुप तिष्ठते  
 पशुमान्भवत्या दित्यो वा अस्माँल्लोकाद्गमुं लोकमैत्सोऽमुं लोकं गत्वा  
 पुनरिमं लोकमर्भ्यध्यायत्स इमं लोकमागत्य मृत्योरभिभेन्मृत्युसंयुत इव  
 ह्ययं लोकः सोऽमन्यतेऽममेवाग्निं स्तवानि स मां स्तुतः सुवर्गं लोकं  
 गमयिष्यतीति सोऽग्निमस्तौत्स एनं स्तुतः सुवर्गं लोकमगमयद्य एवं  
 विद्वानग्निमुप तिष्ठते सुवर्गमेव लोकमेति सर्वमायुरेत्यभि वा एषोऽग्नी  
 आ रोहति य एनावुप तिष्ठते यथा खलु वै श्रेयान्भ्यारूढः कामयते तथा  
 करोति नक्तमुप तिष्ठते न प्रातः स हि नक्तं वृतानि सृज्यन्ते सह  
 श्रेयांश्च पापीयांश्चासाते ज्योतिर्वा अग्निस्तमो रात्रिर्यन्नक्तमुपतिष्ठते  
 ज्योतिषैव तमस्तरत्यु पस्थेयोऽग्नीर्नोपस्थेया इत्याहुर्मनुष्यायेन्वै  
 योऽहरहराहत्याथैनं याचति स इन्वै तमुपाच्छत्यथ को  
 देवानहरहर्याचिष्यतीति तस्मान्नोपस्थेयोऽथो खल्वाहुराशिषे वै कं

यजमानो यजत इत्येषा खलु वा आहिताग्नेराशीर्यदग्निमुप तिष्ठते  
 तस्मादुपस्थेयः प्रजापतिः पशूनसृजत ते सृष्टा अहोरात्रे  
 प्राविशन्ताञ्छन्दोभिरन्वविन्दद्यच्छन्दोभिरुपतिष्ठते स्वमेव तदन्विञ्छति न  
 तत्र जाम्यस्तीत्याहुर्योऽहरहरुप तिष्ठत इति यो वा अग्निम्प्रत्यङ्ङुप तिष्ठते  
 प्रत्येनमोषति यः पराङ्विष्वङ्प्रजयां पशुभिरेति कर्वातिर्यङ्ङुवोष  
 तिष्ठेत नैनम्प्रत्योषति न विष्वङ्प्रजयां पशुभिरेति ॥६॥

मम नाम प्रथमं जातवेदः पिता माता च दधतुर्यदग्रे । तत्त्वम्बिभृहि  
 पुनरा मदैतोस्तवाहं नाम बिभराण्यग्ने ॥  
 मम नाम तव च जातवेदो वाससी इव विवसानौ ये चरावः । आयुषे  
 त्वं जीवसे वयं यथायथं वि परि दधावहे पुनस्ते ॥  
 नमोऽग्नयेऽप्रतिविद्धाय नमोऽनाधृष्टाय नमः सम्राजे । अषाढोऽग्निर्बृहद्भया  
 विश्वजित्सहन्त्यः श्रेष्ठो गन्धर्वः ॥  
 त्वत्पितारो अग्ने देवास्त्वामाहुतयस्त्वद्विवाचनाः । सम्मामायुषा सं  
 गौपत्येन सुहिते मा धाः ॥  
 अयमग्निः श्रेष्ठतमोऽयम्भगवत्तमोऽयं सहस्रसातमः । अस्मा अस्तु  
 सुवीर्यम् ॥  
 मनो ज्योतिर्जुषतामाज्यं विच्छिन्नं यज्ञं समिमं दधातु । या इष्टा उषसौ  
 निमुचश्च ताः सं दधामि हविषा घृतेन ॥  
 पर्यस्वतीरोषधयः पर्यस्वद्वीरुधाम्पर्यः । अपाम्पर्यसो यत्पयस्तेन मामिन्द्र  
 सं सृज ॥  
 अग्ने व्रतपते व्रतं चरिष्यामि तच्छकेयं तन्मै राध्यताम् ।  
 अग्निं होतारमिह तं हुवे देवान्यज्ञियानिह यान्हवामहे ॥ आ यन्तु

दे॒वाः सु॒मन॒स्यमा॑ना वि॒यन्तु॑ दे॒वा ह॒विषो॑ मे अस्य  
कस्त्वा॑ युनक्ति॒ स त्वा॑ युनक्तु॒ यानि॑ घ॒र्मो क॒पालान्यु॑पचिन्वन्ति॒ वेध॑सः ।  
पू॒ष्णस्तान्य॑पि व्र॒त इन्द्र॑वा॒यू वि मुञ्च॑ताम् ॥  
अभि॑न्नो घ॒र्मो जी॒रदानु॑र्यत॒ आत्त॑स्तद॒गन्पुनः॑ । इ॒ध्मो वेदिः॑ परि॒धय॑श्च॒ सर्वे॑  
य॒ज्ञस्या॑यु॒रनु॑ सं च॑रन्ति ॥  
त्रय॑स्त्रिंश॒त्तन्त॑वो॒ ये वि॒तन्त्रि॑रे य इ॒मं य॒ज्ञं स्व॒धया॑ ददन्ते॒ तेषां॑  
छिन्न॑म्प्रत्ये॒तद्द॑धामि॒ स्वाहा॑ घ॒र्मो दे॒वा अप्ये॑तु ॥१०॥

वैश्वान॑रो न ऊ॒त्या प्र या॑तु॒ परा॑ वतः । अ॒ग्निरु॒क्थेन॑ वाह॑सा ॥  
अ॒तावा॑नं वैश्वान॒रमृ॑तस्य॒ ज्योति॑ष॒स्पति॑म् । अ॒जस्रं॑ घ॒र्ममी॑महे ॥  
वैश्वान॑रस्य॒ दस॑ना॒भ्यो बृ॒हद॑रि॒णादे॑कः॒ स्वप॑स्य॒या क॒विः । उ॒भा पि॒तरा॑  
म॒हय॑न्नजायता॒ग्निर्द्या॑वा॒पृथि॒वी भूरि॑रितसा ॥  
पृ॒ष्ठो दि॒वि पृ॒ष्ठो अ॒ग्निः पृ॒थिव्या॑म्पृ॒ष्ठो वि॒श्वा ओष॑धी॒रा वि॒वेश । वैश्वान॑रः  
सह॑सा पृ॒ष्ठो अ॒ग्निः स नो॑ दि॒वा स रि॑षः पा॒तु नक्त॑म् ।  
जा॒तो यद॑ग्ने॒ भुव॑ना॒ व्यख्यः॑ प॒शुं न गो॑पा इ॒र्यः परि॑ज्मा । वैश्वान॑र॒ ब्रह्म॑णे  
विन्द॑ गा॒तुं यू॒यम्पा॑त स्व॒स्तिभिः॑ सदा॑ नः ॥  
त्वम॑ग्ने शो॒चिषा॑ शोशु॒चान॑ आ रोद॑सी अपृ॒णा जा॑यमानः । त्वं दे॒वा अप्ये॑  
अभि॑शस्तेरमुञ्चो॒ वैश्वान॑र जा॒तवे॑दो महि॒त्वा ॥  
अ॒स्माक॑मग्ने म॒घव॑त्सु धा॒र्याना॑मि॒ क्षत्र॑म॒जरं॑ सु॒वीर्य॑म् । व॒यं ज॑येम  
श॒तिनं॑ सह॒सृणं॑ वैश्वान॑र॒ वाज॑मग्ने॒ तवो॑ऽतिभिः ॥  
वैश्वान॑रस्य॒ सुम॑तौ स्या॒म राजा॑ हि क॒म्भुव॑नानामभि॒श्रीः । इ॒तो जा॑तो  
विश्व॑मि॒दं वि च॑ष्टे वैश्वान॒रो य॑तते॒ सूर्ये॑ण ॥  
अ॒व ते॒ हेडो॑ वरु॒ण नमो॑भि॒रव॑ य॒ज्ञेभि॑रीमहे ह॒विर्भिः॑ । क्ष॒यन्न॑स्मभ्य॒मसुर॑

प्रचेतो राजन्नेनाँसि सिश्रथः कृतानि ॥  
 उदुत्तमं वरुण पाशमस्मदवाधुमं वि मध्यमँ श्रथाय । अथा  
 वयमादित्य वृते तवानागसो अदितये स्याम ॥  
 दधिक्राव्णौ अकारिषं जिष्णोरश्वस्य वाजिनः । सुरभि नो मुखां कर्त्त्र ण  
 आयँषि तारिषत् ॥  
 आ दधिक्राः शर्वसा पञ्च कृष्टीः सूर्य इव ज्योतिषापस्ततान । सहस्रसाः  
 शतसा वाज्यर्वा पृणक्तु वध्वा समिमा वचाँसि ॥  
 अग्निर्मूर्धा भुवः । मरुतो यद्ध वो दिवः सुम्नायन्तो हवामहे । आ तू न  
 उप गन्तन ॥  
 या वः शर्म शशमानाय सन्ति त्रिधातूनि दाशुषे यच्छताधि । अस्मभ्यं  
 तानि मरुतो वि यन्त रयिं नौ धत्त वृषणः सुवीरम् ॥  
 अदितिर्न उरुष्यत्वदितिः शर्म यच्छतु । अदितिः पात्वँहसः ॥  
 महीमूषु मातरँ सुव्रतानामृतस्य पत्नीमवसे हुवेम ।  
 तुविक्षत्रामजरन्तीमुरुचीँ सुशर्माणमदितिँ सुप्रणीतिम् ॥  
 सुत्रामाणम्पृथिवीं द्यामनेहसँ सुशर्माणमदितिँ सुप्रणीतिम् । दैवीं  
 नावँ स्वरित्रामनागसमस्त्रवन्तीमा रूहेमा स्वस्तये ॥  
 इमाँ सु नावमारुहँ शतारित्राँ शतस्फ्याम् । अच्छिद्राम्पारयिष्णुम्  
 ॥११॥

इति प्रथमकारण्डे पञ्चमः प्रपाठकः ५

अथ प्रथमकारण्डे षष्ठः प्रपाठकः ६

सं त्वा सिञ्चामि यजुषा प्रजामायुर्धनं च । बृहस्पतिप्रसूतो यजमान इह  
 मा रिषत् ॥ आज्यमसि सत्यमसि सत्यस्याध्यक्षमसि हविरसि वैश्वानरं

वैश्वदेवमुत्पूतशुष्मं सत्यौजाः सहोऽसि सहमानमसि सहस्वारातीः  
सहस्वारातीयतः सहस्व पृतनाः सहस्व पृतन्यतः । सहस्त्रवीर्यमसि  
तन्मा जिन्वाज्यस्याज्यमसि सत्यस्य सत्यमसि सत्यायुरसि  
सत्यशुष्ममसि सत्येन त्वाभि घारयामि तस्य ते भक्षीय पञ्चानां त्वा  
वातानां यन्त्राय धर्त्राय गृह्णामि पञ्चानां त्वर्तूनां यन्त्राय धर्त्राय गृह्णामि  
पञ्चानां त्वा दिशां यन्त्राय धर्त्राय गृह्णामि पञ्चानां त्वा पञ्चजनानां यन्त्राय  
धर्त्राय गृह्णामि  
चरोस्त्वा पञ्चबिलस्य यन्त्राय धर्त्राय गृह्णामि ब्रह्मणस्त्वा तेजसे यन्त्राय  
धर्त्राय गृह्णामि क्षत्रस्य त्वौजसे यन्त्राय धर्त्राय गृह्णामि विशे त्वा यन्त्राय  
धर्त्राय गृह्णामि सुवीर्याय त्वा गृह्णामि सुप्रजास्त्वाय त्वा गृह्णामि  
रायस्पोषाय त्वा गृह्णामि ब्रह्मवर्चसाय त्वा गृह्णामि भूरस्माकं  
हविर्देवानामाशिषो यजमानस्य देवानां त्वा देवताभ्यो गृह्णामि कामाय  
त्वा गृह्णामि ॥१॥

ध्रुवोऽसि ध्रुवोऽहं संजातेषु भूयासं धीरश्चेत्ता वसुविदु ग्रीऽस्युग्रीऽहं  
संजातेषु भूयासमुग्रश्चेत्ता वसुवि दंभिभूरस्यभिभूरहं संजातेषु  
भूयासमभिभूश्चेत्ता वसुवि द्युनज्मि त्वा ब्रह्मणा दैव्येन हव्यायास्मै  
वोढवे जातवेदः । इन्धानास्त्वा सुप्रजसः सुवीरा ज्योग्जीवेम बलिहतौ  
व्यं तै ॥

यन्मै अग्ने अस्य यज्ञस्य रिष्याद्यद्वा स्कन्दादाज्यस्योत विष्णो । तेन  
हन्मि सपत्नं दुर्मरायुमैनं दधामि निर्ऋत्या उपस्थे ॥ भूर्भुवः  
सुव रुच्छुष्मो अग्ने यजमानायैधि निशुष्मो अभिदासते ।  
अग्ने देवेद्ध मन्विद्ध मन्द्रजिह्वा मर्त्यस्य ते होतमूर्धन्ना जिघर्मि



रा॒य॒स्पोषाय॑ सु॒प्रजा॒स्त्वाय॑ सु॒वीर्या॑य॒ मनो॑ऽसि प्रा॒जाप॒त्यम्मन॑सा मा  
 भू॒तेना॑ वि॒श॒ वाग॑स्यै॒न्द्री स॑प॒त्नक्ष॑यणी वा॒चा मै॒न्द्रिये॑णावि॒श  
 व॒स॒न्तमृ॑तूनाम्प्री॒णामि॑ स मां प्री॒तः प्री॑णातु ग्री॒ष्ममृ॑तूनाम्प्री॒णामि॑ स मां  
 प्री॒तः प्री॑णातु व॒र्षा ऋ॑तूनाम्प्री॒णामि॑ ता मां प्री॒ताः प्री॑णन्तु  
 श॒रद॑मृ॒तूनाम्प्री॑णामि॒ सा मां प्री॒ता प्री॑णातु हे॒मन्त॑शि॒शिरा॑वृ॒तूनाम्प्री॑णामि॒  
 तौ मां प्री॒तौ प्री॑णीता म॒ग्नीषो॑म॒योर्हं दै॒वय॒ज्यया॑ चक्षु॒ष्मान्भू॑यास म॒ग्नेर्हं  
 दै॒वय॒ज्यया॑न्नादो भू॒यासं द॒ब्धिर॑स्यद॒ब्धो भू॑यासम॒मुं द॒भेय॑ म॒ग्नीषो॑म॒योर्हं  
 दै॒वय॒ज्यया॑ वृ॒त्रहा॑ भू॒यास॑ मि॒न्द्राग्नि॑योर्हं दै॒वय॒ज्ययै॑न्द्रिया॒व्यन्नादो॑  
 भू॒यास॑ मि॒न्द्रस्या॑हं दै॒वय॒ज्ययै॑न्द्रिया॒वी भू॑यासं महे॒न्द्रस्या॑हं दै॒वय॒ज्यया॑  
 जे॒मानं॑महि॒मानं॑ गमे॒य म॒ग्नेः स्वि॑ष्ट॒कृतो॑ऽहं दै॒वय॒ज्यया॑युष्मान्य॒ज्ञेन॑  
 प्र॒तिष्ठां॑ गमे॒यम् ॥२॥

अ॒ग्नि॒र्मा दुरि॑ष्टात्पातु स॒वि॒ताघ॑शँसा द्यो मेऽन्ति दू॒रेऽरा॑ती॒यति॑ तमे॒तेन॑  
 जेषँ॑ सु॒रूप॑वर्षवर्ण॑ ए॒हीमा॑न्भ॒द्रान्दुयाँ॑ अ॒भ्येहि॑ मामनु॒व्रता॑ न्यु शी॒र्षाणि॑  
 मृ॒द्वमि॑ड ए॒ह्यदि॑त ए॒हि सर॑स्व॒त्येहि॑ रन्ति॒रसि॑ रम॒तिरसि॑ सून॒र्यसि॑ जुष्टे  
 जुष्टिं॑ तेऽशी॒योप॑हूत उपह॒वं तैऽशी॑य॒ सा मे॑ स॒त्याशी॑र॒स्य य॒ज्ञस्य॑  
 भू॒यादरै॑डता॒ मन॑सा॒ तच्छ॑के॒यं य॒ज्ञो दि॒वँ रो॑हतु॒ य॒ज्ञो दि॒वं गच्छ॑तु॒ यो  
 दै॒व्यान्ः प॑न्था॒स्तेन॑ य॒ज्ञो दे॒वाँ अ॒प्यै॒त्वस्मा॑स्वि॒न्द्र इन्द्रि॑यं  
 द॒धात्व॑स्मान्ना॒य उ॒त य॒ज्ञाः स॑च॒न्ताम॑स्मासु॒ सन्त्वा॑शिषुः॒ सा नः॑ प्रि॒या  
 सु॒प्रतू॑र्ति॒र्मघो॑नी॒ जुष्टि॑रसि॒ जुष॑स्व॒ नो जु॑ष्टा॒ नोऽसि॑ जुष्टिं॑ ते गमे॒यं मनो॑  
 ज्यो॒तिर्जु॑षता॒माज्यं॑ विच्छि॒न्नं य॒ज्ञँ स॒मिमं॑ द॒धातु॑ । बृ॒हस्प॑ति॒स्तनु॑तामि॒मं  
 नो॒ विश्वे॑ दे॒वा इ॒ह मा॑द॒यन्ता॑म् ॥

ब्र॒ध्म पि॒न्वस्व॑ दद॒तो मे॒ मा क्षा॑यि कु॒र्वतो॑ मे॒ मोष॑

दसत्प्रजापतेर्भागोऽस्यूजस्वान्ययस्वान्प्राणापानौ मे पाहि समानव्यानौ मे  
पाह्युदानव्यानौ मे पाह्यक्षितोऽस्यक्षित्यै त्वा मा मे क्षेष्टा  
अमुत्रामुष्मिल्लोके ॥३॥

बर्हिषोऽहं देवयज्यया प्रजावान्भूयासं नराशंसस्याहं देवयज्यया  
पशुमान्भूयास मग्नेः स्वष्टकृतोऽहं देवयज्ययायुष्मान्यज्ञेन प्रतिष्ठां  
गमेय मग्नेरहमुज्जितिमनूजैषं  
सोमस्याहमुज्जितिमनूजैष मग्नेरहमुज्जितिमनूजैष मग्नीषोमयोरहमुज्जितिम  
नूजैष मिन्द्राग्रियोरहमुज्जितिमनूजैष मिन्द्रस्याहमुज्जितिमनूजैषं  
महेन्द्रस्याहमुज्जितिमनूजैष मग्नेः स्वष्टकृतोऽहमुज्जितिमनूजैषं वाजस्य मा  
प्रसवेनो द्ग्राभेणोदग्रभीत् । अथा सपत्नां इन्द्रो मे निग्राभेणाधरां  
अकः ॥

उद्ग्राभं च निग्राभं च ब्रह्म देवा अवीवृधन् । अथा सपत्नानिन्द्राग्नी मे  
विषूचीनान्व्यस्यताम् ॥

एमा अगमन्नाशिषो दोहकामा इन्द्रवन्तो वनामहे धुक्षीमहि प्रजामिषम् ॥  
रोहितेन त्वाग्निर्देवतां गमयतु हरिभ्यां त्वेन्द्रो देवतां गमयत्वे तशेन त्वा  
सूर्यो देवतां गमयतु वि ते मुञ्चामि रशना वि रश्मीन्वि योक्त्रा यानि  
परिचर्तनानि धत्तादस्मासु द्रविणं यच्च भद्रम्प शौ ब्रूताद्भागधान्देवतासु ॥  
विष्णोः शम्योरहं देवयज्यया यज्ञेन प्रतिष्ठां गमेयं सोमस्याहं  
देवयज्यया सुरेता रेतो धिषीय त्वष्टुरहं देवयज्यया पशूनां रूपम्पुषेयं  
देवानाम्पत्नीरग्निर्गृहपतिर्यज्ञस्य मिथुनं तयोरहं देवयज्यया मिथुनेन प्र  
भूयासं वेदोऽसि वित्तिरसि विदेय कर्मासि करुणमसि क्रियासं  
सनिरसि सनितासि सनेयं घृतवन्तं कुलायिनं रायस्पोषं सहस्त्रिणं

वेदो ददातु वाजिनम् ॥४॥

आ प्यायतां ध्रुवा घृतेन यज्ञं यज्ञम्प्रति देवयद्भ्यः । सूर्याया ऊधोऽदित्या  
उपस्थं उरुधारा पृथिवी यज्ञे अस्मिन् ॥

प्रजापतेर्विभानाम् लोकस्तस्मिँस्त्वा दधामि सह यजमानेन  
सदसि सन्मै भूयाः सर्वमसि सर्वम्मे भूयाः पूर्णमसि पूर्णम्मे भूया  
अक्षितमसि मा मै क्षेष्टाः प्राच्यां दिशि देवा ऋत्विजो मार्जयन्तां  
दक्षिणायां दिशि मासाः पितरो मार्जयन्ताम्रतीच्यां दिशि गृहाः पशवो  
मार्जयन्ता मुदीच्यां दिश्याप ओषधयो वनस्पतयो मार्जयन्ता मूर्ध्वायां  
दिशि यज्ञः संवत्सरो यज्ञपतिमार्जयन्तां विष्णोः क्रमोऽस्यभिमातिहा  
गायत्रेण च्छन्दसा पृथिवीमनु वि क्रमे निर्भक्तः स यं द्विष्मो विष्णोः  
क्रमोऽस्यभिशस्तिहा त्रैष्टुभेन च्छन्दसान्तरिक्षमनु वि क्रमे निर्भक्तः स यं  
द्विष्मो विष्णोः क्रमोऽस्यरातीयतो हन्ता जागतेन च्छन्दसा दिवमनु वि  
क्रमे निर्भक्तः स यं द्विष्मो विष्णोः क्रमोऽसि शत्रूयतो हन्तानुष्टुभेन  
च्छन्दसा दिशोऽनु वि क्रमे निर्भक्तः स यं द्विष्मः ॥५॥

अगन्म सुवः सुवरगन्म सदृशस्ते मा च्छित्सि यत्ते तपस्तस्मै ते मा वृक्षि  
सुभूरसि श्रेष्ठो रश्मीनामायुर्धा अस्यायुर्मे धेहि वर्चोधा असि वर्चो मयि  
धेही दमहममुभ्रातृव्यमाभ्यो दिग्भ्योऽस्यै दिवोऽस्मादन्तरिक्षादस्यै  
पृथिव्या अस्मादन्नाद्यान्निर्भजामि निर्भक्तः स यं द्विष्मः सं  
ज्योतिषाभूव मैन्द्रीमावृतमन्वावर्ते समहम्प्रजया सम्मया प्रजा समहँ  
रायस्पोषेण सम्मया रायस्पोषः समिद्धो अग्ने मे दीदिहि समेद्धा तै अग्ने  
दीद्यासं वसुमान्यज्ञो वसीयान्भूयासु मग्न आयूँषि पवसु आ

सुवोर्जमिषं च नः । अरे बांधस्व दुच्छुनाम् ॥  
 अग्ने पवस्व स्वपा अस्मे वर्चः सुवीर्यं । दधत्पोषं रयिम्मयि ॥  
 अग्ने गृहपते सुगृहपतिरहं त्वया गृहपतिना भूयासं सुगृहपतिर्मया त्वं  
 गृहपतिना भूयाः शतं हिमास्तामाशिषमा शासे तन्तवे ज्योतिष्मतीं  
 तामाशिषमा शासेऽमुष्मै ज्योतिष्मतीं कस्त्वा युनक्ति स त्वा वि  
 मुञ्चत्व ग्रे व्रतपते व्रतमचारिषं तदशकं तन्मेऽराधि यज्ञो बभूव स आ  
 बभूव स प्र जज्ञे स वावृधे । स देवानामधिपतिर्बभूव सो अस्मां  
 अधिपतीन्करोतु वयं स्याम पतयो रयीणाम् ॥  
 गोमां अग्नेऽविमां अश्वी यज्ञो नृवत्सखा सदमिदप्रमृष्यः । इडावां  
 एषो असुर प्रजावान्दीर्घो रयिः पृथुबुध्नः सभावान् ॥६॥

यथा वै समृतसोमा एवं वा एते समृतयज्ञा यदर्शपूर्णमासौ कस्य वाहं  
 देवा यज्ञमा गच्छन्ति कस्य वा न बहूनां यजमानानां यो वै देवताः पूर्वाः  
 परिगृह्णाति स एनाः श्वो भूते यजत एतद्वै देवानामायतनं  
 यदाहवनीयोऽन्तराग्नी पशूनां गार्हपत्यो मनुष्याणामन्वाहार्यपचनः  
 पितृणा मग्निं गृह्णाति स्व एवायतने देवताः परि गृह्णाति ताः श्वो भूते  
 यजते व्रतेन वै मेध्योऽग्निर्व्रतपतिर्ब्राह्मणो व्रतभृद्व्रतमुपैष्यन्ब्रूयादग्ने  
 व्रतपते व्रतं चरिष्यामीत्यग्निर्वै देवानां व्रतपतिः तस्मा एव प्रतिप्रोच्य  
 व्रतमा लभते बर्हिषा पूर्णमासे व्रतमुपैति  
 वत्सैरमावास्यायामेतद्धयैतयोरायतनमुपस्तीर्यः  
 पूर्वश्चाग्निरपरश्चेत्याहुर्मनुष्या इन्वा उपस्तीर्णमिच्छन्ति किमु देवा येषां  
 नवावसानमुपास्मिञ्छ्वो यद्यमाणे देवता वसन्ति य एवं  
 विद्वानग्निमुपस्तृणाति यजमानेन ग्राम्याश्च पशवोऽवरुध्या

आरण्याश्चेत्याहुयद्ग्राम्यानुपवसति तेन ग्राम्यानव रुद्धे  
यदारण्यस्याश्नाति तेनारण्यान्यदनाश्वानुपवसैत्पितृदेवृत्यः  
स्यादा रण्यस्याश्नातीन्द्रियं वा आरण्यमिन्द्रियमेवात्मन्धत्ते  
यदनाश्वानुपवसेत्क्षोधुकः स्याद्यदशनीयाद्द्रौऽस्य पशून्भि  
मन्येता पौऽश्नाति तन्नेवाशितं नेवानशितं न क्षोधुको भवति नास्य रुद्रः  
पशून्भि मन्यते वज्रो वै यज्ञः क्षुत्खलु वै मनुष्यस्य भ्रातृव्यो  
यदनाश्वानुपवसति वज्रैशैव साक्षात्क्षुधुम्भ्रातृव्यं हन्ति ॥७॥

यो वै श्रद्धामनारभ्य यज्ञेन यजते नास्येष्टाय श्रद्धधतेऽपः प्र णयति श्रद्धा  
वा आपः श्रद्धामेवारभ्य यज्ञेन यजत उभयैऽस्य देवमनुष्या इष्टाय श्रद्धधते  
तदाहुरति वा एता वत्रं नेदन्त्यति वाचं मनो वावैता नाति नेदन्तीति  
मनसा प्र णयती यं वै मनोऽनयैवैनाः प्र णयत्य स्कन्नहविर्भवति य एवं  
वेदं यज्ञायुधानि सम्भवति यज्ञो वै यज्ञायुधानि यज्ञमेव तत्सम्भरति  
यदेकमेकं सम्भरैत्पितृदेवृत्यानि स्युर्यत्सह सर्वाणि मानुषाणि द्वेद्वे  
सम्भरति याज्यानुवाक्ययोरेव रूपं करोत्यथो मिथुनमेव यो वै दश  
यज्ञायुधानि वेदं मुखतौऽस्य यज्ञः कल्पते स्म्यश्च कपालानि  
चाग्निहोत्रहवर्णी च शूर्पं च कृष्णाजिनं च शम्या चोलूखलं च मुसलं च  
दृषच्चोपला चैतानि वै दश यज्ञायुधानि य एवं वेदं मुखतौऽस्य यज्ञः  
कल्पते यो वै देवेभ्यः प्रतिप्रोच्यं यज्ञेन यजते जुषन्तैऽस्य देवा हव्यं  
हविर्निरुप्यमाणमभि मन्त्रयेताग्निं होतारमिह तं हव इति देवेभ्य एव  
प्रतिप्रोच्यं यज्ञेन यजते जुषन्तैऽस्य देवा हव्यं मेष वै यज्ञस्य ग्रहौ  
गृहीत्वैव यज्ञेन यजते तदुदित्वा वाचं यच्छति यज्ञस्य धृत्या अथो  
मनसा वै प्रजापतिर्यज्ञमनुत् मनसैव तद्यज्ञं तनुते रक्षसामनन्ववचाराय

यो वै य॒ज्ञं यो॒गु आ॒गते॒ यु॒नक्ति॒ यु॒ङ्क्ते॒ यु॒ञ्जानेषु॒ कस्त्वा॑ यु॒नक्ति॒ स त्वा॑  
यु॒नक्ति॒त्वत्या॑ह प्र॒जाप॑ति॒र्वै कः॑ प्र॒जाप॑ति॒नै॒वैनं॑ यु॒नक्ति॒ यु॒ङ्क्ते॒ यु॒ञ्जानेषु॑ ॥८॥

प्र॒जाप॑ति॒र्य॒ज्ञान॑सृ॒जता॑ग्नि॒होत्रं॑ चा॒ग्निष्टो॑मं च पौ॒र्णमा॒सीं चो॒क्थ्यं  
चा॒मावा॒स्यां चा॒तिरा॒त्रं च॒ तानु॑द॒मिमी॑त॒ याव॑द॒ग्निहो॑त्रमा॒सीत्तावा॑न॒ग्निष्टो॑मो  
याव॑ती पौ॒र्णमा॒सी तावा॑नु॒क्थ्यो॑ याव॑त्य॒मावा॒स्या तावा॑न॒तिरा॒त्रो य ए॒वं  
वि॒द्वान॑ग्नि॒होत्रं॑ जु॒होति॒ याव॑द॒ग्निष्टो॑मे॒नोपा॑प्रोति॒ ताव॑दु॒पाप्रो॑ति॒ य ए॒वं  
वि॒द्वान्यौ॑र्णमा॒सीं य॒जते॒ याव॑दु॒क्थ्ये॒नोपा॑प्रोति॒ ताव॑दु॒पाप्रो॑ति॒ य ए॒वं  
वि॒द्वान॑मावा॒स्यां य॒जते॒ याव॑द॒तिरा॒त्रेणो॑पा॒प्रोति॒ ताव॑दु॒पाप्रो॑ति॒ पर॑मे॒ष्ठिनो॑  
वा ए॒ष य॒ज्ञोऽग्रं॑ आ॒सीत्ते॒न स पर॑मां का॒ष्ठा॒मगच्छ॑त्ते॒न प्र॒जाप॑तिं  
नि॒रवा॑साय॒यत्ते॒न प्र॒जाप॑तिः पर॑मां का॒ष्ठा॒मगच्छ॑त्ते॒नेन्द्रं॑ नि॒रवा॑साय॒यत्ते॒नेन्द्रः॑  
पर॑मां का॒ष्ठा॒मगच्छ॑त्ते॒नाग्नी॑षोमौ॒ नि॒रवा॑साय॒यत्ते॒नाग्नी॑षोमौ॒ पर॑मां  
का॒ष्ठा॒मगच्छ॑तां॒ य ए॒वं वि॒द्वान्दर्श॑पूर्णमा॒सौ य॒जते॒ पर॑मा॒मे॒व का॒ष्ठां  
गच्छ॑ति॒ यो वै प्र॒जाते॑न॒ य॒ज्ञेन॒ य॒जते॒ प्र प्र॒जया॑ प॒शुभि॑र्मि॒थुनै॒र्जा॑यते॒ द्वाद॑श  
मा॒साः सं॒वत्स॑रो द्वाद॑श द्वंद्वानि॒ दर्श॑पूर्णमा॒सयो॒स्तानि॑  
स॒म्पाद्या॑नीत्या॒हुर्व॑त्सं चो॒पाव॑सृ॒जत्यु॒खां चाधि॑ श्रय॒त्यव॑ च॒ हन्ति॑ दृ॒षदौ॑  
च स॒माह॑न्त्यधि॒ च॒ वप॑ते क॒पालानि॑ चोप॑ दधाति पुरो॒डाशं॑  
चाधि॑श्रय॒त्याज्यं॑ च  
स्त॒म्बय॑जुश्च॒ हर॑त्य॒भि च॑ गृह्णाति॒ वेदिं॑ च॒ परि॑ गृह्णाति॒ पत्नीं॑ च॒ सं न॑ह्यति॒  
प्रोक्ष॑णीश्चासा॒दय॑त्याज्यं चै॒ तानि॑ वै द्वाद॑श द्वंद्वानि॒ दर्श॑पूर्णमा॒सयोः॑ तानि॒  
य ए॒व स॒म्पाद्य॑ य॒जते॒ प्रजा॑ति॒नै॒व य॒ज्ञेन॑ य॒जते॒ प्र प्र॒जया॑  
प॒शुभि॑र्मि॒थुनै॒र्जा॑यते ॥९॥

ध्रुवोऽसि ध्रुवोऽहँ संजातेषु भूयासमित्याह ध्रुवानेवैनान्कुरुत  
 उग्रोऽस्युग्रोऽहँ संजातेषु भूयासमित्याहाप्रतिवादिन  
 एवैनान्कुरुतेऽभिभूरस्यभिभूरहँ संजातेषु भूयासमित्याह य  
 एवैनम्प्रत्युत्पिपीते तमुपास्यते युनक्ति त्वा ब्रह्मणा दैव्येनेत्याहैष वा  
 अग्रेयोगस्तेनैवैनं युनक्ति यज्ञस्य वै समृद्धेन देवाः सुवर्ग  
 लोकमायन्यज्ञस्य व्यृद्धेनासुरान्परा भावयन्त्यन्मै अग्रे अस्य यज्ञस्य  
 रिष्यादित्याह यज्ञस्यैव तत्समृद्धेन यजमानः सुवर्ग लोकमेति यज्ञस्य  
 व्यृद्धेन भ्रातृव्यान्परा भावयत्यग्निहोत्रमेताभिव्याहृतीभिरुप  
 सादये द्यज्ञमुखं वा अग्निहोत्रम्ब्रह्मैता व्याहृतयो यज्ञमुख एव ब्रह्म कुरुते  
 संवत्सरे पर्यागत एताभिरिवोप सादयेद्ब्रह्मणैवोभयतः संवत्सरम्परि  
 गृह्णाति दर्शपूर्णमासौ चातुर्मास्यान्यालभमान एताभिव्याहृतीभिर्हवीँष्या  
 सादयेद्यज्ञमुखं वै दर्शपूर्णमासौ चातुर्मास्यानि ब्रह्मैता व्याहृतयो यज्ञमुख  
 एव ब्रह्म कुरुते संवत्सरे पर्यागत एताभिरिवा सादयेद्ब्रह्मणैवोभयतः  
 संवत्सरम्परि गृह्णाति यद्वै यज्ञस्य साम्ना क्रियते राष्ट्रं यज्ञस्याशीर्गच्छति  
 यदृचा विशं यज्ञस्याशीर्गच्छत्यर्थं ब्राह्मणोऽनाशीर्केण यज्ञेन यजते  
 सामिधेनीरनुवक्ष्यन्नेता व्याहृतीः पुरस्ताद्दध्याद्ब्रह्मैव प्रतिपदं कुरुते तथा  
 ब्राह्मणः साशीर्केण यज्ञेन यजते यं कामयैत यजमानम्भ्रातृव्यमस्य  
 यज्ञस्याशीर्गच्छेदिति तस्यैता व्याहृतीः पुरोऽनुवाक्यायां  
 दध्याद्भ्रातृव्यदेवत्यां वै पुरोऽनुवाक्यां भ्रातृव्यमेवास्य यज्ञस्याशीर्गच्छति  
 यान्कामयैत यजमानान्त्समावत्येनान्यज्ञस्याशीर्गच्छेदिति तेषामेता  
 व्याहृतीः पुरोऽनुवाक्याया अर्धर्च एकां दध्याद्याज्यायै पुरस्तादेकां  
 याज्याया अर्धर्च एकां तथैनान्त्समावती यज्ञस्याशीर्गच्छति यथा वै  
 पर्जन्यः सुवृष्टं वर्षत्येवं यज्ञो यजमानस्य वर्षति

स्थलयोदकम्परिगृह्णन्त्याशिषा यज्ञं यजमानः परि गृह्णाति मनोऽसि  
प्राजापत्यं मनसा मा भूतेना विशेत्याह मनो वै प्राजापत्यम्प्राजापत्यो  
यज्ञो मन एव यज्ञमात्मन्धत्ते वागस्यैन्द्री संपन्नक्षर्यणी वाचा मैन्द्रियेणा  
विशेत्याहैन्द्री वै वाग्वाचमेवैन्द्रीमात्मन्धत्ते ॥१०॥

यो वै सप्तदशम्प्रजापतिं यज्ञमन्वार्यत्तं वेद प्रति यज्ञेन तिष्ठति न  
यज्ञाद्भ्रंशत आ श्रावयेति चतुरक्षरमस्तु श्रौषडिति चतुरक्षरं यजेति  
द्वयक्षरं ये यजामह इति पञ्चाक्षरं द्वयक्षरो वषट्कार एष वै सप्तदशः  
प्रजापतिर्यज्ञमन्वार्यत्तो य एवं वेद प्रति यज्ञेन तिष्ठति न यज्ञाद्भ्रंशते  
यो वै यज्ञस्य प्रायणम्प्रतिष्ठामुदयनं वेद प्रतिष्ठितेनारिष्टेन यज्ञेन सुंस्थां  
गच्छत्या श्राव्यास्तु श्रौषडयज्ञ ये यजामहे वषट्कार एतद्वै यज्ञस्य  
प्रायणमेषा प्रतिष्ठैतदुदयनं य एवं वेद प्रतिष्ठितेनारिष्टेन यज्ञेन सुंस्थां  
गच्छति यो वै सूनृतायै दोहं वेद दुह एवैनां यज्ञो वै सूनृता  
श्रावयेत्यैवैनामहृदस्तु श्रौषडित्युपावास्त्राग्यजेत्युदनैषीद्ये यजामह  
इत्युपासद्वषट्कारेण दोग्ध्येष वै सूनृतायै दोहो य एवं वेद दुह एवैनां  
देवा वै सत्रमासत तेषां दिशोऽदस्यन्त एतामार्द्राम्पङ्क्तिमपश्यन्ना श्रावयेति  
पुरोवातमजनयन्नस्तु श्रौषडित्यभ्रं समप्लावयन्त्यजेति विद्युतमजनयन्ते  
यजामह इति प्रार्षयन्नभ्यस्तनयन्वषट्कारेण ततो वै तेभ्यो दिशः  
प्राप्यायन्त य एवं वेद प्रास्मै दिशः प्यायन्ते प्रजापतिं त्वो वेद  
प्रजापतिस्त्वं वेद यम्प्रजापतिर्वेद स पुरयो भवत्येष वै छन्दस्यः  
प्रजापतिरा श्राव्यास्तु श्रौषडयज्ञ ये यजामहे वषट्कारो य एवं वेद  
पुरयो भवति वसन्तमृतूनाम्प्रीणामीत्याहर्तवो वै प्रयाजा ऋतूनेव प्रीणाति  
तैऽस्मै प्रीता यथापूर्वं कल्पन्ते कल्पन्तेऽस्मा ऋतवो य एवं



वेदा ग्रीषोमयो॒रहं दे॒वय॒ज्यया॒ चक्षु॑ष्मान्भूयास॒मित्याहा॒ ग्रीषोमा॑भ्यां वै  
यज्ञश्चक्षु॑ष्मान्ताभ्यामे॒व चक्षु॑रात्मन्धत्ते ऽग्ने॒रहं दे॒वय॒ज्ययान्ना॒दो  
भूयास॒मित्याहा॒ग्निर्वै दे॒वानाम॑नादः तेनै॒वान्नाद्य॑मात्मन्धत्ते द॒ब्धि॒रस्य॑द॒ब्धो  
भूयास॒मुं द॒भेय॑मित्या॒हैतया॒ वै द॒भ्यां दे॒वा असु॑रानद॒भुव॑न्त॒यैव भ्रातृ॑व्यं  
द॒भ्नोत्य॑ति॒ ग्रीषोम॑यो॒रहं दे॒वय॒ज्यया॑ वृ॒त्रहा भूयास॒मित्याहा॒ ग्रीषोमा॑भ्यां वा  
इन्द्रो॑ वृ॒त्रम॑हन्ताभ्यामे॒व भ्रातृ॑व्यं स्तृ॒णुत इन्द्रा॑ग्नि॒यो॒रहं  
दे॒वय॒ज्ययै॑न्द्रि॒याव्य॑नादो भूयास॒मित्याहे॑न्द्रि॒याव्यै॑वान्नादो भ॒वती॑ न्द्र॒स्याहं  
दे॒वय॒ज्ययै॑न्द्रि॒यावी भूयास॒मित्याहे॑न्द्रि॒याव्यै॑व भ॒वति॑ महेन्द्र॒स्याहं  
दे॒वय॒ज्यया॑ जे॒मानं॑महि॒मानं ग॑मे॒यमित्या॑ह जे॒मानमे॑व म॒हिमानं॑  
गच्छ॑त्य॒ग्नेः स्वि॑ष्ट॒कृतो॑ऽहं दे॒वय॒ज्यया॑युष्मान्य॒ज्ञेन॑ प्रति॒ष्ठां  
ग॑मे॒यमित्या॑हायु॒रेवा॑त्मन्धत्ते प्रति॒ य॒ज्ञेन॑ तिष्ठति ॥११॥

इन्द्रं॑ वो वि॒श्वत॑स्प॒रि ह॒वाम॑हे जने॒भ्यः । अ॒स्माक॑मस्तु के॒वलः ॥  
इन्द्रं॑ नरो॒ नेम॑र्धिता ह॒वन्ते॒ यत्पार्या॑ यु॒नज॑ते धि॒यस्ताः । शूरो॑ नृषा॒ता  
शर्व॑सश्च॒कान आ गो॑मति वृ॒जे भ॑जा॒ त्वं नः ॥  
इन्द्रि॒याणि॑ शत॒क्रतो॑ या ते जने॒षु प॒ञ्चसु॑ । इन्द्र॒ तानि॑ त॒ आ वृ॑णे ॥  
अनु॑ ते दा॒यि म॒ह इन्द्रि॒याय॑ स॒त्रा ते वि॒श्वम॑नु वृ॒त्रह॑त्यै । अनु॑ । च॒त्रम॑नु  
सहो॑ यज॒त्रेन्द्र॑ दे॒वेभि॑रनु॒ ते नृ॑षह्ये ॥  
आ यस्मि॑न्त्स॒प्त वा॑स॒वास्ति॑ष्ठन्ति स्वा॒रुहो॑ यथा । ऋ॒षिर्ह दी॑र्घ॒श्रुत्त॑म॒  
इन्द्र॑स्य घ॒र्मो अ॒तिथिः ॥  
आमा॑सु॒ प॒क्वमै॑र॒य आ सू॒यं रो॑हयो दि॒वि । घ॒र्म न  
साम॑न्त॒पता॑सु॒वृक्ति॑भिर्जुष्टं॒ गिर्व॑णसे॒ गिरः ॥  
इन्द्र॑मि॒द्गाथि॑नो॒ बृह॑दिन्द्र॒म॒र्केभि॑र॒र्किणः॑ । इन्द्रं॑ वा॒णीर॑नूषत ॥

गायन्ति त्वा गायत्रिणोऽर्चन्त्यर्कमर्किणः । ब्रह्माणस्त्वा  
शतक्रतुवुद्धुःशमिव येमिरे ॥

अहोमुचे प्र भरिमा मनीषामौषिष्ठदाव्ने सुमतिं गृणानाः । इदमिन्द्र प्रति  
हव्यं गृभाय सत्याः संन्तु यजमानस्य कामाः ॥

विवेष यन्मा धिषणा जजान स्तवै पुरा पार्यादिन्द्रमहः । अहंसो यत्र  
पीपरद्यथा नो नावेव यान्तमुभयै हवन्ते ॥

प्र सम्राजमप्रथममध्वराणामहोमुचं वृषभं यज्ञियानाम् । अपां  
नपातमश्विना हयन्तमस्मिन्नर इन्द्रियं धत्तमोजः ॥

वि न इन्द्र मृधो जहि नीचा यच्छ पृतन्यतः । अधस्पदं तमीं कृधि यो  
अस्मां अभिदासति ॥

इन्द्रं क्षत्रमभि वाममोजोऽजायथा वृषभ चर्षणीनाम् । अपानुदो  
जनममित्रयन्तमुरुं देवेभ्यो अकृनोरु लोकम् ॥

मृगो न भीमः कुचरो गिरिष्ठाः परावत आ जगामा परस्याः । सूकं  
संशायं पविमिन्द्र तिग्मं वि शत्रून्ताहि वि मृधो नुदस्व ॥

वि शत्रून्वि मृधो नुद वि वृत्रस्य हनू रुज । वि मन्युमिन्द्र  
भामितोऽमित्रस्याभिदासतः ॥

त्रातारमिन्द्रमवितारमिन्द्रं हवैहवे सुहवः शूरमिन्द्रम् । हुवे नु  
शक्रम्पुरुहूतमिन्द्रं स्वस्ति नो मघवा धात्विन्द्रः ॥

मा तै अस्यां सहसावन्परिष्ठावघाय भूम हरिवः परादै । त्रायस्व  
नोऽवृकेभिर्वरूथैस्तव प्रियासः सूरिषु स्याम ॥

अनवस्ते रथमश्वाय तन्नन्वष्टा वज्रम्पुरुहूत द्युमन्तम् । ब्रह्माण  
इन्द्रम्महयन्तो अकैरवर्धयन्नहये हन्तवा उ ॥

वृष्णे यत्ते वृषणो अर्कमर्चानिन्द्र ग्रावाणो अदितिः सजोषाः । अनुश्वासो

ये प॒वयोऽ॒रथा इन्द्रै॑षिता अ॒भ्यव॑र्तन्त॒ दस्यू॑न् ॥१२॥

इति प्रथमकारण्डे षष्ठः प्रपाठकः ६

अथ प्रथमकारण्डे सप्तमः प्रपाठकः ७

पा॒क॒य॒ज्ञं वा अ॒न्वाहि॑ताग्नेः प॒शव॑ उ॒प तिष्ठ॑न्त॒ इडा॒ खलु॑ वै पा॒क॒य॒ज्ञः  
सैषान्तरा प्रयाजानूयाजान्यजमानस्य लोकेऽवहिता तामाह्वियमाणामभि  
मन्त्रयेत् सुरूपवर्षवर्ण एहीति पशवो वा इडा पशूनेवोप ह्वयते यज्ञं वै  
देवा अदुहन्त्यज्ञोऽसुराँ अदुहत्तेऽसुरा यज्ञदुग्धाः पराभवन्त्यो वै यज्ञस्य  
दोहं विद्वान्यजतेऽप्यन्यं यजमानं दुहे सा मै सत्याशीरस्य यज्ञस्य  
भूयादित्याहैष वै यज्ञस्य दोहस्तेनैवैनं दुहे प्रत्ता वैगौर्दुहे प्रत्तेडा  
यजमानाय दुह एते वा इडाँयै स्तना इडोपहूतेति वायुर्वत्सो यर्हि  
होतेडामुपह्वयेत तर्हि यजमानो होतारमीक्षमाणो वायुम्मनसा ध्यायेन्मात्रे  
वत्समुपावसृजति सर्वेण वै यज्ञेन देवाः सुवर्गं लोकमायन्पाकयज्ञेन  
मनुरश्राम्यत्सेडा मनुमुपावर्तत तां देवासुरा व्यह्वयन्त प्रतीचीं देवाः  
पराचीमसुराः सा देवानुपावर्तत पशवो वै तद्देवानवृणत  
पशवोऽसुरानजहु र्यं कामयेतापशुः स्यादिति पराचीं तस्येडामुप  
ह्वयेतापशुरेव भवति यं कामयेत पशुमान्तस्यादिति प्रतीचीं तस्येडामुप  
ह्वयेत पशुमानेव भवति ब्रह्मवादिनो वदन्ति स त्वा इडामुप ह्वयेत य  
इडामुपह्वयात्मानमिडायामुपह्वयेतेति सा नः प्रिया  
सुप्रतूर्तिर्मघोनीत्याहेडामेवोपह्वयात्मानमिडायामुप ह्वयते व्यस्तमिव वा  
एतद्यज्ञस्य यदिडाँ सामि प्राश्नन्ति सामि मार्जयन्त एतत्प्रति वा  
असुराणां यज्ञो व्यच्छिद्यत ब्रह्मणा देवाः समदधुर्बृहस्पतिस्तनुतामिमं न  
इत्याह ब्रह्म वै देवानाम्बृहस्पतिर्ब्रह्मणैव यज्ञँ सं दधाति विच्छिन्नं यज्ञँ

समिमं दधात्वित्याह संतत्यै विश्वे देवा इह मादयन्तामित्याह संतत्यैव  
यज्ञं देवेभ्योऽनु दिशति यां वै यज्ञे दक्षिणां ददाति तामस्य पशवोऽनु सं  
क्रामन्ति स एष ईजानोऽपशुर्भावुको यजमानेन खलु वै  
तत्कार्यमित्याहुर्यथा देवत्रा दत्तं कुर्वीतात्मन्पशून्मयेतेति ब्रध्न  
पिन्वस्वेत्याह यज्ञो वै ब्रध्नो यज्ञमेव तन्महयत्यथो देवत्रैव दत्तं कुरुत  
आत्मन्पशून्मयते ददतो मे मा क्षायीत्याहाक्षितिमेवोपैति कुर्वतो मे मोष  
दसदित्याह भूमानमेवोपैति ॥१॥

संश्रवा ह सौवर्चनसस्तुमिञ्जमौपौदितिमुवाच यत्सत्रिणां होताभूः  
कामिडामुपाहृथा इति तामुपाहृ इति होवाच या प्राणेन देवान्दाधारं  
व्यानेन मनुष्यानपानेन पितृनितीं च्छिनत्ति सा न च्छिनत्ती इति  
च्छिनत्तीति होवाच शरीरं वा अस्यै तदुपाहृथा इति होवाच गौर्वा अस्यै  
शरीरं गां वाव तौ तत्पर्यवदतां या यज्ञे दीयते सा प्राणेन देवान्दाधारं  
यया मनुष्या जीवन्ति सा व्यानेन मनुष्यान्याम्पितृभ्यो घ्नन्ति सापानेन  
पितृभ्य एव वेदं पशुमान्भवत्यथ वै तामुपाहृ इति होवाच या प्रजाः  
प्रभवन्तीः प्रत्याभवतीत्यन्नं वा अस्यै तदुपाहृथा इति होवाचौ षधयो  
वा अस्यै अन्नमोषधयो वै प्रजाः प्रभवन्तीः प्रत्या भवन्ति य एवं  
वेदान्नादो भवत्यथ वै तामुपाहृ इति होवाच या प्रजाः  
पराभवन्तीरनुगृह्णाति प्रत्याभवन्तीर्गृह्णातीति प्रतिष्ठां वा अस्यै तदुपाहृथा  
इति होवाचे यं वा अस्यै प्रतिष्ठेयं वै प्रजाः पराभवन्तीरनु गृह्णाति  
प्रत्याभवन्तीर्गृह्णाति य एवं वेदं प्रत्येव तिष्ठत्यथ वै तामुपाहृ इति होवाच  
यस्यै निक्रमणे घृतम्प्रजाः संजीवन्तीः पिबन्तीति च्छिनत्ति सा न  
च्छिनत्ती इति न च्छिनत्तीति होवाच प्र तु जनयतीत्येष वा

इडामुपाह्वथा इति होवाच वृष्टिर्वा इडा वृष्ट्यै वै निक्रमणे घृतम्प्रजाः  
संजीवन्तीः पिबन्ति य एवं वेद प्रैव जायतेऽन्नादो भवति ॥२॥

परोऽन्नं वा अन्ये देवा इज्यन्ते प्रत्यक्षमन्ये यद्यजते य एव देवाः  
परोऽक्षमिज्यन्ते तानेव तद्यजति यदन्वाहार्यमाहरत्येते वै देवाः प्रत्यक्षं  
यद्ब्राह्मणास्तानेव तेन प्रीणात्यथो दक्षिणैवास्यैषाऽथो यज्ञस्यैव  
च्छिद्रमपि दधाति यद्वै यज्ञस्य क्रूरं यद्विलिष्टं तदन्वाहार्येणान्वाहरति  
तदन्वाहार्यस्यान्वाहार्यत्वं देवदूता वा एते यदृत्विजो यदन्वाहार्यमाहरति  
देवदूतानेव प्रीणाति प्रजापतिर्देवेभ्यो यज्ञान्यादिशत्स रिरिचानोऽमन्यत  
स एतमन्वाहार्यमभक्तमपश्यत्तमात्मन्नधत्त स वा एष प्राजापत्यो  
यदन्वाहार्यो यस्यैवं विदुषोऽन्वाहार्य आह्वियते साक्षादेव  
प्रजापतिमृध्नोत्यपरिमितो निरुप्योऽपरिमितः प्रजापतिः प्रजापतेराप्त्यै  
देवा वै यद्यज्ञेऽकुर्वत तदसुरा अकुर्वत ते देवा  
एतम्प्राजापत्यमन्वाहार्यमपश्यन्तमन्वाहरन्त  
ततो देवा अभवन्परासुरा यस्यैवं विदुषोऽन्वाहार्य आह्वियते भवत्यात्मना  
परास्य भ्रातृव्यो भवति यज्ञेन वा इष्टी पक्वेन पूर्ती यस्यैवं  
विदुषोऽन्वाहार्य आह्वियते स त्वैवेष्टापूर्ती प्रजापतेर्भागोऽसीत्याह  
प्रजापतिमेव भागधेयेन  
समर्धयत्यूर्जस्वान्पर्यस्वानित्याहोर्जमेवास्मिन्पर्यो दधाति प्राणापानौ मे  
पाहि समानव्यानौ मे पाहीत्याहाशिषमेवैतामा शास्तेऽक्षितोऽस्यक्षित्यै  
त्वा मा मे क्षेष्टा अमुत्रामुष्मिल्लोक इत्याह क्षीयते वा  
अमुष्मिल्लोकेऽन्नमितःप्रदानं ह्यमुष्मिल्लोके प्रजा उपजीवन्ति  
यदेवमभिमृशत्यक्षितिमेवैनद्गमयति नास्यामुष्मिल्लोकेऽन्नं क्षीयते ॥३॥

ब॒र्हिषोऽहं दैवय॒ज्यया प्र॒जावा॑न्भूयास॒मित्या॑ह ब॒र्हिषा वै प्र॒जाप॑तिः प्र॒जा  
 असृ॒जत॒ तेनै॒व प्र॒जाः सृ॒जते॒ नरा॒शँस॑स्याहं दैवय॒ज्यया  
 पशु॒मान्भू॑यास॒मित्या॑ह नरा॒शँसै॒न वै प्र॒जाप॑तिः प॒शून॑सृजत॒ तेनै॒व  
 प॒शून्सृ॑जतेऽग्नेः स्विष्ट॒कृतोऽहं दैवय॒ज्ययायु॑ष्मान्य॒ज्ञेन॑ प्रति॒ष्ठां  
 गमे॒य॒मित्या॑हायुरे॒वात्म॑न्ध॒त्ते प्रति॑ यज्ञेन॑ तिष्ठति द॒र्शपूर्ण॑मा॒सयो॒र्वै दे॒वा  
 उ॒ज्जि॑तिम॒नूद॑जयन्द॒र्शपूर्ण॑मा॒साभ्या॑मसुरा॒नपा॑नुदन्ता॒ग्नेर॑हमु॒ज्जि॑तिम॒नूजै॑षमि॒त्  
 या॑ह द॒र्शपूर्ण॑मा॒सयो॒रेव॑ दे॒वता॑नां यज॒मान॒ उ॒ज्जि॑तिम॒नूज॑यति  
 द॒र्शपूर्ण॑मा॒साभ्या॑म्भ्रातृ॒व्या॒नप॑ नुदते॒ वाज॑वतीभ्यां व्यूह॒त्यन्नं॑ वै  
 वाजोऽन्नमे॒वाव॑रुन्दे द्वाभ्या॒म्प्रति॑ष्ठित्यै यो वै य॒ज्ञस्य॒ द्वौ दोहौ॑ वि॒द्वान्य॑जत  
 उ॒भय॑त ए॒व य॒ज्ञं दु॒हे पु॒स्ताञ्चो॒परि॑ष्ठाञ्चैष वा अ॒न्यो य॒ज्ञस्य॒ दोह॑  
 इडा॒याम॒न्यो यर्हि॑ होता॒ यज॑मानस्य॒ नाम॑ गृह्णीयात्तर्हि ब्रूया॒देमा  
 अ॒ग्नन्ना॑शिषो दोह॑कामा इति सँस्तुता ए॒व दे॒वता॑ दुहेऽथो॑ उ॒भय॑त ए॒व  
 य॒ज्ञं दु॒हे पु॒स्ताञ्चो॒परि॑ष्ठाञ्च रोहितेन त्वाग्निर्दे॒वतां॑ गमय॒त्वित्या॑हैते वै  
 दै॒वाश्वा॒ यज॑मानः प्र॒स्तरो॒ यदे॒तैः प्र॒स्तर॑म्प्र॒हर॑ति दे॒वाश्चै॒रेव॑ यज॒मानँ  
 सुव॒र्गं लो॒कं ग॑मयति॒ वि ते॑ मुञ्चामि र॒शना॑ वि॒र॒श्मी॒नित्या॑हैष वा  
 अ॒ग्नेर्वि॑मो॒कस्ते॒नैवै॒नं वि॑ मुञ्चति॒ विष्णोः॑ श॒म्योर॑हं दैवय॒ज्यया॑ य॒ज्ञेन॑  
 प्रति॒ष्ठां ग॑मे॒य॒मित्या॑ह य॒ज्ञो वै वि॑ष्णोर्य॒ज्ञ ए॒वान्त॑तः प्रति॑ तिष्ठति  
 सोम॑स्याहं दैवय॒ज्यया॑ सुरेता॒ रेतो॑ धिषी॒येत्या॑ह सोमो॒ वै रेतो॑धास्तेनै॒व  
 रेत॑ आ॒त्मन्ध॑त्ते त्वष्ट॒रुहं॑ दैवय॒ज्यया॑ पशूनाँ॒ रूप॑म्पुषे॒य॒मित्या॑ह त्वष्टा॒ वै  
 प॑शूना॒मि॒मि॒थुना॑नाँ॒ रूप॑कृ॒त्तेनै॒व प॑शूनाँ॒ रूप॑मा॒त्मन्ध॑त्ते  
 दे॒वाना॑म्पत्नी॒रग्नि॑र्गृहपतिर्य॒ज्ञस्य॑ मिथुनं॒ तयो॑रुहं दैवय॒ज्यया॑ मिथुने॒न प्र  
 भू॑यास॒मित्या॑हैतस्मा॒द्वै मि॒थुना॑त्प्रजापतिर्मिथुने॒न प्रा॑जायत॒ तस्मा॑दे॒व

यजमानो मिथुनेन प्र जायते वेदोऽसि वित्तिरसि विदेयेत्याह वेदेन वै  
 देवा असुराणां वित्तं वेद्यमविन्दन्त तद्वेदस्य वेदत्वं  
 यद्यद्भ्रातृव्यस्याभिध्यायैत्तस्य नाम गृह्णीयात्तदेवास्य सर्वं वृद्धे घृतवन्तं  
 कुलायिनं॑ रायस्पोषं॑ सहस्त्रिणं वेदो ददातु वाजिनमित्याह प्र  
 सहस्रम्पशूनाप्रोत्यास्यं प्रजायां वाजी जायते य एवं वेद ॥४॥

ध्रुवां वै रिच्यमानां यज्ञोऽनु रिच्यते यज्ञं यजमानो यजमानम्प्रजा  
 ध्रुवामाप्यार्यमानां यज्ञोऽन्वा प्यायते यज्ञं यजमानो यजमानम्प्रजा आ  
 प्यायतां ध्रुवा घृतेनेत्याह ध्रुवामेवाप्याययति तामाप्यार्यमानां यज्ञोऽन्वा  
 प्यायते यज्ञं यजमानो यजमानम्प्रजाः प्रजापतेर्विभान्नाम  
 लोकस्तस्मिं॑स्त्वा दधामि सह यजमानेनेत्याहायं वै प्रजापतेर्विभान्नाम  
 लोकस्तस्मिन्नेवैनं दधाति सह यजमानेन रिच्यत इव वा एतद्यद्यजते  
 यद्यजमानभागम्प्राश्नात्यात्मानमेव प्रीणात्ये तावान्वै यज्ञो  
 यावान्यजमानभागो यज्ञो यजमानो यद्यजमानभागम्प्राश्नाति यज्ञ एव  
 यज्ञम्प्रतिष्ठापयत्येतद्वै सूयवसु॑ सोदकं यद्बुर्हिश्चापश्चैतद्यजमानस्यायतनं  
 यद्वेदि र्यत्पूर्णपात्रमन्तर्वेदि निनयति स्व एवायतने सूयवसु॑ सोदकं  
 कुरुते सदसि सन्मै भूया इत्याहापो वै यज्ञ आपोऽमृतं  
 यज्ञमेवामृतमात्मन्धत्ते सर्वाणि वै भूतानि व्रतमुपयन्तमनूपं यन्ति प्राच्यां  
 दिशि देवा ऋत्विजो मार्जयन्तामित्याहैष वै दर्शपूर्णमासयोरवभृथो  
 यान्येवैनम्भूतानि व्रतमुपयन्तमनूपयन्ति तैरेव सहावभृथमवैति  
 विष्णुमुखा वै  
 देवाश्छन्दोभिरिमाँल्लोकाननपज्य्यमभ्यजयन्त्यद्विष्णुक्रमान्क्रमते विष्णुरिव  
 भूत्वा यजमानश्छन्दोभिरिमाँल्लोकाननपज्य्यमभि जयति विष्णोः

क्रमोऽस्यभिमातिहेत्याह गायत्री वै पृथिवी त्रैष्टुभमन्तरिक्षं जागती  
द्यौरानुष्टुभीर्दिशश्छन्दोभिरेवेमाँल्लोकान्यथापूर्वमभि जयति ॥५॥

अगन्म सुवः सुवरगन्मेत्याह सुवर्गमेव लोकमेति सदृशस्ते मा छित्ति  
यत्ते तपस्तस्मै ते मा वृक्षीत्याह यथायजुरेवैतत्सुभूरसि श्रेष्ठौ  
रश्मीनामायुर्धा अस्यायुर्मे धेहीत्याहाशिषमेवैतामा शास्ते प्र वा  
एषोऽस्माँल्लोकाच्चयवते यो विष्णुक्रमान्क्रमते सुवर्गाय हि लोकाय  
विष्णुक्रमाः क्रम्यन्ते ब्रह्मवादिनो वदन्ति स त्वै विष्णुक्रमान्क्रमेत य  
इमाँल्लोकान्भ्रातृव्यस्य संविद्य पुनरिमँल्लोकम्प्रत्यवरोहेदित्ये ष वा  
अस्य लोकस्य प्रत्यवरोहो यदाहेदमहममुभ्रातृव्यमाभ्यो दिग्भ्योऽस्यै  
दिव इतीमानेव लोकान्भ्रातृव्यस्य संविद्य पुनरिमँल्लोकम्प्रत्यवरोहति  
सं ज्योतिषाभूवमित्याहास्मिन्नेव लोके प्रति तिष्ठत्यै न्द्रीमावृतमन्वावर्त  
इत्याहासौ वा आदित्य इन्द्रस्तस्यैवावृतमनु पर्यावर्तते दक्षिणा पर्यावर्तते  
स्वमेव वीर्यमनु पर्यावर्तते तस्माद्दक्षिणोऽर्ध आत्मनो वीर्यावत्तरोऽथो  
आदित्यस्यैवावृतमनु पर्यावर्तते समहम्प्रजया सम्मया  
प्रजेत्याहाशिषमेवैतामा शास्ते समिद्धो अग्ने मे दीदिहि समेद्धा तै अग्ने  
दीद्यासमित्याह यथायजुरेवैत द्वसुमान्यज्ञो  
वसीयान्भूयासमित्याहाशिषमेवैतामा शास्ते बहु वै गार्हपत्यस्यान्ते  
मिश्रमिव चर्यत आग्निपावमानीभ्यां गार्हपत्यमुप तिष्ठते  
पुनात्येवाग्निम्पुनीत आत्मानं द्वाभ्याम्प्रतिष्ठित्या अग्रै गृपत् इत्याह  
यथायजुरेवैतच्छ्रुतँ हिमा इत्याह शतं त्वा हेमन्तानिन्धिषीयेति  
वावैतदाह पुत्रस्य नाम गृह्णात्यन्नादमेवैनं करोति तामाशिषमा शासे  
तन्तवे ज्योतिष्मतीमिति ब्रूयाद्यस्य पुत्रोऽजातः स्यात्तैजस्व्यैवास्य



ब्रह्मवर्चसी पुत्रो जायते तामाशिषुमा शासेऽमुष्मै ज्योतिष्मतीमिति  
 ब्रूयाद्यस्य पुत्रो जातः स्यात्तेज एवास्मिन्ब्रह्मवर्चसं दधाति यो वै  
 यज्ञम्प्रयुज्य न विमुञ्चत्यप्रतिष्ठानो वै स भवतिकस्त्वा युनक्ति स त्वा वि  
 मुञ्चत्वित्याह प्रजापतिर्वै कः प्रजापतिनैवैनं युनक्ति प्रजापतिना वि मुञ्चति  
 प्रतिष्ठित्या ईश्वरं वै व्रतमविसृष्टम्प्रदहोऽग्ने व्रतपते व्रतमचारिषमित्याह  
 व्रतमेव वि सृजते शान्त्या अप्रदाहाय पराङ्वाव यज्ञ एति न नि वर्तते  
 पुनर्यो वै यज्ञस्य पुनरालम्भं विद्वान्यजते तमभि नि वर्तते यज्ञो बभूव स  
 आ बभूवेत्याहैष वै यज्ञस्य पुनरालम्भस्तेनैवैनम्पुनरा लभते ऽनवरुद्धा  
 वा एतस्य विराडय आहिताग्निः सन्नसभः पशवः खलु वै ब्राह्मणस्य  
 सभे ष्वा प्राङुत्क्रम्य ब्रूयाद्गोमाँ अग्नेऽविमाँ अश्वी यज्ञ इत्यव सभाँ  
 रुद्धे प्र सहस्रम्पशूनांप्रोत्यास्य प्रजायां वाजी जायते ॥६॥

देव सवितुः प्र सुव यज्ञम्प्र सुव यज्ञपतिम्भगाय दिव्यो गन्धर्वः । केतूपुः  
 केतं नः पुनातु वाचस्पतिर्वाचमद्य स्वदाति नः ॥  
 इन्द्रस्य वज्रोऽसि वार्त्रघ्नस्त्वयायं वृत्रं वध्यात् ॥  
 वाजस्य नु प्रसवे मातरम्महीमदितिं नाम वचसा करामहे । यस्यामिदं  
 विश्वम्भुवनमाविवेश तस्यां नो देवः सविता धर्म साविषत् ॥  
 अप्स्वन्तरमृतमप्सु भैषजमपामुत प्रशस्तिष्वश्वा भवथ वाजिनः ॥  
 वायुर्वा त्वा मनुर्वा त्वा गन्धर्वाः सप्तर्विशतिः । ते अग्ने अश्वमायुञ्जन्ते  
 अस्मिञ्जवमादधुः ॥  
 अपां नपादाशुहेमन्य ऊर्मिः ककुद्धान्प्रतूर्तिर्वाजसातमस्तेनायं वाजँ सेत्  
 ॥

विष्णोः क्रमोऽसि विष्णोः क्रान्तमसि विष्णोर्विक्रान्तमस्य ङ्कौ

न्यङ्कावभितो रथं यौ ध्वान्तं वाताग्रमनु संचरन्तौ  
दूरेहेतिरिन्द्रियावान्पतत्री ते नोऽग्नयः पप्रयः पारयन्तु ॥७॥

देवस्याहँ सवितुः प्रसवे बृहस्पतिना वाजजिता वाजं जेषं  
देवस्याहँ सवितुः प्रसवे बृहस्पतिना वाजजिता वर्षिष्ठं नाकँ  
रुहेय मिन्द्राय वाचं वदतेन्द्रं वाजं जापयतेन्द्रो वाजमजयित् ॥  
अश्वाजनि वाजिनि वाजेषु वाजिनीवृत्यश्चान्तसमत्सु वाजय ॥  
अर्वासि सप्तिरसि वाज्यसि वाजिनो वाजं धावत मरुताम्प्रसवे जयत् वि  
योजना मिमीध्वमध्वन स्कभीत् काष्ठां गच्छत् वाजैवाजेऽवत वाजिनो  
नो धनेषु विप्रा अमृता ऋतज्ञाः ॥ अस्य मध्वः पिबत मादयध्वं तृप्ता  
यात पृथिभिर्देवयानैः ॥

ते नो अर्वन्तो हवनश्रुतो हवं विश्वै शृणवन्तु वाजिनः ॥  
मितद्रवः सहस्रसा मेधसाता सनिष्यवः । महो ये रन्तँ समिथेषु  
जध्निरे शं नो भवन्तु वाजिनो हवेषु ॥  
देवताता मितद्रवः स्वर्काः । जम्भयन्तोऽहिं वृकँ रक्षाँसि  
सनैम्यस्मद्युयवन्नमीवाः ॥  
एष स्य वाजी क्षिपुणिं तुरगयति ग्रीवायाम्बद्धो अपिकृक्ष आसनि । क्रतुं  
दधिक्रा अनु संतवीत्वत्पथामङ्काँस्यन्वापनीफणात् ॥  
उत स्मास्य द्रवतस्तुरगयतः पूर्णं न वेरनु वाति प्रगर्धिनः । श्येनस्येव  
ध्रजतो अङ्कुसम्परि दधिक्राव्णाः सहोर्जा तरित्रतः ॥  
आ मा वाजस्य प्रसवो जगम्यादा द्यावापृथिवी विश्वशम्भू । आ मा  
गन्ताम्पितरा मातरा चामा सोमो अमृतत्वार्य गम्यात् ॥  
वाजिनो वाजजितो वाजँ सरिष्यन्तो वाजं जेष्यन्तो बृहस्पतेर्भागमव

जिघ्रत वाजिनो वाजजितो वाजं ससृवांसो वाजं जिगिवांसो  
 बृहस्पतेर्भागे नि मृड्वमियं वः सा सत्या संधाभूद्यामिन्द्रैण  
 समधद्भूव मजीजिपत वनस्पतय इन्द्रं वाजं वि मुच्यध्वम् ॥८॥

क्षत्रस्योल्बमसि क्षत्रस्य योनिरसि जाय एहि सुवो रोहाव रोहाव हि  
 सुव र्हं नावुभयोः सुवो रोक्ष्यामि वाजश्च प्रसवश्चा पिजश्च क्रतुश्च सुवश्च  
 मूर्धा च व्यशिनयश्चा न्त्यायन श्रान्त्यश्च भौवनश्च भुवनश्चा धिपतिश्च ।  
 आयुर्यज्ञेन कल्पताम्प्राणो यज्ञेन कल्पता मपानो यज्ञेन कल्पतां व्यानो  
 यज्ञेन कल्पतां चक्षुर्यज्ञेन कल्पतां श्रोत्रं यज्ञेन कल्पताम्मनो यज्ञेन  
 कल्पतां वाग्यज्ञेन कल्पता मात्मा यज्ञेन कल्पतां यज्ञो यज्ञेन कल्पतां  
 सुवर्देवां अगन्मामृता अभूम प्रजापतेः प्रजा अभूम समहम्प्रजया सम्मया  
 प्रजा समहं रायस्पोषेण सम्मया रायस्पोषोऽन्नाय त्वान्नाद्याय त्वा  
 वाजाय त्वा वाजजित्यायै त्वामृतमसि पुष्टिरसि प्रजननमसि ॥९॥

वाजस्येमम्प्रसवः सुषुवे अग्ने सोमं राजानमोषधीष्वप्सु । ता  
 अस्मभ्यम्मधुमतीर्भवन्तु वयं राष्ट्रे जाग्रियाम पुरोहिताः ॥  
 वाजस्येदम्प्रसव आ बभूवेमा च विश्वा भुवनानि सर्वतः । स  
 विराजम्पर्येति प्रजानन्प्रजम्पुष्टिं वर्धयमानो अस्मे ॥  
 वाजस्येमाम्प्रसवः शिश्रिये दिवमिमा च विश्वा भुवनानि सम्राट् ।  
 अदित्सन्तं दापयतु प्रजानन्नयिं च नः सर्ववीरां नि यच्छतु ॥  
 अग्ने अच्छा वदेह नः प्रति नः सुमना भव । प्र शौ यच्छ भुवस्पते धनदा  
 असि नस्त्वम् ॥

प्र शौ यच्छत्वयमा प्र भगुः प्र बृहस्पतिः । प्र देवाः प्रोत सूनृता प्र

वाग्देवी ददातु नः ॥

अ॒र्य॒म॒ण॒म्बृ॒ह॒स्प॒ति॒मिन्द्रं॑ दानाय चोदय । वाचं॑ विष्णुं॑ सरस्वतीं॑  
सवितारं॑ च वाजिनम् ॥

सोमं॑ राजानं॑ वरुणम॒ग्नि॒मन्वार॑भामहे । आ॒दि॒त्या॒न्विष्णुं॑ सूर्य॒म्ब्र॒ह्माणं॑  
च बृहस्पतिम् ।

देवस्य॑ त्वा सवितुः प्रस॒वैऽश्विनो॑र्बा॒हु॒भ्या॒म्पू॒ष्णो हस्ता॑भ्यां॑ सरस्वत्यै  
वाचो॑ य॒न्तुर्य॒न्त्रेणा॑ग्नेस्त्वा॒ साम्रा॑ज्येना॒भि षिञ्चामी॑ न्द्रस्य॑ बृहस्पते॑स्त्वा  
साम्रा॑ज्येना॒भि षिञ्चामि ॥१०॥

अ॒ग्नि॒रेका॑क्षरेण॒ वाच॑मुद॒जय॑ द॒श्विनो॑ द्व्यक्षरेण प्राणा॒पाना॑वुद॒जयतां॑  
विष्णु॑र्यक्षरेण॒ त्री॒न्लो॒कानु॑द॒जय॑त्सोम॒श्चतुर॑क्षरेण॒ चतु॑ष्पदः  
प॒शूनु॑द॒जय॑त्पूषा पञ्चाक्षरेण॒ प॒ङ्क्ति॑मुद॒जय॑त्धा॒ता षड॑क्षरेण॒  
षड॑तूनुद॒जय॑न्म॒रुतः॑ स॒प्ताक्ष॑रेण स॒प्तप॑दां॑  
शक्व॑रीमुद॒जय॑न्बृहस्पति॒रष्टा॑क्षरेण॒ गाय॑त्रीमुद॒जय॑न्मि॒त्रो नवा॑क्षरेण  
त्रि॒वृत्तं॑ स्तोम॒मुद॒जय॑द्वरु॒णो दशा॑क्षरेण॒ वि॒राज॑मुद॒जय॑दिन्द्र  
एका॑दशाक्षरेण॒ त्रि॒ष्टुभ॑मुद॒जय॑द्विश्वे॑ दे॒वा द्वाद॑शाक्षरेण॒  
जग॑तीमुद॒जय॑न्वस॒वस्त्रयो॑दशाक्षरेण॒ त्रयो॑दशं॑  
स्तोम॑मुद॒जय॑न्नु॒द्राश्चतु॑र्दशाक्षरेण॒ चतु॑र्दशं॑ स्तोम॑मुद॒जय॑न्ना॒दि॒त्याः  
पञ्च॑दशाक्षरेण॒ पञ्च॑दशं॑ स्तोम॑मुद॒जय॑न्नदि॒तिः षोड॑शाक्षरेण॒ षोड॑शं॑  
स्तोम॑मुद॒जय॑न्प्रजापतिः स॒प्तद॑शाक्षरेण॒ सप्त॑दशं॑ स्तोम॑मुद॒जय॑त् ॥११॥

उ॒प॒या॒म॒गृ॒हीतो॑ऽसि नृषदं॑ त्वा द्रुषदं॑भुवन॒सद॑मिन्द्राय जुष्टं॑ गृह्णाम्ये॒ष ते॑  
यो॒नि॒रिन्द्राय॑ त्वो॒प॒या॒म॒गृ॒हीतो॑ऽस्यप्सुषदं॑ त्वा घृत॒सद॑म्व्योम॒सद॑मिन्द्राय

जुष्टं गृह्णाम्येष ते योनिरिन्द्राय त्वोपयामगृहीतोऽसि पृथिविषदं  
त्वान्तरिक्षसदम्नाकसदमिन्द्राय जुष्टं गृह्णाम्येष ते योनिरिन्द्राय त्वा ये  
ग्रहाः पञ्चजनीना येषां तिस्रः परमजाः । दैव्यः कोशः समुब्जितः ।  
तेषां विशिप्रियाणामिषमूर्जं समग्रभीमेष ते योनिरिन्द्राय त्वा ॥  
अपां रसमुद्वयसुं सूर्यरश्मिं समाभृतम् । अपां रसस्य यो रसस्तं  
वो गृह्णाम्युत्तममेष ते योनिरिन्द्राय त्वा ॥  
अथा विष्टा जनयन्कर्वराणि स हि घृणिरुर्वराय गातुः । स  
प्रत्युदैद्धरुणो मध्वो अग्रं स्वायां यत्तनुवां तनूमैरयत ।  
उपयामगृहीतोऽसि प्रजापतये त्वा जुष्टं गृह्णाम्येष ते योनिः प्रजापतये  
त्वा ॥१२॥

अन्वह मासा अन्विद्वनान्यन्वोषधीरनु पर्वतासः । अन्विन्द्रुं रोदसी  
वावशाने अन्वापो अजिहतु जायमानम् ॥  
अनु ते दायि मह इन्द्रियाय सत्रा ते विश्वमनु वृत्रहत्ये । अनु क्षत्रमनु  
सहो यजत्रेन्द्र देवेभिरनु ते नृषह्ये ।  
इन्द्राणीमासु नारिषु सुपत्नीमहमश्रवम् । न ह्यस्या अपरं च न जरसा  
मरते पतिः ॥  
नाहमिन्द्राणि रारण सख्युर्वृषाकपेऋते । यस्येदमप्यं हविः प्रियं देवेषु  
गच्छति ॥  
यो जात एव प्रथमो मनस्वान्देवो देवान्कृतुना पर्यभूषत् । यस्य  
शुष्माद्रोदसी अभ्यसेतामृणस्य मृहा स जनासु इन्द्रः ॥  
आ ते मह इन्द्रोत्युग्र समन्यवो यत्समरन्त सेनाः । पताति दिद्युन्नर्यस्य  
बाहुवोर्मा ते मनो विष्वद्रियुग्वि चारीत् ॥

मा नो मर्धीरा भरा दद्धि तन्नः प्र दाशुषे दातवे भूरि यत्ते । नव्ये द्वेषो  
 शस्ते अस्मिन्त उक्थे प्र ब्रवाम वयमिन्द्र स्तुवन्तः ॥  
 आ तू भर माकिरेतत्परिं ष्टाद्विद्या हि त्वा वसुपतिं वसूनाम् । इन्द्र यत्ते  
 माहिंनं दत्रमस्त्यस्मभ्यं तद्धर्यश्च प्र यन्धि ॥  
 प्रदातारं हवामह इन्द्रमा हविषा वयम् । उभा हि हस्ता वसुना  
 पूणस्वा प्र यच्छ दक्षिणादोत सव्यात् ॥  
 प्रदाता वज्री वृषभस्तुराषाट्छुष्मी राजा वृत्रहा सोमपावा । अस्मिन्यज्ञे  
 बर्हिष्या निषद्याथा भव यजमानाय शं योः ॥  
 इन्द्रः सुत्रामा स्ववां अवीभिः सुमृडीको भवतु विश्ववेदाः । बाधतां  
 द्वेषो अभयं कृणोतु सुवीर्यस्य पतयः स्याम ॥  
 तस्य वयं सुमतौ यज्ञियस्यापि भद्रे सौमनसे स्याम । स सुत्रामा  
 स्ववां इन्द्रो अस्मे आराञ्चिदद्वेषः सनुतर्युयोतु ॥  
 रेवतीर्नः सध्रमाद् इन्द्रे सन्तु तुविवाजाः । क्षुमन्तो याभिर्मदम ॥  
 प्रो ष्वस्मै पुरोरथमिन्द्राय शूषमर्चत । अभीकै चिदु लोककृत्संगे समत्सु  
 वृत्रहा । अस्माकम्बोधि चोदिता नभन्तामन्युकेषाम् । ज्याका अधि  
 धन्वसु ॥१३॥

इति प्रथमकारण्डे सप्तमः प्रपाठकः ७

अथ प्रथमकारण्डे अष्टमः प्रपाठकः ८

अनुमत्यै पुरोडाशमृष्टाकपालं निर्वपति धेनुर्दक्षिणा ये प्रत्यञ्चः शम्याया  
 अवशीर्यन्ते तं नैर्ऋतमेककपालं कृष्णं वासः कृष्णतूषं दक्षिणा वीहि  
 स्वाहाहृतिं जुषाण एष तै निर्ऋते भागो भूते हविष्मत्यसि मुञ्चेममं हंसः  
 स्वाहा नमो य इदं चकारा दित्यं चरुं निर्वपति वरो

दक्षिणाग्नावैष्णवमेकादशकपालं वामनो वृही  
दक्षिणाग्नीषोमीयमेकादशकपालं हिरण्यं  
दक्षिणैन्द्रमेकादशकपालमृषभो वृही दक्षिणाग्नेयमष्टाकपालमैन्द्रं  
दध्यृषभो वृही दक्षिणैन्द्राग्रं द्वादशकपालं वैश्वदेवं चरुम्रथमजो वृत्सो  
दक्षिणा सौम्यं श्यामाकं चरुं वासो दक्षिणा सरस्वत्यै चरुं सरस्वते  
चरुमिथुनौ गावौ दक्षिणा ॥१॥

आग्नेयमष्टाकपालं निर्वपति सौम्यं चरुं सावित्रं द्वादशकपालं  
सारस्वतं चरुमपौष्णं चरुममारुतं सप्तकपालं वैश्वदेवीमामिक्षां  
द्यावापृथिव्यमेककपालम् ॥२॥

ऐन्द्राग्रमेकादशकपालममारुतीमामिक्षां वारुणीमामिक्षां कायमेककपालं  
प्रघास्यान्हवामहे मरुतौ यज्ञवाहसः करम्भेण सजोषसः ॥  
मो षू ण इन्द्र पृत्सु देवास्तु स्म ते शुष्मिन्नव्या । मही ह्यस्य मीढुषौ  
यव्या । हविष्मतो मरुतो वन्दते गीः ॥  
यद्ग्रामे यदरण्ये यत्सभायां यदिन्द्रिये । यच्छूद्रे यदर्य एनश्चकृमा वयम्  
। यदेकस्याधि धर्मणि तस्यावयजनमसि स्वाहा ॥  
अक्रन्कर्म कर्मकृतः सह वाचा मयोभुवा । देवेभ्यः कर्म कृत्वास्तम्प्रेतं  
सुदानवः ॥३॥

अग्रयेऽनीकवते पुरोडाशमष्टाकपालमिर्वपति साकं सूर्येणोद्यता मरुद्भ्यः  
सांतपनेभ्यो मध्यन्दिने चरुमरुद्भ्यो गृहमेधिभ्यः सर्वासां दुग्धे सायं चरुं  
पूर्णां देविं परां पत सुपूर्णां पुनरा पत । वस्त्रेव वि क्रीणावहा

इषमूर्जं शतक्रतो ॥

देहि मे ददामि ते नि मे धेहि नि ते दधे । निहारमिन्नि मे हरा निहारं नि  
हरामि ते ॥

मरुद्भ्यः क्रीडिभ्यः पुरोडाशं सप्तकपालं निर्वपति साकं  
सूर्येणोद्यताग्नेयमष्टाकपालं निर्वपति सौम्यं चरुं सावित्रं द्वादशकपालं  
सारस्वतं चरुम्पौष्णं चरुमैन्द्राग्रमेकादशकपालमैन्द्रं चरुं  
वैश्वकर्माणमेककपालम् ॥४॥

सोमाय पितृमते पुरोडाशं षट्कपालं निर्वपति पितृभ्यो बर्हिषद्भ्यो धानाः  
पितृभ्योऽग्निष्वान्तेभ्योऽभिवान्यायै दुग्धे मन्थमेतत् तत् ये च  
त्वामन्वेतत् पितामह प्रपितामह ये च त्वामन्वत्र पितरो  
यथाभागम्मन्दध्वं सुसंदृशं त्वा वयम्मघवन्मन्दिषीमहि । प्र  
नूनम्पूर्णवन्धुरः स्तुतो यासि वशां अनु । योजा न्विन्द्र ते हरी ॥  
अक्षन्मीमदन्त ह्यव प्रिया अधूषत । अस्तौषत स्वभानवो विप्रा  
नविष्टया मती योजा न्विन्द्र ते हरी ॥

अक्षन्पितरोऽमीमदन्त पितरोऽतीतृपन्त पितरोऽमीमृजन्त पितरः  
परैत पितरः सोम्या गम्भीरैः पृथिभिः पूव्यैः । अथा पितृन्त्सुविदत्रां  
अपीत यमेन ये सधमादम्मदन्ति ॥

मनो न्वा हुवामहे नाराशं सेन स्तोमेन पितृणां च मन्मभिः ।  
आ न एतु मनः पुनः क्रत्वे दक्षाय जीवसे । ज्योक्च सूर्यं दृशे ॥  
पुनर्नः पितरो मनो ददातु दैव्यो जनः । जीवं व्रातं सचेमहि ॥  
यदन्तरिक्षमृथिवीमुत द्यां यन्मातरंम्पितरं वा जिहिंसिम । अग्निर्मा  
तस्मादेनसो गार्हपत्यः प्र मुञ्चतु दुरिता यानि चकृम करोतु मामनेनसम्  
॥५॥



प्रतिपूरुषमेककपालान्निर्वपत्येकमतिरिक्तं यावन्तो गृह्याः स्मस्तेभ्यः  
 कर्मकरं पशूनाँ शर्मासि शर्म यजमानस्य शर्म मे यच्छैक एव रुद्रो न  
 द्वितीयाय तस्थ आखुस्तै रुद्र पशुस्तं जुषस्वै ष तै रुद्र भागः सह  
 स्वस्त्राम्बिकया तं जुषस्व भेषजं गवेऽश्वाय पुरुषाय भेषज मथौ  
 अस्मभ्यम्भेषजँ सुभेषजं यथासति सुगम्भेषाय मेष्या अवाम्ब  
 रुद्रमदिमह्यव देवं त्र्यम्बकम् । यथा नः श्रेयसः कर्द्यथा नो वस्यसः  
 कर्द्यथा नः पशुमतः कर्द्यथा नो व्यवसाययात् ॥  
 त्र्यम्बकं यजामहे सुगन्धिम्पुष्टिवर्धनम् । उर्वारुकमिव  
 बन्धनान्मृत्योर्मुक्षीय मामृतात् ।  
 एष तै रुद्र भागस्तं जुषस्व तेनावसेन पुरो मूर्जवतोऽतीह्यवततधन्वा  
 पिनाकहस्तः कृत्तिवासाः ॥६॥

ऐन्द्राग्रं द्वादशकपालं वैश्वदेवं चरुमिन्द्राय शुनासीराय पुरोडाशं  
 द्वादशकपालं वायव्यम्पयः सौर्यमेककपालं द्वादशगवँ सीरं  
 दक्षिणाग्नेयमष्टाकपालं निर्वपति रौद्रं गावीधुकं चरुमैन्द्रं दधि वारुणं  
 यवमयं चरुं वहिनी धेनुर्दक्षिणा ये देवाः पुरःसदोऽग्निनेत्रा दक्षिणसदो  
 यमनेत्राः पश्चात्सदः सवितृनेत्रा उत्तरसदो वरुणनेत्रा उपरिषदो  
 बृहस्पतिनेत्रा रक्षोहणस्ते नः पान्तु ते नोऽवन्तु तेभ्यो नमस्तेभ्यः स्वाहा  
 समूढँ रक्षः संदग्धँ रक्ष इदमहँ रक्षोऽभि सं दहाम्य ग्रये रक्षोघ्ने  
 स्वाहा यमार्य सवित्रे वरुणाय बृहस्पतये दुर्वस्वते रक्षोघ्ने स्वाहा  
 प्रष्टिवाही रथो दक्षिणा देवस्य त्वा सवितुः प्रसवैऽश्विनौर्बाहुभ्याम्पूष्णो  
 हस्ताभ्याँ रक्षसो वधं जुहोमि हतँ रक्षोऽर्वधिष्म रक्षो यद्वस्ते  
 तदक्षिणा ॥७॥

धात्रे पुरोडाशं द्वादशकपालं निर्वपत्यनुमत्यै चरुं राकायै चरुं  
सिनीवाल्क्यै चरुं कुह्यै चरुं मिथुनौ गावौ  
दक्षिणाग्रावैष्णवमेकादशकपालं निर्वपत्यैन्द्रावैष्णवमेकादशकपालं  
वैष्णवं त्रिकपालं वामनो वही दक्षिणाग्रीषोमीयमेकादशकपालं  
निर्वपतीन्द्रासोमीयमेकादशकपालं सौम्यं चरुं बभ्रुर्दक्षिणा सोमापौष्णं  
चरुं निर्वपत्यैन्द्रापौष्णं चरुं पौष्णं चरुं श्यामो दक्षिणा वैश्वानरं  
द्वादशकपालं निर्वपति हिरण्यं दक्षिणा वारुणं यवमयं चरुमश्वो दक्षिणा  
॥८॥

बार्हस्पत्यं चरुं निर्वपति ब्रह्मणो गृहे शितिपृष्ठो  
दक्षिणैन्द्रमेकादशकपालं राजन्यस्य गृहे ऋषभो दक्षिणादित्यं  
चरुम्महिष्यै गृहे धेनुर्दक्षिणा नैर्ऋतं चरुम्परिवृक्त्यै गृहे कृष्णानां व्रीहीणां  
नखनिर्भिन्नं कृष्णा कूटा दक्षिणाग्नेयमष्टाकपालं सेनान्यो गृहे हिरण्यं  
दक्षिणा वारुणं दशकपालं सूतस्य गृहे महानिरष्टो दक्षिणा  
मारुतं सप्तकपालं ग्रामण्यो गृहे पृश्निर्दक्षिणा सावित्रं द्वादशकपालं  
क्षत्रुर्गृह उपध्वस्तो दक्षिणाश्विनं द्विकपालं संग्रहीतुर्गृहे संवात्यौ  
दक्षिणा पौष्णं चरुम्भागदुघस्य गृहे श्यामो दक्षिणा  
रौद्रं गावीधुकं चरुमक्षावापस्य गृहे शबल उद्गारो दक्षिणे न्द्राय सुत्राम्णो  
पुरोडाशमेकादशकपालम्प्रति निर्वपतीन्द्राया होमुचेऽयं नो राजा वृत्रहा  
राजा भूत्वा वृत्रं वध्या नैत्राबार्हस्पत्यम्भवति श्वेतार्यै श्वेतवत्सायै दुग्धे  
स्वयम्मूर्ते स्वयम्मथित आज्य आश्वत्थे पात्रे चतुःस्रक्तौ स्वयमवपन्नायै  
शाखायै कर्णाश्चाकर्णाश्च तराडुलान्वि चिनुयाद्ये कर्णाः स पर्यसि

बार्हस्पत्यो येऽकर्णाः स आज्ये मैत्रः स्वयंकृता वेदिर्भवति  
स्वयंदिनम्बर्हिः स्वयंकृत इध्मः सैव श्वेता श्वेतवत्सा दक्षिणा ॥६॥

अग्रये गृहपतये पुरोडाशमष्टाकपालं निर्वपति कृष्णानां व्रीहीणां  
सोमाय वनस्पतये श्यामाकं चरुं सवित्रे सत्यप्रसवाय पुरोडाशं  
द्वादशकपालमाशूनां व्रीहीणां रुद्राय पशुपतये गावीधुकं  
चरुम्बृहस्पतये वाचस्पतये नैवारं चरुमिन्द्राय ज्येष्ठाय  
पुरोडाशमेकादशकपालम्हाव्रीहीणाम्मित्राय सत्यायाम्बानां चरुं  
वरुणाय धर्मपतये यवमयं चरुं सविता त्वा प्रसवानां  
सुवतामग्निर्गृहपतीनां सोमो वनस्पतीनां रुद्रः पशूनां  
बृहस्पतिर्वाचामिन्द्रो ज्येष्ठानाम्मित्रः सत्यानां वरुणो धर्मपतीनां ये देवा  
देवसुवः स्थ त इममामुष्यायणमनमित्राय सुवध्वम्महते क्षत्राय महत  
आधिपत्याय महते जानराज्यायै ष वो भरता राजा  
सोमोऽस्माकम्ब्राह्मणाणां राजा प्रति त्यन्नाम राज्यमधायि स्वां तनुवं  
वरुणो अशिश्चेच्छुचैर्मित्रस्य वत्या अभूमामन्महि महत ऋतस्य नाम सर्वे  
वाता वरुणस्याभूवन्वि मित्र एवैररातिमतारीदसूषुदन्त यज्ञिया ऋतेन व्यु  
त्रितो जरिमाणं न आनड्विष्णोः क्रमोऽसि विष्णोः क्रान्तमसि  
विष्णोर्विक्रान्तमसि ॥१०॥

अर्थेतःस्था पाम्पतिरसि वृषास्यूर्मि वृषसेनोऽसि व्रजक्षितःस्थ  
मरुतामोर्जःस्थ सूर्यवर्चसःस्थ सूर्यत्वचसःस्थ मान्दाःस्थ वाशाःस्थ  
शक्वरीःस्थ विश्वभृतःस्थ जनभृतःस्था ग्रेस्तैजस्याःस्था पामोषधीनां  
रसःस्था पो देवीर्मधुमतीरगृह्णन्नूर्जस्वती राजसूयाय चितानाः ।

याभिर्मित्रावरुणावभ्यषिञ्चन्याभिरिन्द्रमनयन्नत्यरातीः ॥

राष्ट्रदाःस्थ राष्ट्रं दत्त स्वाहा राष्ट्रदाःस्थ राष्ट्रमुष्मै दत्त ॥११॥

देवीरापः सम्मधुमतीर्मधुमतीभिः सृज्यध्वम्महि वर्चः क्षत्रियाय वन्वाना  
अनाधृष्टाः सीदतोर्जस्वतीर्महि वर्चः क्षत्रियाय दधती रनिभृष्टमसि वाचो  
बन्धुस्तपोजाः सोमस्य दात्रमसि शुक्रा वः शुक्रेशोत्पुनामि  
चन्द्राश्चन्द्रेणामृता अमृतेन स्वाहा राजसूयाय चितानाः ॥

सधमादौ द्युमिनीरूर्ज एता अनिभृष्टा अपस्युवो वसानः । पस्त्यासु चक्रे  
वरुणः सधस्थमपाँ शिशुर्मातृतमास्वन्तः ॥

क्षत्रस्योल्बमसि क्षत्रस्य योनिरस्या विन्नो अग्निर्गृहपति राविन्न इन्द्रो  
वृद्धश्रवा आविन्नः पूषा विश्ववेदा आविन्नो मित्रावरुणावृतावृधा वाविन्ने  
द्यावापृथिवी धृतव्रते आविन्ना

देव्यदितिर्विश्वरूप्या विन्नोऽयमसावामुष्यायणोऽस्यां विश्वस्मिन्नाष्ट्रे  
महते क्षत्राय महत आधिपत्याय महते जानराज्या यैष वो भरता राजा  
सोमोऽस्माकम्ब्राह्मणानाँ राजेन्द्रस्य वज्रोऽसि वार्त्रघ्नस्त्वयायं वृत्रं  
वध्या च्छत्रुबाधनाःस्थ पात मा प्रत्यञ्चम्पात मा तिर्यञ्चमन्वञ्चम्मा पात  
दिग्भ्यो मा पात विश्वाभ्यो मा नाष्ट्राभ्यः पात हिरण्यवर्णावुषसां  
विरोकेऽयस्थूणावुदितौ सूर्यस्यारौहतं वरुण मित्रं गर्तं ततश्चक्ष्वाथामदितिं  
दितिं च ॥१२॥

समिधुमा तिष्ठ गायत्री त्वा छन्दसामवतु त्रिवृत्स्तोमो रथंतरँ  
सामाग्निर्देवता ब्रह्म द्रविण मुग्रामा तिष्ठ त्रिष्टुप्त्वा छन्दसामवतु  
पञ्चदशस्तोमो बृहत्सामेन्द्रो देवता क्षत्रं द्रविणं विराजुमा तिष्ठ जगती त्वा

छन्दसामवतु सप्तदशस्तोमो वैरूपं सामं मरुतो देवता  
विड्द्रविण मुदीचीमा तिष्ठानुष्टुप्त्वा छन्दसामवत्वेकविंशस्तोमो  
वैराजं सामं मित्रावरुणौ देवता बलं द्रविण मूर्ध्वामा तिष्ठ पङ्क्तिस्त्वा  
छन्दसामवतु त्रिणवत्रयस्त्रिंशौ स्तोमो शाक्वरैवते सामनी  
बृहस्पतिर्देवता वर्चो द्रविण मी दृङ्चा न्यादृङ्चै तादृङ्च प्रतिदृङ्च  
मितश्च सम्मितश्च सभराः शुक्रज्योतिश्च चित्रज्योतिश्च सत्यज्योतिश्च  
ज्योतिष्मांश्च सत्यश्च तृपाश्चात्यंहाः ।

अग्रये स्वाहा सोमाय स्वाहा सवित्रे स्वाहा सरस्वत्यै स्वाहा पूष्णे  
स्वाहा बृहस्पतये स्वाहेन्द्राय स्वाहा घोषाय स्वाहा श्लोकाय  
स्वाहांशाय स्वाहा भगाय स्वाहा क्षेत्रस्य पतये स्वाहा  
पृथिव्यै स्वाहान्तरिक्षाय स्वाहा दिवे स्वाहा सूर्याय स्वाहा चन्द्रमसे  
स्वाहा नक्षत्रेभ्यः स्वाहाद्भ्यः स्वाहौषधीभ्यः स्वाहा वनस्पतिभ्यः स्वाहा  
चराचरेभ्यः स्वाहा परिप्लवेभ्यः स्वाहा सरीसृपेभ्यः स्वाहा ॥१३॥

सोमस्य त्विषिरसि तवैव मे त्विषिर्भूया दमृतमसि मृत्योर्मा पाहि  
दिद्योन्मा पाह्य वैष्टा दन्दशूका निरस्तं नमुचेः शिरः ॥  
सोमो राजा वरुणो देवा धर्मसुर्वश्च ये । ते ते वाचं सुवन्तां ते ते  
प्राणं सुवन्तां ते ते चक्षुः सुवन्तां ते ते श्रोत्रं सुवन्तां सोमस्य त्वा  
द्युम्नेनाभि षिञ्चाम्यग्नेः तेजसा सूर्यस्य वर्चसेन्द्रस्येन्द्रियेण  
मित्रावरुणयोर्वीर्येण मरुतामोजसा क्षत्राणां क्षत्रपति रस्यति दिवस्पाहि  
समाववृत्रन्नधरागुदीचीरहिम्बुधियमनु संचरन्ती स्ताः पर्वतस्य वृषभस्य  
पृष्ठे नावश्चरन्ति स्वसिचं इयानाः ॥  
रुद्र यत्ते क्रयी परं नाम तस्मै हुतमसि यमेष्टमसि ।

प्रजापते न त्वदेतान्यन्यो विश्वा जातानि परि ता बभूव । यत्कामास्ते  
जुहुमस्तन्नो अस्तु वयं स्याम पतयो रयीणाम् ॥१४॥

इन्द्रस्य वज्रोऽसि वार्त्रघ्नस्त्वयायं वृत्रं वध्या मित्रावरुणयोस्त्वा  
प्रशास्त्रोः प्रशिषा युनज्मि यज्ञस्य योगेन विष्णोः क्रमोऽसि विष्णोः  
क्रान्तमसि विष्णोर्विक्रान्तमसि मरुताम्प्रसवे जैषमा तम्मनः  
समहमिन्द्रियेण वीर्येण पशूनामन्युरसि तवैव मे मन्युर्भूया नमो मात्रे  
पृथिव्यै माहम्मातरम्पृथिवीं हिंसिषम्मा मां माता पृथिवी  
हिंसी दियदस्यायुरस्यायुर्मे धेह्युर्गस्यूर्जमे धेहि युङ्ङसि वर्चोऽसि  
वर्चो मयि धेह्युर्ग्रये गृहपतये स्वाहा सोमाय वनस्पतये स्वाहेन्द्रस्य  
बलाय स्वाहा मरुतामोर्जसे स्वाहा हंसः शुचिषद्वसुरन्तरिक्षसद्धोता  
वेदिषदतिथिर्दुरोणसत् । नृषद्वरसदृतसद्वयोमसदब्जा गोजा ऋतजा  
अद्रिजा ऋतम्बृहत् ॥१५॥

मित्रोऽसि वरुणोऽसि समहं विश्वैर्देवैः क्षत्रस्य नाभिरसि क्षत्रस्य योनिरसि  
स्योनामा सीद सुषदामा सीद मा त्वा हिंसीन्मा मां हिंसी निषसाद  
धृतव्रतो वरुणः पुस्त्यास्वा साम्राज्याय सुक्रतुर्ब्रह्माइन्त्वं राजन्ब्रह्मासि  
सवितासि सत्यसवो ब्रह्माइन्त्वं राजन्ब्रह्मासीन्द्रोऽसि सत्यौजा  
ब्रह्माइन्त्वं राजन्ब्रह्मासि मित्रोऽसि सुशेवो ब्रह्माइन्त्वं राजन्ब्रह्मासि  
वरुणोऽसि सत्यधर्मेन्द्रस्य वज्रोऽसि वार्त्रघ्नस्तेन मे रध्यु दिशोऽर्भ्ययं  
राजाभूत्सुश्लोकाँइ सुमङ्गलाँइ सत्यराजाइन् ॥  
अपां नष्ट्रे स्वाहो जो नष्ट्रे स्वाहाऽग्रये गृहपतये स्वाहा ॥१६॥

आग्नेयमष्टाकपालं निर्वपति हिरण्यं दक्षिणा सारस्वतं चरुं वत्सतरी  
 दक्षिणा सावित्रं द्वादशकपालमुपध्वस्तो दक्षिणा पौष्णं चरुं श्यामो  
 दक्षिणा बार्हस्पत्यं चरुं शितिपृष्ठो दक्षिणैन्द्रमेकादशकपालमृषभो  
 दक्षिणा वारुणं दशकपालमहानिरष्टो दक्षिणा सौम्यं चरुम्बभ्रुर्दक्षिणा  
 त्वाष्ट्रमष्टाकपालं शुगठो दक्षिणा वैष्णवं त्रिकपालं वामनो दक्षिणा  
 ॥१७॥

सृद्यो दीक्षयन्ति सृद्यः सोमं क्रीणन्ति पुण्डरिस्रजाम्प्र यच्छति  
 दशभिर्वत्सतरैः सोमं क्रीणाति दशपेयो भवति शतम्ब्राह्मणाः पिबन्ति  
 सप्तदशं स्तोत्रम्भवति प्राक्शावध्वर्यवै ददाति स्रजमुद्गात्रे रुक्मं  
 होत्रेऽश्वम्प्रस्तोतृप्रतिहृत्भ्यां द्वादश पष्ठौहीर्ब्रह्मणो  
 वशाम्मैत्रावरुणाय षभम्ब्राह्मणाच्छुंसिने वाससी नेष्टापोतृभ्यां स्थूरिं  
 यवाचितमच्छावाकाया नड्वाहमग्नीधे भार्गवो होता भवति  
 श्रायन्तीयम्ब्रह्मसामम्भवति वारवन्तीयमग्निष्टोमसामं सारस्वतीरपो  
 गृह्णाति ॥१८॥

आग्नेयमष्टाकपालं निर्वपति हिरण्यं दक्षिणैन्द्रमेकादशकपालमृषभो  
 दक्षिणा वैश्वदेवं चरुम्पिशंगी पष्ठौही दक्षिणा मैत्रावरुणीमामिक्षां वशा  
 दक्षिणा बार्हस्पत्यं चरुं शितिपृष्ठो दक्षिणादित्याम्मल्हां गर्भिणीमा  
 लभते मारुतीम्पृश्निम्पष्ठौही म श्विभ्याम्पूष्णे पुरोडाशं द्वादशकपालं  
 निर्वपति सरस्वते सत्यवाचै चरुं सवित्रे सत्यप्रसवाय पुरोडाशं  
 द्वादशकपालं तिसृधन्वं शुष्कदृतिर्दक्षिणा ॥१९॥

आग्नेयमष्टाकपालं निर्वपति सौम्यं चरुं सावित्रं द्वादशकपालं  
बार्हस्पत्यं चरुं त्वाष्ट्रमष्टाकपालं वैश्वानरं द्वादशकपालं दक्षिणो  
रथवाहनवाहो दक्षिणा सारस्वतं चरुं निर्वपति पौष्णं चरुं मैत्रं चरुं वारुणं  
चरुं क्षैत्रपत्यं चरुमादित्यं चरुमुत्तरो रथवाहनवाहो दक्षिणा ॥२०॥

स्वाद्धीं त्वा स्वादुना तीव्रां तीव्रेणामृतामृतेन सृजामि स सोमैनु  
सोमोऽस्यश्विभ्याम्पच्यस्व सरस्वत्यै पच्यस्वेन्द्राय सुत्राम्णौ पच्यस्व पुनातु  
ते परिस्नुतं सोमं सूर्यस्य दुहिता । वारैण शश्वता तना ॥

वायुः पूतः पवित्रेण प्रत्यङ्गसोमो अतिद्रुतः । इन्द्रस्य युज्यः सर्वा ॥  
कुविदङ्ग यवमन्तो यवं चिद्यथा दान्त्यनुपूर्वं वियूय । इहेहैषां कृणुत  
भोजनानि ये बर्हिषो नमोवृक्तिं न जग्मुः ॥

आश्विनं धूम्रमा लभते सारस्वतम्पेषमैन्द्रमृषभ मैन्द्रमेकादशकपालं  
निर्वपति सावित्रं द्वादशकपालं वारुणं दशकपालं  
सोमप्रतीकाः पितरस्तृष्णुत वड्बा दक्षिणा ॥२१॥

अग्नाविष्णु महि तद्वाम्महित्वं वीतं घृतस्य गुह्यानि नाम । दमैदमे सप्त  
रत्ना दधाना प्रति वां जिह्वा घृतमा चरणयेत् ॥

अग्नाविष्णु महि धाम प्रियं वां वीथो घृतस्य गुह्या जुषाणा । दमैदमे  
सुष्टुतीर्वावृधाना प्रति वां जिह्वा घृतमुच्चरणयेत् ॥

प्र णौ देवी सरस्वती वाजैभिर्वाजिनीवती । धीनामवित्र्यवतु ॥

आ नो दिवो बृहतः पर्वतादा सरस्वती यजता गन्तु यज्ञम् । हवं देवी  
जुजुषाणा घृताची शग्मां नो वाचमुशती शृणोतु ॥

बृहस्पते जुषस्व नो हव्यानि विश्वदेव्य । रास्व रत्नानि दाशुषे ॥



एवा पित्रे विश्वदेवाय वृष्णे यज्ञैर्विधेम नमसा हविर्भिः । बृहस्पते  
 सुप्रजा वीरवन्तो वयं स्याम पतयो रयीणाम् ॥  
 बृहस्पते अति यदर्यो अर्हाद्युमद्विभाति क्रतुमज्जनैषु ।  
 यद्दीदयच्छवसर्तप्रजात् तदस्मासु द्रविणं धेहि चित्रम् ॥  
 आ नो मित्रावरुणा घृतैर्गव्यूतिमुक्षतम् । मध्वा रजांसि सुक्रतू ॥  
 प्र ब्राहवांसिसृतं जीवसे न आ नो गव्यूतिमुक्षतं घृतेन । आ नो जनै  
 श्रवयतं युवाना श्रुतम्मै मित्रावरुणा हवेमा ॥  
 अग्निं वः पूर्व्यं गिरा देवमीडे वसूनाम् । सपर्यन्तः पुरुप्रियम्नित्रं न  
 क्षेत्रसाधसम् ॥  
 मक्षू देववतो रथः शूरो वा पृत्सु कासु चित् । देवानां य इन्मनो  
 यजमान इयक्षत्यभीदयज्वनो भुवत् ॥  
 न यजमान रिष्यसि न सुन्वान् न देवयो । असदत्र सुवीर्यमुत  
 त्यदाश्वश्चियम् । नक्लिष्टं कर्मणा नशन्न प्र योषन्न योषति ॥  
 उपं क्षरन्ति सिन्धवो मयोभुव ईजानं च यद्वयमाणं च धेनवः । पृणन्तं च  
 पपुंरिं च श्रवस्यवो घृतस्य धारा उपं यन्ति विश्वतः ॥  
 सोमारुद्रा वि वृहतं विषूचीममीवा या नो गर्यमाविवेश । आरे बाधेथां  
 निर्ऋतिम्पराचैः कृतं चिदेनः प्र मुमुक्तमस्मत् ॥  
 सोमारुद्रा युवमेतान्यस्मे विश्वा तनूषु भेषजानि धत्तम् । अवं स्यतम्मुञ्चतं  
 यन्नो अस्ति तनूषु बद्धं कृतमेनो अस्मत् ॥  
 सोमापूषणा जनना रयीणां जनना दिवो जनना पृथिव्याः । जातौ  
 विश्वस्य भुवनस्य गोपौ देवा अकृणवन्नमृतस्य नाभिम् ॥  
 इमौ देवौ जायमानौ जुषन्तेमौ तमांसि गूहतामजुष्टा । आभ्यामिन्द्रः  
 पक्वमामास्वन्तः सौमापूषभ्यां जनदुस्त्रियासु ॥२२॥

इति प्रथमकारण्डे अष्टमः प्रपाठकः ८

इति प्रथमं कारण्डं सम्पूर्णम्

अथ द्वितीयं कारण्डम्

अथ द्वितीयकारण्डे प्रथमः प्रपाठकः १

वा॒यु॒व्यं॑ श्वेत॒मा ल॑भेत् भू॒तिकामो॑ वा॒युर्वै॑ क्षेपि॒ष्ठा दे॒वता॑ वा॒युमे॒व  
स्वेन॑ भाग॒धेये॒नोप॑ धावति॒ स ए॒वैन॑म्भूतिं॒ गम॑यति॒ भव॑त्ये॒वा ति॑क्षि॒प्रा  
दे॒वते॒त्याहुः॑ सैन॑मीश्व॒रा प्र॒दह॑ इत्ये॒तमे॒व सन्तं॑ वा॒यवे॑ नि॒युत्व॑न्त॒ आ ल॑भेत्  
नि॒युद्वा अ॑स्य॒ धृति॑र्धृ॒त ए॒व भू॒तिमु॒पैत्य॑प्र॒दाहाय॑ भव॑त्ये॒व वा॒यवे॑ नि॒युत्व॑न्त  
आ ल॑भेत्॒ ग्राम॑कामो वा॒युर्वा इ॒माः प्र॒जा न॑स्यो॒ता नैनी॑यते वा॒युमे॒व  
नि॒युत्व॑न्त॒ स्वेन॑ भाग॒धेये॒नोप॑ धावति॒ स ए॒वास्मै॑ प्र॒जा न॑स्यो॒ता नि  
य॑च्छति॒ ग्राम्ये॑व भवति॒ नि॒युत्व॑न्ते भवति॒ ध्रु॒वा ए॒वास्मा॑ अन॑पगाः करोति  
वा॒यवे॑ नि॒युत्व॑न्त॒ आ ल॑भेत् प्र॒जाका॑मः प्रा॒णो वै वा॒युर॑पा॒नो  
नि॒युत्प्रा॑णापा॒नौ खलु॑ वा ए॒तस्य॑ प्र॒जाया॑ अप॑ क्रामतो॒ योऽल॑म्प्रजायै  
सन्प्र॒जां न वि॒न्दते॑ वा॒युमे॒व नि॒युत्व॑न्त॒ स्वेन॑ भाग॒धेये॒नोप॑ धावति॒ स  
ए॒वास्मै॑ प्राणापा॒नाभ्या॑म्प्र॒जाम्प्र॑ जनयति॒ वि॒न्दते॑ प्र॒जां वा॒यवे॑ नि॒युत्व॑न्त॒ आ  
ल॑भेत् ज्यो॒गाम॑यावी प्रा॒णो वै वा॒युर॑पा॒नो नि॒युत्प्रा॑णापा॒नौ खलु॑ वा  
ए॒तस्मा॑दप॑क्रामतो॒ यस्य॑ ज्यो॒गाम॑र्यति वा॒युमे॒व नि॒युत्व॑न्त॒ स्वेन॑  
भाग॒धेये॒नोप॑ धावति॒ स ए॒वास्मि॑न्प्राणापा॒नौ द॑धात्यु॒त यदी॒तासु॑र्भवति॒  
जीव॑त्ये॒व प्र॒जाप॑तिर्वा इ॒दमे॑कं आसी॒त्सोऽका॑मयत प्र॒जाः प॒शून्सृ॑जे॒येति॑  
स आ॒त्मनो॑ व॒पामु॑द॒क्खि॒दत्ता॑म॒ग्नौ प्रा॑गृ॒ह्णात्ततो॑ऽजस्तू॒परः॑ सम॑भवत्त॒  
स्वायै॑ दे॒वता॑या आल॑भत् ततो॒ वै स प्र॒जाः प॒शून्सृ॑जत् यः प्र॒जाका॑मः  
प॒शुका॑मः स्यात्स ए॒तम्प्र॑जाप॒त्यम॒जं तू॒पर॑मा ल॑भेत् प्र॒जाप॑तिमे॒व स्वेन॑

भागधेयेनोप धावति स एवास्मै प्रजाम्पशून्प्र जनयति  
यच्छमश्रुणस्तत्पुरुषाणां रूपं यत्तूपरस्तदश्वानां यदन्यतोदन्तद्रवां यदव्या  
इव शफास्तदवीनां यदजस्तदजानामेतावन्तो वै ग्राम्याः  
पशवस्तानूपेणैवाव रुन्धे सोमापौष्णं त्रैतमा लभेत पशुकामो द्वौ वा  
अजायै स्तनौ नानैव द्वावभि जायैते ऊर्जम्पुष्टिं तृतीयः सोमापूषणावेव  
स्वेन भागधेयेनोप धावति तावेवास्मै पशून्प्र जनयतः सोमो वै रेतोधाः  
पूषा पशूनाम्प्रजनयिता सोम एवास्मै रेतो दधाति पूषा पशून्प्र  
जनयत्यौदुम्बरो यूपो भवत्यूर्गवा उदुम्बर ऊर्क्पर्शव ऊर्जेवास्मा  
ऊर्जम्पशूनव रुन्धे ॥१॥

प्रजापतिः प्रजा असृजत ता अस्मात्सृष्टाः पराचीरायन्ता वरुणमगच्छन्ता  
अन्वैत्ताः पुनरयाचत ता अस्मै न पुनरददात्सोऽब्रवीद्वरुणं वृणीष्वार्थ मे  
पुनर्देहीति तासां वरुमालभत स कृष्ण एकशितिपादभव द्यो वरुणगृहीतः  
स्यात्स एतं वारुणं कृष्णमेकशितिपादमा लभेत वरुणमेव स्वेन  
भागधेयेनोप धावति स एवैनं वरुणपाशान्मुञ्चति कृष्ण  
एकशितिपाद्भवति वारुणो देवतया समृद्धयै सुवर्भानुरासुरः सूर्य  
तमसाविध्यत्तस्मै देवाः प्रार्थञ्चित्तिसैच्छन्तस्य यत्प्रथमं तमोऽपाघ्नन्त्सा  
कृष्णाविरभवद्यद्विद्वतीयं सा फल्गुनी यत्तृतीयं सा बलक्षी  
यदध्यस्थादपाकृन्तन्त्साविर्वशा समभवत्ते देवा अब्रुवन्देवपशुर्वा अयं  
समभूत्कस्मा इममा लप्स्यामह इत्यथ वै तर्ह्यल्पा पृथिव्यासीदजाता  
ओषधयस्तामविं वशामादित्येभ्यः कामायालभन्त ततो वा अप्रथत  
पृथिव्यजायन्तौषधयो यः कामयैत प्रथेय पशुभिः प्र प्रजया जायेयेति स  
एतामविं वशामादित्येभ्यः कामायालभेतादित्यानेव कामं स्वेन

भागधेयेनोप धावति त एवैनमृथयन्ति पशुभिः प्र प्रजया  
जनयन्त्य सावादित्यो न व्यरोचत तस्मै देवाः प्रायश्चित्तिमैच्छन्तस्मा एता  
मल्हा आलभन्ताग्नेयीं कृष्णग्रीवीं संहितामैन्द्रीं श्वेताम्बार्हस्पत्यां  
ताभिरेवास्मिन्नुचमदधुर्यो ब्रह्मवर्चसकामः स्यात्तस्मा एता मल्हा आ  
लभेताग्नेयीं कृष्णग्रीवीं संहितामैन्द्रीं श्वेताम्बार्हस्पत्यामेता एव  
देवताः स्वेन भागधेयेनोप धावति ता एवास्मिन्ब्रह्मवर्चसं दधति  
ब्रह्मवर्चस्यैव भवति वसन्ता प्रातराग्नेयीं कृष्णग्रीवीमा लभेत ग्रीष्मे  
मध्यन्दिने संहितामैन्द्रीं शरद्यपराह्णे श्वेताम्बार्हस्पत्यां त्रीणि वा  
आदित्यस्य तेजांसि वसन्ता प्रातर्ग्रीष्मे मध्यन्दिने शरद्यपराह्णे  
यावन्त्येव तेजांसि तान्येवाव रुन्धे संवत्सरम्पर्यालभ्यन्ते संवत्सरो वै  
ब्रह्मवर्चसस्य प्रदाता संवत्सर एवास्मै ब्रह्मवर्चसम्प्र यच्छति  
ब्रह्मवर्चस्यैव भवति गर्भिणीयो भवन्तीन्द्रियं वै गर्भ इन्द्रियमेवास्मिन्दधति  
सारस्वतीम्पेषीमा लभेत य ईश्वरो वाचो वदितोः सन्वाचं न वदेद्वाग्वै  
सरस्वती सरस्वतीमेव स्वेन भागधेयेनोप धावति सैवास्मिन्वाचं दधाति  
प्रवदिता वाचो भवत्यपन्नदती भवति तस्मान्मनुष्याः सर्वा  
वाचम्वदन्त्याग्नेयं कृष्णग्रीवमा लभेत सौम्यम्बभ्रुं ज्योगामयाव्यग्निं वा  
एतस्य शरीरं गच्छति सोमं रसो यस्य ज्योगामयत्यग्नेरेवास्य शरीरं  
निष्क्रीणाति सोमाद्रसमुत् यदीतासुर्भवति जीवत्येव सौम्यम्बभ्रुमा  
लभेताग्नेयं कृष्णग्रीवम्प्रजाकामः सोमो वै रेतोधा अग्निः  
प्रजानाम्प्रजनयिता सोम एवास्मै रेतो दधात्यग्निः प्रजाम्प्र जनयति विन्दते  
प्रजा माग्नेयं कृष्णग्रीवमा लभेत सौम्यम्बभ्रुं यो ब्राह्मणो विद्यामनूच्य न  
विरोचेत यदाग्नेयो भवति तेज एवास्मिन्तेन दधाति यत्सौम्यो ब्रह्मवर्चसं  
तेन कृष्णग्रीव आग्नेयो भवति तम एवास्मादप हन्ति श्वेतो भवति

रुचमेवास्मिन्दधाति ब्रुः सौम्यो भवति ब्रह्मवर्चसमेवास्मिन्त्विषिं  
 दधात्याग्नेयं कृष्णग्रीवमा लभेत सौम्यम्ब्रुमाग्नेयं कृष्णग्रीवम्पुरोधायाम्  
 स्पर्धमान आग्नेयो वै ब्राह्मणः सौम्यो राजन्योऽभितः सौम्यमाग्नेयौ  
 भवतस्तेजसैव ब्रह्मणोभयतौ राष्ट्रम्परि गृह्णात्येकधा समावृङ्क्ते पुर एनं  
 दधते ॥२॥

देवासुरा एषु लोकेष्वस्पर्धन्त स एतं विष्णुर्वामनमपश्यत् स्वायै  
 देवताया आलभत् ततो वै स इमाँल्लोकानभ्यजय द्वैष्णवं वामनमा  
 लभेत स्पर्धमानो विष्णुरिव भूत्वेमाँल्लोकानभि जयति विषम आ लभेत  
 विषमा इव हीमे लोकाः समृद्ध्या इन्द्राय मन्युमते मनस्वते  
 ललामम्प्राशृङ्गमा लभेत संग्रामे संयत्त इन्द्रियेण वै मन्युना मनसा संग्रामं  
 जयतीन्द्रमेव मन्युमन्तम्मनस्वन्तस्वेन भागधेयेनोप धावति स  
 एवास्मिन्निन्द्रियम्न्युम्मनो दधाति जयति तं संग्राम मिन्द्राय मरुत्वते  
 पृश्निस्क्थमा लभेत ग्रामकाम इन्द्रमेव मरुत्वन्तस्वेन भागधेयेनोप  
 धावति स एवास्मै सजातान्प्र यच्छति ग्राम्यैव भवति यदृषभस्तेनैन्द्रो  
 यत्पृश्निस्तेन मारुतः समृद्ध्यै पश्चात्पृश्निस्क्थो भवति  
 पश्चादन्ववसायिनीमेवास्मै विशं करोति सौम्यम्ब्रुमा लभेतान्नकामः  
 सौम्यं वा अन्नं सोममेव स्वेन भागधेयेनोप धावति स एवास्मा अन्नम्प्र  
 यच्छत्यन्नाद एव भवति ब्रुर्भवत्येतद्वा अन्नस्य रूपं समृद्ध्यै  
 सौम्यम्ब्रुमा लभेत यमलं राज्याय सन्तं राज्यं नोपनमेत्सौम्यं वै  
 राज्यं सोममेव स्वेन भागधेयेनोप धावति स एवास्मै राज्यम्प्र  
 यच्छत्युपै नं राज्यं नमति ब्रुर्भवत्येतद्वै सोमस्य रूपं समृद्ध्या इन्द्राय  
 वृत्रतुरै ललामम्प्राशृङ्गमा लभेत गतश्रीः प्रतिष्ठाकामः प्राप्मानमेव वृत्रं

तीर्त्वा प्रतिष्ठां गच्छतीन्द्रायाभिमातिघ्ने ललामम्प्राशृङ्गमा लभेत यः  
पाप्मना गृहीतः स्यात्पाप्मा वा अभिमातिरिन्द्रमेवाभिमातिहनः स्वेन  
भागधेयेनोप धावति स एवास्मात्पाप्मानमभिमातिम्प्र गुदत इन्द्राय  
वज्रिणै ललामम्प्राशृङ्गमा लभेत यमलः राज्याय सन्तः राज्यं  
नोपनमेदिन्द्रमेव वज्रिणः स्वेन भागधेयेनोप धावति स एवास्मै वज्रम्प्र  
यच्छति स एनं वज्रो भूत्या इन्ध उषैनः राज्यं नमति ललामः प्राशृङ्गो  
भवत्येतद्वै वज्रस्य रूपः समृद्धयै ॥३॥

असावादित्यो न व्यरोचत तस्मै देवाः प्रायश्चित्तिमैच्छन्तस्मा एतां  
दर्शर्षभामालभन्त तयैवास्मिन्नुचमदधुर्यो ब्रह्मवर्चसकामः स्यात्तस्मा  
एतां दर्शर्षभामा लभेतामुमेवादित्यः स्वेन भागधेयेनोप धावति स  
एवास्मिन्ब्रह्मवर्चसं दधाति ब्रह्मवर्चस्यैव भवति वसन्ता  
प्रातस्त्रील्ललामाना लभेत ग्रीष्मे मध्यन्दिने त्रीञ्छितिपृष्ठां छरद्यपराह्णे  
त्रीञ्छितिवारान्त्रीणि वा आदित्यस्य तेजांसि वसन्ता प्रातर्ग्रीष्मे  
मध्यन्दिने शरद्यपराह्णे यावन्त्येव तेजांसि तान्येवाव रुन्धे त्रयस्त्रय आ  
लभ्यन्तेऽभिपूर्वमेवास्मिन्तेजौ दधाति संवत्सरम्पर्यालभ्यन्ते संवत्सरो वै  
ब्रह्मवर्चसस्य प्रदाता संवत्सर एवास्मै ब्रह्मवर्चसम्प्र यच्छति  
ब्रह्मवर्चस्यैव भवति संवत्सरस्य परस्तात्प्राजापत्यं कद्रुमा लभेत  
प्रजापतिः सर्वा देवता देवतास्वेव प्रति तिष्ठति यदि बिभीयाद्दुश्चर्मा  
भविष्यामीति सोमापौष्णः श्याममा लभेत सौम्यो वै देवतया पुरुषः  
पौष्णाः पशवः स्वयैवास्मै देवतया पशुभिस्त्वचं करोति न दुश्चर्मा भवति  
देवाश्च वै यमश्चास्मिँल्लोकेऽस्पर्धन्त स यमो देवानामिन्द्रियं वीर्यमयुवत  
तद्यमस्य यमत्वं ते देवा अमन्यन्त यमो वा इदमभूद्यद्वयः स्म इति ते

प्रजापतिमुपाधावन्स एतौ प्रजापतिरात्मन उक्षवशौ निरमिमीत ते देवा  
 वैष्णावरुणीं वशामालभन्तैन्द्रमुक्षाणं तं वरुणेनैव ग्राहयित्वा विष्णुना  
 यज्ञेन प्राणुदन्तैन्द्रेणैवास्यैन्द्रियमवृञ्जत यो भ्रातृव्यवान्स्यात्स स्पर्धमानो  
 वैष्णावरुणीं वशामा लभेतैन्द्रमुक्षाणं वरुणेनैव भ्रातृव्यं ग्राहयित्वा  
 विष्णुना यज्ञेन प्र गुदत ऐन्द्रेणैवास्यैन्द्रियं वृङ्के भवत्यात्मना परास्य  
 भ्रातृव्यो भवतीन्द्रो वृत्रमहन्तं वृत्रो हतः षोडशभिर्भोगैरसिनात्तस्य  
 वृत्रस्य शीर्षतो गाव उदायन्ता वैदेह्योऽभवन्तासामृषभो  
 जघनेऽनूदैत्तमिन्द्रोऽचायत्सोऽमन्यत यो वा इममालभेत  
 मुच्येतास्मात्पाप्मन इति स आग्नेयं कृष्णग्रीवमा लभेतैन्द्रमृषभं  
 तस्याग्निरेव स्वेन भागधेयेनोपसृतः षोडशधा वृत्रस्य  
 भोगानप्यदहद्वैन्द्रेणैन्द्रियमात्मन्धत्त यः पाप्मना गृहीतः स्यात्स आग्नेयं  
 कृष्णग्रीवमा लभेतैन्द्रमृषभमग्निरेवास्य स्वेन भागधेयेनोपसृतः  
 पाप्मानमपि दहत्यैन्द्रेणैन्द्रियमात्मन्धत्ते मुच्येते पाप्मनो भवत्येव  
 द्यावापृथिव्यां धेनुमा लभेत ज्योगपरुद्धोऽनयोर्हि वा एषोऽप्रतिष्ठितोऽथैष  
 ज्योगपरुद्धो द्यावापृथिवी एव स्वेन भागधेयेनोप धावति ते एवैनम्प्रतिष्ठां  
 गमयतः प्रत्येव तिष्ठति पर्यारिणी भवति पर्यारीव ह्यैतस्य राष्ट्रं यो  
 ज्योगपरुद्धः समृद्धयै वायव्यं वत्समा लभेत वायुर्वा अनयोर्वत्स इमे वा  
 एतस्मै लोका अपशुष्का विडपशुष्काथैष ज्योगपरुद्धो वायुमेव स्वेन  
 भागधेयेनोप धावति स एवास्मा इमाल्लोकान्विशम्प्र दापयति प्रास्मा  
 इमे लोकाः स्तुवन्ति भुञ्जत्यैनं विडुपं तिष्ठते ॥४॥

इन्द्रो वलस्य बिलमपौर्णोत्स य उत्तमः पशुरासीत्तम्पृष्ठम्प्रति  
 संगृह्योर्दक्खिदत्तं सहस्रम्पशवोऽनूदायन्स उत्ततोऽभवद्यः पशुकामः

स्यात्स एतमैन्द्रमुन्नतमा लभेतेन्द्रमेव स्वेन भागधेयेनोप धावति स  
एवास्मै पशून्प्र यच्छति पशुमानेव भवत्युन्नतो भवति साहस्री वा एषा  
लक्ष्मी यदुन्नतो लक्ष्मियैव पशूनव रुन्धे यदा सहस्रम्पशून्प्राप्नुयातथ  
वैष्णवं वामनमा लभेतैतस्मिन्वै तत्सहस्रमध्यतिष्ठत्तस्मादेष वामनः  
समीषितः पशुभ्य एव प्रजातेभ्यः प्रतिष्ठां दधाति कौऽर्हति  
सहस्रम्पशून्प्राप्तमित्याहुरहोरात्राण्येव सहस्रं सम्पाद्या लभेत पशवो वा  
अहोरात्राणि पशूनेव प्रजातान्प्रतिष्ठां गमयत्योषधीभ्यो वेहतमा लभेत  
प्रजाकाम ओषधयो वा एतम्प्रजायै परि बाधन्ते योऽलम्प्रजायै सन्प्रजां न  
विन्दत ओषधयः खलु वा एतस्यै सूतमपि घ्नन्ति या वेहद्भवत्योषधीरेव  
स्वेन भागधेयेनोप धावति ता एवास्मै स्वाद्योनैः प्रजाम्प्र जनयन्ति  
विन्दते प्रजामापो वा ओषधयोऽसत्पुरुष आप एवास्मा असतः सद्दति  
तस्मादाहुर्यश्चैवं वेद यश्च नापस्त्वावासतः सद्दती त्यैन्द्रीं सूतवशामा  
लभेत भूतिकामोऽजातो वा एष योऽलम्भूत्यै सन्भूतिं न प्राप्नोतीन्द्रं खलु  
वा एषा सूत्वा वशा भवदिन्द्रमेव स्वेन भागधेयेनोप धावति स  
एवैनम्भूतिं गमयति भवत्येव यं सूत्वा वशा स्यात्तमैन्द्रमेवा  
लभेतैतद्वाव तदिन्द्रियं साक्षादेवेन्द्रियमव रुन्ध ऐन्द्राग्रम्पुनरुत्सृष्टमा  
लभेत य आ तृतीयात्पुरुषात्सोमं न पिबेद्विच्छिन्नो वा एतस्य सोमपीथो  
यो ब्राह्मणः सन्ना तृतीयात्पुरुषात्सोमं न पिबतीन्द्राग्नी एव स्वेन  
भागधेयेनोप धावति तावेवास्मै सोमपीथम्प्र यच्छत उपैनं सोमपीथो  
नमति यदैन्द्रो भवतीन्द्रियं वै सोमपीथ इन्द्रियमेव सोमपीथमव रुन्दे  
यदाग्नेयो भवत्याग्नेयो वै ब्राह्मणः स्वामेव देवतामनु सं तनोति  
पुनरुत्सृष्टो भवति पुनरुत्सृष्ट इव ह्यैतस्य सोमपीथः समृद्धयै ब्राह्मणस्पत्यं  
तूपरमा लभेताभिचरन्ब्रह्मणस्पतिमेव स्वेन भागधेयेनोप धावति तस्मा



एवैनमा वृश्चति ताजगार्तिमाच्छति तूपरो भवति क्षुरपविर्वा एषा लक्ष्मी  
यत्तूपरः समृद्धयै स्फ्यो यूपौ भवति वज्रो वै स्फ्यो वज्रमेवास्मै प्र हरति  
शरमयम्बर्हिः शृणात्येवैनं वैभीदक इध्मो भिनत्येवैनम् ॥५॥

बार्हस्पत्यं शितिपृष्ठमा लभेत ग्रामकामो यः कामयेत पृष्ठं समानानां  
स्यामिति बृहस्पतिमेव स्वेन भागधेयेनोप धावति स एवैनम्पृष्ठं  
समानानां करोति ग्राम्यैव भवति शितिपृष्ठो भवति बार्हस्पत्यो ह्येष  
देवतया समृद्धयै पौष्णं श्याममा लभेतान्नकामोऽन्नं वै पूषा पूषणमेव  
स्वेन भागधेयेनोप धावति स एवास्मा अन्नम्प्र यच्छत्यन्नाद एव भवति  
श्यामो भवत्येतद्वा अन्नस्य रूपं समृद्धयै मारुतम्पृश्निमा  
लभेतान्नकामोऽन्नं वै मरुतो मरुत एव स्वेन भागधेयेनोप धावति त  
एवास्मा अन्नम्प्र यच्छन्त्यन्नाद एव भवति पृश्निर्भवत्येतद्वा अन्नस्य रूपं  
समृद्धय ऐन्द्रमरुणमा लभेतेन्द्रियकाम इन्द्रमेव स्वेन भागधेयेनोप धावति  
स एवास्मिन्निन्द्रियं दधातीन्द्रियाव्यैव भवत्यरुणो भ्रूमान्भवत्येतद्वा  
इन्द्रस्य रूपं समृद्धयै सावित्रमुपध्वस्तमा लभेत सनिकामः सविता वै  
प्रसवानामीशे सवितारमेव स्वेन भागधेयेनोप धावति स एवास्मै सनिम्प्र  
सुवति दानकामा अस्मै प्रजा भवन्त्युपध्वस्तो भवति सावित्रो ह्येषः  
देवतया समृद्धयै वैश्वदेवम्बहुरूपमा लभेतान्नकामो वैश्वदेवं वा अन्नं  
विश्वानेव देवान्स्वेन भागधेयेनोप धावति त एवास्मा अन्नम्प्र  
यच्छत्यन्नाद एव भवति बहुरूपो भवति बहुरूपं ह्यन्नं समृद्धयै  
वैश्वदेवम्बहुरूपमा लभेत ग्रामकामो वैश्वदेवा वै सजाता विश्वानेव  
देवान्स्वेन भागधेयेनोप धावति त एवास्मै सजातान्प्र यच्छन्ति ग्राम्यैव  
भवति बहुरूपो भवति बहुदेवत्योऽह्येष समृद्धयै प्रजापत्यं तूपरमा लभेत

यस्यानाज्ञातमिव ज्योगामयेत्प्राजापत्यो वै पुरुषः प्रजापतिः खलु वै तस्य  
वेद यस्यानाज्ञातमिव ज्योगामयेति प्रजापतिमेव स्वेन भागधेयेनोप  
धावति स एवैनं तस्मात्स्वामान्मुञ्चति तूपरो भवति प्राजापत्यो ह्येष  
देवतया समृद्धये ॥६॥

वषट्कारो वै गायत्रियै शिरौऽच्छिनत्तस्यै रसः  
परापतत्तम्बृहस्पतिरुपागृह्णात्सा शितिपृष्ठा वशाभवद्यो द्वितीयः  
परापतत्तमित्रावरुणावुपागृह्णीताँ सा द्विरूपा वशाभवद्यस्तृतीयः  
परापतत्तं विश्वे देवा उपागृह्णन्त्सा बहुरूपा वशा भवद्यश्चतुर्थः परापतत्स  
पृथिवीम्प्राविशत्तम्बृहस्पतिरभ्यगृह्णादस्त्वेवायम्भोगायेति स उक्षवशः  
समभवद्यल्लोहितम्परापतत्तद्द्रु उपागृह्णात्सा रौद्री रोहिणी  
वशाभवद्द्वार्हस्पत्याँ शितिपृष्ठामा लभेत ब्रह्मवर्चसकामो  
बृहस्पतिमेव स्वेन भागधेयेनोप धावति स एवास्मिन्ब्रह्मवर्चसं दधाति  
ब्रह्मवर्चस्यैव भवति छन्दसां वा एष रसो यद्वशा रस इव खलु वै  
ब्रह्मवर्चसं छन्दसामेव रसेन रसम्ब्रह्मवर्चसमव रुद्धे मैत्रावरुणीं  
द्विरूपामा लभेत वृष्टिकामो मैत्रं वा अहर्वारुणी रात्रिरहोरात्राभ्यां खलु वै  
पर्जन्यो वर्षति मित्रावरुणावेव स्वेन भागधेयेनोप धावति तावेवास्मा  
अहोरात्राभ्याम्पर्जन्यं वर्षयतश्छन्दसां वा एष रसो यद्वशा रस इव खलु  
वै वृष्टिश्छन्दसामेव रसेन रसं वृष्टिमव रुद्धे मैत्रावरुणीं द्विरूपामा  
लभेत प्रजाकामो मैत्रं वा अहर्वारुणी रात्रिरहोरात्राभ्यां खलु वै प्रजाः प्र  
जायन्ते मित्रावरुणावेव स्वेन भागधेयेनोप धावति तावेवास्मा  
अहोरात्राभ्याम्प्रजाम्प्रजनयतश्छन्दसां वा एष रसो यद्वशा रस इव खलु  
वै प्रजा छन्दसामेव रसेन रसम्प्रजामव रुद्धे वैश्वदेवीम्बहूरूपामा

लभेतान्नकामो वैश्वदेवं वा अन्नं विश्वानेव देवान्स्वेन भागधेयेनोप  
 धावति त एवास्मा अन्नम्प्र यच्छन्त्यन्नाद एव भवति च्छन्दसां वा एष  
 रसो यद्वशा रस इव खलु वा अन्नं छन्दसामेव रसेन रसमन्नमव रुद्धे  
 वैश्वदेवीम्बहूरूपामा लभेत ग्रामकामो वैश्वदेवा वै सजाता विश्वानेव  
 देवान्स्वेन भागधेयेनोप धावति त एवास्मै सजातान्प्र यच्छन्ति ग्राम्यैव  
 भवति च्छन्दसां वा एष रसो यद्वशा रस इव खलु वै  
 सजाताश्छन्दसामेव रसेन रसं सजातानव रुद्धे बार्हस्पत्यमुक्षवशमा  
 लभेत ब्रह्मवर्चसकामो बृहस्पतिमेव स्वेन भागधेयेनोप धावति स  
 एवास्मिन्ब्रह्मवर्चसं दधाति ब्रह्मवर्चस्यैव भवति वशं वा एष चरति  
 यदुक्षा वश इव खलु वै ब्रह्मवर्चसं वशेनैव वशम्ब्रह्मवर्चसमव रुद्धे  
 रौद्रीं रोहिणीमा लभेताभिचरन्नुद्रमेव स्वेन भागधेयेनोप धावति तस्मा  
 एवैनमा वृश्चति ताजगार्तिमाच्छति रोहिणी भवति रौद्री ह्येषा देवतया  
 समृद्ध्यै स्फ्यो यूपौ भवति वज्रो वै स्फ्यो वज्रमेवास्मै प्र हरति  
 शर्मयम्बर्हिः शृणात्येवैनं वैभीदक इध्मो भिनत्येवैनम् ॥७॥

असावादित्यो न व्यरोचत तस्मै देवाः प्रायश्चित्तिमैच्छन्तस्मा एतां  
 सौरीं श्वेतां वशामालभन्त तयैवास्मिन्नुचमदधुर्यो ब्रह्मवर्चसकामः  
 स्यात्तस्मा एतां सौरीं श्वेतां वशामा लभेतामुमेवादित्यं स्वेन  
 भागधेयेनोप धावति स एवास्मिन्ब्रह्मवर्चसं दधाति ब्रह्मवर्चस्यैव भवति  
 ब्रैल्वो यूपौ भवन्त्यसौ वा आदित्यो यतोऽजायत ततो ब्रिल्वं  
 उदतिष्ठत्सयोन्येव ब्रह्मवर्चसमव रुद्धे ब्राह्मणस्पत्याम्बभ्रुकर्णीमा  
 लभेताभिफोरेचरन्वारुणं दशकपालम्पुरस्तान्निर्वपेद्वरुणेनैव भ्रातृव्यं  
 ग्राहयित्वा ब्रह्मणा स्तृणुते बभ्रुकर्णी भवत्येतद्वै ब्रह्मणो रूपं समृद्ध्यै

स्फ्यो यूषो भवति वज्रो वै स्फ्यो वज्रमेवास्मै प्र हरति शरमयम्बर्हिः  
शृणात्ये वै नुं वैभीदक इध्मो भिनत्येवैनं वैष्णवं वामनमा लभेत यं यज्ञो  
नोपनमेद्विष्णुर्वै यज्ञो विष्णुमेव स्वेन भागधेयेनोप धावति स एवास्मै  
यज्ञम्प्र यच्छत्युपैनं यज्ञो नमति वामनो भवति वैष्णवो ह्येष देवतया  
समृद्धयै त्वाष्ट्रं वडुबमा लभेत पशुकामस्त्वष्ट्रा वै पशूनामिन्धुनानां  
प्रजनयिता त्वष्टारमेव स्वेन भागधेयेनोप धावति स एवास्मै  
पशून्मिन्धुनान्प्र जनयति प्रजा हि वा एतस्मिन्पशवः प्रविष्टा अथैष  
पुमान्त्सन्वडुबः साक्षादेव प्रजाम्पशूनवं रुन्धे रुन्धे मैत्रं श्वेतमा लभेत  
संग्रामे संयत्ते समयकामो मित्रमेव स्वेन भागधेयेनोप धावति स  
एवैनमित्रेण सं नयति विशालो भवति व्यवसाययत्येवैनं प्राजापत्यं  
कृष्णमा लभेत वृष्टिकामः प्रजापतिर्वै वृष्ट्या ईशे प्रजापतिमेव स्वेन  
भागधेयेनोप धावति स एवास्मै प्रजन्यं वर्षयति कृष्णो भवत्येतद्वै वृष्ट्यै  
रूपं रूपेणैव वृष्टिमवं रुन्धे शबलो भवति विद्युतमेवास्मै जनयित्वा  
वर्षयत्यवाशृङ्गो भवति वृष्टिमेवास्मै नि यच्छति ॥८॥

वरुणं सुषुवाणमन्नाद्यं नोपानमत्स एतां वारुणीं कृष्णां वशामपश्यत्तां  
स्वायै देवताया आलभत ततो वै तमन्नाद्यमुपानमद्यमलमन्नाद्याय  
सन्तमन्नाद्यं नोपनमेत्स एतां वारुणीं कृष्णां वशामा लभेत वरुणमेव स्वेन  
भागधेयेनोप धावति स एवास्मा अन्नम्प्र यच्छत्यन्नादः एव भवति कृष्णा  
भवति वारुणी ह्येषा देवतया समृद्धयै मैत्रं श्वेतमा लभेत वारुणं  
कृष्णमपां चौषधीनां च संधावन्नकामो मैत्रीर्वा ओषधयो वारुणीरापोऽपां  
च खलु वा ओषधीनां च रसमुप जीवामो मित्रावरुणावेव स्वेन  
भागधेयेनोप धावति तावेवास्मा अन्नम्प्र यच्छतोऽन्नाद एव

भवत्युपां चोषधीनां च संधावा लभत उभयस्यावरुद्ध्यै विशाखो यूपो  
भवति द्वे ह्येते देवते समृद्ध्यै मैत्रं श्वेतमा लभेत वारुणं कृष्णं  
ज्योगामयावी यन्मैत्रो भवति मित्रेणैवास्मै वरुणं शमयति यद्वारुणः  
साक्षादेवैनं वरुणपाशान्मुञ्चत्युत यदीतासुर्भवति जीवत्येव देवा वै पुष्टिं  
नाविन्दन्तामिन्धुनेऽपश्यन्तस्यान्न समराधयन्तावश्विनावब्रूतामावयोर्वा  
एषा मैतस्यां वदध्वमिति साश्विनोरिवाभवद्यः पुष्टिकामः स्यात्स  
एतामाश्विनीं यमीं वशामा लभेताश्विनावेव स्वेन भागधेयेनोप धावति  
तावेवास्मिन्पुष्टिं धत्तः पुष्यति प्रजयां पशुभिः ॥६॥

आश्विनं धूम्रललाममा लभेत यो दुर्ब्राह्मणः सोमम्पिपासेदश्विनौ वै  
देवानामसौमपावास्तां तौ पश्चा सोमपीथम्प्राप्नुतामश्विनावेतस्य देवता यो  
दुर्ब्राह्मणः सोमम्पिपासत्यश्विनावेव स्वेन भागधेयेनोप धावति तावेवास्मै  
सोमपीथम्प्र यच्छत उपैनं सोमपीथो नमति यद्धूम्रो भवति  
धूम्रिमाणमेवास्मादप हन्ति ललामो भवति मुखत एवास्मिन्तेजो दधाति  
वायुव्यं गोमृगमा लभेत यमर्जघ्निवांसमभिशंसैयुरपूता वा एतं  
वागृच्छति यमर्जघ्निवांसमभिशंसन्ति नैष ग्राम्यः पशुर्नारणयो यद्वैमृगो  
नेवैष ग्रामे नारणये यमर्जघ्निवांसमभिशंसन्ति वायुर्वै देवानाम्पवित्रं  
वायुमेव स्वेन भागधेयेनोप धावति स एवैनम्पवयति पराची वा एतस्मै  
व्युच्छन्ती व्युच्छति तमः पाप्मानम्प्र विशति यस्याश्विने शस्यमाने सूर्यो  
नाविर्भवति सौर्यम्बहुरूपमा लभेतामुमेवादित्यं स्वेन भागधेयेनोप  
धावति स एवास्मात्तमः पाप्मानमप हन्ति प्रतीच्यस्मै व्युच्छन्ती  
व्युच्छत्यप तमः पाप्मानं हते ॥१०॥

इन्द्रं वो विश्वतस्परीन्द्रं नरो मरुतो यद्ध वो दिवो या वः शर्म ॥  
भरेष्विन्द्रं सुहवं हवामहेऽहोमुचं सुकृतं दैव्यं जनम् ।  
अग्निमित्रं वरुणं सातये भगं द्यावापृथिवी मरुतः स्वस्तये ॥ ममत्तु नः  
परिज्मा वसर्हा ममत्तु वातो अपां वर्षणवान् । शिशीतमिन्द्रापर्वता युवं  
नस्तन्नो विश्वे वरिवस्यन्तु देवाः ॥ प्रिया वो नाम हुवे तुराणाम् । आ  
यत्तृपन्मरुतो वावशानाः ॥  
श्रियसे कम्भानुभिः सम्मिमिच्छिरे ते रश्मिभिस्त ऋक्वभिः सुखादयः । ते  
वाशीमन्त इष्मिणो अभीरवो विद्रे प्रियस्य मारुतस्य धाम्नः ॥  
अग्निः प्रथमो वसुभिर्नो अव्यात्सोमो रुद्रेभिरभि रक्षतु त्मना । इन्द्रो  
मरुद्धिर्ऋतुधा कृणोत्वादित्यैर्नो वरुणः सँ शिशातु ॥  
सं नो देवो वसुभिरग्निः सँ सोमस्तनूभी रुद्रियाभिः । समिन्द्रो  
मरुद्धिर्यज्ञियैः समादित्यैर्नो वरुणो अजिज्ञिपत् ॥  
यथादित्या वसुभिः सम्बभूवुर्मरुद्धी रुद्राः समजानताभि । एवा  
त्रिणामन्नहणीयमाना विश्वे देवाः समनसो भवन्तु ॥  
कुत्रा चिद्यस्य समृतौ रणवा नरो नृषदने । अहन्तश्चिद्यमिन्धुते संजनयन्ति  
जन्तवः ॥ सं यदिषो वनामहे सँ हव्या मानुषाणाम् । उत द्युमस्य  
शवसः ऋतस्य रश्मिमा ददे ॥  
यज्ञो देवानाम्प्रत्यैति सुममादित्यासो भवता मृडयन्तः । आ वोऽर्वाची  
सुमतिर्ववत्याद्होश्चिद्या वरिवोवित्तरासत् ॥  
शुचिरपः सूयवसा अदब्ध उपं क्षेति वृद्धवयाः सुवीरः । नकिष्टं  
घ्नन्त्यन्तितो न दूराद्य आदित्यानाम्भवति प्रणीतौ ॥ धारयन्त  
आदित्यासो जगत्स्था देवा विश्वस्य भुवनस्य गोपाः । दीर्घाधियो  
रक्षमाणा असुर्यमृतावानुश्चर्यमाना ऋणानि ॥

तिस्रो भूर्मीर्धारयन्त्रींरुत द्यून्त्रीणि वृता विदथे अन्तरैषाम् ।  
 ऋतेनादित्या महि वो महित्वं तदर्यमन्वरुण मित्र चारु ॥  
 त्यान्नु क्षत्रियाँ अवं आदित्यान्याचिषामहे । सुमृडीकाँ अभिष्टये ॥  
 न दक्षिणा वि चिकिते न सव्या न प्राचीनमादित्या नोत पश्चा । पाक्या  
 चिद्वसवो धीर्या चिद्युष्मानीतो अभयं ज्योतिरश्याम् ॥  
 आदित्यानामवसा नूतनेन सक्षीमहि शर्मणा शंतमेन । अनागास्त्वे  
 अदितित्वे तुरास इमं यज्ञं दधतु श्रोषमाणाः ॥  
 इमम्मे वरुण श्रुधी हवमृद्या च मृडय । त्वामवस्युरा चके ॥  
 तत्त्वा यामि ब्रह्मणा वन्दमानस्तदा शास्ते यजमानो हविर्भिः ।  
 अहेडमानो वरुणेह बोध्युरुशँसु मा न आयुः प्र मौषीः ॥११॥

इति द्वितीयकारण्डे प्रथमः प्रपाठकः १

अथ द्वितीयकारण्डे द्वितीयः प्रपाठकः २

प्रजापतिः प्रजा असृजत ताः सृष्टा इन्द्राग्नी अपागूहताँ  
 सौऽचायत्प्रजापतिरिन्द्राग्नी वै मै प्रजा अपाघुक्षतामिति स  
 एतमैन्द्राग्रमेकादशकपालमपश्यत्तं निरवपत्तावस्मै प्रजाः  
 प्रासाधयता मिन्द्राग्नी वा एतस्य प्रजामप गूहतो योऽलम्प्रजायै सन्प्रजां न  
 विन्दत ऐन्द्राग्रमेकादशकपालं निर्वपेत्प्रजाकाम इन्द्राग्नी एव स्वेन  
 भागधेयेनोप धावति तावेवास्मै प्रजाम्प्र साधयतो विन्दतै  
 प्रजा मैन्द्राग्रमेकादशकपालं निर्वपेत्स्पर्धमानः क्षेत्रे वा सजातेषु  
 वोन्द्राग्नी एव स्वेन भागधेयेनोप धावति ताभ्यामेवेन्द्रियं वीर्यंभ्रातृव्यस्य  
 वृङ्गे वि पाप्मना भ्रातृव्येण जयतेऽप वा एतस्मादिन्द्रियं वीर्यं क्रामति यः  
 संग्राममुपप्रयात्यैन्द्राग्रमेकादशकपालं निर्वपेत्संग्राममुपप्रयास्यन्नन्द्राग्नी

एव स्वेन भागधेयेनोप धावति तावेवास्मिन्निन्द्रियं वीर्यं धत्तः सहेन्द्रियेण  
 वीर्येणोप प्र याति जयति तं संग्रामं वि वा एष इन्द्रियेण वीर्येण ध्व्यते  
 यः संग्रामं जयत्यैन्द्राग्रमेकादशकपालं निर्वपेत्संग्रामं जित्वेन्द्राग्नी एव  
 स्वेन भागधेयेनोप धावति तावेवास्मिन्निन्द्रियं वीर्यं धत्तो नेन्द्रियेण  
 वीर्येण व्यृध्यतेऽप वा एतस्मादिन्द्रियं वीर्यं क्रामति य एति  
 जनतामैन्द्राग्रमेकादशकपालं निर्वपेज्जनतामेष्यन्निन्द्राग्नी एव स्वेन  
 भागधेयेनोप धावति तावेवास्मिन्निन्द्रियं वीर्यं धत्तः सहेन्द्रियेण वीर्येण  
 जनतामेतिम पौष्णं चरुमनु निर्वपेत्पूषा वा इन्द्रियस्य वीर्यस्यानुप्रदाता  
 पूषणमेव स्वेन भागधेयेनोप धावति स एवास्मा इन्द्रियं वीर्यमनु प्र  
 यच्छति क्षेत्रपत्यं चरुं निर्वपेज्जनतामागत्येयं वै क्षेत्रस्य पतिरस्यामेव प्रति  
 तिष्ठत्यैन्द्राग्रमेकादशकपालमुपरिष्ठात्निर्वपेदस्यामेव प्रतिष्ठार्येन्द्रियं  
 वीर्यमुपरिष्ठादात्मन्धत्ते ॥१॥

अग्रये पथिकृते पुरोडाशमष्टाकपालं निर्वपेद्यो दर्शपूर्णमासयाजी  
 सन्नमावास्यां वा पौर्णमासीं वातिपादयेत्पथो वा एषोऽध्यपथेनेति यो  
 दर्शपूर्णमासयाजी सन्नमावायां वा पौर्णमासीं वातिपादयेत्यग्निमेव  
 पथिकृतं स्वेन भागधेयेनोप धावति स एवैनमपथात्पन्थामपि  
 नयत्यनुड्वान्दक्षिणा वही ह्येष समृद्ध्या अग्रये व्रतपतये  
 पुरोडाशमष्टाकपालं निर्वपेद्य आहिताग्निः सन्नव्रत्यमिव चरेदग्निमेव  
 व्रतपतिं स्वेन भागधेयेनोप धावति स एवैनं व्रतमा लम्भयति व्रत्यौ  
 भवत्यग्रये रक्षोघ्ने पुरोडाशमष्टाकपालं निर्वपेद्यं रक्षांसि  
 सचैरन्नग्निमेव रक्षोहणं स्वेन भागधेयेनोप धावति स  
 एवास्माद्रक्षांस्यप हन्ति निशितायां निर्वपेन्निशितायां हि रक्षांसि



प्रेरते सम्प्रेर्णान्येवैनानि हन्ति परिश्रिते याजयेद्रक्षसामनन्ववचाराय  
 रक्षोघ्नी याज्यानुवाक्ये भवतो रक्षसाँ स्तृत्या अग्रये रुद्रवते  
 पुरोडाशमष्टाकपालं निर्वपेदभिचरन्नेषा वा अस्य घोरा तनूर्यद्रुद्रस्तस्मा  
 एवैनमा वृश्चति ताजगार्तिमाच्छत्य ग्रये सुरभिमते पुरोडाशमष्टाकपालं  
 निर्वपेद्यस्य गावो वा पुरुषा वा प्रमीयेरन्यो वा बिभीयादेषा वा अस्य  
 भेषज्या तनूर्यत्सुरभिमती तयैवास्मै भेषजं करोति सुरभिमते भवति  
 पूतीगन्धस्यापहत्या अग्रये क्षामवते पुरोडाशमष्टाकपालं निर्वपेत्संग्रामे  
 संयत्ते भागधेयेनैवैनँ शमयित्वा परानुभि निर्दिशति यमवरेषां विध्यन्ति  
 जीवति स यम्परेषाम्प्र स मीयते जयति तँ संग्राममभि वा एष  
 एतानुच्यति येषाम्पूर्वापरा अन्वञ्चः प्रमीयन्ते पुरुषाहुतिर्ह्यस्य प्रियतमाग्रये  
 क्षामवते पुरोडाशमष्टाकपालं निर्वपेद्भागधेयेनैवैनँ शमयति  
 नैषाम्पुरायुषोपरः प्र मीयतेऽभि वा एष एतस्य गृहानुच्यति यस्य  
 गृहान्दहत्यग्रये क्षामवते पुरोडाशमष्टाकपालं निर्वपेद्भागधेयेनैवैनँ  
 शमयति नास्यापरं गृहान्दहति ॥२॥

अग्रये कामाय पुरोडाशमष्टाकपालं निर्वपेद्यं कामो नोपनमैदग्निमेव  
 कामँ स्वेन भागधेयेनोप धावति स एवैनं कामेन समर्धयत्युपैनं कामौ  
 नमत्य ग्रये यविष्ठाय पुरोडाशमष्टाकपालं निर्वपेत्स्पर्धमानः क्षेत्रे वा  
 सजातेषु वाग्निमेव यविष्ठँ स्वेन भागधेयेनोप धावति तेनैवेन्द्रियं  
 वीर्यम्भ्रातृव्यस्य युवते वि पाप्मना भ्रातृव्येण जयतेऽग्रये यविष्ठाय  
 पुरोडाशमष्टाकपालं निर्वपेदभिचर्यमाणोऽग्निमेव यविष्ठँ स्वेन  
 भागधेयेनोप धावति स एवास्माद्रक्षाँसि यवयति  
 नैनमभिचरन्तस्तृणुतेऽग्रय आयुष्मते पुरोडाशमष्टाकपालं निर्वपेद्यः

कामयेत् सर्वमार्युरियामित्यग्निमेवायुष्मन्त्स्वेन भागधेयेनोप धावति  
स एवास्मिन्नायुर्दधाति सर्वमार्युरेत्यग्रये जातवेदसे पुरोडाशमष्टार्कपालं  
निर्वपेद्भूतिकामोऽग्निमेव जातवेदस्त्स्वेन भागधेयेनोप धावति स  
एवैनम्भूतिं गमयति भवत्येवाग्रये रुक्मते पुरोडाशमष्टार्कपालं  
निर्वपेद्भुक्कामोऽग्निमेव रुक्मन्त्स्वेन भागधेयेनोप धावति स  
एवास्मिन्नुचं दधाति रोचत एवाग्रये तेजस्वते पुरोडाशमष्टार्कपालं  
निर्वपेत्तेजस्कामोऽग्निमेव तेजस्वन्त्स्वेन भागधेयेनोप धावति स  
एवास्मिन्तेजौ दधाति तेजस्व्यैव भवत्यग्रये साहन्त्याय  
पुरोडाशमष्टार्कपालं निर्वपेत्सीक्षमाणोऽग्निमेव साहन्त्यस्त्स्वेन  
भागधेयेनोप धावति तेनैव सहते यस्सीक्षते ॥३॥

अग्रयेऽन्नवते पुरोडाशमष्टार्कपालं निर्वपेद्यः

कामयेतान्नवान्तस्यामित्यग्निमेवान्नवन्त्स्वेन भागधेयेनोप धावति स  
एवैनमन्नवन्तं करोत्यन्नवानेव भवत्यग्रयेऽन्नादाय पुरोडाशमष्टार्कपालं  
निर्वपेद्यः कामयेतान्नादः स्यामित्यग्निमेवान्नादस्त्स्वेन भागधेयेनोप  
धावति स एवैनमन्नादं करोत्यन्नाद एव भवत्यग्रयेऽन्नपतये  
पुरोडाशमष्टार्कपालं निर्वपेद्यः कामयेतान्नपतिः स्यामित्यग्निमेवान्नपतिं  
स्वेन भागधेयेनोप धावति स एवैनमन्नपतिं करोत्यन्नपतिरेव भवत्यग्रये  
पर्वमानाय पुरोडाशमष्टार्कपालं निर्वपेद्ग्रये पावकायाग्रये शुचये  
ज्योगामयावी यद्ग्रये पर्वमानाय निर्वपति प्राणमेवास्मिन्तेन दधाति  
यद्ग्रये पावकाय वाचमेवास्मिन्तेन दधाति यद्ग्रये शुचय  
आर्युरेवास्मिन्तेन दधात्युत यदीतासुर्भवति जीवत्येवैतामेव  
निर्वपेच्चक्षुष्कामो यद्ग्रये पर्वमानाय निर्वपति प्राणमेवास्मिन्तेन दधाति

यद्ग्रयै पावकाय वाचमेवास्मिन्तेन दधाति यद्ग्रये शुचये  
 चक्षुरेवास्मिन्तेन दधात्युत यद्यन्धो भवति प्रैव पश्यत्यग्रये पुत्रवते  
 पुरोडाशमष्टाकपालं निर्वपेदिन्द्राय पुत्रिणै  
 पुरोडाशमेकादशकपालम्प्रजाकामोऽग्निरेवास्मै प्रजाम्प्रजनयति  
 वृद्धामिन्द्रः प्र यच्छत्यग्रये रसवतेऽजक्षीरे चरुं निर्वपेद्यः कामयेत  
 रसवान्त्स्यामित्यग्निमेव रसवन्तं स्वेन भागधेयेनोप धावति स एवैनं  
 रसवन्तं करोति रसवानेव भवत्यजक्षीरे भवत्याग्नेयी वा एषा यद्जा  
 साक्षादेव रसमव रुद्धेऽग्रये वसुमते पुरोडाशमष्टाकपालं निर्वपेद्यः  
 कामयेत वसुमान्त्स्यामित्यग्निमेव वसुमन्तं स्वेन भागधेयेनोप धावति  
 स एवैनं वसुमन्तं करोति वसुमानेव भवत्यग्रये वाजसृतै  
 पुरोडाशमष्टाकपालं निर्वपेत्संग्रामे संयत्ते वाजं वा एष सिंसीर्षति यः  
 संग्रामं जिगीषत्यग्निः खलु वै देवानां वाजसृद्ग्रामेव वाजसृतं स्वेन  
 भागधेयेनोप धावति धावति वाजं हन्ति वृत्रं जयति तं संग्राममथौ  
 अग्निरिव न प्रतिधृषे भवत्यग्रयेऽग्निवते पुरोडाशमष्टाकपालं  
 निर्वपेद्यस्याग्नावग्निमभ्युद्धरैयुर्निर्दिष्टभागो वा  
 एतयोरन्योऽनिर्दिष्टभागोऽन्यस्तौ सम्भवन्तौ यजमान मभि सम्भवतः स  
 ईश्वर आर्तिमार्तोयद्ग्रयेऽग्निवते निर्वपति भागधेयेनैवैनौ शमयति  
 नार्तिमार्च्छति यजमानोऽग्रये ज्योतिष्मते पुरोडाशमष्टाकपालं  
 निर्वपेद्यस्याग्निरुद्धृतोऽहुतेऽग्निहोत्र उद्वाये दपर आदीप्यानुद्धृत्य  
 इत्याहु स्तत्तथा न कार्यं यद्भागधेयमभि पूर्वं उद्घ्रयते  
 किमपरोऽभ्युद्घ्रयेतेति तान्येवावक्षाणानि संनिधाय मन्थे दितः प्रथमं  
 जज्ञे अग्निः स्वाद्योनेरधि जातवेदाः । स गायत्रिया त्रिष्टुभा जगत्या  
 देवेभ्यो हव्यं वहतु प्रजानन्निति च्छन्दोभिरेवैनं स्वाद्योनेः प्र जनयत्येष

वाव सौऽग्निरित्याहुर्ज्योतिस्त्वा अस्य परापतितमिति यद्ग्रये  
ज्योतिष्मते निर्वपति यदेवास्य ज्योतिः परापतितं तदेवाव रुद्धे ॥ ४ ॥

वैश्वानरं द्वादशकपालं निर्वपेद्वारुणं चरुं दधिक्राव्णौ चरुमभिशस्यमानो  
यद्वैश्वानरो द्वादशकपालो भवति संवत्सरो वा अग्निवैश्वानरः  
संवत्सरेणैवैनं स्वदयत्यप पापं वर्णं हते वारुणेनैवैनं  
वरुणपाशान्मुञ्चति दधिक्राव्णा पुनाति हिरण्यं दक्षिणा पवित्रं वै  
हिरण्यम्पुनात्येवैनमाद्यमस्यान्नभवत्ये तामेव निर्वपेत्प्रजाकामः  
संवत्सरो वा एतस्याशान्तो योनिम्प्रजायै पशूनां निर्दहति योऽलम्प्रजायै  
सन्प्रजां न विन्दते यद्वैश्वानरो द्वादशकपालो भवति संवत्सरो वा  
अग्निवैश्वानरः संवत्सरमेव भागधेयेन शमयति सौऽस्मै शान्तः स्वाद्योनेः  
प्रजाम्प्र जनयति वारुणेनैवैनं वरुणपाशान्मुञ्चति दधिक्राव्णा पुनाति  
हिरण्यं दक्षिणा पवित्रं वै हिरण्यम्पुनात्येवैनं विन्दते प्रजां वैश्वानरं  
द्वादशकपालं निर्वपेत्पुत्रे जाते यदष्टाकपालो भवति  
गायत्रियैवैनम्ब्रह्मवर्चसेन पुनाति यन्नवकपालस्त्रिवृतैवास्मिन्तेजौ दधाति  
यद्दशकपालो विराजैवास्मिन्नाद्यं दधाति  
यदेकादशकपालस्त्रिष्टुभैवास्मिन्निन्द्रियं दधाति यद्द्वादशकपालो  
जगत्यैवास्मिन्पशून्दधाति यस्मिञ्जात एतामिष्टिभिर्वपति पूत एव  
तैजस्व्यन्नाद इन्द्रियावी पशु मान्भवत्य व वा एष सुवर्गाल्लोकाच्छिद्यते  
यो दर्शपूर्णमासयाजी सन्नमावास्यां वा पौर्णमासीं वातिपादयति  
सुवर्गाय हि लोकाय दर्शपूर्णमासाविज्येतै वैश्वानरं द्वादशकपालं  
निर्वपेदमावास्यां वा पौर्णमासीं वातिपाद्यं संवत्सरो वा अग्निवैश्वानरः  
संवत्सरमेव प्रीणात्यथौ संवत्सरमेवास्मा उप दधाति सुवर्गस्य लोकस्य

समष्ट्या अथौ देवता एवान्वारभ्य सुवर्ग लोकमैति वीरहा वा एष  
 देवानां योऽग्निमुद्वासयते न वा एतस्य ब्राह्मणा ऋतायवः  
 पुरान्नमक्षत्रा ग्रेयमष्टाकपालं निर्वपेद्वैश्वानरं  
 द्वादशकपालमग्निमुद्वासयिष्यन्त्यष्टाकपालो भवत्यष्टाक्षरा गायत्री  
 गायत्रोऽग्निर्यावानेवाग्निस्तस्मा आतिथ्यं करोत्यथो यथा जनं यतैऽवसं  
 करोति तादृगेव तद्द्वादशकपालो वैश्वानरो भवति द्वादश मासाः  
 संवत्सरः संवत्सरः खलु वा अग्रेयोनिः स्वामेवैनं योनिं  
 गमयत्याद्यमस्यान्नम्भवति वैश्वानरं द्वादशकपालं निर्वपेन्मारुतं  
 सप्तकपालं ग्रामकाम आहवनीये वैश्वानरमधि श्रयति गार्हपत्ये  
 मारुतम्पापवस्यसस्य विधृत्यै द्वादशकपालो वैश्वानरो भवति द्वादश  
 मासाः संवत्सरः संवत्सरेणैवास्मै सजाताश्चर्चावयति मारुतो भवति  
 मरुतो वै देवानां विशो देवविशेनैवास्मै मनुष्यविशमव रुद्धे  
 सप्तकपालो भवति सप्तगणा वै मरुतो गणश एवास्मै सजातानव  
 रुद्धेऽनूच्यमान आ सादयति विशमेवास्मा अनुवर्त्मानं करोति ॥५॥

आदित्यं चरुं निर्वपेत्संग्राममुपप्रयास्यन्नियं वा अदितिरस्यामेव पूर्वे प्रति  
 तिष्ठन्ति वैश्वानरं द्वादशकपालं निर्वपेदायतनं गत्वा संवत्सरो वा  
 अग्निर्वैश्वानरः संवत्सरः खलु वै देवानामायतनमेतस्माद्वा आयतनाद्देवा  
 असुरानजयन्त्यद्वैश्वानरं द्वादशकपालं निर्वपति देवानामेवायतने यतते  
 जयति तं संग्राम मेतस्मिन्वा एतौ मृजाते यो विद्विषाणयोरन्नमत्ति  
 वैश्वानरं द्वादशकपालं निर्वपेद्विद्विषाणयोरन्नं जग्ध्वा संवत्सरो वा  
 अग्निर्वैश्वानरः संवत्सरस्वदितमेवात्ति नास्मिन्मृजाते संवत्सराय वा एतौ  
 सममाते यौ सममाते तयोर्यः पूर्वोऽभिद्रुह्यति तं वरुणो गृह्णाति वैश्वानरं

द्वादशकपालं निर्वपेत्सममानयोः पूर्वोऽभिद्रुह्य संवत्सरो वा अग्निर्वैश्वानरः  
संवत्सरमेवाप्त्वा निर्वरुणं परस्तादभि द्रुह्यति नैनं वरुणो गृह्णात्या व्यं  
वा एष प्रति गृह्णाति योऽविम्प्रतिगृह्णाति वैश्वानरं द्वादशकपालं  
निर्वपेदविम्प्रतिगृह्य संवत्सरो वा अग्निर्वैश्वानरः संवत्सरस्वदितामेव  
प्रतिगृह्णाति नाव्यम्प्रति गृह्णात्यात्मनो वा एष मात्रामाप्नोति य  
उभयादत्प्रतिगृह्णात्यश्वं वा पुरुषं वा वैश्वानरं द्वादशकपालं  
निर्वपेदुभयादत्प्रतिगृह्य संवत्सरो वा अग्निर्वैश्वानरः संवत्सरस्वदितमेव  
प्रति गृह्णाति नात्मनो मात्रामाप्नोति वैश्वानरं द्वादशकपालं  
निर्वपेत्सनिमेष्यन्त्संवत्सरो वा अग्निर्वैश्वानरो यदा खलु वै संवत्सरं  
जनतायां चरत्यथ स धनार्घो भवति यद्वैश्वानरं द्वादशकपालं निर्वपति  
संवत्सरसातामेव सनिमभि प्र च्यवते दानकामा अस्मै प्रजा भवन्ति यो  
वै संवत्सरं प्रयुज्य न विमुञ्चत्यप्रतिष्ठानो वै स भवत्येतमेव  
वैश्वानरम्पुनरागत्य निर्वपेद्यमेव प्रयुङ्क्ते तम्भागधेयेन वि मुञ्चति प्रतिष्ठित्यै  
यया रज्ज्वोत्तमां गामाजेत्ताम्भ्रातृव्याय प्र हिणुयान्निर्ऋतिमेवास्मै प्र  
हिणोति ॥६॥

ऐन्द्रं चरुं निर्वपेत्पशुकाम ऐन्द्रा वै पशव इन्द्रमेव स्वेन भागधेयेनोप  
धावति स एवास्मै पशून्प्र यच्छति पशुमानेव भवति चरुर्भवति  
स्वादेवास्मै योनेः पशून्प्र जनयतीन्द्रायेन्द्रियावते  
पुरोडाशमेकादशकपालं निर्वपेत्पशुकाम इन्द्रियं वै पशव  
इन्द्रमेवेन्द्रियावन्तुं स्वेन भागधेयेनोप धावति स एवास्मा इन्द्रियम्पशून्प्र  
यच्छति पशुमानेव भवतीन्द्राय घर्मवते पुरोडाशमेकादशकपालं  
निर्वपेद्ब्रह्मवर्चसकामो ब्रह्मवर्चसं वै घर्म इन्द्रमेव घर्मवन्तुं स्वेन

भागधेयेनोप धावति स एवास्मिन्ब्रह्मवर्चसं दधाति ब्रह्मवर्चस्यैव  
 भवतीन्द्रायार्कवते पुरोडाशमेकादशकपालं निर्वपेदन्नकामोऽर्को वै  
 देवानामन्नमिन्द्रमेवार्कवन्तस्वेन भागधेयेनोप धावति स एवास्मा  
 अन्नम्प्र यच्छत्यन्नाद एव भवतीन्द्राय घर्मवते पुरोडाशमेकादशकपालं  
 निर्वपेदिन्द्रायेन्द्रियावत् इन्द्रायार्कवते भूतिकामो यदिन्द्राय घर्मवते  
 निर्वपति शिर एवास्य तेन करोति यदिन्द्रायेन्द्रियावत् आत्मानमेवास्य  
 तेन करोति यदिन्द्रायार्कवते भूत एवान्नाद्ये प्रति तिष्ठति  
 भवत्येवेन्द्रायाँहोमुचे पुरोडाशमेकादशकपालं निर्वपेद्यः प्राप्सना  
 गृहीतः स्यात्प्राप्सा वा अँह इन्द्रमेवाँहोमुचस्वेन भागधेयेनोप  
 धावति स एवैनम्प्राप्सनोऽहंसो मुञ्चतीन्द्राय वैमृधाय  
 पुरोडाशमेकादशकपालं निर्वपेद्यम्मृधोऽभि प्रवेपैरन्नाष्ट्राणि वाभि  
 समियुरिन्द्रमेव वैमृधस्वेन भागधेयेनोप धावति स एवास्मान्मृधोऽप  
 हन्तीन्द्राय त्रात्रे पुरोडाशमेकादशकपालं निर्वपेद्बुद्धो वा परियत्तो  
 वेन्द्रमेव त्रातारस्वेन भागधेयेनोप धावति स एवैनं त्रायत्  
 इन्द्रायार्काश्वमेधवते पुरोडाशमेकादशकपालं निर्वपेद्यम्महायज्ञो  
 नोपनमैदेते वै महायज्ञस्यान्त्यै तनू यदर्काश्वमेधाविन्द्रमेवार्काश्वमेधवन्तस्वेन  
 भागधेयेनोप धावति स एवास्मा अन्ततो महायज्ञं च्यावयत्युपैनं  
 महायज्ञो नमति ॥७॥

इन्द्रायान्वृजवे पुरोडाशमेकादशकपालं निर्वपेद्ग्रामकाम् इन्द्रमेवान्वृजुस्वेन  
 भागधेयेनोप धावति स एवास्मै सजाताननुकान्करोति ग्राम्यैव  
 भवतीन्द्रायै चरुं निर्वपेद्यस्य सेनासँशितेव स्यादिन्द्राणी वै सेनायै  
 देवतैन्द्राणीमेव स्वेन भागधेयेनोप धावति सैवास्य सेनाँ सँ श्यति

बल्बजानपीध्मे सं नह्येद्रौर्यत्राधिष्कन्ना न्यमेहृत्ततो बल्बजा  
 उदतिष्ठन्गवामेवैनं न्यायमपिनीय गा वैदयतीन्द्राय मन्युमते मनस्वते  
 पुरोडाशमेकादशकपालं निर्वपेत्संग्रामे संयत्त इन्द्रियेण वै मन्युना मनसा  
 संग्रामं जयतीन्द्रमेव मन्युमन्तम्मनस्वन्तुं स्वेन भागधेयेनोप धावति स  
 एवास्मिन्निन्द्रियमन्युम्मनो दधाति जयति तं संग्राममे तामेव निर्वपेद्यो  
 हृतमनाः स्वयम्पाप इव स्यादेतानि हि वा एतस्मादपक्रान्तान्यथैष  
 हृतमनाः स्वयम्पाप इन्द्रमेव मन्युमन्तम्मनस्वन्तुं स्वेन भागधेयेनोप  
 धावति स एवास्मिन्निन्द्रियमन्युम्मनो दधाति न हृतमनाः स्वयम्पापो  
 भवतीन्द्राय दात्रे पुरोडाशमेकादशकपालं निर्वपेद्यः कामयेत दानकामा  
 मे प्रजाः स्युरितीन्द्रमेव दातारुं स्वेन भागधेयेनोप धावति स एवास्मै  
 दानकामाः प्रजाः करोति दानकामा अस्मै प्रजा भवन्तीन्द्राय प्रदात्रे  
 पुरोडाशमेकादशकपालं निर्वपेद्यस्मै प्रत्तमिव सन्न प्रदीयेतेन्द्रमेव  
 प्रदातारुं स्वेन भागधेयेनोप धावति स एवास्मै प्र दीपयतीन्द्राय  
 सुत्राम्णै पुरोडाशमेकादशकपालं निर्वपेदपरुद्धो वापरुध्यमानो वेन्द्रमेव  
 सुत्रामाणुं स्वेन भागधेयेनोप धावति स एवैनं त्रायतेऽनपरुध्यो  
 भवतीन्द्रो वै सदृइदेवताभिरासीत्स न व्यावृत्तमगच्छत्स  
 प्रजापतिमुपाधावत्तस्मा एतमैन्द्रमेकादशकपालं  
 निरवपत्तेनैवास्मिन्निन्द्रियमदधाच्छक्वरी याज्यानुवाक्ये अकरोद्वज्रो वै  
 शक्वरी स एनं वज्रो भूत्या ऐन्द्र सोऽभवत्सोऽबिभेद्भूतः प्र मा धक्षयतीति  
 स प्रजापतिम्पुनरुपाधावत्स प्रजापतिः शक्वर्या अधि रेवतीं निरमिमीत्  
 शान्त्या अप्रदाहाय योऽलं श्रियै सन्त्सदृङ्कसमानैः स्यात्तस्मा  
 एतमैन्द्रमेकादशकपालं निर्वपेदिन्द्रमेव स्वेन भागधेयेनोप धावति स  
 एवास्मिन्निन्द्रियं दधाति रेवतीं पुरोऽनुवाक्या भवति शान्त्या अप्रदाहाय



शक्वरी याज्या वज्रो वै शक्वरी स एनं वज्रो भूत्या इन्द्रे भवत्येव ॥८॥

आग्नावैष्णवमेकादशकपालं निर्वपेदभिचरन्त्सरस्वत्याज्यभागा  
स्याद्बार्हस्पत्यश्चर्यदाग्नावैष्णव एकादशकपालो भवत्यग्निः सर्वा देवता  
विष्णुर्यज्ञो देवताभिश्चैवैनं यज्ञेन चाभि चरति सरस्वत्याज्यभागा भवति  
वाग्वै सरस्वती वाचैवैनमभि चरति बार्हस्पत्यश्चरुर्भवति ब्रह्म वै  
देवानाम्बृहस्पतिर्ब्रह्मणैवैनमभि चरति प्रति वै परस्तादभिचरन्तमभि  
चरन्ति द्वे द्वे पुरोऽनुवाक्ये कुर्यादति प्रयुक्त्या एतयैव यजेताभिचर्यमाणो  
देवताभिरेव देवताः प्रतिचरति यज्ञेन यज्ञं वाचा वाचम्ब्रह्मणा ब्रह्म स  
देवताश्चैव यज्ञं च मध्यतो व्यवसर्पति तस्य न कुतश्चनोपाव्याधो भवति  
नैनमभिचरन्तस्तृणुत आग्नावैष्णवमेकादशकपालं निर्वपेद्यं यज्ञो  
नोपनमैदग्निः सर्वा देवता विष्णुर्यज्ञोऽग्निं चैव विष्णुं च स्वेन  
भागधेयेनोप धावति तावेवास्मै यज्ञम्प्र यच्छत उपैनं यज्ञो  
नमत्या गावैष्णवं घृते चरुं निर्वपेच्चक्षुष्कामोऽग्नेर्वै चक्षुषा मनुष्या वि  
पश्यन्ति यज्ञस्य देवा अग्निं चैव विष्णुं च स्वेन भागधेयेनोप धावति  
तावेवास्मिञ्चक्षुर्धत्तश्चक्षुष्मानेव भवति धेन्वै वा एतद्रेतो  
यदाज्यमनुडुहस्तण्डुला मिथुनादेवास्मै चक्षुः प्र जनयति घृते भवति  
तेजो वै घृतं तेजश्चक्षुस्तेजसैवास्मै तेजश्चक्षुरव रुद्ध इन्द्रियं वै वीर्यं वृद्धे  
भ्रातृव्यो यजमानोऽयजमानस्याध्वरकल्पाम्प्रति निर्वपेद्भ्रातृव्ये यजमाने  
नास्येन्द्रियं वीर्यं वृद्धे पुरा वाचः प्रवदितोर्निर्वपेद्यावत्येव  
वाक्तामप्रौदिताभ्रातृव्यस्य वृद्धे तामस्य वाचम्प्रवदन्तीमन्या वाचोऽनु प्र  
वदन्ति ता इन्द्रियं वीर्यं यजमाने दधत्या गावैष्णवमष्टाकपालं  
निर्वपेत्प्रातःसवनस्याकाले सरस्वत्याज्यभागा

स्याद्द्वार्हस्पत्यश्चरुयद्दृष्टाकपालो भवत्यष्टाक्षरा गायत्री  
गायत्रम्प्रातःसवनम्प्रातःसवनमेव तेनाप्रोत्याग्रावैष्णवमेकादशकपालं  
निर्वपेन्माध्यन्दिनस्य सवनस्याकाले सरस्वत्याज्यभागा  
स्याद्द्वार्हस्पत्यश्चरुयदेकादशकपालो भवत्येकादशाक्षरा  
त्रिष्टुप्त्रैष्टुभम्माध्यन्दिनं सवनम्माध्यन्दिनमेव सर्वान् तेनाप्रोत्याग्रावैष्णवं  
द्वादशकपालं निर्वपेत्तृतीयसवनस्याकाले सरस्वत्याज्यभागा  
स्याद्द्वार्हस्पत्यश्चरुयद्द्वादशकपालो भवति द्वादशाक्षरा जगती जागृतं  
तृतीयसवनं तृतीयसवनमेव तेनाप्रोति देवताभिरेव देवताः प्रतिचरति  
यज्ञेन यज्ञं वाचा वाचम्ब्रह्मणा ब्रह्म कपालैरेव च्छन्दांस्युप्रोति  
पुरोडाशैः सर्वानानि मैत्रावरुणमेककपालं निर्वपेद्दृशाथै काले यैवासौ  
भ्रातृव्यस्य वशानूबन्ध्या सो एवैषैतस्यैककपालो भवति न हि कपालैः  
पशुमर्हत्याप्तुम् ॥६॥

ऋसावादित्यो न व्यरोचत तस्मै देवाः प्रायश्चित्तिमैच्छन्तस्मा एतं  
सौमारौद्रं चरुं निर्वपन्तेनैवास्मिन्नुचमदधुर्यो ब्रह्मवर्चसकामः स्यात्तस्मा  
एतं सौमारौद्रं चरुं निर्वपेत्सोमं चैव रुद्रं च स्वेन भागधेयेनोप धावति  
तावेवास्मिन्ब्रह्मवर्चसं धत्तो ब्रह्मवर्चस्यैव भवति तिष्यापूर्णमासे  
निर्वपेद्द्रो वै तिष्यः सोमः पूर्णमासः साक्षादेव ब्रह्मवर्चसमव रुद्धे  
परिश्रिते याजयति ब्रह्मवर्चसस्य परिगृहीत्यै श्वेतायै श्वेतवत्सायै  
दुग्धम्मथितमाज्यं भवत्याज्यम्प्रोक्षणमाज्येन मार्जयन्ते यावदेव  
ब्रह्मवर्चसं तत्सर्वं करोत्यति ब्रह्मवर्चसं क्रियत इत्याहुरीश्वरो दुश्चर्मा  
भवितोरिति मानवी ऋचौ धार्य्यै कुर्याद्यद्वै किं च मनुरवदत्तर्द्रेषजं  
भेषजमेवास्मै करोति यदि बिभीयादुश्चर्मा भविष्यामीति सोमापौष्णं चरुं

निर्वपेत्सौम्यो वै देवतया पुरुषः पौष्णाः पशवः स्वयैवास्मै देवतया  
 पशुभिस्त्वचं करोति न दुश्चर्मा भवति सोमारौद्रं चरुं निर्वपेत्प्रजाकामः  
 सोमो वै रेतोधा अग्निः प्रजानाम्प्रजनयिता सोमं एवास्मै रेतो दधात्यग्निः  
 प्रजाम्प्र जनयति विन्दते प्रजाँ सौमारौद्रं चरुं निर्वपेदभिचरन्त्सौम्यो वै  
 देवतया पुरुष एष रुद्रो यदग्निः स्वाया एवैनं देवतायै निष्क्रीय रुद्रायपि  
 दधाति ताजगार्तिमाच्छति सोमारौद्रं चरुं निर्वपेज्जयोगामयावी सोमं वा  
 एतस्य रसौ गच्छत्यग्निँ शरीरं यस्य ज्योगामयति सोमादेवास्य रसं  
 निष्क्रीणात्यग्नेः शरीरमुत यदीतासुर्भवति जीवत्येव सौमारुद्रयोर्वा एतं  
 ग्रसितँ होता निष्विदति स ईश्वर आर्तिमार्तोरनड्वान्होत्रा देयो वह्निर्वा  
 अनड्वान्वह्निर्होता वह्निर्नैव वह्निमात्मानँ स्पृणोति सोमारौद्रं चरुं  
 निर्वपेद्यः कामयेत स्वैऽस्मा आयतने भ्रातृव्यं जनयेयमिति  
 वेदिम्परिगृह्यार्धमुद्धन्यादुर्ध नार्धम्बर्हिषः स्तृणीयादुर्ध  
 नार्धमिध्मस्याभ्यादुध्यादुर्ध न स्व एवास्मा आयतने भ्रातृव्यं जनयति  
 ॥१०॥

ऐन्द्रमेकादशकपालं निर्वपेन्मारुतँ सप्तकपालं ग्रामकाम इन्द्रं चैव  
 मरुतंश्च स्वेन भागधेयेनोप धावति त एवास्मै सजातान्प्र यच्छन्ति ग्राम्यैव  
 भवत्याहवनीयं ऐन्द्रमधि श्रयति गार्हपत्ये मारुतं पापवस्यसस्य विधृत्यै  
 सप्तकपालो मारुतो भवति सप्तगणा वै मरुतौ गणश एवास्मै सजातानव  
 रुद्धेऽनूच्यमान आ सादयति विशमेवास्मा अनुवर्तमानं करोत्येतामेव  
 निर्वपेद्यः कामयेत ज्ञत्राय च विशे च समदं  
 दध्यामित्यैन्द्रस्यावघ्नब्रूयादिन्द्रायानु ब्रूहीत्याश्राव्य ब्रूयान्मरुतो यजेति  
 मारुतस्यावघ्नब्रूयान्मरुद्धोऽनु ब्रूहीत्याश्राव्य ब्रूयादिन्द्रं यजेति स्व एवैभ्यो

भागधेये समदं दधाति वितृं ह्राणास्तिष्ठन्त्ये तामेव निर्वपेद्यः कामयेत  
कल्पेन्निति यथादेवतमवदाय यथादेवतं यजेद्भागधेयेनैवैनान्यथायथं  
कल्पयति कल्पन्त एवैन्द्रमेकादशकपालं निर्वपेद्वैश्वदेवं द्वादशकपालं  
ग्रामकाम इन्द्रं चैव विश्वांश्च देवान्स्वेन भागधेयेनोप धावति त  
एवास्मै सजातान्प्र यच्छन्ति ग्राम्यैव भवत्यैन्द्रस्यावदाय वैश्वदेवस्याव  
द्येदथैन्द्रस्योपरिष्ठादिन्द्रियेणैवास्मा उभयतः सजातान्परि  
गृह्णात्युपाधार्थ्यपूर्वयं वासो दक्षिणा सजातानामुपहित्यै पृश्नियै दुग्धे  
प्रैयङ्गवं चरुं निर्वपेन्मरुद्भ्यो ग्रामकामः पृश्नियै वै पर्यसो मरुतो जाताः  
पृश्नियै प्रियङ्गवो मारुताः खलु वै देवतया सजाता मरुत एव स्वेन  
भागधेयेनोप धावति त एवास्मै सजातान्प्र यच्छन्ति ग्राम्यैव भवति  
प्रियवती याज्यानुवाक्यै भवतः प्रियमेवैनं समानानां करोति द्विपदा  
पुरोऽनुवाक्या भवति द्विपद एवाव रुद्धे चतुष्पदा याज्या चतुष्पद एव  
पृश्नव रुद्धे देवासुराः संयत्ता आसन्ते देवा मिथो विप्रिया  
आसन्तेऽन्योऽन्यस्मै ज्यैष्ठ्यायातिष्ठमानाश्चतुर्धा व्यक्रामन्नग्निर्वसुभिः सोमो  
रुद्रैरिन्द्रो मरुद्भिर्वरुणा आदित्यैः स इन्द्रः प्रजापतिमुपाधावत्तमेतया  
संज्ञान्यायाजयेद्ग्नये वसुमते पुरोडाशमष्टाकपालं निर्वपेत्सोमाय रुद्रवते  
चरुमिन्द्राय मरुत्वते पुरोडाशमेकादशकपालं वरुणायादित्यवते चरुं ततो  
वा इन्द्रं देवा ज्यैष्ठ्यायाभि समजानत यः समानैर्मिथो विप्रियुः  
स्यात्तमेतया संज्ञान्या याजयेद्ग्नये वसुमते पुरोडाशमष्टाकपालं  
निर्वपेत्सोमाय रुद्रवते चरुमिन्द्राय मरुत्वते पुरोडाशमेकादशकपालं  
वरुणाया दित्यवते चरुमिन्द्रमेवैनम्भूतं ज्यैष्ठ्याय समाना अभि सं जानते  
वसिष्ठः समानानाम्भवति ॥११॥

हिरण्यगर्भ । आपो ह यत् । प्रजापते ॥  
 स वैद पुत्रः पितरँ स मातरँ स सूनुर्भुवत्स भुवत्पुनर्मघः । स  
 द्यामौर्णोदन्तरिँ स सुवः स विश्वा भुवो अभवत्स आभवत् ॥ उदु त्यं  
 चित्रम् ॥  
 स प्रब्रवन्नवीयसाग्रे द्युम्नेन संयता । बृहत्तन्थ भानुना ॥  
 नि काव्या वेधसः शश्वतस्कर्हस्ते दधानो नर्या पुरुणि ।  
 अग्निर्भुवद्रयिपती रयीणाँ सत्रा चक्राणो अमृतानि विश्वा ॥  
 हिरण्यपाणिमूतयै सवितारमुप ह्वये । स चेत्ता देवता पदम् ॥  
 वाममद्य सवितर्वाममु श्वो दिवेदिवे वाममस्मभ्यँ सावीः । वामस्य  
 हि क्षयस्य देव भूरैया धिया वामभाजः स्याम ॥  
 बडित्था पर्वतानां खिद्रम्बिभर्षि पृथिवि । प्र या भूमि प्रवत्वति म्हा  
 जिनोषि महिनि ॥ स्तोमांसस्त्वा विचारिणि प्रति षोभन्त्यक्तुभिः । प्र  
 या वाजं न हेषन्तम्पेरुमस्यस्यर्जुनि ॥  
 ऋदूदरेण सख्या सचेय यो मा न रिष्यैद्धर्यश्च पीतः । अयं यः सोमो  
 न्यधाय्यस्मे तस्मा इन्द्रम्प्रतिरमेम्यच्छ ॥  
 आपान्तमन्युस्तृपलप्रभर्मा धुनिः शिमीवाञ्छरुमाँ ऋजीषी । सोमो  
 विश्वान्यतसा वनानि नार्वागिन्द्रम्प्रतिमानानि देभुः ॥  
 प्र सुवानः सोमं ऋतयुश्चिकेतेन्द्राय ब्रह्म जमदग्निरर्चन् । वृषा यन्तासि  
 शर्वसस्तरस्यान्तर्यच्छ गृणते ध्रुवं दृँह ॥  
 सबाधस्ते मदं च शुष्मयं च ब्रह्म नरो ब्रह्मकृतः सपर्यन् । अर्को वा  
 यत्तुरते सोमचक्षास्तत्रेदिन्द्रो दधते पृत्सु तुर्याम् ॥  
 वर्षट्ते विष्णवास आ कृणोमि तन्मै जुषस्व शिपिविष्ट हव्यम् ।  
 वर्धन्तु त्वा सुष्टुतयो गिरौ मे यूयम्पात स्वस्तिभिः सदा नः ॥

प्र तत्तै अद्य शिपिविष्ट नामार्यः शंसामि वयुनानि विद्वान् । तं त्वा  
गृणामि तवसुमर्तवीयान्द्वयन्तमस्य रजसः पराके ॥

किमित्तै विष्णो परिचक्ष्यम्भूत्प्र यद्वैवक्षे शिपिविष्टो अस्मि । मा वर्षो  
अस्मदपे गूह एतद्यदन्यरूपः समिथे बभूथ ॥

अग्ने दा दाशुषे रयिं वीरवन्तम्परीणसम् । शिशीहि नः सूनुमर्तः ॥

दा नो अग्ने शतिनो दाः सहस्त्रिणो दुरो न वाजं श्रुत्या अपा वृधि ।

प्राची द्यावापृथिवी ब्रह्मणा कृधि सुवर्णं शुक्रमुषसो वि दिद्युतुः ॥

अग्निर्दा द्रविणं वीरपेशा अग्निर्ऋषिं यः सहस्रां सुनोति । अग्निर्दिवि  
हव्यमा ततानाग्नेर्धामानि विभृता पुरुत्रा ॥

मा नो मर्धीरा तू भर ॥

घृतं न पूतं तनूरैपाः शुचि हिरण्यम् । तत्तै रुक्मो न रौचत स्वधावः उभे  
सुश्चन्द्र सर्पिषो दर्वी श्रीणीष आसनि । उतो न उत्पूर्या उक्थेषु  
शवसस्पत इषं स्तोतृभ्य आ भर ॥

वायो शतं हरीणां युवस्व पोष्यानाम् । उत वा ते सहस्त्रिणो रथ आ  
यातु पाजसा ॥

प्र याभि र्यासिं दाश्वांसमच्छा नियुद्धिर्वायविष्टये दुरोणे । नि नो  
रयिं सुभोजसं युवेह नि वीरवद्व्यमश्वियं च राधः ॥

रेवतीर्नः सधुमाद् इन्द्रै सन्तु तुविवाजाः । क्षुमन्तो याभिर्मदेम ॥

रेवां इद्रेवर्तः स्तोता स्यात्त्वार्वतो मघोनः । प्रेदु हरिवः श्रुतस्य ॥१२॥

इति द्वितीयकाण्डे द्वितीयः प्रपाठकः २

अथ द्वितीयकाण्डे तृतीयः प्रपाठकः ३

आदित्येभ्यो भुवद्व्यश्चरुं निर्वपेद्भूतिकाम आदित्या वा एतम्भूत्यै प्रति



देवा वै मृत्योरबिभयुस्ते प्रजापतिमुपाधावन्तेभ्य एताम्प्राजापत्याँ  
 शतकृष्णलां निरवपत्तयैवैष्वमृतमदधाद्यो मृत्योर्बिभीयात्तस्मा  
 एताम्प्राजापत्याँ शतकृष्णलां निर्वपेत्प्रजापतिमेव स्वेन भागधेयेनोप  
 धावति स एवास्मिन्नायुर्दधाति सर्वमायुरेति शतकृष्णला भवति शतायुः  
 पुरुषः शतेन्द्रिय आयुष्येवेन्द्रिये प्रति तिष्ठति घृते भवत्यायुर्वै घृतममृतँ  
 हिरण्यमायुश्चैवास्मा अमृतं च समीचीं दधाति चत्वारिचत्वारि  
 कृष्णलान्यव द्यति चतुरवत्तस्याप्रया एकधा ब्रह्मण उप हरत्येकधैव  
 यजमान आयुर्दधात्य सावादित्यो न व्यरोचत तस्मै देवाः  
 प्रायश्चित्तिमैच्छन्तस्मा एतँ सौर्यं चरुं निरवपन्तेनैवास्मिन्नुचमदधुर्यो  
 ब्रह्मवर्चसकामः स्यात्तस्मा एतँ सौर्यं चरुं निर्वपेदमुमेवादित्यँ स्वेन  
 भागधेयेनोप धावति स एवास्मिन्ब्रह्मवर्चसं दधाति ब्रह्मवर्चस्यैव  
 भवत्यु भयतो रुक्मौ भवत उभयत एवास्मिन्नुचं दधाति प्रयाजेप्रयाजे  
 कृष्णलं जुहोति दिग्भ्य एवास्मै ब्रह्मवर्चसमव रुद्ध आग्नेयमष्टाकपालं  
 निर्वपेत्सावित्रं द्वादशकपालभूम्यै चरुं यः कामयेत् हिरण्यं विन्देय  
 हिरण्यम्पोषं नमेदिति यदाग्नेयो भवत्याग्नेयं वै हिरण्यं यस्यैव हिरण्यं  
 तेनैवैनद्विन्दते सावित्रो भवति सवितृप्रसूत एवैनद्विन्दते भूम्यै  
 चरुर्भवत्यस्यामेवैनद्विन्दत उपैन्ँ हिरण्यं नमति वि वा एष इन्द्रियेण  
 वीर्येण व्यृध्यते यो हिरण्यं विन्दत एतामेव निर्वपेद्विरण्यं वित्त्वा नेन्द्रियेण  
 वीर्येण व्यृध्यत एतामेव निर्वपेद्यस्य हिरण्यं नश्येद्यदाग्नेयो भवत्याग्नेयं  
 वै हिरण्यं यस्यैव हिरण्यं तेनैवैनद्विन्दति सावित्रो भवति सवितृप्रसूत  
 एवैनद्विन्दति भूम्यै चरुर्भवत्यस्यां वा एतन्नश्यति  
 यन्नश्यत्यस्यामेवैनद्विन्दतीन्द्रः त्वष्टुः सोममभीषहापिबत्स  
 विष्वङ्गव्यार्च्छत्स इन्द्रियेण सोमपीथेन व्यार्ध्यत स यदूर्ध्वमुदवमीत्ते



श्यामाका अभवन्त्स प्रजापतिमुपाधावत्तस्मा एतं सौमेन्द्रं श्यामाकं  
 चरुम्रिरवपत्तेनैवास्मिन्निन्द्रियं सौमपीथमदधा द्वि वा एष इन्द्रियेण  
 सोमपीथेनर्ध्यते यः सोमं वर्मिति यः सौमवामी स्यात्तस्मा एतं  
 सौमेन्द्रं श्यामाकं चरुं निर्वपेत्सोमं चैवेन्द्रं च स्वेन भागधेयेनोप  
 धावति तावेवास्मिन्निन्द्रियं सौमपीथं धत्तो नेन्द्रियेण सोमपीथेन  
 व्यृध्यते यत्सौम्यो भवति सोमपीथमेवाव रुन्दे यदैन्द्रो भवतीन्द्रियं वै  
 सौमपीथ इन्द्रियमेव सौमपीथमव रुन्दे श्यामाको भवत्येष वाव स  
 सोमः साक्षादेव सौमपीथमव रुन्देऽग्रये दात्रे पुरोडाशमष्टाकपालं  
 निर्वपेदिन्द्राय प्रदात्रे पुरोडाशमेकादशकपालम्पशुकामोऽग्निरेवास्मै  
 पशून्प्रजनयति वृद्धानिन्द्रः प्र यच्छति दधि मधु घृतमापौ धाना  
 भवन्त्येतद्वै पशूनां रूपं रूपेणैव पशूनव रुन्दे पञ्चगृहीतम्भवति पाङ्गा  
 हि पशवो बहुरूपम्भवति बहुरूपा हि पशवः समृध्यै प्राजापत्यम्भवति  
 प्राजापत्या वै पशवः प्रजापतिरेवास्मै पशून्प्र जनयत्यात्मा वै पुरुषस्य  
 मधु यन्मध्वग्नौ जुहोत्यात्मानमेव तद्यजमानोऽग्नौ प्र दधाति पङ्क्यौ  
 याज्यानुवाक्यै भवतः पाङ्कः पुरुषः पाङ्गाः पशव आत्मानमेव  
 मृत्योर्निष्क्रीय पशूनव रुन्दे ॥२॥

देवा वै सूत्रमासुतर्द्धिपरिमितं यशस्कामास्तेषां सोमं राजानं यशं  
 आर्च्छत्स गिरिमुदैत्तमग्निरनूदैत्तावग्नीषोमौ समभवतां ताविन्द्रौ  
 यज्ञविभ्रष्टोऽनु परैत्तावब्रवीद्याजयतुम्मेति तस्मा एतामिष्टिं  
 निरवपतामाग्नेयमष्टाकपालमैन्द्रमेकादशकपालं सौम्यं चरुं  
 तयैवास्मिन्तेज इन्द्रियम्ब्रह्मवर्चसमधत्तां यो यज्ञविभ्रष्टः स्यात्तस्मा  
 एतामिष्टिं निर्वपेदाग्नेयमष्टाकपालमैन्द्रमेकादशकपालं सौम्यं चरुं

यदाग्नेयो भवति तेज एवास्मिन्तेन दधाति यदैन्द्रो  
 भवतीन्द्रियमेवास्मिन्तेन दधाति यत्सौम्यो ब्रह्मवर्चसं तेनाग्नेयस्य च  
 सौम्यस्य चैन्द्रे समाश्लेषयेत्तेजश्चैवास्मिन्ब्रह्मवर्चसं च समीचीं  
 दधात्यग्नीषोमीयमेकादशकपालं निर्वपेद्यं कामो नोपनमेदाग्नेयो वै  
 ब्राह्मणः स सोमम्पिबति स्वामेव देवतां स्वेन भागधेयेनोप धावति  
 सैवैनं कामेन समर्धयत्युपैनं कामो नमत्यग्नीषोमीयमष्टाकपालं  
 निर्वपेद्ब्रह्मवर्चसकामोऽग्नीषोमावेव स्वेन भागधेयेनोप धावति  
 तावेवास्मिन्ब्रह्मवर्चसं धत्तो ब्रह्मवर्चस्यैव भवति यद्दष्टाकपालस्तेनाग्नेयो  
 यच्छ्यामाकस्तेन सौम्यः समृद्धयै सोमाय वाजिनै श्यामाकं चरुं  
 निर्वपेद्यः क्लैव्याद्विभीयाद्रेतो हि वा एतस्माद्वाजिनमपक्रामत्यथैष  
 क्लैव्याद्विभाय सोममेव वाजिनं स्वेन भागधेयेनोप धावति स  
 एवास्मिन्नेतो वाजिनं दधाति न क्लीबो भवति  
 ब्राह्मणस्पत्यमेकादशकपालं निर्वपेद्ग्रामकामो । ब्रह्मणस्पतिमेव स्वेन  
 भागधेयेनोप धावति स एवास्मै सजातान्प्र यच्छति ग्राम्यैव भवति  
 गुणवती याज्यानुवाक्यै भवतः सजातैरेवैनं गुणवन्तं करोत्येतामेव  
 निर्वपेद्यः कामयैत ब्रह्मन्विशं वि नाशयेयमिति मारुती याज्यानुवाक्यै  
 कुर्याद्ब्रह्मन्नेव विशं वि नाशयति ॥३॥

अर्यम्णे चरुं निर्वपेत्सुवर्गकामोऽसौ वा आदित्योऽर्यमार्यमणमेव स्वेन  
 भागधेयेनोप धावति स एवैनं सुवर्गं लोकं गमयत्यर्यम्णे चरुं  
 निर्वपेद्यः कामयैत दानकामा मे प्रजाः स्युरित्यसौ वा आदित्योऽर्यमा यः  
 खलु वै ददाति सोऽर्यमार्यमणमेव स्वेन भागधेयेनोप धावति स एवास्मै  
 दानकामाः प्रजाः करोति दानकामा अस्मै प्रजा भवन्त्यर्यम्णे चरुं

निर्वपेद्यः कामयेत स्वस्ति जनतामियामित्यसौ वा  
 आदित्योऽर्यमार्यमणमेव स्वेन भागधेयेनोप धावति स एवैनं तद्गमयति  
 यत्र जिगमिषतीन्द्रो वै देवानामानुजावर आसीत्स  
 प्रजापतिमुपाधावत्तस्मा एतमैन्द्रमानुषूकमेकादशकपालं  
 निर्वपत्तेनैवैनमग्रं देवतानाम्पर्यणयद्बुध्वती अग्रवती याज्यानुवाक्ये  
 अकरोद्बुधादेवैनमग्रम्पर्यणयद्दो राजन्य आनुजावरः स्यात्तस्मा  
 एतमैन्द्रमानुषूकमेकादशकपालं निर्वपेदिन्द्रमेव स्वेन भागधेयेनोप  
 धावति स एवैनमग्रं समानानाम्परि णयति बुध्वती अग्रवती  
 याज्यानुवाक्ये भवतो बुधादेवैनमग्रं परि णयत्यानुषूको भवत्येषा ह्येतस्य  
 देवता य आनुजावरः समृद्धयै यो ब्राह्मण आनुजावरः स्यात्तस्मा  
 एतम्बार्हस्पत्यमानुषूकं चरुं निर्वपेद्बृहस्पतिमेव स्वेन भागधेयेनोप धावति  
 स एवैनमग्रं समानानाम्परि णयति बुध्वती अग्रवती याज्यानुवाक्ये  
 भवतो बुधादेवैनमग्रम्परि णयत्यानुषूको भवत्येषा ह्येतस्य देवता य  
 आनुजावरः समृद्धयै ॥४॥

प्रजापतेस्त्रयस्त्रिंशद्दुहितर आसन्ताः सोमाय राज्ञेऽददात्तासां  
 रोहिणीमुपैत्ता ईर्ष्यन्तीः पुनरगच्छन्ता अन्वैत्ताः पुनरयाचत ता अस्मै न  
 पुनरददात्सौऽब्रवीदृतममीष्व यथा समावच्छ उपैष्याम्यथ ते  
 पुनर्दास्यामीति स ऋतमांतीत्ता अस्मै पुनरददात्तासां रोहिणीमेवोपैत्तं  
 यद्धम आर्च्छद्राजानं यद्धम आरदिति तद्राजयद्धमस्य जन्म  
 यत्पापीयानभवत्तत्पापयद्धमस्य यज्जायाभ्योऽविन्दत्तज्जायेन्यस्य य  
 एवमेतेषां यद्धमाणां जन्म वेद नैनमेते यद्धमा विन्दन्ति स एता एव  
 नमस्यन्मुपाधावत्ता अब्रुवन्वरं वृणामहै समावच्छ एव न उपाय इति

तस्मा एतमादित्यं चरुं निर्वपन्तेनैवैनम्पापात्स्रामादमुञ्चन्त्यः  
पापयुद्धमगृहीतः स्यात्तस्मा एतमादित्यं चरुं निर्वपेदादित्यानेव स्वेन  
भागधेयेनोप धावति त एवैनं पापात्स्रामान्मुञ्चन्त्य मावास्यायां  
निर्वपेदमुमेवैनमाप्यार्यमानमन्वा प्याययति नवौनवो भवति जायमान  
इति पुरोऽनुवाक्या भवत्यायुरेवास्मिन्तया दधाति यमादित्या  
अ० शुमाप्याययन्तीति याज्यैवैनमेतया प्याययति ॥५॥

प्रजापतिर्देवेभ्योऽन्नाद्यं व्यादिशत्सौऽब्रवीद्यदिमान्लोकानभ्यतिरिच्यतै  
तन्ममासदिति तदिमान्लोकानभ्यत्यरिच्यतेन्द्र०  
राजानमिन्द्रमभिराजमिन्द्र० स्वराजानं ततो वै स  
इमान्लोका० स्त्रेधादुहत्तत्रिधातौस्त्रिधातुत्वं यं कामयैतान्नादः स्यादिति  
तस्मा एतं त्रिधातुं निर्वपेदिन्द्राय राज्ञे  
पुरोडाशमेकादशकपालमिन्द्रायाधिराजायेन्द्राय स्वराज्ञेऽयं वा इन्द्रो  
राजायमिन्द्रोऽधिराजोऽसाविन्द्रः स्वराडिमानेव लोकान्स्वेन भागधेयेनोप  
धावति त एवास्मा अन्नम्प्र यच्छन्त्यन्नाद एव भवति यथा वृत्सेन प्रत्तां गां  
दुह एवमेवेमान्लोकान्प्रत्तान्काममन्नाद्यं दुह उत्तानेषु कपालेष्वधि  
श्रयत्ययातयामत्वाय त्रयः पुरोडाशा भवन्ति त्रय इमे लोका एषां  
लोकानामाप्त्या उत्तरउत्तरो ज्यायाभवत्येवमिव हीमे लोकाः समृद्धयै  
सर्वेषामभिगमयन्नव द्यत्यच्छम्बट्कारं व्यत्यासमन्वाहानिर्दाहाय ॥६॥

देवासुराः संयत्ता आसन्तान्देवानसुरा अजयन्ते देवाः पराजिग्याना  
असुराणां वैश्यमुपायन्तेभ्य इन्द्रियं  
वीर्यमपाक्रामत्तदिन्द्रोऽचायत्तदन्वपाक्रामत्तद्वरुधुं

नाशक्नोत्तदस्मादभ्यर्धोऽचरत्स प्रजापतिमुपाधावत्तमेतया  
 सर्वपृष्ठयायाजयत्तयैवास्मिन्निन्द्रियं वीर्यमदधाद्य इन्द्रियकामो  
 वीर्यकामः स्यात्तमेतया सर्वपृष्ठया याजयेदेता एव देवताः स्वेन  
 भागधेयेनोप धावति ता एवास्मिन्निन्द्रियं वीर्यं दधति यदिन्द्राय  
 राथंतराय निर्वपति यदेवाग्नेस्तेजस्तदेवाव रुद्धे यदिन्द्राय बार्हताय  
 यदेवेन्द्रस्य तेजस्तदेवाव रुद्धे यदिन्द्राय वैरूपाय यदेव  
 सवितुस्तेजस्तदेवाव रुद्धे यदिन्द्राय वैराजाय यदेव धातुस्तेजस्तदेवाव  
 रुद्धे यदिन्द्राय शाक्वराय यदेव मरुतां तेजस्तदेवाव रुद्धे यदिन्द्राय  
 रैवताय यदेव बृहस्पतेस्तेजस्तदेवाव रुद्ध एतावन्ति वै तेजांसि  
 तान्येवाव रुद्ध उत्तानेषु कपालेष्वधि श्रयत्ययातयामत्वाय  
 द्वादशकपालः पुरोडाशो भवति वैश्वदेवत्वाय समन्तम्पर्यवद्यति  
 समन्तमेवेन्द्रियं वीर्यं यजमाने दधाति व्यत्यासमन्वाहानिर्दहायाश्च  
 ऋषभो वृष्णिर्बस्तः सा दक्षिणा वृषस्त्वायै तयैव यजेताभिश्शस्यमान  
 एताश्चेद्वा अस्य देवता अन्नमदन्त्यदन्त्युवेवास्य मनुष्याः ॥७॥

रजनो वै कौण्डिनः क्रतुजितं जानकिं चक्षुर्वन्यमयात्तस्मा एतामिष्टिं  
 निर्वपद्ग्नये भ्राजस्वते पुरोडाशमष्टाकपालं सौर्यं चरुमग्नये भ्राजस्वते  
 पुरोडाशमष्टाकपालं तयैवास्मिञ्चक्षुर्दधाद्यश्चक्षुष्कामः स्यात्तस्मा  
 एतामिष्टिं निर्वपद्ग्नये भ्राजस्वते पुरोडाशमष्टाकपालं सौर्यं चरुमग्नये  
 भ्राजस्वते पुरोडाशमष्टाकपालमग्नेर्वै चक्षुषा मनुष्या वि पश्यन्ति सूर्यस्य  
 देवा अग्निं चैव सूर्यं च स्वेन भागधेयेनोप धावति  
 तावेवास्मिञ्चक्षुर्धत्तश्चक्षुष्मानेव भवति यदाग्नेयौ भवतश्चक्षुषी  
 एवास्मिन्तत्प्रति दधाति यत्सौर्यो नासिकां तेनाभितः सौर्यमाग्नेयौ

भवतस्तस्माद्भितो नासिकां चक्षुषी तस्मान्नासिकया चक्षुषी विधृते  
समानी याज्यानुवाक्यै भवतः समानं हि चक्षुः समृद्ध्या उदु त्यं  
जातवेदसं सप्त त्वा हरितो रथे चित्रं देवानामुदगादनीकमिति  
पिण्डान्प्र यच्छति चक्षुरेवास्मै प्र यच्छति यदेव तस्य तत् ॥८॥

ध्रुवोऽसि ध्रुवोऽहं संजातेषु भूयासं धीरश्चेत्ता वसुविद्ध्रुवोऽसि  
ध्रुवोऽहं संजातेषु भूयासमुग्रश्चेत्ता वसुविद्ध्रुवोऽसि ध्रुवोऽहं संजातेषु  
भूयासमभिभूश्चेत्ता वसुवि दामनमस्यामनस्य देवा ये संजाताः कुमारः  
समनसस्तानहं कामये हृदा ते मां कामयन्तां हृदा तान्म आमनसः  
कृधि स्वाहामनमस्यामनस्य देवा याः स्त्रियः समनसस्ता अहं कामये  
हृदा ता मां कामयन्तां हृदा ता म आमनसः कृधि स्वाहा वैश्वदेवीं  
सांग्रहणीं निर्वपेद्ग्रामकामो वैश्वदेवा वै संजाता विश्वानेव देवान्त्स्वेन  
भागधेयेनोप धावति त एवास्मै सजातान्प्र यच्छन्ति ग्राम्यैव भवति  
सांग्रहणी भवति मनोग्रहणं वै संग्रहणं मन एव संजातानां गृह्णाति  
ध्रुवोऽसि ध्रुवोऽहं संजातेषु भूयासमिति परिधीन्परि  
दधात्याशिषमेवैतामा शास्तेऽथो एतदेव सर्वं संजातेष्वधि भवति  
यस्यैवं विदुष एते परिधयः परिधीयन्त आमनमस्यामनस्य देवा इति  
तिस्त्र आहुतीर्जुहोत्येतावन्तो वै संजाता ये महान्तो ये क्षुल्लका याः  
स्त्रियः तानेवाव रुद्धे त एनमवरुद्धा उप तिष्ठन्ते ॥९॥

यन्नवमैत्तन्नवनीतमभवद्यदसर्पत्तत्सर्पिरेभवद्यदधियत  
तद्धृत मभव दश्विनोः प्राणोऽसि तस्य ते दत्तां ययोः प्राणोऽसि  
स्वाहे न्द्रस्य प्राणोऽसि तस्य ते ददातु यस्य प्राणोऽसि स्वाहा

मित्रावरुणयोः प्राणोऽसि तस्य ते दत्तां ययोः प्राणोऽसि स्वाहा विश्वेषां  
 देवानाम्प्राणोऽसि तस्य ते ददतु येषाम्प्राणोऽसि स्वाहा घृतस्य  
 धाराममृतस्य पन्थामिन्द्रैश्च दत्ताम्पर्यताम्रुद्धिः । तत्त्वा विष्णुः  
 पर्यपश्यत्तत्त्वेडा गव्यैरयत् ॥

पावमानेन त्वा स्तोमैर्न गायत्रस्य वर्तन्योपांशोर्वीर्येण देवस्त्वा  
 सवितोत्सृजतु जीवातवे जीवनस्यायै बृहद्रथन्तरयोस्त्वा स्तोमैर्न त्रिष्टुभौ  
 वर्तन्या शुक्रस्य वीर्येण देवस्त्वा सवितोत्सृजतु जीवातवे जीवनस्याया  
 अग्नेस्त्वा मात्रया जगत्यै वर्तन्याग्रयणस्य वीर्येण देवस्त्वा सवितोत्सृजतु  
 जीवातवे जीवनस्याया इममग्र आयुषे वर्चसे कृधि प्रिं रेतो वरुण सोम  
 राजन् । मातेवास्मा अदिते शर्म यच्छ विश्वे देवा जरदष्टिर्यथासत् ॥  
 अग्निरायुष्मान्त्स वनस्पतिभिरायुष्मान्तेन त्वायुषायुष्मन्तं करोमि सोम  
 आयुष्मान्त्स ओषधीभिर्यज्ञ आयुष्मान्त्स  
 दक्षिणाभिर्ब्रह्मायुष्मत्तद्ब्राह्मणैरायुष्मद्देवा आयुष्मन्तस्तेऽमृतेन पितर  
 आयुष्मन्तस्ते स्वधयायुष्मन्तस्तेन त्वायुषायुष्मन्तं करोमि ॥१०॥

अग्निं वा एतस्य शरीरं गच्छति सोमं रसो वरुण एनं वरुणपाशेन  
 गृह्णाति सरस्वतीं वाग्नाविष्णू आत्मा यस्य ज्योगामयति । यो  
 ज्योगामयावी स्याद्यो वा कामयैत सर्वमायुरियामिति तस्मा एतामिष्टिं  
 निर्वपेदाग्नेयमष्टाकपालं सौम्यं चरुं वारुणं दशकपालं सारस्वतं  
 चरुमाग्रावैष्णवमेकादशकपालमग्नेरेवास्य शरीरं निष्क्रीणाति सोमाद्रसं  
 वारुणेनैवैनं वरुणपाशान्मुञ्चति सारस्वतेन वाचं दधात्यग्निः सर्वा देवता  
 विष्णुर्यज्ञो देवताभिश्चैवैनं यज्ञेन च भिषज्यत्युत यदीतासुर्भवति जीवत्येव  
 यन्नवमैत्तन्नवनीतमभवदित्याज्यमवैक्षते रूपमेवास्यैतन्महिमानं

व्याचष्टेऽश्विनौः प्राणोऽसीत्याहाश्विनौ वै देवानां भिषजौ ताभ्यामेवास्मै  
 भेषजं करोतीन्द्रस्य प्राणोऽसीत्याहेन्द्रियमेवास्मिन्नेतेन दधाति  
 मित्रावरुणयोः प्राणोऽसीत्याह प्राणापानावेवास्मिन्नेतेन दधाति विश्वेषां  
 देवानाम्प्राणोऽसीत्याह वीर्यमेवास्मिन्नेतेन दधाति घृतस्य धाराममृतस्य  
 पन्थामित्याह यथायजुरेवैतत्पावमानेन त्वा स्तोमेनेत्याह  
 प्राणमेवास्मिन्नेतेन दधाति बृहद्रथन्तरयोस्त्वा स्तोमेनेत्याहौज  
 एवास्मिन्नेतेन दधात्यग्नेस्त्वा मात्रयेत्याहात्मानमेवास्मिन्नेतेन  
 दधात्यृत्विजः पर्याहुर्यावन्त एवर्त्विजस्त एनम्भिषज्यन्ति ब्रह्मणो  
 हस्तमन्वारभ्य पर्याहुरेकधैव यजमान आयुर्दधति यदेव तस्य  
 त द्विरंशयाद्घृतं निष्पिबत्यायुर्वै घृतममृतं  
 हिरंशयममृतादेवायुर्निष्पिबति शतमानम्भवति शतायुः पुरुषः शतेन्द्रिय  
 आयुष्येवेन्द्रिये प्रति तिष्ठत्यथो खलु यावतीः समा एष्यन्मन्येत  
 तार्वन्मानं स्यात्समृद्ध्या इममग्न आयुषे वर्चसे  
 कृधीत्याहार्युरेवास्मिन्वर्चो दधाति । विश्वे देवा जरदष्टिर्यथासदित्याह  
 जरदष्टिमेवैनं करोत्यग्निरायुष्मानिति हस्तं गृह्णात्येते वै देवा  
 आयुष्मन्तस्त एवास्मिन्नायुर्दधति सर्वमायुरेति ॥११॥

प्रजापतिर्वरुणायाश्चमनयत्स स्वां देवतामार्च्छत्स पर्यदीर्यत् स एतं वारुणं  
 चतुष्कपालमपश्यत्तं निरवपत्ततो वै स वरुणापाशादमुच्यत् वरुणो वा एतं  
 गृह्णाति योऽश्वम्प्रतिगृह्णाति यावतोऽश्वान्प्रतिगृह्णीयात्तावतो  
 वारुणाञ्चतुष्कपालान्निर्वपेद्वरुणमेव स्वेन भागधेयेनोप धावति स एवैनं  
 वरुणापाशान्मुञ्चति चतुष्कपाला भवन्ति चतुष्पाद्द्वयश्वः समृद्ध्या  
 एकमतिरिक्तं निर्वपेद्यमेव प्रतिग्राही भवति यं वा नाध्येति तस्मादेव



वरुणपाशान्मुच्यते यद्यपरम्प्रतिग्राही स्यात्सौर्यमेककपालमनु  
निर्वपेदमुमेवादित्यमुच्चारं कुरुतेऽपोऽवभृथमवैत्यप्सु वै वरुणः साक्षादेव  
वरुणमव यजतेऽपोनृप्रीयं चरुम्पुनरेत्य निर्वपेदप्सुयोनिर्वा अश्वः  
स्वामेवैनं योनिं गमयति स एनं शान्त उप तिष्ठते ॥१२॥

या वामिन्द्रावरुणा यतव्या तनूस्तयेममं हंसो मुञ्चतं या वामिन्द्रावरुणा  
सहस्या रक्षस्या तेजस्या तनूस्तयेममं हंसो मुञ्चतं यो वामिन्द्रावरुणावृग्नौ  
स्त्रामस्तं वामेतेनाव यजे यो वामिन्द्रावरुणा द्विपात्सु पशुषु चतुष्पात्सु  
गोष्ठे गृहेष्वप्सो षधीषु वनस्पतिषु स्त्रामस्तं वामेतेनाव यज इन्द्रो वा  
एतस्यैन्द्रियेणप क्रामति वरुण एनं वरुणपाशेन गृह्णाति यः पाप्मनां  
गृहीतो भवति यः पाप्मनां गृहीतः स्यात्तस्मा एतामैन्द्रावरुणीम्पयस्यां  
निर्वपेदिन्द्र एवास्मिन्निन्द्रियं दधाति वरुण एनं वरुणपाशान्मुञ्चति पयस्यां  
भवति पयो हि वा एतस्मादपक्रामत्यथैष पाप्मनां गृहीतो यत्पयस्यां  
भवति पय एवास्मिन्तया दधाति पयस्यायां पुरोडाशमव  
दधात्यात्मन्वन्तमेवैनं करोत्यथो आयतनवन्तमेव चतुर्धा व्यूहति दिद्वेव  
प्रति तिष्ठति पुनः समूहति दिग्भ्य एवास्मै भेषजं करोति समूह्याव द्यति  
यथाविद्धं निष्कृन्तति तादृगेव तद्यो वामिन्द्रावरुणावृग्नौ स्त्रामस्तं  
वामेतेनाव यज इत्याह दुरिष्ट्या एवैनम्पाति यो वामिन्द्रावरुणा द्विपात्सु  
पशुषु स्त्रामस्तं वामेतेनाव यज इत्याहैतावतीर्वा आप ओषधयो  
वनस्पतयः प्रजाः पशव उपजीवनीयास्ता एवास्मै वरुणपाशान्मुञ्चति  
॥१३॥

स प्रब्रवन्नि काव्येन्द्रं वो विश्वतस्परीन्द्रं नरः ।

त्वं नः सोम विश्वतो रक्षा राजन्नघायतः । न रिष्येत्त्वावतः सर्वा ॥  
 या ते धामानि दिवि या पृथिव्यां या पर्वतेष्वोषधीष्वप्सु । तेभिर्नो  
 विश्वैः सुमना अहेङ्नाजन्त्सोमं प्रति हव्या गृभाय ॥  
 अग्नीषोमा सवेदसा सहृती वनतं गिरः । सं देवत्रा बभूवथुः ॥  
 युवमेतानि दिवि रोचनान्यग्निश्च सोमं सक्रतू अधत्तम् । युवँ  
 सिन्धँरभिर्शस्तेरवद्यादग्नीषोमावमुञ्चतं गृभीतान् ॥  
 अग्नीषोमाविमँ सु मे शृणुतं वृषणा हवम् । प्रति सूक्तानि हर्यतम्भवंतं  
 दाशुषे मयः ॥  
 आन्यं दिवो मातरिश्वा जभारामथ्नादन्यम्परि श्येनो अद्रैः । अग्नीषोमा  
 ब्रह्मणा वावृधानोरं यज्ञाय चक्रथुरु लोकम् ॥  
 अग्नीषोमा हविषः प्रस्थितस्य वीतँ हर्यतं वृषणा जुषेथाम् । सुशर्माणा  
 स्ववसा हि भूतमथा धत्तं यजमानाय शं योः ॥  
 आ प्यायस्व सं ते ॥  
 गुणानां त्वा गुणपतिँ हवामहे क्विं कवीनामुपमश्रवस्तमम् ।  
 ज्येष्ठराजम्ब्रह्मणाम्ब्रह्मणस्पत आ नः शृण्वन्नूतिभिः सीद सादनम् ॥  
 स इज्जनैन स विशा स जन्मना स पुत्रैर्वाजम्भरते धना नृभिः । देवानां  
 यः पितरमाविवासति श्रद्धामना हविषा ब्रह्मणस्पतिम् ॥  
 स सुष्टुभा स ऋक्वता गुणेन वलँ रुरोज फलिगँ रवेण ।  
 बृहस्पतिरुसृया हव्यसूदः कनिक्रदद्वावशतीरुदाजत् ॥  
 मरुतो यद्ध वो दिवो या वः शर्म ॥  
 अर्यमा याति वृषभस्तुविष्मान्दाता वसूनाम्पुरुहूतो अर्हन् । सहस्राक्षो  
 गौत्रभिद्वज्रबाहरस्मासु देवो द्रविणं दधातु ॥  
 ये तैऽर्यमन्ब्रह्मवो देवयानाः पन्थानो राजन्दिव आचरन्ति । तेभिर्नो देव

महि शर्म यच्छु शं न एधि द्विपदे शं चतुष्पदे ॥  
 बुधादग्रमङ्गिरोभिर्गृणानो वि पर्वतस्य दृ॑हितान्यैरत् । रुजद्रोधा॑ंसि  
 कृत्रिमा॑णयेषा॑ सोमस्य ता मद् इन्द्रश्चकार ॥  
 बुधादग्रै॑ण वि मिमाय॑ मानैर्वज्रेण॑ खान्य॑तृणन्नदीनाम् ।  
 वृथा॑सृजत्प॒थिभिर्दीर्घया॑थैः सोमस्य॒ ता मद् इन्द्रश्चकार॑ प्र यो जु॒ज्ञे वि॒द्वा॑  
 अस्य॒ बन्धुं॑ विश्वानि दे॒वो जनि॑मा विवक्ति । ब्रह्म॒ ब्रह्म॑ण उ॒ज्जभा॑र  
 मध्या॑न्नीचादु॒च्चा स्व॒धया॑भि प्र तस्थौ ॥  
 म॒हान्म॒ही अ॒स्तभा॑यद्वि जा॒तो द्या॑ सद्य॒ पार्थि॑वं च॒ रजः॑ । स बु॒धादा॑ष्ट  
 जु॒नुषा॑भ्यग्र॒म्बृह॑स्पतिर्दे॒वता॑ यस्य॒ स॒म्राट् ॥  
 बु॒धाद्यो॑ अग्र॒मभ्य॑त्यो॒जसा॑ बृह॒स्पति॑मा वि॒वास॑न्ति दे॒वाः । भि॒नद्भूलं॑ वि  
 पुरो॑ दर्दरीति॒ कनि॑क्रदत्सु॒वर॑पो जगाय ॥१४॥

इति द्वितीयकाण्डे तृतीयः प्रपाठकः ३

अथ द्वितीयकाण्डे चतुर्थः प्रपाठकः ४

दे॒वा म॑नु॒ष्याः पि॒तर॒स्तै॑ऽन्यत॑ आस॒न्नसु॑रा॒ रक्षा॑ंसि पिशा॒चास्तै॑ऽन्यत॒स्तेषां॑  
 दे॒वाना॑मु॒त यद॑ल्पं॒ लोहि॑त॒मकु॑र्वन्त॒द्रक्षा॑ंसि  
 रात्री॑भिरसु॒भन्तान्त्सु॑ब्धान्मृ॒तान॑भि व्यौ॒च्छ॑त्ते दे॒वा अ॒विदु॑र्यो वै  
 नो॑ऽय॒मि॒यते॑ रक्षा॑ंसि वा इ॒मं घ्न॑न्तीति॒ ते रक्षा॑ंस्यु॒पा॒मन्त्र॑यन्त  
 तान्य॑ब्रुव॒न्वरं॑ वृ॒णाम॑है यदसु॒राञ्जया॑म् तन्नः॒ स॒हास॑दिति॒ ततो॑ वै दे॒वा  
 असु॑रानज॒यन्ते॑ऽसु॒राञ्जित्वा॑ रक्षा॑ंस्यु॒पा॒नुद॑न्त॒ तानि॑ रक्षा॑ंस्यनृ॒तम॑क॒र्तेति॑  
 सम॑न्तं दे॒वान्पर्य॑वि॒शन्ते॑ दे॒वा अ॒ग्राव॑नाथन्त॒ तैऽग्नये॑ प्रव॑ते  
 पुरो॑डाश॒म॒ष्टाक॑पालं॒ निर॑वपन्न॒ग्नये॑ वि॒बा॒धव॑तेऽग्नये॒ प्रती॑कवते॒ यद्ग्नये॑  
 प्रव॑ते॒ निर॑व॒प॒न्या॒न्येव॑ पु॒रस्ता॑द्रक्षा॑ंस्यु॒पा॒स॒न्तानि॑ तेन॒ प्राणु॑दन्त॒ यद्ग्नये॑

विबाधवते यान्येवाभितो रक्षाँस्यासन्तानि तेन व्यबाधन्त यद्गये  
 प्रतीकवते यान्येव पश्चाद्रक्षाँस्यासन्तानि तेनापानुदन्त ततो देवा  
 अभवन्परासुरा यो भ्रातृव्यवान्त्स्यात्स स्पर्धमान एतयेष्ट्या यजेताग्नये  
 प्रवते पुरोडाशमष्टाकपालं निर्वपेद्गये विबाधवतेऽग्नये प्रतीकवते यद्गये  
 प्रवते निर्वपति य एवास्माच्छ्रेयान्भ्रातृव्यस्तं तेन प्र गुदते यद्गये  
 विबाधवते य एवैनैन सदृशं तेन वि बाधते यद्गये प्रतीकवते य  
 एवास्मात्पापीयान्तं तेनाप नुदते प्र श्रेयाँसम्भ्रातृव्यं नुदतेऽति सदृशं  
 क्रामति नैनम्पापीयानाप्रोति य एवं विद्वानेतयेष्ट्या यजते ॥१॥

देवासुराः संयत्ता आसन्ते देवा अब्रुवन्यो नो वीर्यावत्तमस्तमनु  
 समारभामहा इति त इन्द्रमब्रुवन्त्वं वै नो वीर्यावत्तमोऽसि त्वामनु  
 समारभामहा इति सौऽब्रवीत्तिस्रो म इमास्तनुवो वीर्यावतीस्ताः  
 प्रीणीताथासुरानुभि भविष्यथेति ता वै ब्रूहीत्यब्रुवन्नियमँहोमुगियं  
 विमृधेयमिन्द्रियावतीत्यब्रवीत्त इन्द्रायाँहोमुचै पुरोडाशमेकादशकपालं  
 निर्वपन्नन्द्राय वैमृधायेन्द्रायेन्द्रियावते यदिन्द्रायाँहोमुचै निर्वपन्नँहंस  
 एव तेनामुच्यन्त यदिन्द्राय वैमृधाय मृध एव तेनापानुदन्त  
 यदिन्द्रायेन्द्रियावत इन्द्रियमेव तेनात्मन्नदधत  
 त्रयस्त्रिँशत्कपालम्पुरोडाशं निर्वपन्नयस्त्रिँशद्वै देवतास्ता इन्द्र  
 आत्मन्ननु समारभयत भूत्यै तां वाव देवा विजितिमुत्तमामसुरैर्व्यजयन्त  
 यो भ्रातृव्यवान्त्स्यात्स स्पर्धमान एतयेष्ट्या यजेतेन्द्रायाँहोमुचै  
 पुरोडाशमेकादशकपालं निर्वपेदिन्द्राय वैमृधायेन्द्रायेन्द्रियावतेऽँहंसा  
 वा एष गृहीतो यस्माच्छ्रेयान्भ्रातृव्यो यदिन्द्रायाँहोमुचै निर्वपत्यँहंस  
 एव तेन मुच्यते मृधा वा एषोऽभिषरणो यस्मात्समानेष्वन्यः

श्रेयानुताभ्रातृव्यो यदिन्द्राय वैमृधाय मृध एव तेनाप हते  
 यदिन्द्रायेन्द्रियावत इन्द्रियमेव तेनात्मन्धत्ते त्रयस्त्रिंशत्कपालम्पुरोडाशं  
 निर्वपति त्रयस्त्रिंशद्वै देवतास्ता एव यजमान आत्मन्ननु समारम्भयते  
 भूत्यै सा वा एषा विजितिर्नामेष्टिर्य एवं विद्वानेतयेष्ट्या यजत उक्तमामेव  
 विजितिम्भ्रातृव्येण वि जयते ॥२॥

देवासुराः संयत्ता आसन्तेषां गायत्र्योजो बलमिन्द्रियं  
 वीर्यम्प्रजाम्पशूनसंगृह्यादायापक्रम्यातिष्ठत्तैऽमन्यन्त यतरान्वा  
 इयमुपावत्स्यति त इदम्भविष्यन्तीति तां व्यह्वयन्त विश्वकर्मन्निति देवा  
 दाभीत्यसुराः सा नान्यतरांश्चनोपावर्तत ते देवा एतद्यजुरपश्यन्नोजोऽसि  
 सहोऽसि बलमसि भ्राजोऽसि देवानां धाम नामासि विश्वमसि विश्वायुः  
 सर्वमसि सर्वायुरभिभूरिति वाव देवा असुराणामोजो बलमिन्द्रियं  
 वीर्यम्प्रजाम्पशूनवृञ्जत यद्गायत्र्यपक्रम्यातिष्ठत्तस्मादेतां गायत्रीतीष्टिमाहुः  
 सम्वत्सरो वै गायत्री संवत्सरो वै तदपक्रम्यातिष्ठद्यदेतया देवा  
 असुराणामोजो बलमिन्द्रियं वीर्यं प्रजाम्पशूनवृञ्जत तस्मादेतां संवर्ग  
 इतीष्टिमाहु र्यो भ्रातृव्यवान्त्स्यात्स स्पर्धमान एतयेष्ट्या यजेताग्र्यै  
 संवर्गाय पुरोडाशमष्टाकपालं निर्वपेत्तं श्रुतमासन्नमेतेन यजुषाभि  
 मृशेदोज एव बलमिन्द्रियं वीर्यम्प्रजाम्पशून्भ्रातृव्यस्य वृङ्के भवत्यात्मना  
 परास्य भ्रातृव्यो भवति ॥३॥

प्रजापतिः प्रजा असृजत ता अस्मात्सृष्टाः पराचीरायन्ता यत्रावसन्ततौ  
 गर्मुदुदतिष्ठत्ता बृहस्पतिश्चान्ववैतां सौऽब्रवीद्बृहस्पतिरनया त्वा प्र  
 तिष्ठान्यथ त्वा प्रजा उपावत्स्यन्तीति तम्प्रातिष्ठत्तो वै प्रजापतिम्प्रजा

उपावर्तन्त यः प्रजाकामः स्यात्तस्मा एतम्प्राजापत्यं गर्मुतं चरुं  
निर्वपेत्प्रजापतिमेव स्वेन भागधेयेनोप धावति स एवास्मै प्रजाम्प्र  
जनयति प्रजापतिः पशूनसृजत तैऽस्मात्सृष्टाः पराञ्च आयन्ते यत्रावसन्ततो  
गर्मुदुदतिष्ठत्तान्पूषा चान्ववैताँ सौऽब्रवीत्पूषानया मा प्र तिष्ठार्थं त्वा  
पशव उपावर्त्स्यन्तीति माम्प्र तिष्ठेति सोमोऽब्रवीन्मम् वा  
अकृष्टपच्यमित्युभौ वाम्प्र तिष्ठानीत्यब्रवीत्तौ प्रातिष्ठत्ततो वै  
प्रजापतिम्पशव उपावर्तन्त यः पशुकामः स्यात्तस्मा एतँ सौमापौष्णं  
गर्मुतं चरुं निर्वपेत्सोमापूषणावेव स्वेन भागधेयेनोप धावति तावेवास्मै  
पशून्प्र जनयतः सोमो वै रेतोधाः पूषा पशूनाम्प्रजनयिता सोम एवास्मै  
रेतो दधाति पूषा पशून्प्र जनयति ॥४॥

अग्ने गोभिर्न आ गृहीन्दो पुष्ट्या जुषस्व नः । इन्द्रो धर्ता गृहेषु नः ॥  
सविता यः सहस्त्रियः स नो गृहेषु रारणत् । आ पुषा एत्वा वसु ॥  
धाता ददातु नो रयिमीशानो जगतस्पतिः । स नः पूर्णेन वावनत् ॥  
त्वष्टा यो वृषभो वृषा स नो गृहेषु रारणत् । सहस्त्रेणायुतेन च ॥  
येन देवा अमृतं दीर्घँ श्रवो दिव्यैरयन्त । रायस्पोष त्वमस्मभ्यं गवां  
कुल्मिं जीवसु आ युवस्व ॥  
अग्निर्गृहपतिः सोमो विश्ववनिः सविता सुमेधाः स्वाहा ।  
अग्ने गृहपते यस्ते घृत्यो भागस्तेन सह ओज आक्रममाणाय धेहि  
श्रेष्ठ्यात्पथो मा योषं मूर्धा भूयासुँ स्वाहा ॥५॥

चित्रया यजेत पशुकाम इयं वै चित्रा यद्वा अस्यां विश्वम्भूतमधि प्रजायते  
तेनेयं चित्रा य एवं विद्वाँश्चित्रया पशुकामो यजते प्र प्रजया

पुशुभिर्मिथुनैर्जायते प्रैवाग्नेयेन वापयति रेतः सौम्येन दधाति रेत एव हितं  
 त्वष्टा रूपाणि वि करोति सारस्वतौ भवत एतद्वै दैव्यमिथुनं  
 दैव्यमेवास्मै मिथुनमध्यतो दधाति पुष्ट्यै प्रजननाय सिनीवाल्थै  
 चरुर्भवति वाग्वै सिनीवाली पुष्टिः खलु वै वाक्पुष्टिमेव वाचमुपैत्यैन्द्र  
 उत्तमो भवति तेनैव तन्मिथुनं सप्तैतानि हवींषि भवन्ति सप्त ग्राम्याः  
 पशवः सप्तारण्याः सप्त च्छन्दांस्युभयस्यावरुद्ध्या अथैता  
 आहुतीर्जुहोत्येते वै देवाः पुष्टिपतयस्त एवास्मिन्पुष्टिं दधति पुष्यति  
 प्रजयां पुशुभिरथो यदेता आहुतीर्जुहोति प्रतिष्ठित्यै ॥६॥

मारुतमसि मरुतामोजोऽपां धाराम्भिन्द्र रमयत मरुतः  
 श्येनमायिनम्मनोजवसं वृषणं सुवृक्तिम् । येन शर्ध उग्रमवसृष्टमेति  
 तदश्विना परि धत्तं स्वस्ति ॥  
 पुरोवातो वर्षञ्जिनवरावृत्स्वाहा वातावद्वर्षन्नुग्ररावृत्स्वाहा  
 स्तनयन्वर्षन्भीमरावृत्स्वाहानशन्यवस्फूर्जन्दिद्युद्वर्षन्त्वेषरावृत्स्वाहातिरात्रं  
 वर्षन्पूर्तिरावृत्स्वाहा बहु हायमवृषादिति श्रुतरावृत्स्वाहातपति  
 वर्षन्विराडावृत्स्वाहावस्फूर्जन्दिद्युद्वर्षन्भूतरावृत्स्वाहा मान्दा वाशाः  
 शुन्ध्यूरजिराः । ज्योतिष्मतीस्तमस्वरीरुन्दतीः सुफेनाः । मित्रभृतः  
 क्षत्रभृतः सुराष्ट्रा इह मावत वृष्णो अश्वस्य सुदानमसि वृष्ट्यै त्वोप  
 नह्यामि ॥७॥

देवा वसव्या अग्ने सोम सूर्य । देवाः शर्मण्या मित्रावरुणार्यमन् ।  
 देवाः सपीतयो ऽपां नपादाशुहेमन् । उदनो दत्तोऽदधिभिन्त दिवः  
 पर्जन्यादन्तरिक्षात्पृथिव्यास्ततो नो वृष्ट्यावत दिवा चित्तमः कृणवन्ति

प॒र्जन्ये॑नोदवा॒हेन॑ । पृ॒थि॒वीं यद्व॒चु॒न्दन्ति॑ ॥

आ यं नरः सुदानवो ददाशुषे दिवः कोशमचुच्यवुः । वि पर्जन्याः  
सृजन्ति रोदसी अनु धन्वना यन्ति वृष्टयः ॥

उदीरयथा मरुतः समुद्रतो यूयं वृष्टिं वर्षयथा पुरीषिणः । न वो दस्त्रा  
उप दस्यन्ति धेनवः शुभं यातामनु रथा अवृत्सत ॥

सृजा वृष्टिं दिव आद्भिः समुद्रम्पृण । अब्जा असि प्रथमजा बलमसि  
समुद्रियम् ॥ उन्नम्भय पृथिवीम्भिन्द्रीदं दिव्यं नभः । उदनो दिव्यस्य  
नो देहीशानो वि सृजा दृतिम् ॥

ये देवा दिविभागा येऽन्तरिक्षभागा ये पृथिविभागाः । त इमं यज्ञमवन्तु  
त इदं क्षेत्रमा विशन्तु त इदं क्षेत्रमनु वि विशन्तु ॥८॥

मारुतमसि मरुतामोज इति कृष्णं वासः कृष्णतूष्मपरि धत्त एतद्वै वृष्ट्यै  
रूपं सरूप एव भूत्वा पर्जन्यं वर्षयति रमयत मरुतः श्येनमायिनमिति  
पश्चाद्वातम्प्रति मीवति पुरोवातमेव जनयति वर्षस्यावरुद्ध्यै वातनामानि  
जुहोति वायुर्वै वृष्ट्या ईशे वायुमेव स्वेन भागधेयेनोप धावति स  
एवास्मै पर्जन्यं वर्षयत्यष्टौ जुहोति चतस्रो वै दिशश्चतस्रोऽवान्तरदिशा  
दिग्भ्य एव वृष्टिं सम्प्र च्यावयति कृष्णाजिने सं यौति  
हविरेवाक रन्तर्वेदि सं यौत्यवरुद्ध्यै यतीनामद्यमानानां शीर्षाणि  
परापतन्ते खर्जूरा अभवन्तेषां रस ऊर्ध्वोऽपतत्तानि  
करीराण्यभवन्त्सौम्यानि वै करीराणि सौम्या खलु वा आहुतिर्दिवो वृष्टिं  
च्यावयति यत्करीराणि भवन्ति सौम्यैवाहुत्या दिवो वृष्टिमव रुद्धे  
मधुषा सं यैत्यपां वा एष ओषधीनां रसो यन्मध्वद्भ्य एवौषधीभ्यो



वर्षत्यथो अद्भ्य एवौषधीभ्यो वृष्टिं नि नयति मान्दा वाशा इति सं यौति  
 नामधेयैरैवैना अच्छैत्यथो यथा ब्रूयादसावेहीत्येवमेवैना नामधेयैरा  
 च्यावयति वृष्णो अश्वस्य संदानमसि वृष्ट्यै त्वोप नह्यामीत्याह वृषा वा  
 अश्वो वृषा पर्जन्यः कृष्ण इव खलु वै भूत्वा वर्षति रूपेणैवैनं  
 समर्धयति वर्षस्यावरुद्ध्यै ॥६॥

देवा वसव्या देवाः शर्मण्या देवाः सपीतय इत्या बध्नाति  
 देवताभिरेवान्वहं वृष्टिमिच्छति यदि वर्षेत्तावत्येव हीतव्यं यदि न  
 वर्षेच्छवो भूते हविर्निर्वपे दहोरात्रे वै मित्रावरुणावहोरात्राभ्यां खलु वै  
 पर्जन्यो वर्षति नक्तं वा हि दिवा वा वर्षति मित्रावरुणावेव स्वेन  
 भागधेयेनोप धावति तावेवास्मा अहोरात्राभ्याम्पर्जन्यं वर्षयतोऽग्र्ये  
 धामच्छदै पुरोडाशमष्टाकपालं निर्वपेन्मारुतं सप्तकपालं  
 सौर्यमेककपालमग्निर्वा इतो वृष्टिमुदीरयति मरुतः सृष्टां नयन्ति यदा  
 खलु वा असावादित्यो न्यङ्ग्रश्मिभिः पर्यावर्ततेऽथ वर्षति धामच्छदिव  
 खलु वै भूत्वा वर्षत्येता वै देवता वृष्ट्या ईशते ता एव स्वेन  
 भागधेयेनोप धावति ता एवास्मै पर्जन्यं वर्षयन्त्युतावर्षिष्यन्वर्षत्येव  
 सृजा वृष्टिं दिव आद्भिः समुद्रम्पृणेत्याहेमाश्चैवामूश्चापः समर्धयत्यथो  
 आभिरेवामूरच्छैत्यु ब्जा असि प्रथमजा बलमसि समुद्रियमित्याह  
 यथायजुरेवैत दुन्नम्भय पृथिवीमिति वर्षाहां जुहोत्येषा वा ओषधीनां  
 वृष्टिवनिस्त्यैव वृष्टिमा च्यावयति ये देवा दिविभागा इति  
 कृष्णाजिनमव धूनोतीम एवास्मै लोकाः प्रीता अभीष्टा भवन्ति ॥१०॥

सर्वाणि च्छन्दांस्येतस्यामिष्ट्यामनूच्यानीत्याहुस्त्रिष्टुभो वा एतद्वीर्यं

यत्कुदुष्णिहा जगत्यै यदुष्णिहककुभावन्वाह तेनैव सर्वाणि  
 छन्दाँस्यव रुद्धे गायत्री वा एषा यदुष्णिहा यानि चत्वार्यध्यक्षराणि  
 चतुष्पाद एव ते पशवो यथा पुरोडाशे पुरोडाशोऽध्येवमेव  
 तद्यद्व्यध्यक्षराणि यज्जगत्या परिदध्यादन्तं यज्ञं गमयेत्त्रिष्टुभा परि  
 दधातीन्द्रियं वै वीर्यं त्रिष्टुगिन्द्रिय एव वीर्यं यज्ञम्प्रति ष्ठापयति नान्तं  
 गमयत्यग्ने त्री ते वाजिना त्री षधस्थेति त्रिवत्या परि दधाति  
 सरूपत्वाय सर्वो वा एष यज्ञो यत्रैधातवीयं कामायकामाय प्र युज्यते  
 सर्वेभ्यो हि कामेभ्यो यज्ञः प्रयुज्यते त्रैधातवीयेन यजेताभिचरन्सर्वो वा  
 एष यज्ञो यत्रैधातवीयं सर्वैरैवैनं यज्ञेनाभि चरति स्तृणुत  
 एवैनं मेतयैव यजेताभिचर्यमाणः सर्वो वा एष यज्ञो यत्रैधातवीयं  
 सर्वैरैव यज्ञेन यजते नैनमभिचरन्स्तृणुत एतयैव यजेत सहस्रेण  
 यद्यमाणः प्रजातमेवैनददात्ये तयैव यजेत सहस्रेणेजानोऽन्तं वा एष  
 पशूनां गच्छति यः सहस्रेण यजते प्रजापतिः खलु वै पशूनसृजत  
 ताँस्त्रैधातवीयेनैवासृजत य एवं विद्वाँस्त्रैधातवीयेन पशुकामो यजते  
 यस्मादेव योनैः प्रजापतिः पशूनसृजत तस्मादेवैनान्तसृजत उपैनुत्तरं  
 सहस्रं नमति देवताभ्यो वा एष आ वृश्चयते यो यद्य इत्युक्त्वा न यजते  
 त्रैधातवीयेन यजेत सर्वो वा एष यज्ञो यत्रैधातवीयं सर्वैरैव यज्ञेन  
 यजते न देवताभ्य आ वृश्चयते द्वादशकपालः पुरोडाशो भवति ते  
 त्रयश्चतुष्कपालात्रिष्वमृद्धत्वाय त्रयः पुरोडाशा भवन्ति त्रय इमे लोका  
 एषां लोकानामाप्त्या उत्तरउत्तरो ज्यायान्भवत्येवमिव हीमे लोका  
 यवमयो मध्य एतद्वा अन्तरिक्षस्य रूपं समृद्धयै सर्वेषामभिगमयन्नव  
 द्यत्यच्छम्बट्कारं हिरण्यं ददाति तेज एवाव रुद्धे तार्प्यं ददाति  
 पशूनेवाव रुद्धे धेनुं ददात्याशिष एवाव रुद्धे साम्नो वा एष वर्णो

यद्धिरण्यं यजुषां तार्प्यमुक्थामदानां धेनुरेतानेव सर्वान्वर्णानव रुद्धे  
॥११॥

त्वष्टा हतपुत्रो वीन्द्रः सोममाहरत्तस्मिन्निन्द्र उपहवमैच्छत् तं नोपा हयत  
पुत्रम्मैऽवधीरिति स यज्ञवेशसं कृत्वा प्रासहा सोममपिबत्तस्य  
यदत्यशिष्यत् तत्त्वष्टाहवनीयमुप प्रावर्तयत्स्वाहेन्द्रशत्रुर्वर्धस्वेति स  
यावदूर्ध्वः पराविध्यति तावति स्वयमेव व्यरमत यदि वा  
तावत्प्रवृणमासीत्यदि वा तावदध्यग्रेरासीत्स सम्भवन्नग्रीषोमावभि  
समभवत्स इषुमात्रमिषुमात्रं विष्वङ्ङवर्धत् स  
इमाँल्लोकानवृणोद्यदिमाँल्लोकानवृणोत्तद्वृत्रस्य वृत्रत्वं  
तस्मादिन्द्रोऽबिभेदपि त्वष्टा तस्मै त्वष्टा वज्रमसिञ्चत्तपो वै स वज्र  
आसीत्तमुद्यन्तुं नाशक्नोदथ वै तर्हि विष्णुरन्या  
देवतासीत्सोऽब्रवीद्विष्णवेहीदमा हरिष्यावो येनायमिदमिति स  
विष्णुस्त्रेधात्मानं वि न्यधत्त पृथिव्यां तृतीयमन्तरिक्षे तृतीयं दिवि  
तृतीयमभिपर्यावर्ताद्ध्यबिभेद्यत्पृथिव्यां तृतीयमासीत्तेनेन्द्रो  
वज्रमुदयच्छद्विष्णवनुस्थितः सोऽब्रवीतन्मा मे प्र हारस्ति वा इदं मयि  
वीर्यं तत्ते प्र दास्यामीति तदस्मै प्रायच्छत्तत्प्रत्यगृह्णादधा मेति तद्विष्णवेति  
प्रायच्छत्तद्विष्णुः प्रत्यगृह्णादस्मास्विन्द्र इन्द्रियं दधात्विति यदन्तरिक्षे  
तृतीयमासीत्तेनेन्द्रो वज्रमुदयच्छद्विष्णवनुस्थितः सोऽब्रवीन्मा मे प्र  
हारस्ति वा इदं मयि वीर्यं तत्ते प्र दास्यामीति तदस्मै  
प्रायच्छत्तात्प्रत्यगृह्णादिद्वर्माधा इति तद्विष्णवेति प्रायच्छत्तद्विष्णुः  
प्रत्यगृह्णादस्मास्विन्द्र इन्द्रियं दधात्विति यद्वि वि तृतीयमासीत्तेनेन्द्रो  
वज्रमुदयच्छद्विष्णवनुस्थितः सोऽब्रवीन्मा मे प्र हार्येनाहमिदमस्मि तत्ते प्र

दास्यामीति त्वी३ इत्यब्रवीत्संधां तु सं दधावहै त्वामेव प्र विशानीति  
यन्माम्प्रविशेः किम्मा भुञ्ज्या इत्यब्रवीत्त्वामेवेन्धीय तव भोगाय त्वाम्प्र  
विशेयमित्यब्रवीत्तम्वृत्रः प्राविशदुदरं वै वृत्रः क्षुत्खलु वै मनुष्यस्य  
भ्रातृव्यो य एवं वेद हन्ति क्षुधम्भ्रातृव्यं तदस्मै  
प्रायच्छत्प्रत्यगृह्णात्त्रिमाधा इति तद्विष्णवेति प्रायच्छत्तद्विष्णुः  
प्रत्यगृह्णादस्मास्विन्द्र इन्द्रियं दधात्विति यत्रिः प्रायच्छत्त्रिः  
प्रत्यगृह्णात्त्रिधातौस्त्रिधातुत्वं यद्विष्णुरन्वतिष्ठत विष्णवेति  
प्रायच्छत्तस्मादैन्द्रावैष्णवँ हविर्भवति यद्वा इदं किञ्च तदस्मै  
तत्प्रायच्छदृचः सामानि यजूँषि सहस्रं वा अस्मै  
तत्प्रायच्छत्तस्मात्सहस्रदक्षिणम् ॥१२॥

देवा वै राजन्याञ्जायमानादबिभयुस्तमन्तरेव सन्तं दाम्नापौम्भन्त्स वा  
एषोऽपोब्धो जायते यद्राजन्यो यद्वा एषोऽनपोब्धो जायेत वृत्रान्घँश्चरे द्यं  
कामयेत राजन्यमनपोब्धो जायेत वृत्रान्घँश्चरेदिति तस्मा  
एतमैन्द्राबार्हस्पत्यं चरुं निर्वपेदैन्द्रो वै राजन्यो ब्रह्म बृहस्पतिर्ब्रह्मणैवैनं  
दाम्नोऽपोम्भनान्मुञ्चति हिरण्यमयं दाम् दक्षिणा साक्षादेवैनं  
दाम्नोऽपोम्भनान्मुञ्चति ॥१३॥

नवोनवो भवति जायमानोऽह्नां केतुरुषसामेत्यग्रे । भागं देवेभ्यो वि  
दधात्यायन् चन्द्रमास्तिरति दीर्घमारुः ॥  
यमादित्या अँशुमाप्याययन्ति यमक्षितमक्षितयः पिबन्ति । तेन नो  
राजा वरुणो बृहस्पतिरा प्याययन्तु भुवनस्य गोपाः ॥  
प्राच्यां दिशि त्वमिन्द्रासि राजतोदीच्यां वृत्रहन्वृत्रहासि । यत्र यन्ति

स्रोत्यास्तज्जितं ते दक्षिणतो वृषभ एधि हव्यः ।  
 इन्द्रो जयाति न परा जयाता अधिराजो राजसु राजयाति । विश्वा हि  
 भूयाः पृतना अभिष्टीरुपसद्यो नमस्यो यथासत् ॥  
 अस्येदेव प्र रिरिचे महित्वं दिवः पृथिव्याः पर्यन्तरिक्षात् । स्वराडिन्द्रो  
 दम् आ विश्वगूर्तः स्वरिरमत्रो ववक्षे रणाय ।  
 अभि त्वा शूर नोनुमो ऽदुग्धा इव धेनवः । ईशानमस्य जगतः  
 सुवर्दशमीशानमिन्द्र तस्थुषः ॥  
 त्वामिद्धि हवामहे साता वाजस्य कारवः । त्वां वृत्रेष्विन्द्र सत्पतिं  
 नरस्त्वां काष्ठास्वर्वतः ॥  
 यद्द्याव इन्द्र ते शतं शतम्भूमिरुत स्युः । न त्वा वज्रिन्सहस्रं सूर्या  
 अनु न जातमष्ट रोदसी ॥  
 पिबा सोममिन्द्र मन्दतु त्वा यं ते सुषाव हर्यश्वाद्रिः सोतुर्बाहुभ्यां सुयतो  
 नारवा ॥  
 रेवतीर्नः सधमाद् इन्द्रे सन्तु तुविवाजाः । क्षुमन्तो याभिर्मदैम ॥  
 उदग्ने शुचयस्तव वि ज्योतिषो दु त्यं जातवैदसं सप्त त्वा हरितो रथे  
 वहन्ति देव सूर्य । शोचिष्वैशं विचक्षण ॥  
 चित्रं देवानामुदगादनीकं चक्षुर्मित्रस्य वरुणस्याग्नेः । आप्रा द्यावापृथिवी  
 अन्तरिक्षं सूर्य आत्मा जगतस्तस्थुषश्च ॥  
 विश्वे देवा ऋतावृध ऋतुभिर्हवनश्रुतः । जुषन्तां युज्यम्पयः ॥  
 विश्वे देवाः शृणुतेमं हवम्मे ये अन्तरिक्षे य उप द्यविष्ठ । ये अग्निजिह्वा  
 उत वा यजत्रा आसद्यास्मिन्बर्हिषि मादयध्वम् ॥१४॥

इति द्वितीयकाण्डे चतुर्थः प्रपाठकः ४

अथ द्वितीयकारण्डे पञ्चमः प्रपाठकः ५

विश्वरूपो वै त्वाष्ट्रः पुरोहितो देवानामासीत्स्त्रीयोऽसुराणां तस्य त्रीणि  
 शीर्षाण्यासन्त्सोमपानं सुरापानमन्नादनं स प्रत्यक्षं देवेभ्यो  
 भागमवदत्परोऽक्षमसुरेभ्यः सर्वस्मै वै प्रत्यक्षं भागं वदन्ति यस्मा एव  
 परोऽक्षं वदन्ति तस्य भाग उदितस्तस्मादिन्द्रोऽबिभेदीदृङ् वै राष्ट्रं वि  
 पर्यावर्तयतीति तस्य वज्रमादाय शीर्षाण्यच्छिनद्यत्सोमपानमासीत्स  
 कपिञ्जलोऽभवद्यत्सुरापानं स कलविङ्को यदन्नादनं स  
 तित्तिरि स्तस्याञ्जलिना ब्रमहृत्यामुपागृह्णात्तां  
 संवत्सुरमबिभस्तम्भूतान्यभ्यक्रोशन्ब्रह्महन्निति । स पृथिवीमुपासीददस्यै  
 ब्रह्महृत्यायै तृतीयम्प्रति गृह्णाणेति साब्रवीद्वरं वृणो खातात्पराभविष्यन्ती  
 मन्ये ततो मा परा भूवमिति पुरा ते संवत्सुरादपि  
 रोहादित्यब्रवीत्तस्मात्पुरा संवत्सुरात्पृथिव्यै खातमपि रोहति वारैवृतं  
 ह्यस्यै तृतीयम्ब्रह्महृत्यायै प्रत्यगृह्णात्तस्वकृतमिरिणमभवत्तस्मादाहिताग्निः  
 श्रद्धादेवः स्वकृत इरिणे नाव स्येद्ब्रह्महृत्यायै ह्येष वर्णः स  
 वनस्पतीनुपासीददस्यै ब्रह्महृत्यायै तृतीयम्प्रति गृह्णीतेति तैऽब्रुवन्वरं  
 वृणामहै वृक्षात्पराभविष्यन्तो मन्यामहे ततो मा परा भूमेत्यावश्चनान्दो  
 भूयांसु उत्तिष्ठानित्यब्रवीत्तस्मादावश्चनान्द्वक्षाणाम्भूयांसु उत्तिष्ठन्ति  
 वारैवृतं ह्येषां तृतीयम्ब्रह्महृत्यायै प्रत्यगृह्णन्त्स  
 निर्यासोऽभवत्तस्मान्निर्यासस्य नाशयम्ब्रह्महृत्यायै ह्येष वर्णोऽथो खलु य  
 एव लोहितो यो वावश्चनान्निर्येषति तस्य नाशयं काममन्यस्य । स  
 स्त्रीषंसादमुपासीददस्यै ब्रह्महृत्यायै तृतीयम्प्रति गृह्णीतेति ता अब्रुवन्वरं  
 वृणामहा ऋत्वियात्प्रजां विन्दामहै काममा विजनितोः सम्भवामेति  
 तस्मादृत्वियात्स्त्रियः प्रजां विन्दन्ते काममा विजनितोः सम्भवन्ति

वारैवृतं ह्यासां तृतीयम्ब्रह्महृत्यायै प्रत्यगृह्णन्त्सा मलवद्वासा  
 अभवत्तस्मान्मलवद्वाससा न सं वदेत् न सहासीत् नास्या  
 अन्नमद्याद्ब्रह्महृत्यायै ह्येषा वर्णम्प्रतिमुच्यास्तेऽथो खल्वाहुरभ्यञ्जनं वाव  
 स्त्रिया अन्नमभ्यञ्जनमेव न प्रतिगृह्यं काममन्यदिति याम्मलवद्वाससं  
 सम्भवन्ति यस्ततो जायते सोऽभिश्स्तो यामरंगये तस्यै स्तेनो याम्पराचीं  
 तस्यै हीतमुख्यपगल्भो या स्नाति तस्या अप्सु मारुको याभ्यङ्गे तस्यै  
 दुश्चर्मा या प्रलिखते तस्यै खलतिरपमारी याङ्गे तस्यै काणो या दतो  
 धावते तस्यै श्यावदन्या नखानि निकृन्तते तस्यै कुनखी या कृणत्ति तस्यै  
 क्लीबो या रज्जुं सृजति तस्या उद्धन्धुको या पर्णेन पिबति तस्या  
 उन्मादुको या खर्वेण पिबति तस्यै खर्वस्त्रिस्रो रात्रीर्वृतं चरेदञ्जलिना वा  
 पिबेदखर्वेण वा पात्रेण प्रजायै गोपीथाय ॥१॥

त्वष्टा हतपुत्रो वीन्द्रं सोममाहरत्तस्मिन्निन्द्रं उपहवमैच्छत् तं नोपाह्वयत्  
 पुत्रम्मैऽवधीरिति स यज्ञवेशसं कृत्वा प्रासहा सोममपिबत्तस्य  
 यदत्यशिष्यत् तत्त्वष्टाहवनीयमुप प्रावर्तयत्स्वाहेन्द्रशत्रुर्वर्धस्वेति  
 यदवर्तयत्तद्भ्रस्य वृत्रत्वं यदब्रवीत्स्वाहेन्द्रशत्रुर्वर्धस्वेति तस्मादस्येन्द्रः  
 शत्रुरभवत्स सम्भवन्नग्नीषोमावभि समभवत्स इषुमात्रमिषुमात्रं  
 विष्वङ्ङवर्धत् स इमाल्लोकानवृणोद्यदिमाल्लोकानवृणोत्तद्भ्रस्य वृत्रत्वं  
 तस्मादिन्द्रोऽबिभेत्स प्रजापतिमुपाधावच्छत्रुर्मेऽजनीति तस्मै वज्रं  
 सिक्त्वा प्रायच्छदेतेन जहीति तेनाभ्यायत् तावब्रूतामग्नीषोमौ मा प्र  
 हारावमन्तः स्व इति मम वै युवं स्थ इत्यब्रवीन्मामभ्येतमिति तौ  
 भागधेयमैच्छेतां ताभ्यामेतमग्नीषोमीयमेकादशकपालम्पूर्णमासे  
 प्रायच्छत्तावब्रूतामभि संदष्टौ वै स्वो न शक्नुव ऐतुमिति स इन्द्र आत्मनः

शीतरूरावजनयत्तच्छीतरूरयोर्जन्म य एवँ शीतरूरयोर्जन्म वेद नैनँ  
शीतरूरौ हतस्ताभ्यामेनमभ्यनयत्तस्माञ्जञ्जभ्यमानाद्ग्रीषोमौ निरक्रामतां  
प्राणापानौ वा एनं तदजहितां प्राणो वै दक्षोऽपानः  
क्रतुस्तस्माञ्जञ्जभ्यमानो ब्रूयान्मयि दक्षक्रतू इति प्राणापानावेवात्मन्धत्ते  
सर्वमार्युरेति स देवता वृत्रान्निर्ह्य वार्त्रघ्नँ हविः पूर्णमासे निरवपद्घ्नन्ति  
वा एनम्पूर्णमास आमावास्यायाम्प्याययन्ति तस्माद्वात्रघ्नी पूर्णमासेऽनूच्येते  
वृधन्वती अमावास्यायां तत्सँस्थाप्य वार्त्रघ्नँ हविर्वज्रमादाय  
पुनरभ्यायत् ते अब्रूतां द्यावापृथिवी मा प्र हारावयोर्वै श्रित इति ते  
अब्रूतां वरं वृणावहै  
नक्षत्रविहिताहमसानीत्युसारवब्रवीच्चित्रविहिताहमितीयं  
तस्मान्नक्षत्रविहितासौ चित्रविहितेऽयं य एवं द्यावापृथिव्योर्वरं वेदैनुं वरो  
गच्छति स आभ्यामेव प्रसूत इन्द्रो वृत्रमहन्ते देवा वृत्रँ  
हत्वाग्रीषोमावब्रुवन्हव्यं नो वहतमिति तारवब्रूतामपतेजसौ वै त्यौ वृत्रे वै  
त्ययोस्तेज इति तेऽब्रुवन्क इदमच्छैतीति गौरित्यब्रुवन्गौर्वाव सर्वस्य  
मित्रमिति साब्रवीत्वरं वृणै मय्येव सतोऽभयेन भुनजाध्वा इति  
तद्वैराहरत्तस्माद्गवि सतोऽभयेन भुञ्जत एतद्वा अग्नेस्तेजो यद्धृतमेतत्सोमस्य  
यत्पयो य एवमग्रीषोमयोस्तेजो वेद तेजस्व्यैव भवति ब्रह्मवादिनो  
वदन्ति किंदेवत्यम्पौरणमासमिति प्राजापत्यमिति ब्रूयात्तेनेन्द्रं ज्येष्ठम्पुत्रं  
निरवासाययदिति तस्माञ्ज्येष्ठम्पुत्रं धनेन निरवसाययन्ति ॥२॥

इन्द्रं वृत्रं जघ्निवाँसम्मृधोऽभि प्रावैपन्त स एतं  
वैमृधम्पूर्णमासेऽनुनिर्वाप्यमपश्यत्तं निरवपत्तेन वै स मृधोऽपाहत यद्वैमृधः  
पूर्णमासेऽनुनिर्वाप्यो भवति मृध एव तेन यजमानोऽप हत इन्द्रो वृत्रँ



हृत्वा देवताभिश्चेन्द्रियेण च व्यार्ध्यत स  
 एतमाग्नेयमष्टाकपालममावास्यायामपश्यदैन्द्रं दधि तं निरवपत्तेन वै स  
 देवताश्चेन्द्रियं चावारुद्ध यदाग्नेयोऽष्टाकपालोऽमावास्यायाम्भवत्यैन्द्रं  
 दधि देवताश्चैव तेनैन्द्रियं च यजमानोऽव रुद्ध इन्द्रस्य वृत्रं जघ्रुष इन्द्रियं  
 वीर्यम्पृथिवीमनु व्यार्च्छत्तदोषधयो वीरुधोऽभवत्स  
 प्रजापतिमुपाधावद्धृत्रम् जघ्रुष इन्द्रियं वीर्यं पृथिवीमनु व्यार्च्छत्तदोषधयो  
 वीरुधोऽभूवन्निति स प्रजापतिः पशुनब्रवीदेतदस्मै सं नयतेति तत्पशव  
 ओषधीभ्योऽध्यात्मन्त्समनयन्तत्प्रत्यदुहन्यत्समनयन्तत्सांनय्यस्य  
 सांनय्यत्वं यत्प्रत्यदुहन्तत्प्रतिधुषः प्रतिधुक्त्वँ समनैषुः प्रत्यधुक्षन्न तु  
 मयि श्रयत इत्यब्रवीदेतदस्मै शृतं कुरुतेत्यब्रवीत्तदस्मै शृतमकुर्वन्नन्द्रियं  
 वावास्मिन्वीर्यं तदश्रयन्तच्छृतस्य शृतत्वँ समनैषुः प्रत्यधुक्षञ्छृतमक्रन्न  
 तु मां धिनोतीत्यब्रवीदेतदस्मै दधि कुरुतेत्यब्रवीत्तदस्मै  
 दध्यकुर्वन्तदेनमधिनोत्तद्दधो दधित्वं ब्रह्मवादिनो वदन्ति दध्नः  
 पूर्वस्यावदेयं दधि हि पूर्वं क्रियत इत्य नादृत्य तच्छृतस्यैव पूर्वस्याव  
 द्द्येदिन्द्रियमेवास्मिन्वीर्यँ श्रित्वा दधोपरिष्ठाद्धिनोति यथापूर्वमुपैति  
 यत्पूतीकैर्वा पर्णवल्कैर्वा तञ्चयात्सौम्यं तद्यत्कवलै राक्षसं  
 तद्यत्तण्डुलैर्वैश्वदेवं तद्यदातञ्चनेन मानुषं तद्यद्दध्ना तत्सेन्द्रं दध्ना तनक्ति  
 सेन्द्रत्वायां गिहोत्रोच्छेषणमभ्यातनक्ति यज्ञस्य संतत्या इन्द्रो वृत्रँ हृत्वा  
 पराम्परावतमगच्छदपाराधमिति मन्यमानस्तं देवताः  
 प्रैषमैच्छन्त्सोऽब्रवीत्प्रजापतिर्यः प्रथमोऽनुविन्दति तस्य  
 प्रथमम्भागधेयमिति तम्पितरोऽन्वविन्दन्तस्मात्पितृभ्यः पूर्वेद्युः क्रियते  
 सोऽमावास्याम्प्रत्यागच्छत्तं देवा अभि समगच्छन्तामा वै नोऽद्य वसु  
 वसुतीतीन्द्रो हि देवानां वसु तदमावास्याया अमावास्यत्वं ब्रह्मवादिनो

वदन्ति किंदेवत्यँ सांनाय्यमिति वैश्वदेवमिति ब्रूयाद्विश्वे हि तद्देवा  
भागुधेयमभि समगच्छन्तेत्यथो खल्वैन्द्रमित्येव ब्रूयादिन्द्रं वाव ते  
तद्भिषज्यन्तोऽभि समगच्छन्तेति ॥३॥

ब्रह्मवादिनो वदन्ति स त्वै दर्शपूर्णमासौ यजेत य एनौ सेन्द्रौ यजेतेति  
वैमृधः पूर्णमासेऽनुनिर्वाप्यो भवति तेन पूर्णमासः सेन्द्र ऐन्द्रं  
दध्यमावास्यायां तेनामावास्यां सेन्द्रा य एवं विद्वान्दर्शपूर्णमासौ यजते  
सेन्द्रावेवैनौ यजते श्वःश्वोऽस्मा ईजानाय वसीयो भवति देवा वै  
यद्यज्ञेऽकुर्वत तदसुरा अकुर्वत ते देवा  
एतामिष्टिमपश्यन्नाग्रावैष्णवमेकादशकपालँ सरस्वत्यै चरुँ सरस्वते  
चरुं ताम्पौर्णमासँ सँस्थाप्यानु निरवपन्ततौ देवा अभवन्परासुरा यो  
भ्रातृव्यवान्त्स्यात्स पौर्णमासँ सँस्थाप्यैतामिष्टिमनु  
निर्वपेत्पौर्णमासेनैव वज्रभ्रातृव्याय प्रहत्याग्रावैष्णवेन देवताश्च यज्ञं च  
भ्रातृव्यस्य वृद्धे मिथुनान्पशून्त्सारस्वताभ्यां यावदेवास्यास्ति तत्सर्वं वृद्धे  
पौर्णमासीमेव यजेत भ्रातृव्यवान्नामावास्याँ हत्वा भ्रातृव्यं नाप्याययति  
साकम्प्रस्थायीयेन यजेत पशुकामो यस्मै वा अल्पेनाहरन्ति नात्मना  
तृप्यति नान्यस्मै ददाति यस्मै महता तृप्यत्यात्मना ददात्यन्यस्मै महता  
पूर्णँ हौतव्यं तृप्त एवैनमिन्द्रः प्रजयां पशुभिस्तर्पयति दारुपात्रेण जुहोति  
न हि मृन्मयमाहृतिमानश औदुम्बरं भवत्यूर्वा उदुम्बर ऊर्कृशवं  
ऊर्जेवास्मा ऊर्जम्पशूनवं रुद्धे नागतश्रीर्महेन्द्रं यजेत त्रयो वै गुतश्रियः  
शुश्रुवान्ग्रामिणी राजन्यस्तेषाम्महेन्द्रो देवता यो वै स्वां देवतामति यजते प्र  
स्वायै देवतायै च्यवते न पराम्प्राप्नोति पापीयान्भवति संवत्सरमिन्द्रं  
यजेत संवत्सरँ हि वृतं नाति स्वैवैनं देवतेज्यमाना भूत्या इन्द्रे

वसीयान्भवति संवत्सरस्य परस्ताद्ग्रये व्रतपतये पुरोडाशमष्टाकपालं  
निर्वपेत्संवत्सरमेवैनं वृत्रं जघ्निवाँ समग्निर्व्रतपतिर्व्रतमा लम्भयति  
ततोऽधि कामं यजेत ॥४॥

नासौमयाजी सं नयेदनागतं वा एतस्य पयो योऽसौमयाजी यदसौमयाजी  
सं नयेत्परिमोष एव सोऽनृतं करोत्यथो परैव सिच्यते सोमयाज्यैव सं  
नयेत्पयो वै सोमः पर्यः सांनाव्यम्पर्यसैव पर्य आत्मन्धत्ते वि वा  
एतम्प्रजयां पशुभिरर्धयति वर्धयत्यस्य भ्रातृव्यं यस्य  
हविर्निरुप्तम्पुरस्ताच्चन्द्रमा अभ्युदेति त्रेधा तण्डुलान्वि भजेद्ये मध्यमाः  
स्युस्तान्ग्रये दात्रे पुरोडाशमष्टाकपालं कुर्याद्ये स्थविष्ठास्तानिन्द्राय प्रदात्रे  
दुधँश्चरुं येऽशिष्ठास्तान्विष्णावे शिपिविष्टाय शृते चरुमग्निरेवास्यै  
प्रजाम्प्रजनयति वृद्धामिन्द्रः प्र यच्छति यज्ञो वै विष्णाः पशवः शिपिर्यज्ञ  
एव पशुषु प्रति तिष्ठति न द्वे यजेत यत्पूर्वया सम्प्रति यजेतोत्तरया  
छम्बट्कुर्याद्यदुत्तरया सम्प्रति यजेत पूर्वया छम्बट्कुर्यान्निष्ठिर्भवति न  
यज्ञस्तदनु हीत मुख्यपगल्भो जायत एकामेव यजेत प्रगल्भोऽस्य  
जायतेऽनादृत्य तद्वे एव यजेत यज्ञमुखमेव पूर्वया लभते यजेत उत्तरया  
देवता एव पूर्वयावरुद्ध इन्द्रियमुत्तरया देवलोकमेव पूर्वयाभिजयति  
मनुष्यलोकमुत्तरया भूयसो यज्ञक्रतूनुपैत्येषा वै सुमना  
नामेष्टिर्यमद्येजानम्पश्चाच्चन्द्रमा अभ्युदेत्यस्मिन्नेवास्यै लोकेऽर्धुकम्भवति  
दाक्षायणयज्ञेन सुवर्गकामो यजेत पूर्णमासे सं  
नयेन्मैत्रावरुणायामिक्षायामावास्यायां यजेत पूर्णमासे वै देवानाँ  
सुतस्तेषामेतमर्धमासम्प्रसृत स्तेषाम्मैत्रावरुणी वशामावास्यायामनूबन्ध्या  
यत्पूर्वेद्युर्यजेते वेदिमेव तत्करोति यद्वत्सानपाकरोति सदोहविधानि एव

सम्मिनोति यद्यजते देवैरेव सुत्याँ सम्पादयति स एतमर्धमासँ  
सधमादं देवैः सोमम्पिबति यन्मैत्रावरुणयामिन्नयामावास्यायां यजते  
यैवासौ देवानां वृशानूबन्ध्या सो एवैषैतस्य साक्षाद्वा एष  
देवान्भ्यारोहति य एषां यज्ञमभ्यारोहति यथा खलु वै श्रेयान्भ्यारूढः  
कामयते तथा करोति यद्यवविध्यति पापीयान्भवति यदि नावविध्यति  
सदृङ्ख्यावृत्काम एतेन यज्ञेन यजेत क्षुरपविर्ह्येष यज्ञस्ताजक्पुरयो वा  
भवति प्र वा मीयते तस्यैतद्व्रतं नानृतं वदेन्न माँसमशनीयान्न  
स्त्रियमुपैयान्नास्य पल्पूलनेन वासः पल्पूलयेयुरेतद्धि देवाः सर्वं न  
कुर्वन्ति ॥५॥

एष वै देवर्थो यद्दर्शपूर्णमासौ यो दर्शपूर्णमासाविष्टा सोमैन यजते  
रथस्पष्ट एवावसाने वरै देवानामव स्यत्ये तानि वा अङ्गापरूँषि  
संवत्सरस्य यद्दर्शपूर्णमासौ य एवं विद्वान्दर्शपूर्णमासौ  
यजतेऽङ्गापरूँष्येव संवत्सरस्य प्रति दधात्ये ते वै संवत्सरस्य चक्षुषी  
यद्दर्शपूर्णमासौ य एवं विद्वान्दर्शपूर्णमासौ यजते ताभ्यामेव सुवर्ग  
लोकमनु पश्यत्येषा वै देवानां विक्रान्तिर्यद्दर्शपूर्णमासौ य एवं  
विद्वान्दर्शपूर्णमासौ यजते देवानामेव विक्रान्तिमनु वि क्रमत एष वै  
दैवयानः पन्था यद्दर्शपूर्णमासौ य एवं विद्वान्दर्शपूर्णमासौ यजते य एव  
दैवयानः पन्थास्तँ समारोहत्ये तौ वै देवानाँ हरी यद्दर्शपूर्णमासौ य  
एवं विद्वान्दर्शपूर्णमासौ यजते यावेव देवानाँ हरी ताभ्यामेवैभ्यो हव्यं  
वहत्ये तद्वै देवानामास्यं यद्दर्शपूर्णमासौ य एवं विद्वान्दर्शपूर्णमासौ  
यजते साक्षादेव देवानामास्ये जुहोत्ये ष वै हविर्धानी यो  
दर्शपूर्णमासयाजी सायम्प्रातरग्निहोत्रं जुहोति यजते

दर्शपूर्णमासावहरहर्विधानिनाँ सुतो य एवं विद्वान्दर्शपूर्णमासौ यजते  
हविर्धान्यस्मीति सर्वमेवास्य बर्हिष्यं दत्तम्भवति देवा वा अहर्यज्ञियं  
नाविन्दन्ते दर्शपूर्णमासावपुनन्तौ वा एतौ पूतौ मेध्यौ यद्दर्शपूर्णमासौ य  
एवं विद्वान्दर्शपूर्णमासौ यजते पूतावेवैनौ मेध्यौ यजते नामावास्यायां च  
पौर्णमास्यां च स्त्रियमुपैयाद्यदुपैयान्निरिन्द्रियः स्यात्सोमस्य वै  
राज्ञोऽर्धमासस्य रात्रयः पत्रय आसन्तासाममावास्यां च पौर्णमासीं च  
नोपैत्ते एनमभि समनह्येतां तं यद्म आर्च्छद्राजानं यद्म आरदिति  
तद्राजयद्मस्य जन्म यत्पापीयानभवत्तत्पापयद्मस्य  
यज्ञायाभ्यामविन्दत्तज्ञायेन्यस्य य एवमेतेषां यद्माणां जन्म वेद नैनमेते  
यद्मा विन्दन्ति स एते एव नमस्यन्नुपाधावत्ते अब्रूतां वरं वृणावहा आवं  
देवानाम्भागधे असावावदधि देवा इज्यान्ता इति तस्मात्सदृशीनाँ  
रात्रीणाममावास्यायां च पौर्णमास्यां च देवा इज्यन्त एते हि  
देवानाम्भागधे भागधा अस्मै मनुष्या भवन्ति य एवं वेद भूतानि  
क्षुधमघ्नन्सद्यो मनुष्या अर्धमासे देवा मासि पितरः संवत्सरे  
वनस्पतयस्तस्मादहरहर्मनुष्या अशनमिच्छन्तेऽर्धमासे देवा इज्यन्ते मासि  
पितृभ्यः क्रियते संवत्सरे वनस्पतयः फलं गृह्णन्ति य एवं वेद हन्ति  
क्षुधम्भ्रातृव्यम् ॥६॥

देवा वै नर्चि न यजुष्यश्रयन्त ते सामन्नेवाश्रयन्त हिं करोति सामैवाकृहिं  
करोति यत्रैव देवा अश्रयन्त तत एवैनान्प्र युङ्क्ते हिं करोति वाच एवैष  
योगो हिं करोति प्रजा एव तद्यजमानः सृजते त्रिः प्रथमामन्वाह त्रिरुत्तमां  
यज्ञस्यैव तद्वर्षं नह्यत्यप्रस्रँसाय संततमन्वाह प्राणानामन्नाद्यस्य संतत्या  
अथो रक्षसामपहत्यै राथंतरीम्प्रथमामन्वाह राथंतरो वा अयं लोक

इममेव लोकमभि जयति त्रिवि गृह्णाति त्रय इमे लोका इमानेव  
लोकानभि जयति बार्हतीमुत्तमामन्वाह बार्हतो वा असौ लोकोऽमुमेव  
लोकमभि जयति प्र वो वाजा इत्यनिरुक्ताम्प्राजापत्यामन्वाह यज्ञो वै  
प्रजापतिर्यज्ञमेव प्रजापतिमा रभते प्र वो वाजा इत्यन्वाहान्नं वै  
वाजोऽन्नमेवाव रुद्धे प्र वो वाजा इत्यान्वाह तस्मात्प्राचीनं रेतां  
धीयतेऽग्न आ याहि वीतय इत्याह तस्मात्प्रतीचीः प्रजा जायन्ते प्र वो  
वाजा इत्यन्वाह मासा वै वाजा अर्धमासा अभिद्यवो देवा हविष्मन्तो  
गौर्धृताची यज्ञो देवाञ्जिगाति यजमानः सुम्रयु रिदमसीदमसीत्येव  
यज्ञस्य प्रियं धामाव रुद्धे यं कामयेत् सर्वमायुरियादिति प्र वो वाजा  
इति तस्यानूच्याग्न आ याहि वीतय इति सं तत्तमुत्तरमर्धर्चमा लभेत  
प्राणैवास्यापानं दाधार सर्वमायुरेति यो वा अरत्निं सामिधेनीनां  
वेदारत्नावेव भ्रातृव्यं कुरुतेऽर्धर्चो सं दधात्येष वा अरत्निः सामिधेनीनां य  
एवं वेदारत्नावेव भ्रातृव्यं कुरुत ऋषैर्ऋषेर्वा एता निर्मिता  
यत्सामिधेन्यस्ता यदसंयुक्ताः स्युः प्रजयां पशुभिर्यजमानस्य वि  
तिष्ठेरन्नर्धर्चो संदधाति सं युनक्त्येवैनास्ता अस्मै संयुक्ता अवरुद्धाः  
सर्वामाशिषं दुहे ॥७॥

अयज्ञो वा एष योऽसामाऽग्न आ याहि वीतय इत्याह राथंतरस्यैष वर्णस्तं  
त्वां समिद्धिरङ्गिर इत्याह वामदेव्यस्यैष वर्णो बृहदग्ने सुवीर्यमित्याह  
बृहत एष वर्णो यदेतं तृचमन्वाह यज्ञमेव तत्सामन्वन्तं  
करोत्यग्निमुष्मिल्लोक आसीदादित्योऽस्मिन्ताविमौ  
लोकावशान्तावास्तां ते देवा अब्रुवन्नेतेमौ वि पर्यहामेत्यग्न आ याहि  
वीतय इत्यस्मिल्लोकैऽग्निमदधुर्बृहदग्ने सुवीर्यमित्यमुष्मिल्लोक आदित्यं

ततो वा इमौ लोकावशाभ्यतां यदेवमन्वाहानयोर्लोकयोः शान्त्यै  
 शाम्यतोऽस्मा इमौ लोकौ य एवं वेद पञ्चदश सामिधेनीरन्वाह पञ्चदश  
 वा अर्धमासस्य रात्रयोऽर्धमासशः संवत्सर आप्यते तासां त्रीणि च  
 शतानि षष्टिश्चाक्षराणि तावतीः संवत्सरस्य रात्रयोऽक्षरश एव  
 संवत्सरमाप्नोति नृमेधश्च परुच्छेपश्च ब्रह्मवाद्यमवदेतामस्मिन्दारावाद्देऽग्निं  
 जनयाव यतरो नौ ब्रह्मीयानिति नृमेधोऽभ्यवदत्स  
 धूममजनयत्परुच्छेपोऽभ्यवदत्सोऽग्निमजनयदृष इत्यब्रवीद्यत्सुमावद्विद्व  
 कथा त्वमग्निमजीजनो नाहमिति सामिधेनीनामेवाहं वर्णं  
 वेदेत्यब्रवीद्यद्भूतवत्पदमनूच्यते स आसां वर्णस्तं त्वा समिद्धिरङ्गिर  
 इत्याह सामिधेनीष्वेव तज्ज्योतिर्जनयति स्त्रियस्तेन यदृच स्त्रियस्तेन  
 यद्वायत्रियः स्त्रियस्तेन यत्सामिधेन्यौ वृषणवतीमन्वाह तेन पुंस्वतीस्तेन  
 सेन्द्रास्तेन मिथुना अग्निर्देवानां दूत आसीदुशना काव्योऽसुराणां तौ  
 प्रजापतिम्प्रश्नमैतां स प्रजापतिरग्निं दूतं वृणीमह इत्यभि पर्यावर्तत ततो  
 देवा अभवन्परासुरा यस्यैवं विदुषोऽग्निं दूतं वृणीमह इत्यन्वाह  
 भवत्यात्मना परास्य भ्रातृव्यो भवत्यध्वरवतीमन्वाह भ्रातृव्यमेवैतया  
 ध्वरति शोचिष्कैशस्तमीमह इत्याह पवित्रमेवैतद्यजमानमेवैतया पवयति  
 समिद्धो अग्न आहुतेत्याह परिधिमेवैतम्परि दधात्यस्कन्दाय यदतं  
 ऊर्ध्वमभ्यादध्याद्यथा बहिःपरिधि स्कन्दति तादृगेव तत्रयो वा अग्रयो  
 हव्यवाहनो देवानां कव्यवाहनः पितृणां सहरंक्षा असुराणां त एतर्ह्या  
 शंसन्ते मां वरिष्यते मामिति वृणीध्वं हव्यवाहनमित्याह य एव  
 देवानां तं वृणीत आर्षेयं वृणीते बन्धोरिव नैत्यथो संतत्यै परस्ताद्वार्चा  
 वृणीते तस्मात्परस्ताद्वार्चाञ्चो मनुष्यान्पितरोऽनु प्र पिपते ॥८॥

अग्नें महाँ असीत्याह महान्द्यैष यदग्निर्ब्राह्मणेत्याह ब्राह्मणो ह्येष  
 भारतेत्याहैष हि देवेभ्यो हव्यम्भरति देवेद्ध इत्याह देवा ह्येतमैन्धत्  
 मन्विद्ध इत्याह मनुर्ह्येतमुत्तरो देवेभ्य ऐन्द्र षिष्टुत् इत्याहर्षयो  
 ह्येतमस्तुवन्विप्रानुमदित् इत्याह विप्रा ह्येते यच्छुश्रुवाँसः कविशस्त  
 इत्याह कवयो ह्येते यच्छुश्रुवाँसो ब्रह्मसँशित् इत्याह ब्रह्मसँशितो  
 ह्येष घृताहवन इत्याह घृताहुतिर्ह्यस्य प्रियतमा प्रणीर्यज्ञानामित्याह  
 प्रणीर्ह्येष यज्ञानाँ रथीरध्वराणामित्याहैष हि देवर्थोऽतूर्तो होतेत्याह न  
 ह्येतं कश्चन तरति तूर्णिर्हव्यवाडित्याह सर्वँ ह्येष तरत्या स्यात्रं  
 जुहूर्देवानामित्याह जुहूर्ह्येष देवानां चमसो देवपान इत्याह चमसो ह्येष  
 देवपानोऽराँ इवाग्ने नेमिर्देवाँस्त्वम्परिधूरसीत्याह देवान्द्यैष  
 परिभूर्यद्ब्रूयादा वह देवान्देवयते यजमानायेति भ्रातृव्यमस्मै जनयेदा  
 वह देवान्यजमानायेत्याह यजमानमेवैतेन वर्धयत्यग्निमग्ना आ वह  
 सोममा वहेत्याह देवता एव तद्यथापूर्वमुप ह्वयत् आ चाग्ने देवान्वह  
 सुयजां च यज जातवेद् इत्याहाग्निमेव तत्सँ श्यति सोऽस्य सँशितो  
 देवेभ्यो हव्यं वहत्यग्निर्होतेत्याहाग्निर्वै देवानाँ होता य एव देवानाँ  
 होता तं वृणीते स्मो व्यमित्याहात्मानमेव सत्त्वं गमयति साधु ते  
 यजमान देवतेत्याहाशिषमेवैतामा शास्ते यद्ब्रूयाद्योऽग्निँ होतारमवृथा  
 इत्यग्निर्नोऽभ्यतो यजमानम्परि गृह्णीयात्प्रमायुकः स्याद्यजमानदेवत्या वै  
 जुहूर्भ्रातृव्यदेवत्योऽपृभृद्यद्वे इव ब्रूयाद्भ्रातृव्यमस्मै  
 जनयेद्घृतवतीमध्वर्यो स्तुचुमास्यस्वेत्याह यजमानमेवैतेन वर्धयति  
 देवायुवमित्याह देवान्द्येषावति विश्ववारामित्याह विश्वँ  
 ह्येषावती डामहै देवाँ ईडेन्यान्नमस्याम नमस्यान्यजाम यज्ञियानित्याह  
 मनुष्या वा ईडेन्याः पितरो नमस्या देवा यज्ञिया देवता एव तद्यथाभागं



यजति ॥६॥

त्रींस्तृचाननु ब्रूयाद्राजन्त्यस्य त्रयो वा अन्ये राजन्त्यात्पुरुषा ब्राह्मणो  
 वैश्यः शूद्रस्तानेवास्मा अनुकान्करोति पञ्चदशानु ब्रूयाद्राजन्त्यस्य पञ्चदशो  
 वै राजन्त्यः स्व एवैनं स्तोमे प्रति ष्ठापयति तृष्टुभा परि दध्यादिन्द्रियं वै  
 त्रिष्टुगिन्द्रियकामः खलु वै राजन्त्यो यजते त्रिष्टुभैवास्मा इन्द्रियम्परि  
 गृह्णाति यदि कामयेत ब्रह्मवर्चसमस्त्विति गायत्रिया परि  
 दध्याद्ब्रह्मवर्चसं वै गायत्री ब्रह्मवर्चसमेव भवति सप्तदशानु  
 ब्रूयाद्वैश्यस्य सप्तदशो वै वैश्यः स्व एवैनं स्तोमे प्रति ष्ठापयति जगत्या  
 परि दध्याज्जागता वै पशवः पशुकामः खलु वै वैश्यो यजते  
 ज्जगत्यैवास्मै पशून्परि गृह्णात्ये कविंशतिमनु  
 ब्रूयात्प्रतिष्ठाकामस्यैकविंशः स्तोमानाम्प्रतिष्ठा प्रतिष्ठित्यै  
 चतुर्विंशतिमनु ब्रूयाद्ब्रह्मवर्चसकामस्य चतुर्विंशत्यक्षरा गायत्री  
 गायत्री ब्रह्मवर्चसं गायत्रियैवास्मै ब्रह्मवर्चसमव रुद्धे त्रिंशतमनु  
 ब्रूयादन्नकामस्य त्रिंशदक्षरा विराडन्नं विराड्विराजैवास्मा अन्नाद्यमव  
 रुद्धे द्वात्रिंशतमनु ब्रूयात्प्रतिष्ठाकामस्य  
 द्वात्रिंशदक्षरानुष्टुगनुष्टुफ्णन्दसाम्प्रतिष्ठा प्रतिष्ठित्यै षट्त्रिंशतमनु  
 ब्रूयात्पशुकामस्य षट्त्रिंशदक्षरा बृहती बार्हताः पशवो बृहत्यैवास्मै  
 पशून्व रुद्धे चतुश्चत्वारिंशतमनु ब्रूयादिन्द्रियकामस्य  
 चतुश्चत्वारिंशदक्षरा त्रिष्टुगिन्द्रियं त्रिष्टुत्रिष्टुभैवास्मा इन्द्रियमव  
 रुद्धेऽष्टाचत्वारिंशतमनु ब्रूयात्पशुकामस्याष्टाचत्वारिंशदक्षरा जगती  
 जागताः पशवो जगत्यैवास्मै पशून्व रुद्धे सर्वाणि च्छन्दांस्यनु  
 ब्रूयाद्ब्रह्मयाजिनः सर्वाणि वा एतस्य च्छन्दांस्यवरुद्धानि यो

बहुयाज्य परिमितमनु ब्रूयादपरिमितस्यावरुद्धये ॥१०॥

निर्वीतम्मनुष्याणां प्राचीनावीतम्पितृणामुपवीतं देवाना मुप व्ययते  
 देवलक्ष्ममेव तत्कुरुते तिष्ठन्नन्वाह तिष्ठन्त्याश्रुततरं वदति तिष्ठन्नन्वाह  
 सुवर्गस्य लोकस्याभिजित्या आसीनो यजत्यस्मिन्नेव लोके प्रति तिष्ठति  
 यत्क्रौञ्चमन्वाहासुरं तद्यन्मन्मनुषं तद्यदन्तरा तत्सदेवमन्तरानूच्यं  
 सदेवत्वार्यं विद्वांसो वै पुरा होतारोऽभूवन्तस्माद्विधृता अध्वानोऽभूवन्न  
 पन्थानः समरुक्षन्नन्तर्वेद्यन्यः पादो भवति बहिर्वेद्यन्योऽथान्वाहाध्वानां  
 विधृत्यै पथामसंरोहायाथौ भूतं चैव भविष्यच्चाव रुद्धेऽथो परिमितं  
 चैवापरिमितं चाव रुद्धेऽथो ग्राम्यांश्चैव पशूनांरगयांश्चाव रुद्धेऽथो  
 देवलोकं चैव मनुष्यलोकं चाभि जयति देवा वै सामिधेनीरनूच्यं यज्ञं  
 नान्वपश्यन्त्स प्रजापतिस्तूष्णीमाघारमाऽघारयत्ततो वै देवा  
 यज्ञमन्वपश्यन्तूष्णीमाघारमाघारयति यज्ञस्यानुरूपात्या अथौ  
 सामिधेनीरेवाभ्यनक्त्य लूक्षो भवति य एवं वेदाथौ  
 तर्पयत्येवैना स्तृष्यति प्रजयां पशुभिर्य एवं वेद  
 यदेकयाघारदयेदेकाम्प्रीणीयाद्यद्वाभ्यां द्वे प्रीणीयाद्यत्तिसृभिरति  
 तद्वैचयेन्मनसाघारयति मनसा ह्यनाप्तमाप्यते तिर्यञ्चमा  
 घारयत्यच्छम्बट्कारं वाक्च मनश्चार्त्तयेतामहं देवेभ्यो हव्यं वहामीति  
 वागब्रवीदहं देवेभ्य इति मनस्तौ प्रजापतिम्प्रश्नमैतां  
 सौऽब्रवीत्प्रजापतिर्दूतीरेव त्वम्मनसोऽसि यद्धि मनसा ध्यायति तद्वाचा  
 वदतीति तत्खलु तुभ्यं न वाचा जुहवन्नित्यंब्रवीत्तस्मान्मनसा प्रजापतये  
 जुह्वति मन इव हि प्रजापतिः प्रजापतेराप्त्यै परिधीन्त्सम्मार्ष्टि  
 पुनात्येवैनान्निर्मध्यमं त्रयो वै प्राणाः प्राणनेवाभि जयति त्रिर्दक्षिणाध्यं

त्रयं इमे लोका इमानेव लोकानभि जयति त्रिरुत्तरार्ध्यं त्रयो वै देवयानाः  
 पन्थानस्तानेवाभि जयति त्रिरुप वाजयति त्रयो वै देवल्लोका  
 देवल्लोकानेवाभि जयति द्वादश सम्पद्यन्ते द्वादश मासाः संवत्सरः  
 संवत्सरमेव प्रीणात्यथौ संवत्सरमेवास्मा उप दधाति सुवर्गस्य लोकस्य  
 समष्ट्या आघारमा घारयति तिर इव वै सुवर्गो लोकः सुवर्गमेवास्मै  
 लोकम्प रौचयत्यृ जुमा घारयत्यृजुरिव हि प्राणः संततमा घारयति  
 प्राणानामन्नाद्यस्य संतत्या अथो रक्षसामपहत्यै यं कामयैत प्रमायुकः  
 स्यादिति जिह्वं तस्याघारयेत्प्राणमेवास्माज्जिह्वं नयति ताजम्प मीयते  
 शिरो वा एतद्यज्ञस्य यदाघार आत्मा ध्रुवाघारमाघार्य ध्रुवाँ  
 समनक्त्यात्मनेव यज्ञस्य शिरः प्रति दधात्यृ गिर्देवानां दूत  
 आसीद्देव्योऽसुराणां तौ प्रजापतिम्पश्नमैताँ स  
 प्रजापतिर्ब्राह्मणमब्रवीदेतद्वि ब्रूहीत्या श्रावयेतीदं देवाः शृणुतेति वाव  
 तदब्रवीद्गिर्देवो होतेति य एव देवानां तमवृणीत ततो देवा  
 अभवन्परासुरा यस्यैवं विदुषः प्रवरम्प्रवृणते भवत्यात्मना परास्य भ्रातृव्यो  
 भवति यद्ब्राह्मणश्चाब्राह्मणश्च प्रश्नमेयाताम्ब्राह्मणायाधि  
 ब्रूयाद्यद्ब्राह्मणायाध्याहात्मनेऽध्याह यद्ब्राह्मणम्पराहात्मानम्पराह  
 तस्माद्ब्राह्मणो न परोच्यः ॥११॥

आयुष्ट आयुर्दा अग्र आ प्यायस्व सं तेऽव ते हेड उदुत्तमं प्र णो देव्या नौ  
 दिवोऽग्नाविष्णू अग्नाविष्णू इमं मे वरुण तत्त्वा याम्यु दु त्यं चित्रम् ॥  
 अपां नपादा ह्यस्थादुपस्थं जिह्वानामूर्ध्वो विद्युतं वसानः । तस्य  
 ज्येष्ठम्महिमानं वहन्तीर्हिरण्यवर्णाः परि यन्ति यहीः ॥  
 समन्या यन्त्युप यन्त्यन्याः समानमूर्वं नद्यः पृणन्ति । तमू शुचिँ

शुचयो दीदिवाँसमपां नपातम्परि तस्थुरापः ॥  
 तमस्मेरा युवतयो युवानम्मर्मृज्यमानाः परि यन्त्यापः । स शुक्रेण  
 शिक्वना रेवदग्निर्दीदायानिध्मो घृतनिर्णिगप्सु ॥  
 इन्द्रावरुणयोरहँसम्राजोरव आ वृणे । ता नो मृडात ईदृशै ॥  
 इन्द्रावरुणा युवमध्वराय नो विशे जनाय महि शर्म यच्छतम् ।  
 दीर्घप्रयज्युमति यो वनुष्यति वयं जयेम पृतनासु दूढयः ॥  
 आ नो मित्रावरुणा प्र ब्राह्वा त्वं नो अग्ने वरुणस्य विद्वान्देवस्य हेडोऽव  
 यासिसीष्ठाः । यजिष्ठो वह्नितमः शोशुचानो विश्वा द्वेषाँसि प्र  
 मुमुग्ध्यस्मत् ॥  
 स त्वं नो अग्नेऽवमो भवोती नेदिष्ठो अस्य उषसो व्युष्टौ । अवं यद्व  
 नो वरुणँ रराणो वीहि मृडीकँ सुहवो न एधि ॥  
 प्रप्रायमग्निर्भरतस्य शृणवे वि यत्सूर्यो न रोचते बृहद्भाः । अभि यः  
 पूरुमपृतनासु तस्थौ दीदाय दैव्यो अतिथिः शिवो नः ॥  
 प्र तै यद्भि प्र त इयर्मि मन्म भुवो यथा वन्द्यो नो हवेषु । धन्वन्निव प्रपा  
 असि त्वमग्न इयुक्षवे पूरवे प्रत्न राजन् ॥  
 वि पाजसा वि ज्योतिषा ॥  
 स त्वमग्ने प्रतीकेन प्रत्यौष यातुधान्यः । उरुक्षयेषु दीद्यत् ॥  
 तँ सुप्रतीकँ सुदृशँ स्वञ्चमविद्वाँसो विदुष्टरँ सपेम । स  
 यद्द्विश्वा वयुनानि विद्वान्प्र हव्यमग्निर्मृतेषु वोचत् ॥  
 अँहोमुचै विवेषु यन्मा वि न इन्द्रेन्द्रं क्षत्र मिन्द्रियाणि शतक्रतोऽनु ते  
 दायि ॥१२॥

इति द्वितीयकाण्डे पञ्चमः प्रपाठकः ५

अथ द्वितीयकारडे षष्ठः प्रपाठकः ६

समिधौ यजति वसन्तमेवर्तूनामव रुद्धे तनूनपातं यजति ग्रीष्ममेवाव  
रुद्ध इडो यजति वर्षा एवाव रुद्धे बर्हिर्यजति शरदमेवाव रुद्धे  
स्वाहाकारं यजति हेमन्तमेवाव रुद्धे तस्मात्स्वाहाकृता हेमन्पशवोऽव  
सीदन्ति समिधौ यजत्युषस एव देवतानामव रुद्धे तनूनपातं यजति  
यज्ञमेवाव रुद्ध इडो यजति पशूनेवाव रुद्धे बर्हिर्यजति प्रजामेवाव  
रुद्धे समानयत उपभृतस्तेजो वा आज्यम्प्रजा बर्हिः प्रजास्वेव तेजो  
दधाति स्वाहाकारं यजति वाचमेवाव रुद्धे दश सम्पद्यन्ते दशाक्षरा  
विराडन्नं विराडिवराजैवान्नाद्यमव रुद्धे समिधौ यजत्यस्मिन्नेव लोके  
प्रति तिष्ठति तनूनपातं यजति यज्ञ एवान्तरिक्षे प्रति तिष्ठतीडो यजति  
पशुष्वेव प्रति तिष्ठति बर्हिर्यजति य एव देवयानाः पन्थानस्तेष्वेव प्रति  
तिष्ठति स्वाहाकारं यजति सुवर्ग एव लोके प्रति तिष्ठत्येतावन्तो वै  
देवलोकास्तेष्वेव यथापूर्वम्प्रति तिष्ठति देवासुरा एषु लोकेष्वस्पर्धन्ते ते  
देवाः प्रयाजैरेभ्यो लोकेभ्योऽसुरान्प्राणदन्त तत्प्रयाजानां प्रयाजत्वं यस्यैवं  
विदुषः प्रयाजा इज्यन्ते प्रैभ्यो लोकेभ्यो भ्रातृव्यानुदतेऽभिक्रामं  
जुहोत्यभिजित्यै यो वै प्रयाजानाम्मिथुनं वेद प्र प्रजया  
पशुभिर्मिथुनैर्जायते समिधौ बर्हीरिव यजति तनूनपातमेकमिव मिथुनं  
तदिडो बर्हीरिव यजति बर्हीरेकमिव मिथुनं तदेतद्वै प्रयाजानाम्मिथुनं य  
एवं वेद प्र प्रजया पशुभिर्मिथुनैर्जायते देवानां वा अनिष्टा देवता  
आसन्नथासुरा यज्ञमजिघांसन्ते देवा गायत्रीं व्यौहन्पञ्चाक्षराणि  
प्राचीनानि त्रीणि प्रतीचीनानि ततो वर्म यज्ञायाभ्वद्धर्मं यजमानाय  
यत्प्रयाजानूयाजा इज्यन्ते वर्मेव तद्यज्ञाय क्रियते वर्म यजमानाय  
भ्रातृव्याभिभूत्यै तस्माद्ब्रूथम्पुरस्ताद्बर्षीयः पश्चाद्घ्रसीयो देवा वै पुरा

रक्षौभ्य इति स्वाहाकारेण प्रयाजेषु यज्ञं संस्थाप्यमपश्यन्तं  
स्वाहाकारेण प्रयाजेषु समस्थापयन्वि वा एतद्यज्ञं छिन्दन्ति  
यत्स्वाहाकारेण प्रयाजेषु संस्थापयन्ति प्रयाजानिष्ठा हवींष्यभि  
घारयति यज्ञस्य संतत्या अथौ हविरेवाकरथौ यथापूर्वमुपैति पिता वै  
प्रयाजाः प्रजानूयाजा यत्प्रयाजानिष्ठा हवींष्यभिघारयति पितैव तत्पुत्रेण  
साधारणं कुरुते तस्मादाहुर्यश्चैवं वेद यश्च न कथा पुत्रस्य केवलं कथा  
साधारणम्पितुरित्य स्कन्नमेव तद्यत्प्रयाजेष्विष्टेषु स्कन्दति गायत्र्यैव तेन  
गर्भं धत्ते सा प्रजाम्पशून्यजमानाय प्र जनयति ॥१॥

चक्षुषी वा एते यज्ञस्य यदाज्यभागौ यदाज्यभागौ यजति चक्षुषी एव  
तद्यज्ञस्य प्रति दधाति पूर्वार्धे जुहोति तस्मात्पूर्वार्धे चक्षुषी प्रबाहुगुहोति  
तस्मात्प्रबाहुक्चक्षुषी देवलोकं वा अग्निना यजमानोऽनु पश्यति  
पितृलोकं सोमैनोत्तरार्धेऽग्र्ये जुहोति दक्षिणार्धे सोमायैवमिव हीमौ  
लोकावनयौर्लोकयोरनुख्यात्यै राजानौ वा एतौ देवतानां  
यद्ग्रीषोमावन्तरा देवता इज्येते देवतानां विधृत्यै तस्माद्राज्ञा मनुष्या  
विधृता ब्रह्मवादिनो वदन्ति किं तद्यज्ञे यजमानः कुरुते येनान्यतौदतश्च  
पशून्दाधारोऽभयतौदतश्चेत्यृचमनूच्याज्यभागस्य जुषाणेन यजति  
तेनान्यतौदतो दाधारर्चमनूच्य हविषं ऋचा यजति तेनोभयतौदतो दाधार  
मूर्धन्वती पुरोऽनुवाक्या भवति मूर्धानमेवैनं समानानां करोति  
नियुत्वत्या यजति भ्रातृव्यस्यैव पशून्नि युवते केशिनं ह दाभ्यं केशी  
सात्यकामिरुवाच सप्तपदां ते शक्वरीं श्वो यज्ञे प्रयोक्तासे यस्यै वीर्येण  
प्र जातान्भ्रातृव्याद्नुदते प्रति जनिष्यमाणान्यस्यै  
वीर्येणोभयौर्लोकयोर्ज्योतिर्धत्ते यस्यै वीर्येण पूर्वार्धेनान्द्वान्भुनक्ति

जघना॒र्धेन॑ धे॒नुरिति॑ पु॒रस्ता॑ल्लक्ष्मा पु॒रोऽनु॑वा॒क्या भवति॑ जा॒ताने॑व  
भ्रातृ॑व्यान्प्र शु॒दत उ॒परि॑ष्टाल्लक्ष्मा या॒ज्या जनि॑ष्यमा॒णाने॑व प्रति॑ नुदते  
पु॒रस्ता॑ल्लक्ष्मा पु॒रोऽनु॑वा॒क्या भवत्य॑स्मिन्ने॒व लो॒के ज्योति॑र्धत्त  
उ॒परि॑ष्टाल्लक्ष्मा या॒ज्यामु॑ष्मिन्ने॒व लो॒के ज्योति॑र्धत्ते ज्योति॑ष्मन्तावस्मा  
इ॒मौ लो॒कौ भव॑तो॒ य एवं वेद॑ पु॒रस्ता॑ल्लक्ष्मा पु॒रोऽनु॑वा॒क्या भवति॑  
तस्मा॑त्पूर्वा॒र्धेना॑नु॒ड्वान्भु॑नक्त्यु॒परि॑ष्टाल्लक्ष्मा या॒ज्या तस्मा॑ञ्जघना॒र्धेन॑  
धे॒नुर्य एवं वेद॑ भुङ्क्ते ए॒नमे॒तौ वज्र॑ आज्यं वज्र॑ आज्य॒भागौ वज्रौ॑  
वषट्कार॑स्त्रिवृ॒तमे॒व वज्रं॑ सु॒भृत्य॑ भ्रातृ॑व्याय प्र  
ह॒रत्य॑च्छ॒म्बट्कार॑ म॒प॒गूर्य॑ वषट्करोति॑ स्तृत्यै॑ गाय॒त्री पु॒रोऽनु॑वा॒क्या  
भवति॑ त्रि॒ष्टुग्या॑ज्या ब्रह्म॑न्ने॒व क्षत्र॑मन्वार॒म्भयति॑ तस्मा॑द्ब्राह्म॒णो मुख्यो॑  
मुख्यो॑ भवति॑ य एवं वेद॑ प्रै॒वैन॑म्पु॒रोऽनु॑वा॒क्यया॑ह प्र श॒यति॑ या॒ज्यया॑  
ग॒मयति॑ वषट्कारे॒णै वै॑न॒म्पु॒रोऽनु॑वा॒क्यया॑ दत्ते प्र यच्छति॑ या॒ज्यया॑ प्रति॑  
वषट्कारे॑ण॒ स्थाप॑यति त्रि॒पदा॑ पु॒रोऽनु॑वा॒क्या भवति॑ त्रयं॑ इ॒मे लो॒का  
एष्वे॑व लो॒केषु॑ प्रति॑ तिष्ठति॑ चतु॑ष्पदा या॒ज्या चतु॑ष्पद ए॒व प॒शून॑व॒ रुद्धे॑  
द्व्यक्ष॑रो वषट्कारो द्वि॒पाद्य॑जमानः प॒शुष्वे॒वोपरि॑ष्टात्प्रति॑ तिष्ठति॑ गाय॒त्री  
पु॒रोऽनु॑वा॒क्या भवति॑ त्रि॒ष्टुग्या॑ज्यैषा वै स॒प्तप॑दा शक्व॒री यद्वा ए॒तया॑ दे॒वा  
अशि॑क्षन्तद॒शक्नु॑व॒न्य एवं वेद॑ श॒क्नोत्ये॒व यच्छि॑क्षति ॥ २॥

प्र॒जाप॑तिर्दे॒वेभ्यो॑ य॒ज्ञान्यादि॑श॒त्स आ॒त्मना॑ज्यमधत्त॒ तं दे॒वा अब्रु॑वन्नेष  
वाव य॒ज्ञो यदा॑ज्यम॒प्येव॑ नोत्रा॒स्त्विति॑ सौ॒ऽब्रवी॑द्यजान्व॒ आज्य॑भागा॒वुप॑  
स्तृ॒णान॑भि॒ घार॑यानि॒ति तस्मा॑द्यजन्त्याज्य॒भागा॒वुप॑ स्तृ॒णान्त्य॑भि॒ घार॑यन्ति  
ब्रह्म॑वा॒दिनो॑ वदन्ति॒ कस्मा॑त्स॒त्याद्या॑तया॒मान्य॑न्यानि॒  
हवी॑ष्यया॒तयाम॑माज्यमि॒ति प्रा॒जाप॑त्यमि॒ति ब्रू॒याद॑या॒तयाम्॑ हि

देवानाम्प्रजापतिरिति च्छन्दाँसि देवेभ्योऽपाक्रामन्न वौऽभागानि हव्यं  
वक्ष्याम इति तेभ्य एतच्चतुरवत्तमधारयन्पुरोऽनुवाक्यायै याज्यायै देवतायै  
वषट्काराय यच्चतुरवत्तं जुहोति च्छन्दाँस्येव तत्प्रीणाति तान्यस्य  
प्रीतानि देवेभ्यो हव्यं वहन्त्य ङ्गिरसो वा इत उत्तमाः सुवर्गं  
लोकमायन्तदृषयो यज्ञवास्त्वभ्यवायन्तेऽपश्यन्पुरोडाशं कूर्मभूतँ सर्पन्तं  
तमब्रुवन्निन्द्राय धियस्व बृहस्पतये धियस्व विश्वेभ्यो देवेभ्यो धियस्वेति  
स नाधियत् तमब्रुवन्नग्रये धियस्वेति सौऽग्रयेऽधियत्  
यदाग्नेयोऽष्टाकपालोऽमावास्यायां च पौर्णमास्यां चाच्युतो भवति  
सुवर्गस्य लोकस्याभिजित्यै तमब्रुवन्कथाहास्था  
इत्यनुपाक्तोऽभूवमित्यब्रवीद्यथाक्षोऽनुपाक्तोऽवाच्छत्येवमवारमित्युपरिष्ठाद्  
भ्यज्याधस्तादुपानक्ति सुवर्गस्य लोकस्य समष्ट्यै सर्वाणि कपालान्यभि  
प्रथयति तार्वतः पुरोडाशानमुष्मिल्लोकेऽभि जयति यो विदग्धः स  
नैर्ऋतो योऽश्रुतः स रौद्रो यः श्रुतः स सदेवस्तस्मादविदहता श्रुतकृत्यः  
सदेवत्वाय भस्मनाभि वासयति तस्मान्माँसेनास्थि च्छन्नं वेदेनाभि  
वासयति तस्मात्केशैः शिरश्छन्नं प्रच्युतं वा एतदस्माँल्लोकादगतं  
देवलोकं यच्छ्रुतँ हविरनभिघारितमभिघार्योद्वासयति देवत्रैवैनद्गमयति  
यद्येकं कपालं नश्येदेको मासः संवत्सरस्यानवेतः स्यादथ यजमानः प्र  
मीयेत् यद्द्वे नश्येतां द्वौ मासौ संवत्सरस्यानवेतौ स्यातामथ यजमानः प्र  
मीयेत् संख्यायोद्वासयति यजमानस्य गोपीथाय यदि नश्येदाश्विनं  
द्विकपालं निर्वपेद्यावापृथिव्यमेककपालमश्विनौ वै देवानाम्भिषजौ  
ताभ्यामेवास्मै भेषजं करोति द्यावापृथिव्यं एककपालो भवत्यनयोर्वा  
एतन्नश्यति यन्नश्यत्यनयोरेवैनद्विन्दति प्रतिष्ठित्यै ॥३॥



देवस्य त्वा सवितुः प्रसुव इति स्फ्यमा दत्ते प्रसूत्या  
 अश्विनौर्बाहुभ्यामित्याहाश्विनौ हि देवानामध्वर्यू आस्तां पूष्णो  
 हस्ताभ्यामित्याह यत्यै शतभृष्टिरसि वानस्पत्यो द्विषतो वध इत्याह  
 वज्रमेव तत्सं श्यति भ्रातृव्याय प्रहरिष्य न्तस्तम्बयजुर्हरत्येतावती वै  
 पृथिवी यावती वेदिस्तस्या एतावत एव भ्रातृव्यं निर्भजति तस्मान्नाभागं  
 निर्भजन्ति त्रिहरति त्रय इमे लोका एभ्य एवैनं लोकेभ्यो निर्भजति तूष्णीं  
 चतुर्थं हरत्यपरिमितादेवैनं निर्भजत्युद्धन्ति यदेवास्या अमेध्यं तदप  
 हन्त्युद्धन्ति तस्मादोषधयः परा भवन्ति मूलं छिनत्ति भ्रातृव्यस्यैव मूलं  
 छिनत्ति पितृदेवत्यातिखातेयतीं खनति प्रजापतिना यज्ञमुखेन  
 सम्मिता मा प्रतिष्ठायै खनति यजमानमेव प्रतिष्ठां गमयति दक्षिणतो  
 वर्षीयसीं करोति देवयजनस्यैव रूपमक्रः पुरीषवतीं करोति प्रजा वै  
 पशवः पुरीषम्प्रजयैवैनम्पशुभिः पुरीषवन्तं करोत्युत्तरम्परिग्राहम्परि  
 गृह्णात्येतावती वै पृथिवी यावती वेदिस्तस्या एतावत एव भ्रातृव्यं  
 निर्भज्यात्मन उत्तरम्परिग्राहम्परि गृह्णाति क्रूरमिव वा एतत्करोति यद्वेदिं  
 करोति धा असि स्वधा असीति योयुष्यते शान्त्यै प्रोक्षणीरा सादयत्यापो  
 वै रक्षोघ्नी रक्षसामपहत्यै स्फ्यस्य वर्त्मन्सादयति यज्ञस्य संतत्यै यं  
 द्विष्यात्तं ध्यायेच्छुचैवैनमर्पयति ॥४॥

ब्रह्मवादिनो वदन्त्यद्भिर्हवींषि प्रौक्षीः केनाप इति ब्रह्मणेति  
 ब्रूयाद्भिर्हवींषि प्रोक्षति ब्रह्मणा इध्माबर्हिः प्रोक्षति  
 मेध्यमेवैनत्करोति वेदिम्प्रोक्षत्यृक्षा वा एषालोमकामेध्या  
 यद्वेदिर्मेध्यामेवैनां करोति दिवे त्वान्तरिक्षाय त्वा पृथिव्यै त्वेति  
 बर्हिरासाद्य प्रोक्षत्येभ्य एवैनल्लोकेभ्यः प्रोक्षति क्रूरमिव वा एतत्करोति

यत्वनत्यपो नि नयति शान्त्यै पुरस्तात्प्रस्तरं गृह्णाति मुख्यमेवैनं  
करोती यन्तं गृह्णाति प्रजापतिना यज्ञमुखेन सम्मितं बर्हिः स्तृणाति प्रजा  
वै बर्हिः पृथिवी वेदिः प्रजा एव पृथिव्याम्प्रति स्थापयत्यन्तिदृशनं  
स्तृणाति प्रजयैवैनम्पशुभिरन्तिदृशनं करोत्युत्तरम्बर्हिषः प्रस्तरं सादयति  
प्रजा वै बर्हिर्यजमानः प्रस्तरो यजमानमैवायजमानादुत्तरं करोति  
तस्माद्यजमानोऽयजमानादुत्तरोऽन्तर्दधाति व्यावृत्त्या अनक्ति  
हविष्कृतमेवैनं सुवर्गं लोकं गमयति त्रेधानक्ति त्रयं इमे लोका एभ्य  
एवैनं लोकेभ्योऽनक्ति न प्रति शृणाति यत्प्रतिशृणीयादनूर्ध्वम्भावुकं  
यजमानस्य स्यादुपरीव प्र हरत्युतिपरीव हि सुवर्गो लोको नि यच्छति  
वृष्टिमेवास्मै नि यच्छति नात्यग्रम्प्र

हेरदत्यग्रम्प्रहरैदत्यासारिण्यध्वर्योर्नाशुका स्यान्न  
पुरस्तात्प्रत्यस्येद्यत्पुरस्तात्प्रत्यस्येत्सुवर्गाल्लोकाद्यजमानम्प्रति नुदेत्प्राञ्चम्प्र  
हरति यजमानमेव सुवर्गं लोकं गमयति न विष्वञ्चं वि युयाद्यद्विष्वञ्चं  
वियुयात्सूर्यस्य जायेतोर्ध्वमुद्यौत्यूर्ध्वमिव हि पुंसः पुमानेवास्य  
जायते यत्स्फ्येन वोपवेषेण वा योयुष्येत स्तृतिरेवास्य सा हस्तैन  
योयुष्यते यजमानस्य गोपीथार्यं ब्रह्मवादिनो वदन्ति किं यज्ञस्य यजमान  
इति प्रस्तर इति तस्य क्व सुवर्गो लोक इत्याहवनीय इति

ब्रूयाद्यत्प्रस्तरमाहवनीये प्रहरति यजमानमेव सुवर्गं लोकं गमयति वि  
वा एतद्यजमानो लिशते यत्प्रस्तरं योयुष्यन्ते बर्हिरनु प्र हरति शान्त्या  
अनारम्भण इव वा एतर्ह्यध्वर्युः स ईश्वरो वैपनो भवितोर्ध्रुवासीतीमामभि  
मृशतीयं वै ध्रुवास्यामेव प्रति तिष्ठति न वैपनो भवत्य गाश्नग्नीदित्याहु  
यद्ब्रूयादग्निरित्यग्नावग्निं गमयेन्निर्यजमानं

सुवर्गाल्लोकाद्भजेदग्नित्येव ब्रूयाद्यजमानमेव सुवर्गं लोकं गमयति

॥५॥

अग्नेस्त्रयो ज्यायाँसो भ्रातर आसन्ते देवेभ्यो हव्यं वहन्तः प्रामीयन्त  
 सौऽग्निरिभिभेदित्थं वाव स्य आर्तिमारिष्यतीति स निलायत सौऽपः  
 प्राविशत्तं देवताः प्रैषमैच्छन्तम्मत्स्यः प्राब्रवीत्तमशपद्धियाधिया त्वा  
 वध्यासुर्यो मा प्रावौच इति तस्मान्मत्स्यं धियाधिया घ्नन्ति शप्नो हि  
 तमन्वविन्दन्तमब्रुवन्नप न आ वर्तस्व हव्यं नो वहेति सौऽब्रवीद्वरं वृणौ  
 यदेव गृहीतस्याहुतस्य बहिःपरिधि स्कन्दात्तन्मे भ्रातृणाम्भागधेयमसदिति  
 तस्माद्यद्गृहीतस्याहुतस्य बहिःपरिधि स्कन्दति तेषां तद्भागधेयं तानेव तेन  
 प्रीणाति परिधीन्परि दधाति रक्षसामपहत्यै सँ स्पर्शयति  
 रक्षसामनन्ववचाराय न पुरस्तात्परि दधात्यादित्यो  
 ह्यैवोद्यन्पुरस्ताद्रक्षाँस्यपहन्त्यूर्ध्वे समिधावा दधात्युपरिष्ठादेव  
 रक्षाँस्यप हन्ति यजुषान्यां तूष्णीमन्यामिथुनत्वाय द्वे आ दधाति  
 द्विपाद्यजमानः प्रतिष्ठित्यै ब्रह्मवादिनो वदन्ति स त्वै यजेत यो  
 यज्ञस्यात्यां वसीयान्त्स्यादिति भूपतये स्वाहा भुवनपतये स्वाहा भूतानां  
 पतये स्वाहेति स्कन्नमनु मन्त्रयेत यज्ञस्यैव तदात्यां यजमानो  
 वसीयान्भवति भूर्यसीर्हि देवताः प्रीणाति जामि वा एतद्यज्ञस्य क्रियते  
 यदन्वञ्चौ पुरोडाशावुपाँशुयाजमन्तरा यजत्यजामित्वायाथौ  
 मिथुनत्वाया ग्निरमुष्मिल्लोक आसीद्यमौऽस्मिन्ते देवा अब्रुवन्नेतेमौ वि  
 पर्यहामेत्यन्नाद्येन देवा अग्निमुपामन्त्रयन्त राज्येन पितरो यमं  
 तस्माद्ग्निरदेवानामन्नादो यमः पितृणाँ राजा य एवं वेद प्र  
 राज्यमन्नाद्यमाप्नोति तस्मा एतद्भागधेयम्प्रायच्छन्द्यदग्र्यै  
 स्विष्टकृतैऽवद्यन्ति यदग्र्यै स्विष्टकृतैऽवद्यति भागधेयैर्नैव तद्द्रुदँ  
 समर्धयति सकृत्सकृदव द्यति सकृदिव हि रुद्र उत्तरार्धादव द्यत्येषा वै  
 रुद्रस्य दिक्स्वार्यामेव दिशि रुद्रं निरवदयते द्विरभि धारयति

चतुरवृत्तस्याप्तचै पशवो वै पूर्वा आहुतय एष रुद्रो यदग्रिर्यत्पूर्वा  
आहुतीरभि जुहुयाद्बुद्राय पशूनपि दध्यादपशुर्यजमानः स्यादतिहाय पूर्वा  
आहुतीर्जुहोति पशूनां गौपीथाय ॥६॥

मनुः पृथिव्या यज्ञिर्यमैच्छत्स घृतं निषिक्तमविन्दत्सोऽब्रवीत्कौऽस्येश्वरो  
यज्ञेऽपि कर्तोरिति तावंब्रूतामित्रावरुणौ गोरेवावर्मीश्वरौ कर्तोः स्व इति  
तौ ततो गाँ समैरयताँ सा यत्रयत्र न्यक्रामत्ततौ घृतमपीडयत्  
तस्माद्धृतपद्युच्यते तदस्यै जन्मो पंहूतँ रथंतरँ सह पृथिव्येत्याहेयं वै  
रथंतरमिमामेव सहान्नाद्येनोप ह्यत उपंहूतं वामदेव्यँ  
सहान्तरिंक्षेणेत्याह पशवो वै वामदेव्यं पशूनेव सहान्तरिंक्षेणोप ह्यत  
उपंहूतम्बृहत्सह दिवेत्याहिरं वै बृहदिरामेव सह दिवोप ह्यत उपंहूताः  
सप्त होत्रा इत्याह होत्रा एवोप ह्यत उपंहूता धेनुः सहर्षभेत्याह  
मिथुनमेवोप ह्यत उपंहूतो भृक्षः सखेत्याह सोमपीथमेवोप ह्यत  
उपंहूतां३ हो इत्याहात्मानमेवोप ह्यत आत्मा ह्युपंहूतानां वसिष्ठ इडामुप  
ह्यते पशवो वा इडा पशूनेवोप ह्यते चतुरुप ह्यते चतुष्पादो हि पशवो  
मानवीत्याह मनुर्ह्येतामग्रेऽपश्यद्घृतपदीत्याह यदेवास्यै  
पदाद्धृतमपीडयत् तस्मादेवमाह मैत्रावरुणीत्याह मित्रावरुणौ ह्येनाँ  
समैरयतां ब्रह्म देवकृतमुपंहूतमित्याह ब्रह्मैवोप ह्यते दैव्या अध्वर्यव  
उपंहूता उपंहूता मनुष्या इत्याह देवमनुष्यानेवोप ह्यते य इमं  
यज्ञमवान्ये यज्ञपतिं वर्धानित्याह यज्ञाय चैव यजमानाय चाशिषमा  
शास्त उपंहूते द्यावापृथिवी इत्याह द्यावापृथिवी एवोप ह्यते पूर्वजे  
ऋतावरी इत्याह पूर्वजे ह्येते ऋतावरी देवी देवपुत्रे इत्याह देवी ह्येते  
देवपुत्रे उपंहूतोऽयं यजमान इत्याह यजमानमेवोप ह्यत उत्तरस्यां

देवयुज्यायामुपहूतो भूर्यसि हविष्करंण उपहूतो दिव्ये धामनुपहूत इत्याह  
 प्रजा वा उत्तरा देवयुज्या पशवो भूयौ हविष्करंण सुवर्गो लोको दिव्यं  
 धामे दमसीदमसीत्येव यज्ञस्य प्रियं धामोप ह्यते विश्वमस्य  
 प्रियमुपहूतमित्याहाच्छम्बट्कारमेवोप ह्यते ॥७॥

पशवो वा इडा स्वयमा दत्ते काममेवात्मना पशूनामा दत्ते न ह्यन्यः  
 कामम्पशूनाम्प्रयच्छति वाचस्पतये त्वा हुतम्प्राश्नामीत्याह वाचमेव  
 भागधेयेन प्रीणाति सदसस्पतये त्वा हुतम्प्राश्नामीत्याह स्वगाकृत्यै  
 चतुरवत्तम्भवति हविर्वै चतुरवत्तम्पशवश्चतुरवत्तं यद्धोता  
 प्राश्नीयाद्धोतार्तिमाच्छेद्यदग्नौ जुहुयाद्बुद्राय पशूनपि दध्यादपशुर्यजमानः  
 स्याद्वाचस्पतये त्वा हुतम्प्राश्नामीत्याह परोऽक्षमेवैनजुहोति सदसस्पतये  
 त्वा हुतम्प्राश्नामीत्याह स्वगाकृत्यै प्राश्नन्ति तीर्थ एव प्राश्नन्ति दक्षिणां  
 ददाति तीर्थ एव दक्षिणां ददाति वि वा एतद्यज्ञं छिन्दन्ति यन्मध्यतः  
 प्राश्नन्त्यद्भिर्मार्जयन्त आपो वै सर्वा देवता देवताभिरेव यज्ञं सं  
 तन्वन्ति देवा वै यज्ञाद्बुद्रमन्तरायन्तस यज्ञमविध्यत्तं देवा अभि  
 समंगच्छन्त कल्पतां न इदमिति तैऽब्रुवन्त्स्वष्टं वै न इदम्भविष्यति  
 यदिमं राधयिष्याम इति तत्स्विष्टकृतः स्विष्टकृत्त्वं तस्याविद्धं  
 निरकृन्तन्त्यवैनु सम्मितं तस्माद्यवमात्रमव  
 द्ये द्यज्जचार्योऽवद्येद्रोपयेत्तद्यज्ञस्य यदुप च स्तृणीयादभि च  
 घारयेदुभयतःसंश्वायि कुर्यादवदायाभि घारयति द्विः सम्पद्यते  
 द्विपाद्यजमानः प्रतिष्ठित्यै यत्तिरश्चीनमतिहरेदनभिविद्धं यज्ञस्याभि  
 विध्येदग्रेण परि हरति तीर्थेनैव परि हरति तत्पूष्णे पर्यहरन्तपूषा प्राश्य  
 दतौऽरुणत्तस्मात्पूषा प्रपिष्टभागोऽदन्तको हि तं देवा अब्रुवन्वि वा

अयमाध्व्यप्राशित्रियो वा अयमभूदिति तद्बृहस्पतये  
पर्यहरन्त्सोऽबिभेद्बृहस्पतिरित्थं वाव स्य आर्तिमारिष्यतीति स  
एतम्मन्त्रमपश्यत्सूर्यस्य त्वा चक्षुषा प्रति पश्यामीत्यब्रवीन्न हि सूर्यस्य  
चक्षुः किं च न हिनस्ति सोऽबिभेत्प्रतिगृह्णन्तम्मा हिँसिष्यतीति देवस्य  
त्वा सवितुः प्रसूवैऽश्विनोर्बाहुभ्याम्पूष्णो हस्ताभ्याम्प्रति  
गृह्णामीत्यब्रवीत्सवितृप्रसूत एवैनद्ब्रह्मणा देवताभिः  
प्रत्यगृह्णात्सोऽबिभेत्प्राश्नन्तम्मा हिँसिष्यतीत्यग्नेस्त्वास्यैन  
प्राश्नामीत्यब्रवीन्न ह्यग्नेरास्यं किं च न हिनस्ति सोऽबिभेत्प्राशितम्मा  
हिँसि ष्यतीति ब्राह्मणस्योदरेणेत्यब्रवीन्न हि ब्राह्मणस्योदरं किं च न  
हिनस्ति बृहस्पतेर्ब्रह्मणेति स हि ब्रह्मिष्ठोऽपु वा एतस्मात्प्राणाः क्रामन्ति  
यः प्राशित्रम्प्राश्नात्यद्विर्मार्जयित्वा प्राणान्त्सम्मृशतेऽमृतं वै प्राणा  
अमृतमापः प्राणानेव यथास्थानमुप ह्वयते ॥८॥

अग्नीध्र आ दधात्यग्निमुखानेवर्तुन्प्रीणाति समिधुमा  
दधात्युत्तरासामाहुतीनाम्प्रतिष्ठित्या अथो समिद्धेत्येव जुहोति  
परिधीन्त्सम्मार्ष्टि पुनात्येवैना न्त्सकृत्सकृत्सम्मार्ष्टि पराडिव ह्यैतर्हि  
यज्ञश्चतुः सम्पद्यते चतुष्पादः पशवः पशूनेवाव रुद्धे ब्रह्मन्प्र स्थास्याम्  
इत्याहात्र वा एतर्हि यज्ञः श्रितो यत्र ब्रह्मा यत्रैव यज्ञः श्रितस्तत एवैनमा  
रंभते यद्धस्तैन प्रमीवेद्वेपनः स्याद्यच्छीष्णा  
शीर्षक्तिमान्त्स्याद्यत्तूष्णीमासीतासम्प्रतो यज्ञः स्यात्प्र तिष्ठेत्येव ब्रूयाद्वाचि  
वै यज्ञः श्रितो यत्रैव यज्ञः श्रितस्तत एवैनँ सम्प्र यच्छति देव  
सवितरेतत्ते प्राहेत्याह प्रसूत्यै बृहस्पतिर्ब्रह्मेत्याह स हि ब्रह्मिष्ठः स  
यज्ञम्पाहि स यज्ञपतिम्पाहि स माम्पाहीत्याह यज्ञाय यजमानाय्तात्मने

तेभ्य एवाशिषमा शास्तेऽनात्या आश्राव्याह देवान्यजेति ब्रह्मवादिनो  
 वदन्तीष्टा देवता अथ कतम एते देवा इति च्छन्दाँसीति ब्रूयाद्वायुत्रीं  
 त्रिष्टुभं जगतीमित्यथो खल्वाहुर्ब्राह्मणा वै च्छन्दाँसीति तानेव तद्यजति  
 देवानां वा इष्टा देवता आसन्नथाग्निर्नोदज्वलत्तं देवा  
 आहुतीभिरनूयाजेष्वन्वविन्दन्त्यदनूयाजान्यजत्यग्निमेव तत्समिन्द्र एतदुर्वै  
 नामासुर आसीत्स एतर्हि यज्ञस्याशिषमवृङ्क्ते यद्ब्रूयादेतदु द्यावापृथिवी  
 भद्रमभूदित्येतदुमेवासुरं यज्ञस्याशिषं गमयेदित्दं द्यावापृथिवी  
 भद्रमभूदित्येव ब्रूयाद्यजमानमेव यज्ञस्याशिषं गमयत्यार्ध्मं सूक्तवाकमुत  
 नमोवाकमित्याहेदमरात्स्मेति वावैतदाहो पश्रितो दिवः पृथिव्योरित्याह  
 द्यावापृथिव्योर्हि यज्ञ उपश्रित ओमन्वती तेऽस्मिन्यज्ञे यजमान  
 द्यावापृथिवी स्तामित्याहाशिषमेवैतामा शास्ते यद्ब्रूयात्सूपावसाना च  
 स्वध्यवसाना चेति प्रमायुको यजमानः स्याद्यदा हि  
 प्रमीयतेऽथेमामुपावस्यति सूपचरणा च स्वधिचरणा चेत्येव  
 ब्रूयाद्द्वरीयसीमेवास्मै गव्यूतिमा शास्ते न प्रमायुको भवति  
 तयौराविद्यग्निरिदँ हविरंजुषतेत्याह या अयादम देवतास्ता अरीरधामेति  
 वावैतदाह यन्न निर्दिशेत्प्रतिवेशं यज्ञस्याशीर्गच्छेदा शास्तेऽयं  
 यजमानोऽसावित्याह निर्दिश्यैवैनँ सुवर्गं लोकं गमयत्यायुरा शास्ते  
 सुप्रजास्त्वमा शास्तु इत्याहाशिषमेवैतामा शास्ते सजातवनस्यामा शास्तु  
 इत्याह प्राणा वै संजाताः प्राणानेव नान्तरैति तदग्निर्देवो देवेभ्यो वनते  
 वयमग्नेर्मानुषा इत्याहाग्निर्देवेभ्यो वनुते वयमनुष्येभ्य इति वावैतदाहे ह  
 गतिर्वामस्येदं च नमो देवेभ्य इत्याह याश्चैव देवता यजति याश्च न ताभ्य  
 एवोभ्ययीभ्यो नमस्करोत्यात्मनोऽनात्यै ॥६॥

देवा वै यज्ञस्य स्वगाकर्तारं नाविन्दन्ते शम्युम्बार्हस्पत्यमब्रुवन्निमं नो  
यज्ञं स्वगा कुर्विति सोऽब्रवीद्वरं वृणौ यदेवाब्राह्मणोक्तोऽश्रद्धधानो यजति  
सा मे यज्ञस्याशीरसदिति तस्माद्यदब्राह्मणोक्तोऽश्रद्धधानो यजते शम्युमेव  
तस्य बार्हस्पत्यं यज्ञस्याशीर्गच्छत्येतन्ममेत्यब्रवीत्किम्मे प्रजायाः इति  
योऽपगुरातै शतेन यातयाद्यो निहनत्सहस्रेण यातयाद्यो लोहितं  
करवद्घावतः प्रस्कद्य पांसून्त्संगृह्णात्तावतः संवत्सरान्पितृलोकं न प्र  
जानादिति तस्माद्ब्राह्मणाय नाप गुरेत न नि हन्यान्न लोहितं  
कुर्यादित्तावता हैनसा भवति तच्छम्योरा वृणीमह इत्याह यज्ञमेव तत्स्वगा  
करोति तच्छम्योरा वृणीमह इत्याह शम्युमेव बार्हस्पत्यम्भागधेयेन  
समर्धयति गातुं यज्ञाय गातुं यज्ञपतय इत्याहाशिषमेवैतामा शास्ते सोमं  
यजति रेत एव तद्घाति त्वष्टारं यजति रेत एव हितं त्वष्टा रूपाणि वि  
करोति देवानाम्पत्नीर्यजति मिथुनत्वायाग्निं गृहपतिं यजति प्रतिष्ठित्यै  
जामि वा एतद्यज्ञस्य क्रियते यदाज्येन प्रयाजा इज्यन्त आज्येन  
पत्नीसंयाजा ऋचमनूच्य पत्नीसंयाजानामृचा यजत्यजामित्वायाथौ  
मिथुनत्वाय पङ्क्तिप्रायणो वै यज्ञः पङ्क्त्युदयनः पञ्च प्रयाजा इज्यन्ते  
चत्वारः पत्नीसंयाजाः समिष्टयजुः पञ्चमं पङ्क्तिमेवानु प्रयन्ति पङ्क्तिमनूद्यन्ति  
॥१०॥

युद्धवा हि देवहृतमांश्चाग्ने रथीरिव । नि होता पूर्व्यः संदः ॥  
उत नो देव देवांश्चाग्ने वोचो विदुष्टरः । श्रद्धिश्चा वार्या कृधि ॥  
त्वह यद्यविष्टय सहसः सूनवाहुत । ऋतावा यज्ञियो भुवः ॥  
अयमग्निः सहस्त्रिणो वाजस्य शतिनस्पतिः । मूर्धा कवी रयीणाम् ॥  
तं नेमिमृभवौ यथानमस्व सहृतिभिः । नेदीयो यज्ञमङ्गिरः ॥



तस्मै नूनमभिद्यवे वाचा विरूप नित्यया । वृष्णै चोदस्व सुष्टुतिम् ॥  
 कमु ष्विदस्य सेनयाग्नेरपाकचक्षसः । पृणिं गोषु स्तरामहे ॥  
 मा नो देवानां विशः प्रस्त्रातीरिवोस्त्राः । कृशं न हासुरघ्नियाः ॥  
 मा नः समस्य दूढयः परिद्वेषसो अहृतिः ऊर्मिर्न नावमा वधीत् ॥  
 नमस्ते अग्र ओजसे गृणन्ति देव कृष्टयः अमैरमित्रमर्दय ॥  
 कुवित्सु नो गविष्टयेऽग्ने संवेषिषो रयिम् । उरुकदुरु णस्कृधि ॥  
 मा नो अस्मिन्महाधने परा वर्भारभृद्यथा । संवर्गं स रयिं जय ॥  
 अन्यमस्मद्भिया इयमग्ने सिषक्तु दुच्छुना । वर्धा नो अमवच्छवः ॥  
 यस्याजुषन्नमस्विनः शमीमदुर्मखस्य वा । तं घेदग्निर्वृधावति ॥  
 परस्या अधि संवतोऽवरां अभ्या तर । यत्राहमस्मि तां अव ॥  
 विद्या हि ते पुरा वयमग्ने पितुर्यथावसः । अधा ते सुम्रमीमहे ।  
 य उग्र इव शर्यहा तिग्मशृङ्गो न वसंगः । अग्ने पुरो रुरोजिथ ॥  
 सखायः सं वः सम्यञ्चमिषं स्तोमं चाग्रये । वर्षिष्ठाय क्षितीनामूर्जो  
 नष्ट्रे सहस्वते ॥  
 ससमिद्युवसे वृषन्नग्ने विश्वान्यर्य आ । इडस्पदे समिध्यसे स नो  
 वसून्या भर ॥  
 प्रजापते स वेद सोमापूषणेमौ देवौ ॥११॥

उशन्तस्त्वा हवामह उशन्तः समिधीमहि । उशन्नुशत आ वह  
 पितृन्हविषे अत्तवे ॥  
 त्वं सोम प्रचिकितो मनीषा त्वं रजिष्ठमनु नेषि पन्थाम् । तव  
 प्रणीती पितरौ न इन्दो देवेषु रत्नमभजन्त धीराः ॥  
 त्वया हि नः पितरः सोम पूर्वे कर्माणि चक्रुः पवमान धीराः ।

वृन्वन्नवातः परिधीँरपौरुं वीरेभिरश्वैर्मघवा भव नः ॥  
 त्वँ सौम पितृभिः संविदानोऽनु द्यावापृथिवी आ तंतन्थ । तस्मै त  
 इन्दो हविषा विधेम वयँ स्याम पतयो रयीणाम् ॥  
 अग्निष्वान्ताः पितर एह गच्छत सदःसदः सदत सुप्रणीतयः । अन्ता  
 हवीँषि प्रयतानि बर्हिष्यथा रयिँ सर्ववीरं दधातन ॥  
 बर्हिषदः पितर ऊत्यर्वाग्निमा वो हव्या चकृमा जुषध्वम् । त आ  
 गतावसा शंतमेनाथास्मभ्यँ शं योररपो दधात ॥  
 आहम्पितृन्सुविदत्राँ अवित्सि नपातं च विक्रमणं च विष्णोः ।  
 बर्हिषदो ये स्वधया सुतस्य भजन्त पित्वस्त इहागमिष्ठाः ॥  
 उपहूताः पितरः सोम्यासौ बर्हिष्येषु निधिषु प्रियेषु । त आ गमन्तु त इह  
 श्रुवन्त्वधि ब्रुवन्तु ते अवन्त्वस्मान् ॥  
 उदीरतामवर उत्परास उन्मध्यमाः पितरः सोम्यासः । असुं य ईयुरवृका  
 ऋतज्ञास्ते नोऽवन्तु पितरो हवेषु ॥  
 इदम्पितृभ्यो नमो अस्त्वद्य ये पूर्वासो य उपरास ईयुः । ये पार्थिवे  
 रजस्या निषत्ता ये वा नूनँ सुवृजनासु विक्षु ॥  
 अधा यथा नः पितरः परासः प्रत्नासो अग्र ऋतमाशुषाणाः ।  
 शुचीदयन्दीधितिमुक्थशासः क्षामा भिन्दन्तौ अरुणीरप वन् ॥  
 यदग्ने कव्यवाहन पितृन्यद्यृतावृधः । प्र च हव्यानि वक्ष्यसि देवेभ्यश्च  
 पितृभ्य आ ॥  
 त्वमग्र ईडितो जातवेदो ऽवाङ्हव्यानि सुरभीणि कृत्वा । प्रादाः पितृभ्यः  
 स्वधया ते अक्षन्नद्धि त्वं देव प्रयता हवीँषि ॥  
 मातली कव्यैर्यमो अङ्गिरोभिर्बृहस्पतिर्भृक्वभिर्वावृधानः । याँश्च देवा  
 वावृधुर्ये च देवान्स्वाहान्ये स्वधयान्ये मदन्ति इमं यम प्रस्तरमा हि

सीदाङ्गिरोभिः पितृभिः संविदानः । आ त्वा मन्त्राः कविशस्ता  
वहन्त्वेना राजन्हविषा मादयस्व ॥

अङ्गिरोभिरा गंहि यज्ञियेभिर्यम वैरूपैरिह मादयस्व । विवस्वन्तं हुवे  
यः पिता तेऽस्मिन्यज्ञे बर्हिष्या निषद्य ॥

अङ्गिरसो नः पितरो नवगवा अथर्वाणो भृगवः सोम्यासः । तेषां वयं  
सुमत्तौ यज्ञियानामपि भद्रे सौमनसे स्याम ॥१२॥

इति द्वितीयकारण्डे षष्ठः प्रपाठकः ६

इति द्वितीयं कारण्डं सम्पूर्णम्

अथ तृतीयं कारण्डम्

अथ तृतीयकारण्डे प्रथमः प्रपाठकः १

प्रजापतिरकामयत प्रजाः सृजेयेति स तपोऽतप्यत स सर्पानसृजत  
सोऽकामयत प्रजाः सृजेयेति स द्वितीयमतप्यत स वयांस्यसृजत  
सोऽकामयत प्रजाः सृजेयेति स तृतीयमतप्यत स एतं  
दीक्षितवा दमपश्यत्तमवदत्ततो वै स प्रजा असृजत यत्तपस्तप्त्वा  
दीक्षितवादं वदति प्रजा एव तद्यजमानः सृजते यद्वै दीक्षितोऽमेध्यं  
पश्यत्यपास्माद्दीक्षा क्रामति नीलमस्य हरो व्येत्यबद्धं मनो दरिद्रं चक्षुः  
सूर्यो ऽसे ज्योतिषां श्रेष्ठो दीक्षे मा मा हासीरित्याहु नास्माद्दीक्षाऽप  
क्रामति नास्य नीलं न हरो व्येति यद्वै दीक्षितमभिवर्षति दिव्या  
आपोऽशान्ता ओजो बलं दीक्षां तपोऽस्य निर्घन्त्युन्दतीर्बलं धत्तौजो धत्त  
बलं धत्त मा मै दीक्षां मा तपो निर्वाधिष्टेत्याहैतदेव सर्वमात्मन्धत्ते  
नास्यौजो बलं न दीक्षां न तपो निर्घन्त्यग्निर्वै दीक्षितस्य देवता  
सोऽस्मादेतर्हि तिर इव यर्हि याति तमीश्वरं रक्षांसि हन्तोर्भद्रादभि

श्रेयः प्रेहि बृहस्पतिः पुरएता ते अस्त्वित्याह ब्रह्म वै देवानां  
बृहस्पतिस्तमेवान्वारभते स एनं सं पारयत्ये दमगन्म देवयजनं  
पृथिव्या इत्याह देवयजनं ह्येष पृथिव्या आगच्छति यो यजते विश्वे  
देवा यदजुषन्त पूर्व इत्याह विश्वे ह्येतदेवा जोषयन्ते यद्ब्राह्मणा  
ऋक्सामाभ्यां यजुषा सन्तरन्त इत्याहक्सामाभ्यां ह्येष यजुषा सन्तरति  
यो यजते रायस्पोषेण समिषा मदेमेत्याहाशिषमेवैतामा शास्ते ॥१॥

एष ते गायत्रो भाग इति मे सोमाय ब्रूतादेष ते त्रैष्टुभो जागतो भाग इति  
मे सोमाय ब्रूताच्छन्दोमानां साम्राज्यं गच्छेति मे सोमाय ब्रूता द्यो वै  
सोमं राजानं साम्राज्यं लोकं गमयित्वा क्रीणाति गच्छति स्वानां  
साम्राज्यं छन्दांसि खलु वै सोमस्य राज्ञः साम्राज्यो लोकः  
पुरस्तात्सोमस्य क्रयादेवमभि मन्त्रयेत् साम्राज्यमेवैनं लोकं गमयित्वा  
क्रीणाति गच्छति स्वानां साम्राज्यं यो वै तानूनृषस्य प्रतिष्ठां वेद प्रत्येव  
तिष्ठति ब्रह्मवादिनो वदन्ति न प्राश्नन्ति न जुह्वत्यथ क्व तानूनृषं प्रति  
तिष्ठतीति प्रजापतौ मनसीति ब्रूयात्त्रिरव जिघ्रेत्प्रजापतौ त्वा मनसि  
जुहोमीत्येषा वै तानूनृषस्य प्रतिष्ठा य एवं वेद प्रत्येव तिष्ठति यो वा  
अध्वर्योः प्रतिष्ठां वेद प्रत्येव तिष्ठति यतो मन्येतानभिक्रम्य होष्यामीति  
तत्तिष्ठन्ना श्रावयेदेषा वा अध्वर्योः प्रतिष्ठा य एवं वेद प्रत्येव तिष्ठति  
यदभिक्रम्य जुहुयात्प्रतिष्ठाया इयात्तस्मात्समानत्र तिष्ठता होतव्यं  
प्रतिष्ठित्यै यो वा अध्वर्योः स्वं वेद स्ववानेव भवति स्नुग्वा अस्य स्वं  
वायव्यमस्य स्वं चमसोऽस्य स्वं यद्वायव्यं वा चमसं  
वानन्वारभ्याश्रावयेत्स्वादिंयात्तस्मादन्वारभ्याश्राव्यं स्वादेव नैति यो वै  
सोममप्रतिष्ठाप्य स्तोत्रमुपाकरोत्यप्रतिष्ठितः सोमो भवत्यप्रतिष्ठितः

स्तोमोऽप्रतिष्ठितान्युक्थान्यप्रतिष्ठितो यजमानोऽप्रतिष्ठितोऽध्वर्युर्वायव्यं वै  
सोमस्य प्रतिष्ठा चमसोऽस्य प्रतिष्ठा सोमः स्तोमस्य स्तोम उक्थानां ग्रहं  
वा गृहीत्वा चमसं वोन्नीय स्तोत्रमुपाकुर्यात्प्रत्येव सोमं स्थापयति प्रति  
स्तोमं प्रत्युक्थानि प्रति यजमानस्तिष्ठति प्रत्यध्वर्युः ॥२॥

यज्ञं वा एतत्सं भरन्ति यत्सोमक्रयण्यै पदं यज्ञमुखं हविर्धानि यर्हि  
हविर्धानि प्राचीं प्रवर्तयेयुस्तर्हि तेनाक्षमुपाञ्जयाद्यज्ञमुख एव यज्ञमनु सं  
तनोति प्राञ्चमग्निं प्र हरन्त्युत्पत्नीमा नयन्त्यन्वनांसि प्र वर्तयन्त्यथ वा  
अस्यैष धिष्णो हीयते सोऽनु ध्यायति स ईश्वरो रुद्रो भूत्वा प्रजां  
पशून्यजमानस्य शमयितोर्यर्हि पशुमाप्रीतमुदञ्चं नयन्ति तर्हि तस्य  
पशुश्रपणं हरेत्तेनैवैनं भागिनं करोति यजमानो वा आहवनीयो यजमानं  
वा एतद्वि कर्षन्ते यदाहवनीयात्पशुश्रपणं हरन्ति स वैव स्यान्निर्मन्थ्यं  
वा कुर्याद्यजमानस्य सात्सुत्वाय यदि पशोरवदानं नश्येदाज्यस्य  
प्रत्याख्यायमव द्येत्सैव ततः प्रायश्चित्ति र्ये पशुं  
विमथ्नीरन्यस्तान्कामयेता त्रिमाच्छैरुति कुविदङ्गेति  
नमोवृक्तिवत्पर्चाग्नीध्रे जुहुयान्नमोवृक्तिमेवैषां वृद्धे ताजगार्तिमाच्छन्ति  
॥३॥

प्रजापतेर्जायमानाः प्रजा जाताश्च या इमाः ।  
तस्मै प्रति प्र वैदय चिकित्वां अनु मन्यताम् ॥  
इमं पशुं पशुपते ते अद्य बध्नाम्यग्ने सुकृतस्य मध्ये ।  
अनु मन्यस्व सुयजा यजाम जुष्टं देवानामिदमस्तु हव्यम् ॥  
प्रजानन्तः प्रति गृह्णन्ति पूर्वे प्राणमङ्गैभ्यः पर्याचरन्तम् ।

सुव॒र्गं या॑हि प॒थिभिर्दे॑व॒यानै॑रोष॒धीषु॑ प्रति॒ तिष्ठा॑ शरी॒रैः ॥  
येषा॒मीशै॑ पशु॒पतिः॑ पशू॒नां चतु॑ष्पदा॒मुत च॑ द्वि॒पदाम् ।  
निष्क्री॑तोऽयं य॒ज्ञियं॑ भा॒गमे॑तु रा॒यस्पोषा॑ य॒जमान॑स्य सन्तु ॥  
ये ब॒ध्यमा॑न॒मनु॑ ब॒ध्यमा॑ना अ॒भ्यैक्ष॑न्त॒ मनसा॑ चक्षु॒षा च ।  
अग्नि॑स्ताँ अ॒ग्ने प्र मु॑मोक्तु दे॒वः प्र॒जाप॑तिः प्र॒जया॑ संवि॒दानः ॥  
य आ॑र॒ययाः॑ प॒शवो॑ वि॒श्वरू॑पा वि॒रूपाः॑ सन्तो बहु॒धैकरू॑पाः ।  
वा॒युस्ताँ अ॒ग्ने प्र मु॑मोक्तु दे॒वः प्र॒जाप॑तिः प्र॒जया॑ संवि॒दानः ॥  
प्रमु॒ञ्चमा॑ना भुव॑नस्य॒ रेतो॑ गा॒तुं धत्त॑ य॒जमाना॑य दे॒वाः ।  
उ॒पाकृ॑तँ श॒शमा॑नं यद॒स्थाञ्जी॑वं दे॒वाना॑म॒प्येतु॑ पार्थः ॥  
नाना॑ प्रा॒णो य॒जमान॑स्य प॒शुना॑ य॒ज्ञो दे॒वेभिः॑ स॒ह दे॑व॒यानः॑ ।  
जी॒वं दे॒वाना॑म॒प्येतु॑ पार्थः स॒त्याः सं॒न्तु य॒जमान॑स्य॒ कामाः॑ ॥  
यत्प॒शुर्मा॒युम॑कृ॒तोरौ॑ वा प॒द्भिरा॑हते । अ॒ग्निर्मा॑ तस्मा॒देन॑सो  
विश्वान्मुञ्च॑त्वँहँसः ॥  
शमि॑तार उ॒पेत॑न य॒ज्ञं दे॒वेभिरि॑न्वितम् । पाशा॑त्प॒शुं प्र मु॑ञ्चत  
ब॒न्धाद्य॑ज्ञ॒पतिं॑ परि ॥  
अदि॑तिः पाशं प्र मु॑मोक्त्वे॒तं नमः॑ प॒शुभ्यः॑ पशु॒पत॑ये करोमि ।  
अरा॑ती॒यन्त॑म॒धरं॑ कृ॒णोमि॑ यं द्विष्म॒स्तस्मि॑न्प्रति॒ मुञ्चामि॑ पाशम् ॥  
त्वामु॑ ते द॑धिरे ह॒व्यवा॑हँँ श्रु॒तं क॒र्तारि॑मु॒त य॒ज्ञियं॑ च ।  
अग्ने॑ सद॑क्षः स॒तनु॑र्हि भू॒त्वार्थं॑ ह॒व्या जा॑तवे॒दो जुष॑स्व ॥  
जा॒तवे॒दो व॒पया॑ गच्छ दे॒वान्त्वँ हि॑ होता॒ प्रथ॑मो ब॒भूथ॑ ।  
घृ॒तेन॑ त्वं त॒नुवो॑ वर्ध॒यस्व॒ स्वाहा॑कृतँ ह॒विर॑दन्तु दे॒वाः ॥  
स्वाहा॑ दे॒वेभ्यो॑ दे॒वेभ्यः॑ स्वाहा ॥४॥

प्राजापत्या वै पशवस्तेषां रुद्रोऽधिपतिर्यदेताभ्यामुपाकरोति ताभ्यामेवैनं  
 प्रतिप्रोच्या लभत आत्मनोऽनावस्काय द्वाभ्यामुपाकरोति द्विपाद्यजमानः  
 प्रतिष्ठित्या उपाकृत्य पञ्च जुहोति पाङ्गाः पशवः पशूनेवाव रुन्धे मृत्यवे  
 वा एष नीयते यत्पशुस्तं यदन्वारभेत प्रमारुको यजमानः स्यान्नाना प्राणो  
 यजमानस्य पशुनेत्याह व्यावृत्त्यै यत्पशुर्मारुमकृतेति जुहोति शान्त्यै  
 शमितार उपेतनेत्याह यथायजुरेवैत द्वापायां वा  
 आह्वियमाणायामग्नेर्मेधोऽप क्रामति त्वामु ते दधिरे हव्यवाहमिति  
 वृषामभि जुहोत्यग्नेरेव मेधमव रुन्धेऽथो शृतत्वाय पुरस्तात्स्वाहाकृतयो  
 वा अन्ये देवा उपरिष्ठात्स्वाहाकृतयोऽन्ये स्वाहा देवेभ्यो देवेभ्यः  
 स्वाहेत्यभितौ वृषां जुहोति तानेवोभयान्प्रीणाति ॥५॥

यो वा अयथादेवतं यज्ञमुपचरत्या देवताभ्यो वृश्चयते पापीयान्भवति यो  
 यथादेवतं न देवताभ्य आ वृश्चयते वसीयान्भवत्याग्नेय्यर्चाग्नीध्रमभि  
 मृशेद्वैष्णव्या हविर्धानमाग्नेय्या स्रुचौ वायव्यया वायव्यान्धैन्द्रिया सदो  
 यथादेवतमेव यज्ञमुप चरति न देवताभ्य आ वृश्चयते वसीयान्भवति  
 युनज्मि ते पृथिवीं ज्योतिषा सह युनज्मि वायुमन्तरिक्षेण ते सह युनज्मि  
 वाचं सह सूर्येण ते युनज्मि तिस्रो विपृचः सूर्यस्य ते अग्निर्देवता  
 गायत्री च्छन्द उपांशोः पात्रमसि सोमो देवता त्रिष्टुप्छन्दोऽन्तर्यामस्य  
 पात्रमसीन्द्रो देवता जगती च्छन्द इन्द्रवायुवोः पात्रमसि  
 बृहस्पतिर्देवतानुष्टुप्छन्दो मित्रावरुणयोः पात्रमस्यश्विनौ देवता  
 पङ्क्तिश्छन्दोऽश्विनोः पात्रमसि सूर्यो देवता बृहती च्छन्दः शुक्रस्य पात्रमसि  
 चन्द्रमा देवता सतोबृहती च्छन्दो मन्थिनः पात्रमसि विश्वे देवा  
 देवतोष्णिहा च्छन्द आग्रयणस्य पात्रमसीन्द्रो देवता ककुच्छन्द

उक्थानाम्पात्रमसि पृथिवी देवता विराट्छन्दो ध्रुवस्य पात्रमसि ॥६॥

इष्टर्गो वा अध्वर्युर्यजमानस्येष्टर्गः खलु वै पूर्वोऽर्घुः क्षीयत आसन्त्यान्मा  
मन्त्रात्पाहि कस्याश्चिदभिशस्त्या इति पुरा प्रातरनुवाकाञ्जुहुयादात्मन एव  
तदध्वर्युः पुरस्ताच्छर्म नह्यतेऽनात्यै संवेशाय त्वोपवेशाय त्वा  
गायत्रियास्त्रिष्टुभो जगत्या अभिभूत्यै स्वाहा प्राणापानौ मृत्योर्मा  
पातम्प्राणापानौ मा मा हासिष्टं देवतासु वा एते प्राणापानयोर्व्यार्यच्छन्ते  
येषां सोमः समृच्छते संवेशाय त्वोपवेशाय त्वेत्याह छन्दांसि वै  
संवेश उपवेशश्छन्दोभिरेवास्य छन्दांसि वृङ्क्ते प्रेतिवन्त्याज्यानि  
भवन्त्यभिजित्यै मरुत्वतीः प्रतिपदो विजित्या उभे बृहद्रथन्तरे भवत इयं  
वाव रथन्तरमसौ बृहदाभ्यामेवैनमन्तरैत्यद्य वाव रथन्तरं श्वो  
बृहदद्याश्वादेवैनमन्तरैति भूतं वाव  
रथन्तरम्भविष्यद्बृहद्भूताश्चैवैनम्भविष्यतश्चान्तरैति परिमितं वाव  
रथन्तरमपरिमितम्बृहत्परिमिताश्चैवैनमपरिमिताश्चान्तरैति  
विश्वामित्रजमदग्नी वसिष्ठेनास्पर्धेतां स एतज्जमदग्निर्विहव्यमपश्यतेन वै  
स वसिष्ठस्येन्द्रियं वीर्यमवृङ्क्ते यद्विहव्यं शस्यत इन्द्रियमेव तद्वीर्यं  
यजमानो भ्रातृव्यस्य वृङ्क्ते यस्य भूयांसो यज्ञक्रतव इत्याहुः स देवता  
वृङ्क्ते इति यद्यग्निष्टोमः सोमः पुरस्तात्स्यादुक्थ्यं कुर्वीत यद्युक्थ्यः  
स्यादतिरात्रं कुर्वीत यज्ञक्रतुभिरेवास्य देवता वृङ्क्ते वसीयान्भवति ॥७॥

निग्राभ्याः स्थ देवश्रुत आयुर्मे तर्पयत प्राणम्मै तर्पयतापानम्मै तर्पयत  
व्यानम्मै तर्पयत चक्षुर्मे तर्पयत श्रोत्रंमे तर्पयत मनो मे तर्पयत वाचंमे  
तर्पयतात्मानंमे तर्पयताङ्गानि मे तर्पयत प्रजाम्मै तर्पयत पशून्मै तर्पयत



गृहान्मै तर्पयत गुणान्मै तर्पयत सर्वगणम्मा तर्पयत तर्पयत मा गुणा मे मा  
 वि तृषु न्नोषधयो वै सोमस्य विशो विशः खलु वै राज्ञः प्रदातोरीश्वरा  
 ऐन्द्रः सोमोऽवीवृधं वो मनसा सुजाता ऋतप्रजाता भग इद्रः स्याम ।  
 इन्द्रेण देवीर्वीरुधः संविदाना अनु मन्यन्तां सर्वनाय  
 सोम मित्याहौषधीभ्य एवैनं स्वायै विशः स्वायै देवतायै निर्याच्याभि  
 षुणोति यो वै सोमस्याभिषूयमाणस्य प्रथमोऽशुः स्कन्दति स ईश्वर  
 इन्द्रियं वीर्यम्प्रजाम्पशून्यजमानस्य निर्हन्तोस्तमभि मन्त्रयेता मास्कान्तसह  
 प्रजया सह रायस्पोषेणेन्द्रियम्मे वीर्यम्मा निर्वधीरित्याशिषमेवैतामा  
 शास्त इन्द्रियस्य वीर्यस्य प्रजायै पशूनामनिर्घाताय द्रप्सश्चस्कन्द  
 पृथिवीमनु द्यामिमं च योनिमनु यश्च पूर्वः । तृतीयं योनिमनु संचरन्तं  
 द्रप्सं जुहोम्यनु सप्त होत्राः ॥८॥

यो वै देवान्देवयशसेनार्पयति मनुष्यान्मनुष्ययशसेन देवयशस्यैव देवेषु  
 भवति मनुष्ययशसी मनुष्येषु  
 यान्प्राचीनमाग्रयणाद्ग्रहान्गृहीयात्तानुपांशु  
 गृहीयाद्यानुर्ध्वांस्तानुपब्दिमतौ देवानेव तद्देवयशसेनार्पयति  
 मनुष्यान्मनुष्ययशसेन देवयशस्यैव देवेषु भवति मनुष्ययशसी  
 मनुष्येष्वग्निः प्रातःसवने पात्वस्मान्वैश्वानरो महिना विश्वशम्भूः । स  
 नः पावको द्रविणं दधात्वार्युष्मन्तः सहभक्षाः स्याम ॥ विश्वे देवा मरुत  
 इन्द्रो अस्मान्स्मिन्द्रितीये सर्वने न जह्युः । आर्युष्मन्तः प्रियमेषां वदन्तो  
 वयं देवानां सुमतौ स्याम ॥  
 इदं तृतीयं सर्वनं कवीनामृतेन ये चमसमैरयन्त । ते सौधन्वनाः  
 सुवरानशानाः स्वष्टिं नो अभि वसीयो नयन्तु ॥

आय॑त॒नवती॑र्वा अन्या आ॒हु॒तयो हू॒यन्तै॑ऽनाय॒त॒ना अन्या या आ॒धारव॑ती॒स्ता  
 आय॑त॒नवती॑र्याः सौ॒म्यास्ता अ॒नाय॒त॒ना  
 ऐ॒न्द्रवा॒य॒वमा॒दाया॑घा॒रमा॑घा॒रये॑दध्व॒रो य॒ज्ञोऽय॑मस्तु दे॒वा ओष॑धीभ्यः  
 प॒शवै॑ नो जना॒य विश्व॑स्मै भू॒ताया॑ध्व॒रोऽसि॑ स पि॒न्वस्व॑ घृ॒तव॑दे॒व सोमे॑ति  
 सौ॒म्या ए॒व तदा॑हु॒तीरा॒य॒त॒नवतीः॑ करो॒त्या॒य॒त॒नवा॑न्भवति॒ य ए॒वं वेदा॑थो  
 द्यावा॑पृथि॒वी ए॒व घृ॒तेन॑ व्यु॒न॒त्ति॒ ते व्यु॑त्ते उपजीव॒नीयै॑ भवत  
 उपजीव॒नीयौ॑ भवति॒ य ए॒वं वेदै॑ष ते रु॒द्र भा॒गो यं नि॒रया॑चथास्तं  
 जु॒षस्व॑ वि॒देगौ॑प॒त्यँ रा॒य॒स्पोष॑ँ सु॒वीर्यँ॑ संवत्स॒रीणाँ॑ स्व॒स्तिम्  
 ॥

मनुः पु॒त्रेभ्यो॑ दा॒यं व्य॑भज॒त्स नाभा॑नेदि॒ष्ठम्ब्र॑ह्मच॒र्यं वस॑न्तं निर॑भज॒त्स  
 आ॒गच्छ॑त्सोऽब्र॒वीत्क॒था मा॒ निर॑भा॒गिति॑ न त्वा  
 निर॑भा॒क्षमि॒त्यब्र॑वी॒ दङ्गि॑रस इ॒मे स॒त्तमा॑सते ते सु॒वर्गं॑ लो॒कं न प्र॑ जा॒नन्ति॑  
 तेभ्य॑ इ॒दम्ब्रा॑ह्मण॒म्ब्रूहि॑ ते सु॒वर्गं॑ लो॒कम्य॑न्तो य ए॒षाम्प॒शव॑स्ताँस्ते  
 दा॒स्य॒न्तीति॑ तदै॒भ्योऽब्र॑वी॒त्ते सु॒वर्गं॑ लो॒कं य॑न्तो य ए॒षाम्प॒शव॑  
 आ॒स॒न्तान॑स्मा अ॒ददु॑ स्तम्प॒शुभि॑श्चर॑न्तं यज्ञ॒वास्तौ॑ रु॒द्र  
 आ॒गच्छ॑त्सोऽब्र॒वीन्म॑ वा इ॒मे प॒शव॑ इत्यदु॒र्वै म॒ह्यमि॑मानि॒त्यर॑वी॒न्न वै  
 तस्य॑ त ई॒शत॑ इत्य॒ब्रवी॑द्यद्यज्ञ॒वास्तौ॑ ही॒र्यते॑ म॒म वै तदि॑ति॒ तस्मा॑द्यज्ञ॒वास्तु॑  
 नाभ्य॑वेत्यँ सौऽब्र॒वीद्य॑ज्ञे मा भ॒जार्थं॑ ते प॒शून्ना॑भि मँस्य॒ इति॑ तस्मा॑  
 ए॒तम्म॒न्थिनः॑ सँस्रा॒वम॑जुहो॒त्ततो॑ वै तस्य॑ रु॒द्रः प॒शून्ना॑भ्यम॒न्यत॑ यत्रै॒तमे॒वं  
 वि॒द्वान्म॒न्थिनः॑ सँस्रा॒वं जु॑होति॒ न तत्र॑ रु॒द्रः प॒शून्ना॑भि म॒न्यते ॥६॥

जुष्टो वा॒चो भू॑यासं जुष्टो वा॒चस्प॑तये दे॒वि वाक् । यद्वा॒चो  
 मधु॑मत्तस्मिन्मा ध्वाः स्वाहा सर॑स्वत्यै ॥

ऋचा स्तोमं॑ समर्धय गायत्रेण॑ रथं॒तरम् । बृहद्गायत्रवर्तनि ॥  
 यस्तै॑ द्रप्स स्कन्दति॒ यस्तै॑ अ॒शुर्बाहुच्युतो॑ धिषण॑योरुपस्थात् ।  
 अध्व॒र्योर्वा॑ परि॒ यस्तै॑ प॒वित्रा॒त्स्वाहा॑कृतमिन्द्राय॒ तं जु॑होमि ॥  
 यो द्रप्सो अ॒शुः प॑तितः पृथि॒व्याम्परि॒वापात्पु॑रोडाशात्कर॒म्भात् ।  
 धाना॒सोमान्म॒न्थिनं॑ इन्द्र शु॒क्रात्स्वाहा॑कृतमिन्द्राय॒ तं जु॑होमि ॥  
 यस्तै॑ द्रप्सो मधु॒मा॑ इन्द्रियावा॒न्त्स्वाहा॑कृतः पुन॑रप्येति॒ देवान् । दि॒वः  
 पृथि॒व्याः पर्य॑न्तरि॒क्षात्स्वाहा॑कृतमिन्द्राय॒ तं जु॑होमि ॥  
 अध्व॒र्युर्वा॑ ऋ॒त्विजाम्प्रथ॑मो यु॒ज्यते॒ तेन॒ स्तोमो॑ योक्त॒व्य इत्याहु॑र्वाग॒ग्रेगा  
 अग्रं॑ ए॒त्वृजु॒गा दे॒वेभ्यो॑ यशो॒ मयि॑ दध॒ती प्रा॒णान्प॒शुषु॑ प्र॒जाम्मयि॑ च  
 यज॑माने॒ चेत्या॑ह॒ वाच॑मे॒व तद्यज्ञ॑मुखे यु॒नक्ति॑ वास्तु॒ वा ए॒तद्यज्ञ॑स्य॒ क्रियते॑  
 यद्ग्र॑हान्गृही॒त्वा ब॑हिष्पव॒मानं॑ सर्प॒न्ति परा॑ञ्चो॒ हि यन्ति॑ परा॒चीभिः  
 स्तुव॑तै॒ वैष्ण॑व्यर्चा पु॒नरे॒त्योप॑ तिष्ठते॒ यज्ञो॑ वै विष्णु॒र्यज्ञमे॒वाक॑ विष्णो॒ त्वं  
 नो॒ अन्त॑मः शर्म॒ यच्छ॑ सहन्त्य । प्र॒ ते धारा॑ मधु॒श्रुत॑ उत्सं॒ दुह॑ते  
 अक्षि॑त॒ मित्या॑ह॒ यदे॒वास्य॑ शया॒नस्यो॑प॒शुष्य॑ति॒ तदे॒वास्यै॑तेनाप्या॒ययति॑  
 ॥१०॥

अग्नि॑ना॒ रयि॑र्म॒श्नव॒त्पोष॑मे॒व दि॒वेदि॑वे । य॒शसं॑ वी॒रव॑त्तमम् ॥  
 गोमा॑ अ॒ग्नेऽवि॑मा॒ अश्वी॑ य॒ज्ञो नृ॒वत्स॑खा॒ सद॑मिद॒प्रमृ॑ष्यः । इडा॑वा॒  
 एषो॑ अ॒सुर॑ प्र॒जावा॑न्दी॒र्घो र॒यिः पृथु॑बु॒धः स॒भावान् ॥  
 आ॒ प्या॑यस्व॒ सं तै॑ ॥  
 इह॑ त्वष्टा॒रम॑ग्रि॒यं वि॒श्वरू॑पमु॒प ह॒ये । अ॒स्माक॑मस्तु॒ केवलः॑ ॥  
 तन्न॑स्तुरी॒पम॑र्धं पोषयि॒तु दे॒वं त्वष्ट॑र्वि॒ररा॑णः॒ स्यस्व॑ । यतो॑ वी॒रः

कर्मण्यः सुदक्षो युक्तग्रावा जायते देवकामः ॥  
 शिवस्त्वष्टरिहा गंहि विभुः पोष उत त्मना । यज्ञेयज्ञे न उदव ॥  
 पिशंगरूपः सुभरो वयोधाः श्रुष्टी वीरो जायते देवकामः । प्रजां त्वष्टा  
 वि ष्यतु नाभिमस्मे अथा देवानामप्येतु पार्थः ॥  
 प्र णो देव्या नो दिवः ॥  
 पीपिवाँसुँ सरस्वतः स्तनं यो विश्वदर्शतः । धुक्षीमहि प्रजामिषं ॥  
 ये ते सरस्व ऊर्मयो मधुमन्तो घृतश्चुतः । तेषां ते सुम्रमीमहे ॥  
 यस्य व्रतम्पशवो यन्ति सर्वे यस्य व्रतमुपतिष्ठन्त आपः । यस्य व्रते  
 पुष्टिपतिर्निविष्टस्तँ सरस्वन्तमवसे हुवेम ॥  
 दिव्यँ सुपर्णं वयसम्बृहन्तमपां गर्भं वृषभमोषधीनाम् । अभीपतो  
 वृष्ट्या तर्पयन्तं तँ सरस्वन्तमवसे हुवेम ॥  
 सिनीवालि पृथुष्टुके या देवानामसि स्वसा । जुषस्व हव्यमाहुतम्प्रजां  
 देवि दिदिङ्घि नः ॥  
 या सुपाणिः स्वङ्गुरिः सुषूमा बहुसूवरी । तस्यै विश्वत्रियै हविः  
 सिनीवाल्यै जुहोतन ॥  
 इन्द्रं वो विश्वतस्परीन्द्रं नरः ॥  
 असितवर्णा हरयः सुपर्णा मिहो वसाना दिवमुत्पतन्ति । त  
 आर्ववृत्रन्त्सदनानि कृत्वादित्पृथिवी घृतैर्व्युद्यते ॥  
 हिरण्यकेशो रजसो विसारेऽहिर्धुनिर्वार्त इव ध्रजीमान् । शुचिभ्राजा  
 उषसो नवेदा यशस्वतीरपस्युवो न सत्याः ॥  
 आ ते सुपर्णा अमिनन्त एवैः कृष्णो नौनाव वृषभो यदीदम् । शिवाभिर्न  
 स्मर्यमानाभिरागात्पतन्ति मिहः स्तनयन्त्यभ्रा ॥  
 वाश्रेव विद्युन्मिमाति वृत्सं न माता सिषक्ति । यदैषां वृष्टिरसर्जि ॥

पर्वतश्चिन्महिं वृद्धो बिभाय दिवश्चित्सानुं रेजत स्वने वः । यत्क्रीडथ  
 मरुतः ऋष्टिमन्तु आप इव सध्रियञ्चो धवध्वे ॥  
 अभि क्रन्द स्तनय गर्भमा धा उदन्वता परि दीया रथेन । दृतिं सु कर्ष  
 विषितं न्यञ्चं समा भवन्तूद्वता निपादाः ॥  
 त्वं त्या चिदच्युताग्रै पशुर्न यवसे । धामा ह यत्तै अजर वना वृश्चन्ति  
 शिक्वसः ॥  
 अग्ने भूरीणि तव जातवेदो देव स्वधावोऽमृतस्य धाम । याश्च  
 माया मायिनां विश्वमिन्व त्वे पूर्वीः संदधुः पृष्टबन्धो ॥  
 दिवो नो वृष्टिर्मरुतो ररीध्वम्प पिन्वत वृष्णो अश्वस्य धाराः । अर्वाङ्ङितेन  
 स्तनयिब्रुतेह्यपो निषिञ्चन्नसुरः पिता नः ॥  
 पिन्वन्त्यपो मरुतः सुदानवः पयो घृतवद्विदथैष्वाभुवः । अत्यं न मिहे  
 वि नयन्ति वाजिनमुत्सं दुहन्ति स्तनयन्तमक्षितम् ॥  
 उदप्रुतो मरुतस्तां इयर्त वृष्टिं ये विश्वै मरुतो जुनन्ति । क्रोशाति गर्दा  
 कन्यैव तुन्ना पेरुं तुञ्जाना पत्यैव जाया ॥  
 घृतेन द्यावापृथिवी मधुना समुक्षत पयस्वतीः कृणुताप ओषधीः । ऊर्ज  
 च तत्र सुमतिं च पिन्वथ यत्रा नरो मरुतः सिञ्चथा मधु ॥  
 उदु त्यं चित्रम् ॥  
 और्वभृगुवच्छुचिमप्रवानवदा हुवे । अग्निं समुद्रवाससम् ॥  
 आ सव संवितुर्यथा भगस्येव भुजिं हुवे । अग्निं समुद्रवाससम् ॥  
 हुवे वातस्वनं कविम्पर्जन्यक्रन्द्यं सहः । अग्निं समुद्रवाससम् ॥११॥

इति तृतीयकारण्डे प्रथमः प्रपाठकः १

अथ तृतीयकारण्डे द्वितीयः प्रपाठकः २

यो वै पर्वमानानामन्वारोहान्विद्वान्यजृतेऽनु पर्वमानाना रौहति न  
 पर्वमानेभ्योऽव च्छिद्यते श्येनोऽसि गायत्रच्छन्दा अनु त्वारंभे स्वस्ति मा  
 सं पारय सुपर्णोऽसि त्रिष्टुच्छन्दा अनु त्वारंभे स्वस्ति मा सं पारय सघासि  
 जगतीच्छन्दा अनु त्वारंभे स्वस्ति मा सं पारयेत्याहै ते वै  
 पर्वमानानामन्वारोहास्तान्य एवं विद्वान्यजृतेऽनु पर्वमानाना रौहति न  
 पर्वमानेभ्योऽव च्छिद्यते यो वै पर्वमानस्य सन्ततिं वेद सर्वमायुरेति न  
 पुरायुषः प्र मीयते पशुमान्भवति विन्दते प्रजां पर्वमानस्य ग्रहा गृह्यन्तेऽथ  
 वा अस्यैतेऽगृहीता द्रोणकलश आधवनीयः  
 पूतभृत्तान्यदगृहीत्वोपाकुर्यात्पर्वमानं वि च्छिन्द्यात्तं विच्छिद्यमानमध्वर्योः  
 प्राणोऽनु वि च्छिद्येतो पयामगृहीतोऽसि प्रजापतये त्वेति द्रोणकलशमभि  
 मृशेदिन्द्राय त्वेत्याधवनीयं विश्वेभ्यस्त्वा देवेभ्य इति पूतभृतं पर्वमानमेव  
 तत्सं तनोति सर्वमायुरेति न पुरायुषः प्र मीयते पशुमान्भवति विन्दते  
 प्रजाम् ॥१॥

त्रीणि वाव सर्वनान्यथ तृतीयं सर्वनमव लुम्पन्त्यनंशु कुर्वन्त  
 उपांशुं हुत्वोपांशुपात्रेऽशुमवास्य तं तृतीयसर्वनैऽपिसृज्याभि  
 षुणुयाद्यदाप्याययति तेनांशुमद्यदभिषुणोति तेनर्जीषि सर्वाण्येव  
 तत्सर्वनान्यंशुमन्ति शुक्रवन्ति समावद्वीर्याणि करोति द्वौ समुद्रौ  
 विततावजूर्यौ पर्यावर्तेते जठरैव पादाः ।  
 तयोः पश्यन्तो अति यन्त्यन्यमपश्यन्तः सेतुनाति यन्त्यन्यम् ॥  
 द्वे द्रधसी सतती वस्त एकः केशी विश्वा भुवनानि विद्वान् ।  
 तिरोधायैत्यसितं वसानः शुक्रमा दत्ते अनुहाय जार्यै ॥  
 देवा वै यद्यज्ञेऽकुर्वत तदसुरा अकुर्वत ते देवा एतं

महायज्ञमपश्यन्तमन्वताग्निहोत्रं व्रतमकुर्वत् तस्माद्द्विव्रतः  
स्याद्द्विहोत्रं जुहति पौर्णमासं यज्ञमग्नीषोमीयं पशुमकुर्वत् दार्श्यं  
यज्ञमाग्नेयं पशुमकुर्वत् वैश्वदेवं प्रातःसवनमकुर्वत्  
वरुणप्रघासान्माध्यन्दिनं सवनं साकमेधान्पितृयज्ञं  
त्र्यम्बकांस्तृतीयसवनमकुर्वत् तमेषामसुरा यज्ञमन्ववाजिगांसन्तं  
नान्ववायन्तैऽब्रुवन्नध्वर्तव्या वा इमे देवा अभूवन्निति तदध्वरस्याध्वरत्वं  
ततो देवा अभूवन्परासुरा य एवं विद्वान्तसोमैः यजते भवत्यात्मना परास्य  
भ्रातृव्यो भवति ॥२॥

परिभूरग्निं परिभूरिन्द्रं परिभूर्विश्वान्देवान्परिभूर्मांसं सह ब्रह्मवर्चसेन स नः  
पवस्व शं गवे शं जनाय शमवर्ते शं राजन्नोषधीभ्योऽच्छिन्नस्य ते  
रयिपते सुवीर्यस्य रायस्पोषस्य ददितारः स्याम ।  
तस्य मे रास्व तस्य ते भक्षीय तस्य त इदमुन्मृजे ॥

प्राणाय मे वर्चोदा वर्चसे पवस्वा प्राणाय व्यानाय वाचे दक्षक्रतुभ्यां  
चक्षुभ्यां मे वर्चोदौ वर्चसे पवेथां श्रोत्रायात्मनेऽङ्गैभ्य आयुषे वीर्याय  
विष्णो रिन्द्रस्य विश्वेषां देवानां जठरमसि वर्चोदा मे वर्चसे पवस्व  
कौऽसि को नाम कस्मै त्वा कायं त्वा यं त्वा सोमेनातीतृपं यं त्वा  
सोमेनामीमदं सुप्रजाः प्रजया भूयासं सुवीरौ वीरैः सुवर्चा वर्चसा  
सुपोषः पोषैर्विश्वेभ्यो मे रूपेभ्यो वर्चोदा वर्चसे पवस्व तस्य मे रास्व  
तस्य ते भक्षीय तस्य त इदमुन्मृजे ॥

बुभूषन्नवैक्षेतैष वै पात्रियः प्रजापतिर्यज्ञः प्रजापतिस्तमेव तर्पयति स एनं  
तृप्तो भूत्याभि पवते ब्रह्मवर्चसकामोऽवैक्षेतैष वै पात्रियः प्रजापतिर्यज्ञः  
प्रजापतिस्तमेव तर्पयति स एनं तृप्तो ब्रह्मवर्चसेनाभि पवत

आमयाव्यवैक्षेतेष वै पात्रियः प्रजापतिर्यज्ञः प्रजापतिस्तमेव तर्पयति स  
 एनं तृप्त आयुषाभि पवतेऽभिचरन्नवैक्षेतेष वै पात्रियः प्रजापतिर्यज्ञः  
 प्रजापतिस्तमेव तर्पयति स एनं तृप्तः प्राणापानाभ्यां वाचो दक्षक्रतुभ्यां  
 चक्षुर्भ्यां श्रोत्राभ्यामात्मनोऽङ्गैर्भ्य आयुषोऽन्तरैति ताजक्प्र धन्वति ॥३॥

स्फ्यः स्वस्तिर्विघ्नः स्वस्तिः पर्शुर्वेदिः पर्शुर्नः स्वस्तिः ।  
 यज्ञिया यज्ञकृतः स्थ ते मास्मिन्यज्ञ उप ह्यध्वमुप मा द्यावापृथिवी  
 ह्येता मुपास्तावः कलशः सोमो अग्निरुप देवा उप यज्ञ उप मा होत्रा  
 उपह्वे ह्यन्तां नमोऽग्रये मखघ्ने मखस्य मा यशोऽर्यादित्याहवनीयमुप  
 तिष्ठते यज्ञो वै मखो यज्ञं वाव स तदहन्तस्मा एव नमस्कृत्य सदः प्र  
 सर्पत्यात्मनोऽनात्यै नमो रुद्राय मखघ्ने नमस्कृत्या मा पाहीत्याग्नीध्रं तस्मा  
 एव नमस्कृत्य सदः प्र सर्पत्यात्मनोऽनात्यै नम इन्द्राय मखघ्न इन्द्रियं मे  
 वीर्यं मा निर्वधीरिति होत्रीयमाशिषमेवैतामा शास्त इन्द्रियस्य  
 वीर्यस्यानिर्घाताय या वै देवताः सदस्यार्तिमार्पयन्ति यस्ता  
 विद्वान्प्रसर्पति न सदस्यार्तिमाच्छति नमोऽग्रये मखघ्न इत्याहैता वै  
 देवताः सदस्यार्तिमार्पयन्ति ता य एवं विद्वान्प्रसर्पति न  
 सदस्यार्तिमाच्छति दृढे स्थः शिथिरे समीची मा हंसपातु सूर्यो मा  
 देवो दिव्याद हंसपातु वायुरन्तरिक्षादग्निः पृथिव्या यमः पितृभ्यः  
 सरस्वती मनुष्येभ्यो देवीं द्वारौ मा मा सं तां नमः सदसे नमः  
 सदसस्पतये नमः सखीनां पुरोगाणां चक्षुषे नमो दिवे नमः पृथिव्या अहै  
 दैधिष्व्योदतस्तिष्ठान्यस्य सदने सीद् योऽस्मत्पाकतर उन्नित उदुद्वतश्च  
 गेषं पातं मा द्यावापृथिवी अद्याहः सदो वै प्रसर्पन्तं पितरोऽनु प्र सर्पन्ति  
 त एनमीश्वरा हि संसितोः सदः प्रसृप्य दक्षिणार्धं परेक्षेतागन्त पितरः



पितृमानुहं युष्माभिर्भूयासँ सुप्रजसो मया यूयं भूयास्तेति तेभ्य एव  
नमस्कृत्य सदः प्र सर्पत्यात्मनोऽनात्त्यै ॥४॥

भक्षेहि मा विश दीर्घायुत्वाय शन्तनुत्वाय रायस्पोषाय वर्चसे  
सुप्रजास्त्वायेहि वसो पुरोवसो प्रियो मे हृदोऽस्य श्विनोस्त्वा बाहुभ्याँ  
सध्यासं नृचक्षसं त्वा देव सोम सुचक्षा अर्व ख्येषं मन्द्राभिभूतिः  
केतुर्यज्ञानां वाग्जुषाणा सोमस्य तृप्यतु मन्द्रा स्वर्वाच्यदितिरनाहतशीर्ष्णी  
वाग्जुषाणा सोमस्य तृप्यत्वेहि वश्वचर्षणे शम्भूर्मयोभूः स्वस्ति मा  
हरिवर्णं प्र चर क्रत्वे दक्षाय रायस्पोषाय सुवीरतायै मा मा राजन्वि  
बीभिषो मा मे हार्दि त्विषा वधीः । वृषणे शुष्मायार्युषे वर्चसे ॥  
वसुमद्गणस्य सोम देव ते मतिविदः प्रातःसवनस्य गायत्रच्छन्द स  
इन्द्रपीतस्य नराशँसपीतस्य पितृपीतस्य मधुमत उपहृतस्योपहृतो  
भक्षयामि रुद्रवद्गणस्य सोम देव ते मतिविदो माध्यन्दिनस्य सवनस्य  
त्रिष्टुच्छन्दस इन्द्रपीतस्य नराशँसपीतस्य पितृपीतस्य मधुमत  
उपहृतस्योपहृतो भक्षयाम्या दित्यवद्गणस्य सोम देव ते  
मतिविदस्तृतीयस्य सवनस्य जगतीच्छन्दस इन्द्रपीतस्य नराशँसपीतस्य  
पितृपीतस्य मधुमत उपहृतस्योपहृतो भक्षयामि ॥  
आ प्यायस्व समेतु ते विश्वतः सोम वृष्णायम् । भवा वाजस्य सङ्गथे ॥  
हिन्वं मे गात्रा हरिवो गणान्मे मा वि तीतृषः । शिवो मे सप्तर्षीनुप  
तिष्ठस्व मा मेवाङ्नाभिमति गाः ॥  
अपाम् सोमममृता अभूमादशर्म ज्योतिरविदाम देवान् ।  
किमस्मान्कृणवदरातिः किमु धूर्तिरमृत मर्त्यस्य ॥  
यन्म आत्मनो मिन्दाभूद्गिस्तत्पुनराहार्जातवैदा विचर्षणिः ।

पुनरग्निश्चक्षुरदात्पुनरिन्द्रो बृहस्पतिः ।  
 पुनर्मे अश्विना युवं चक्षुरा धत्तमद्योः ॥  
 इष्टयजुषस्ते देव सोम स्तुतस्तौमस्य शस्तोक्थस्य हरिवत् इन्द्रपीतस्य  
 मधुमत उपहूतस्योपहूतो भक्षयामि ॥  
 आपूर्याः स्था मां पूरयत प्रजयां च धनेन च ॥  
 एतत्तै तत् ये च त्वामन्वे तत्तै पितामह प्रपितामह ये च त्वामन्व त्रं  
 पितरो यथाभागं मन्दध्वं नमो वः पितरो रसाय नमो वः पितरः शुष्माय  
 नमो वः पितरो जीवाय नमो वः पितरः स्वधायै नमो वः पितरो मन्यवे  
 नमो वः पितरो घोराय पितरो नमो वो य एतस्मिँल्लोके स्थ  
 युष्माँस्तेऽनु यैऽस्मिँल्लोके मां तेऽनु य एतस्मिँल्लोके स्थ यूयं तेषां  
 वसिष्ठा भूयास्त यैऽस्मिँल्लोकैऽहं तेषां वसिष्ठो भूयासं प्रजापते न  
 त्वदेतान्यन्यो विश्वां जातानि परि ता बभूव यत्कामास्ते जुहुमस्तन्नो अस्तु  
 वयँ स्याम् पतयो रयीणाम् ॥  
 देवकृतस्यैनसोऽवयर्जनमसि मनुष्यकृतस्यैनसोऽवयर्जनमसि  
 पितृकृतस्यैनसोऽवयर्जनमस्य प्सु धौतस्य सोम देव ते नृभिः  
 सुतस्येष्टयजुषः स्तुतस्तौमस्य शस्तोक्थस्य यो भक्षो अश्वसनिर्यो  
 गोसनिस्तस्य ते पितृभिर्भक्षकृतस्योपहूतस्योपहूतो भक्षयामि ॥५॥

महीनां पयोऽसि विश्वेषां देवानां तनूर्त्रुध्यासमद्य पृषतीनां ग्रहं पृषतीनां  
 ग्रहोऽसि विष्णोर्हृदयमस्येकमिष विष्णुस्त्वानु वि चक्रमे भूतिर्द्वा घृतेन  
 वर्धतां तस्य मेष्टस्य वीतस्य द्रविणमा गम्याञ्ज्योतिरसि वैश्वानरं पृश्निन्यै  
 दुग्धं यावती द्यावापृथिवी महित्वा यावच्च सप्त सिन्धवो वितस्थुः ।  
 तार्वन्तमिन्द्र ते ग्रहँ स्रहोर्जा गृह्णाम्यस्तृतम् ॥

यत्कृष्णशकुनः पृषदाज्यमवमृशेच्छूद्रा अस्य प्रमायुकाः  
 स्युर्यच्छ्वावमृशेच्चतुष्पादोऽस्य पशवः प्रमायुकाः स्युर्यत्स्कन्देद्यजमानः  
 प्रमायुकः स्यात्पशवो वै पृषदाज्यं पशवो वा एतस्य स्कन्दन्ति यस्य  
 पृषदाज्यं स्कन्दति यत्पृषदाज्यं पुनर्गृह्णाति पशूनेवास्मै पुनर्गृह्णाति प्राणो  
 वै पृषदाज्यं प्राणो वा एतस्य स्कन्दति यस्य पृषदाज्यं स्कन्दति  
 यत्पृषदाज्यं पुनर्गृह्णाति प्राणमेवास्मै पुनर्गृह्णाति हिरण्यमवधाय  
 गृह्णात्यमृतं वै हिरण्यं प्राणः पृषदाज्यममृतमेवास्य प्राणे दधाति शतमानं  
 भवति शतायुः पुरुषः शतेन्द्रिय आयुष्येवेन्द्रिये प्रति तिष्ठत्यश्वमव  
 घ्रापयति प्राजापत्यो वा अश्वः प्राजापत्यः प्राणः स्वादेवास्मै योनैः प्राणं  
 निर्मिमीते वि वा एतस्य यज्ञशिष्ठेद्यते यस्य पृषदाज्यं स्कन्दति  
 वैष्णव्यर्चा पुनर्गृह्णाति यज्ञो वै विष्णुर्यज्ञेनैव यज्ञं सं तनोति ॥६॥

देवं सवितरेतत्ते प्राहु तत्प्र च सुव प्र च यज्ञ बृहस्पतिर्ब्रह्मायुष्मत्या ऋचो  
 मा गात तनूपात्साम्नः सत्या व आशिषः सन्तु सत्या आकूतय ऋतं च  
 सत्यं च वदत स्तुत देवस्य सवितुः प्रसवे स्तुतस्य स्तुतमस्यूर्जं मह्यं  
 स्तुतं दुहामा मा स्तुतस्य स्तुतं गम्याच्छस्त्रस्य शस्त्रमस्यूर्जं मह्यं शस्त्रं  
 दुहामा मा शस्त्रस्य शस्त्रं गम्यादिन्द्रियावन्तो वनामहे धुक्षीमहि  
 प्रजामिषम् ॥

सा मे सत्याशीर्देवेषु भूयाद्ब्रह्मवर्चसं मागम्यात् ॥

यज्ञो बभूव स आ बभूव स प्र जज्ञे स वावृधे ।

स देवानामधिपतिर्बभूव सो अस्मां अधिपतीन्करोतु वयं स्याम पतयो  
रयीणाम् ॥

यज्ञो वा वै यज्ञपतिं दुहे यज्ञपतिर्वा यज्ञं दुहे स यः

स्तुतशस्त्रयोर्दोहमविद्वान्यजते तं यज्ञो दुहे स इष्ट्वा पापीयान्भवति य  
 एनयोर्दोहं विद्वान्यजते स यज्ञं दुहे स इष्ट्वा वसीयान्भवति स्तुतस्य  
 स्तुतमस्यूजं मह्यं स्तुतं दुहामा मां स्तुतस्य स्तुतं गम्याच्छस्त्रम्यं  
 शस्त्रमस्यूजं मह्यं शस्त्रं दुहामा मां शस्त्रस्य शस्त्रं गम्यादित्याहैष वै  
 स्तुतशस्त्रयोर्दोहस्तं य एवं विद्वान्यजते दुह एव यज्ञमिष्ट्वा वसीयान्भवति  
 ॥७॥

श्येनाय पत्वने स्वाहा वट्स्वयमभिगूर्ताय नमो विष्टम्भाय धर्मणे स्वाहा  
 वट्स्वयमभिगूर्ताय नमः परिधये जनप्रथनाय स्वाहा वट्स्वयमभिगूर्ताय  
 नम ऊर्जे होत्राणां स्वाहा वट्स्वयमभिगूर्ताय नमः पर्यसे होत्राणां  
 स्वाहा वट्स्वयमभिगूर्ताय नमः प्रजापतये मनवे स्वाहा  
 वट्स्वयमभिगूर्ताय नम ऋतमृतापाः सुवर्वाट्स्वाहा वट्स्वयमभिगूर्ताय  
 नम स्तृम्पन्तां होत्रा मधोर्घृतस्य यज्ञपतिमृषय एनसाहुः प्रजा निर्भक्ता  
 अनुतप्यमाना मध्व्यौ स्तोकावप तौ रराध सं नस्ताभ्यां सृजतु  
 विश्वकर्मा घोरा ऋषयो नमो अस्त्वेभ्यः ।  
 चक्षुष एषां मनसश्च सन्धौ बृहस्पतये महि षद्युमन्नमः ।  
 नमो विश्वकर्मणे स उं पात्वस्माननन्यान्त्सोमपान्मन्यमानः ।  
 प्राणस्य विद्वान्त्सामरे न धीर एनश्चकृवान्महि बद्ध एषाम् ॥  
 तं विश्वकर्मन्प्र मुञ्चा स्वस्तये ये भक्षयन्तो न वसून्यानृहुः ।  
 यानग्रयोऽन्वतप्यन्त धिष्ण्या इयं तेषामवया दुरिष्ट्यै स्विष्टिं नस्तां  
 कृणोतु विश्वकर्मा ॥  
 नमः पितृभ्यो ऋभि ये नो अख्यन्यज्ञकृतौ यज्ञकामाः सुदेवा अकामा वो  
 दक्षिणां न नीनिम् मा नस्तस्मादेनसः पापयिष्ट ।

यावन्तो वै सदस्यास्ते सर्वे दक्षिण्यास्तेभ्यो यो दक्षिणां न नयेदैभ्यो  
 वृश्चयेत् यद्वैश्वकर्मणानि जुहोति सदस्यानेव तत्प्रीणात्यस्मे देवासो वपुषे  
 चिकित्सत् यमाशिरा दम्पती वाममश्नुतः ।  
 पुमान्पुत्रो जायते विन्दते वस्वथ विश्वे अरपा एधते गृहः ॥  
 आशीर्दाया दम्पती वाममश्नुतामरिष्टो रायः सचताँ समोकसा ।  
 य आसिचत्सदुग्धं कुम्भ्या सहेष्टेन यामन्नमतिं जहातु सः ॥  
 सर्पिर्ग्रीवी पीवर्यस्य जाया पीवानः पुत्रा अकृशासो अस्य ।  
 सहजानिर्यः सुमखस्यमान् इन्द्रायाशिरँँ सह कुम्भ्यादात् ॥  
 आशीर्म ऊर्जमुत सुप्रजास्त्वमिषं दधातु द्रविणँँ सर्वर्चसम् ।  
 सञ्जयन्क्षेत्राणि सहसाहमिन्द्र कृणवानो अन्याँँ अधरान्तसपत्नान् ॥  
 भूतमसि भूते मां धा मुखमसि मुखं भूयासं द्यावापृथिवीभ्यां त्वा परि  
 गृह्णामि विश्वे त्वा देवा वैश्वानराः प्र च्यावयन्तु दिवि देवान्दँँहान्तरिक्षे  
 वयाँँसि पृथिव्यां पार्थिवान्ध्रुवं ध्रुवेण हविषाव सोमं नयामसि । यथा  
 नः सर्वमिज्जगदयत्नमँँ सुमना असत् ॥  
 यथा न इन्द्र इद्विशः केवलीः सर्वाः समनसः करत् ।  
 यथा नः सर्वा इद्विशोऽस्माकं केवलीरसन् ॥८॥

यद्वै होताध्वर्युमभ्याह्वयते वज्रमेनमभि प्र वर्तयत्युक्थशा इत्याह  
 प्रातःसवनं प्रतिगीर्य त्रीण्येतान्यक्षराणि त्रिपदा गायत्री गायत्रं प्रातःसवनं  
 गायत्रियैव प्रातःसवने वज्रमन्तर्धत्त उक्थं वाचीत्याह माध्यन्दिनँँ सवनं  
 प्रतिगीर्य चत्वार्येतान्यक्षराणि चतुष्पदा त्रिष्टुप्त्रैष्टुभं माध्यन्दिनँँ सवनं  
 त्रिष्टुभैव माध्यन्दिने सवने वज्रमन्तर्धत्त उक्थं वाचीन्द्रायेत्याह  
 तृतीयसवनं प्रतिगीर्य सप्तैतान्यक्षराणि सप्तपदा शक्वरी शाक्वरो वज्रो

वज्रैशैव तृतीयसवने वज्रमन्तर्धत्ते ब्रह्मवादिनो वदन्ति स त्वा अर्ध्वर्युः  
स्याद्यो यथासवनं प्रतिगरे छन्दांसि सम्पादयेत्तेजः प्रातःसवन  
आत्मन्दधीतेन्द्रियं माध्यन्दिने सवने पशूँस्तृतीयसवन इत्युक्थशा  
इत्याह प्रातःसवनं प्रतिगीर्य त्रीण्येतान्यक्षराणि त्रिपदा गायत्री गायत्रं  
प्रातःसवनं प्रातःसवन एव प्रतिगरे छन्दांसि सं पादयत्यथो तेजो वै  
गायत्री तेजः प्रातःसवनं तेज एव प्रातःसवन आत्मन्धत्त उक्थं  
वाचीत्याह माध्यन्दिनं सवनं प्रतिगीर्य चत्वार्येतान्यक्षराणि चतुष्पदा  
त्रिष्टुष्टुष्टुं माध्यन्दिनं सवनं माध्यन्दिन एव सवने प्रतिगरे छन्दांसि  
सं पादयत्यथो इन्द्रियं वै त्रिष्टुगिन्द्रियं माध्यन्दिनं सवनमिन्द्रियमेव  
माध्यन्दिने सवन आत्मन्धत्त उक्थं वाचीन्द्रायेत्याह तृतीयसवनं प्रतिगीर्य  
सप्तैतान्यक्षराणि सप्तपदा शक्वरी शाक्वराः पशवो जागृतं तृतीयसवनं  
तृतीयसवन एव प्रतिगरे छन्दांसि सं पादयत्यथो पशवो वै जगती  
पशवस्तृतीयसवनं पशूनेव तृतीयसवन आत्मन्धत्ते यद्वै  
होताध्वर्युमभ्याह्वयत आव्यमस्मिन्दधाति तद्यन्नापहनीत पुरास्यं  
संवत्सराद्गृह आ वेवीरुञ्छोँसा मोद इवेति प्रत्याह्वयते तेनैव तदप हते  
यथा वा आर्यतां प्रतीक्षत एवमर्ध्वर्युः प्रतिगरं प्रतीक्षते  
यदभिप्रतिगृणीयाद्यथायतया समृच्छते तादृगेव तद्यदधर्चाल्लुप्येत यथा  
धावद्भ्यो हीर्यते तादृगेव तत्प्रबाहुगवा ऋत्विजामुद्गीथा उद्गीथ  
एवोद्गातृणामृचः प्रणव उक्थशँसिनां प्रतिगरौऽध्वर्यूणां य एवं  
विद्वान्प्रतिगृणात्यन्नाद एव भवत्यास्यं प्रजायां वाजी जायत इयं वै  
होतासार्वध्वर्युर्यदासीनः शँसत्यस्या एव तद्धोता नैत्यास्त इव  
हीयमथो इमामेव तेन यजमानो दुहे यत्तिष्ठन्प्रतिगृणात्यमुष्या एव  
तदध्वर्युर्नैति तिष्ठतीव ह्यसावथो अमूमेव तेन यजमानो दुहे यदासीनः

शंसति तस्मादितः प्रदानं देवा उप जीवन्ति यत्तिष्ठन्प्रतिगृणाति  
 तस्मादमुतः प्रदानं मनुष्या उप जीवन्ति यत्प्राडासीनः शंसति  
 प्रत्यङ्गतिष्ठन्प्रतिगृणाति तस्मात्प्राचीनं रेतौ धीयते प्रतीचीः प्रजा जायन्ते  
 यद्वै होताध्वर्युमभ्याह्वयते वज्रमेनमभि प्र वर्तयति पराडा वर्तते वज्रमेव  
 तन्न करोति ॥६॥

उपयामगृहीतोऽसि वाक्षसदसि वाक्पाभ्यां त्वा क्रतुपाभ्यामस्य यज्ञस्य  
 ध्रुवस्याध्यक्षाभ्यां गृह्णाम्युपयामगृहीतोऽस्यृतसदसि चक्षुष्पाभ्यां त्वा  
 क्रतुपाभ्यामस्य यज्ञस्य ध्रुवस्याध्यक्षाभ्यां गृह्णाम्युपयामगृहीतोऽसि  
 श्रुतसदसि श्रोत्रपाभ्यां त्वा क्रतुपाभ्यामस्य यज्ञस्य ध्रुवस्याध्यक्षाभ्यां  
 गृह्णामि देवेभ्यस्त्वा विश्वदेवेभ्यस्त्वा विश्वेभ्यस्त्वा देवेभ्यो  
 विष्णवुरुक्रमैष ते सोमस्तं रक्षस्व तं ते दुश्चक्षा माव ख्यन्मयि वसुः  
 पुरोवसुर्वाक्पा वाचं मे पाहि मयि वसुर्विदद्वसुश्चक्षुष्पाश्चक्षुर्मे पाहि मयि  
 वसुः संयद्वसुः श्रोत्रपाः श्रोत्रम्मे पाहि भूरसि श्रेष्ठौ रश्मीनाम्प्राणपाः  
 प्राणम्मे पाहि धूरसि श्रेष्ठौ रश्मीनामपानपा अपानम्मे पाहि यो न इन्द्रवायू  
 मित्रावरुणा वश्विनावभिदासति भ्रातृव्य उत्पिपीते शुभस्पती इदमहं  
 तमधरम्पादयामि यथेन्द्राहमुत्तमश्चेतयानि ॥१०॥

प्र सो अग्ने तवोतिभिः सुवीराभिस्तरति वाजकर्मभिः । यस्य त्वं  
 सख्यमाविथ ॥

प्र होत्रे पूर्व्यं वचोऽग्र्यै भरता बृहत् । विपां ज्योतींषि बिभ्रते न वेधसे  
 ॥

अग्ने त्री ते वाजिना त्री षधस्थां तिस्रस्तै जिह्वा ऋतजात पूर्वीः । तिस्र

उं ते तनुवौ देववातास्ताभिर्नः पाहि गिरो अप्रयुच्छन् ॥  
 सं वां कर्मणा समिषा हिनोमीन्द्राविष्णु अपसस्पारे अस्य । जुषेथां यज्ञं  
 द्रविणं च धत्तमरिष्टैर्नः पृथिभिः पारयन्ता ॥  
 उभा जिग्यथुर्न परां जयेथे न परां जिग्ये कतरश्चनैनोंः । इन्द्रश्च विष्णो  
 यदपस्पृधेथां त्रेधा सहस्रं वि तदैरयेथाम् ॥  
 त्रीशयायँषि तव जातवेदस्तिस्त्र आजानीरुषसस्ते अग्ने ।  
 ताभिर्देवानामवौ यक्षि विद्वानथा भव यजमानायु शं योः ॥  
 अग्निस्त्रीणि त्रिधातून्या क्षैति विदथा कृविः । स त्रीँरैकादशाँ इह ।  
 यक्षच्च पिप्रयच्च नो विप्रौ दूतः परिष्कृतः । नभन्तामन्यके समे ॥  
 इन्द्राविष्णू दृँहिताः शम्बरस्य नव पुरौ नवतिं च शनथिष्टम् । शतं  
 वर्चिनः सहस्रं च साकँ हथो अप्रत्यसुरस्य वीरान् ॥  
 उत माता महिषमन्ववेनदमी त्वां जहति पुत्र देवाः । अथाब्रवीद्वृत्रमिन्द्रो  
 हनिष्यन्त्सखै विष्णो वितरं वि क्रमस्व ॥११॥

इति तृतीयकारण्डे द्वितीयः प्रपाठकः २

अथ तृतीयकारण्डे तृतीयः प्रपाठकः ३

अग्ने तेजस्विन्तेजस्वी त्वं देवेषु भूयास्तेजस्वन्तम्मामायुष्मन्तं  
 वर्चस्वन्तम्मनुष्येषु कुरु दीक्षायै च त्वा तपसश्च तेजसे जुहोमि  
 तेजोविदसि तेजो मा मा हासीन्माहं तेजो हासिषम्मा मां तेजो  
 हासी दिन्द्रौजस्विन्नोजस्वी त्वं देवेषु भूया ओजस्वन्तम्मामायुष्मन्तं  
 वर्चस्वन्तम्मनुष्येषु कुरु ब्रह्मणश्च त्वा क्षत्रस्य चौजसे  
 जुहोम्यो जोविदस्योजो मा मा हासीन्माहमोजो हासिषम्मा मामोजो  
 हासीत्सूर्य भ्राजस्विन्भ्राजस्वी त्वं देवेषु भूया भ्राजस्वन्तम्मामायुष्मन्तं



वर्चस्वन्तम्मनुष्येषु कुरु वायोश्च त्वापां च भ्राजसे जुहोमि सुवर्विदसि  
सुवर्मा मा हासीन्माहँ सुवर्हासिषम्मा माँ सुवर्हासीन्मयि  
मेधाम्मयि प्रजाम्मय्यग्निस्तेजो दधातु मयि मेधाम्मयि प्रजाम्मयीन्द्र इन्द्रियं  
दधातु मयि मेधाम्मयि प्रजाम्मयि सूर्यो भ्राजो दधातु ॥१॥

वायुर्हिकर्ताग्निः प्रस्तोता प्रजापतिः साम बृहस्पतिरुद्गाता विश्वे देवा  
उपगातारो मरुतः प्रतिहर्तार इन्द्रो निधनं ते देवाः प्राणभृतः प्राणम्मयि  
दधत्वे तद्वै सर्वमध्वर्युरुपाकुर्वन्नुद्गातृभ्य उपाकरोति ते देवाः प्राणभृतः  
प्राणम्मयि दधत्वित्याहैतदेव सर्वमात्मन्धत्त इडा  
देवहूर्मनुर्यज्ञनीर्बृहस्पतिरुक्थामदानि शँसिषद्विश्वे देवाः । सूक्तवाचः  
पृथिवि मातर्मा मा हिँसीर्मधु मनिष्ये मधु जनिष्ये मधु वक्ष्यामि मधु  
वदिष्यामि मधुमतीं देवेभ्यो वाचमुद्यासँ शुश्रूषेणाम्मनुष्येभ्यस्तम्मा  
देवा अवन्तु शोभायै पितरोऽनु मदन्तु ॥२॥

वसवस्त्वा प्र बृहन्तु गायत्रेण च्छन्दसाग्नेः प्रियम्पाथ उपैहि रुद्रास्त्वा प्र  
बृहन्तु त्रैष्टुभेन च्छन्दसेन्द्रस्य प्रियम्पाथ उपैह्या दित्यास्त्वा प्र बृहन्तु  
जागतेन च्छन्दसा विश्वेषां देवानाम्प्रियम्पाथ उपैहि मान्दासु ते शुक्र  
शुक्रमा धूनोमि भन्दनासु कोतनासु नूतनासु रेशीषु मेषीषु  
वाशीषु विश्वभृत्सु माध्वीषु ककुहासु शक्वरीषु शुक्रासु ते शुक्र  
शुक्रमा धूनोमि शुक्रं ते शुक्रेण गृह्णाम्यहो रूपेण सूर्यस्य रश्मिभिः ।  
आस्मिन्नुग्रा अचुच्यवुर्दिवो धारा असञ्चत ॥

ककुहँ रूपं वृषभस्य रोचते बृहत्सोमः सोमस्य पुरोगाः शुक्रः शुक्रस्य  
पुरोगाः ।

यत्तै सोमादाभ्यं नाम जागृवि तस्मै ते सोम सोमाय स्वाहो शिक्त्वं देव  
सोम गायत्रेण च्छन्दसाग्नेः प्रियम्पाथो अपीहि वशी त्वं देव सोम त्रैष्टुभेन  
च्छन्दसेन्द्रस्य प्रियम्पाथो अपीह्य स्मत्सखा त्वं देव सोम जागतेन  
च्छन्दा विश्वेषां देवानाम्प्रियम्पाथो अपीह्या नः प्राण एतु परावत  
आन्तरिक्षाद्विवस्परि । आयुः पृथिव्या अध्यमृतमसि प्राणाय त्वा ।  
इन्द्राग्नी मे वर्चः कृणुतां वर्चः सोमो बृहस्पतिः । वर्चो मे विश्वे देवा  
वर्चो मे धत्तमश्विना ॥

दधन्वे वा यदीमनु वोचद्ब्रह्माणि वेरु तत् । परि विश्वानि काव्या  
नेमिश्चक्रमिवाभवत् ॥३॥

एतद्वा अपां नामधेयं गुह्यं यदाधावा मान्दासु ते शुक्र शुक्रमा  
धूनोमीत्याहापामेव नामधेयेन गुह्येन दिवो वृष्टिमव रुद्धे शुक्रं तै शुक्रेण  
गृह्णामीत्याहैतद्वा अहो रूपं यद्रात्रिः सूर्यस्य रश्मयो वृष्ट्या ईशतेऽहं एव  
रूपेण सूर्यस्य रश्मिभिर्दिवो वृष्टिं च्यावयत्या स्मिन्नुग्रा अचुच्यवुरित्याह  
यथायजुरेवैतत्ककुहं रूपं वृषभस्य रोचते बृहदित्याहैतद्वा अस्य  
ककुहं रूपं यद्वृष्टी रूपेणैव वृष्टिमव रुद्धे यत्तै सोमादाभ्यं नाम  
जागृवीत्याहैष ह वै हविषा हविर्यजति योऽदाभ्यं गृहीत्वा सोमाय  
जुहोति परा वा एतस्यायुः प्राण एति योऽंशुं गृह्णात्या नः प्राण एतु  
परावत इत्याहायुरेव प्राणमात्मन्धत्तेऽमृतमसि प्राणाय त्वेति हिरण्यमभि  
व्यनित्यमृतं वै हिरण्यमायुः प्राणोऽमृतैर्नैवायुरात्मन्धत्ते शतमानम्भवति  
शतायुः पुरुषः शतेन्द्रिय आयुष्येवेन्द्रिये प्रति तिष्ठत्यप उप स्पृशति  
भेषजं वा आपौ भेषजमेव कुरुते ॥४॥

वा॒युर॑सि प्रा॒णो नाम॑ सवि॒तुराधि॑पत्येऽपान॒म्ये दा॒श्चक्षु॑रसि श्रोत्रं नाम  
 धा॒तुराधि॑पत्य॒ आयु॑र्मै दा रूप॒मसि॑ वर्णो नाम॒ बृह॑स्पते॒राधि॑पत्ये प्र॒जाम्यै  
 दा ऋ॒तम॑सि स॒त्यं नामेन्द्र॑स्याधि॒पत्ये द्वा॒त्रम्यै॑ दा भू॒तम॑सि भव्यं नाम  
 पि॒तृणा॑माधि॒पत्येऽपामो॑षधीनां॒ गर्भं॑ धा ऋ॒तस्य॑ त्वा व्यो॒मन॑ ऋ॒तस्य॑ त्वा  
 वि॒भूम॑न ऋ॒तस्य॑ त्वा वि॒धर्म॑ण ऋ॒तस्य॑ त्वा स॒त्याय॑ र्तस्य॑ त्वा ज्योति॑षे  
 प्र॒जाप॑तिर्वि॒राज॑मपश्य॒त्तया॑ भू॒तं च॒ भव्यं॑ चासृ॒जत्  
 तामृ॑षिभ्यस्ति॒रौऽद॒धात्तां॑ ज॒मद॑ग्निस्तपसापश्य॒त्तया॑ वै स  
 पृ॒श्नी॒न्कामा॑नसृ॒जत् तत्पृ॑श्नीनामृ॒श्नि॒त्वं यत्पृ॑श्नयो गृ॒ह्यन्ते॑ पृ॒श्नी॒नेव॑ तैः  
 कामा॒न्यज॑मानोऽव॒ रुद्धे॑ वा॒युर॑सि प्रा॒णो नामेत्या॑ह प्राणा॒पाना॑वे॒वाव॑  
 रुद्धे॑ चक्षु॑रसि श्रोत्रं नामेत्या॒हायु॑रे॒वाव॑ रुद्धे॑ रूप॒मसि॑ वर्णो नामेत्या॑ह  
 प्र॒जामे॑वाव॒ रुद्धे॑ ऋ॒तम॑सि स॒त्यं नामेत्या॑ह द्वा॒त्रमे॑वाव॒ रुद्धे॑ भू॒तम॑सि  
 भव्यं नामेत्या॑ह प॒शवो॑ वा अ॒पामो॑षधीनां॒ गर्भः॑ प॒शूने॑वाव॒ रुद्धे॑ ए॒ताव॑द्वै  
 पु॒रुष॑म्प॒रित॑स्तदे॒वाव॑ रुद्धे॑ ऋ॒तस्य॑ त्वा व्यो॒मन॑ इत्या॒हेयं॑ वा ऋ॒तस्य॑  
 व्यो॒मे॒मामे॑वाभि ज॒यत्यृ॑तस्य॑ त्वा वि॒भूम॑न॒ इत्या॑हान्तरि॒क्ष्मवा॑ ऋ॒तस्य॑  
 वि॒भूमा॑न्तरि॒क्ष्मे॒वाभि॑ ज॒यत्यृ॑तस्य॑ त्वा वि॒धर्म॑ण॒ इत्या॑ह द्यौ॒र्वा ऋ॒तस्य॑  
 वि॒धर्म॑ दि॒वमे॑वाभि ज॒यत्यृ॑तस्य॑ त्वा स॒त्याये॑त्या॒ह दि॒शो॑ वा ऋ॒तस्य॑  
 स॒त्यं दि॒श ए॒वाभि॑ ज॒यत्यृ॑तस्य॑ त्वा ज्योति॑ष॒ इत्या॑ह सु॒वर्गो॑ वै लो॒क  
 ऋ॒तस्य॑ ज्योतिः॒ सु॒वर्ग॑मे॒व लो॒कम॑भि ज॒यत्ये॒ताव॑न्तो वै  
 दै॒वलो॒का॒स्ताने॑वाभि ज॒यति॑ द॒श॒ सम्प॑द्यन्ते दशा॒क्षरा॑ वि॒राड॑न्नं  
 वि॒राडि॑व॒राज्ये॑वान्नाद्ये॒ प्रति॑ तिष्ठति ॥५॥

दे॒वा वै यद्य॑ज्ञेन॒ नावा॑रु॒न्धत्॑ तत्प॒रैर॑वा॒रुन्ध॑त् तत्प॒राणा॑म्प॒त्वं यत्प॑रै  
 गृ॒ह्यन्ते॑ यदे॒व य॑ज्ञेन॒ नाव॑रु॒द्धे॑ तस्या॒व॒रुद्ध॑चै॒ यम्प्र॑थ॒मं गृ॒ह्णाती॑ममे॒व तेन॑

लोकमभि जयति यं द्वितीयमन्तरिक्षं तेन यं तृतीयमुमेव तेन लोकमभि  
जयति यदेते गृह्यन्ते एषां लोकानामभिरित्या उत्तरेष्वहःस्वमुतोऽर्वाञ्चो  
गृह्यन्तेऽभिरित्यैवेमाँल्लोकान्पुनरिमं लोकम्प्रत्यवरोहन्ति  
यत्पूर्वेष्वहःस्वितः पराञ्चो गृह्यन्ते तस्मादितः पराञ्च इमे लोका  
यदुत्तरेष्वहःस्वमुतोऽर्वाञ्चो गृह्यन्ते तस्मादमुतोऽर्वाञ्च इमे  
लोकास्तस्मादयातयाम्नो लोकान्मनुष्या उप जीवन्ति ब्रह्मवादिनो वदन्ति  
कस्मात्सत्याद्द्व्य ओषधयः सम्भवन्त्योषधयो मनुष्याणामन्नम्प्रजापतिम्प्रजा  
अनु प्र जायन्त इति परानन्विति ब्रूया द्यद्गृह्णात्यद्व्यस्त्वौषधीभ्यो  
गृह्णामीति तस्माद्द्व्य ओषधयः सम्भवन्ति यद्गृह्णात्योषधीभ्यस्त्वा  
प्रजाभ्यो गृह्णामीति तस्मादोषधयो मनुष्याणामन्नं यद्गृह्णाति प्रजाभ्यस्त्वा  
प्रजापतये गृह्णामीति तस्मात्प्रजापतिम्प्रजा अनु प्र जायन्ते ॥६॥

प्रजापतिर्देवासुरानसृजत् तदनु यज्ञोऽसृज्यत यज्ञं छन्दाँसि ते विष्वञ्चो  
व्यक्रामन्त्सोऽसुराननु यज्ञोऽपाक्रामद्यज्ञं छन्दाँसि ते देवा अमन्यन्तामी  
वा इदमभूवन्त्यद्व्यँ स्म इति ते  
प्रजापतिमुपाधावन्त्सोऽब्रवीत्प्रजापतिश्छन्दसां वीर्यमादाय तद्व्यः प्र  
दास्यामीति स च्छन्दसां वीर्यमादाय तदैभ्यः प्रायच्छत्तदनु  
च्छन्दाँस्यपाक्रामञ्छन्दाँसि यज्ञस्ततो देवा अभवन्परासुरा य एवं  
छन्दसां वीर्यं वेदा श्रावयास्तु श्रौषड्यज्ञ ये यजामहे वषट्कारो  
भवत्यात्मना परास्य भ्रातृव्यो भवति ब्रह्मवादिनो वदन्ति कस्मै  
कर्मध्वर्युरा श्रावयतीति च्छन्दसां वीर्यायेति ब्रूयादेतद्वै छन्दसां वीर्यमा  
श्रावयास्तु श्रौषड्यज्ञ ये यजामहे वषट्कारो य एवं वेद सर्वायैरेव  
च्छन्दोभिरर्चति यत्किं चार्चति यदिन्द्रो वृत्रमहन्नमेध्यं

तद्यद्यतीनपार्वपदमेध्यं तदथ कस्माद्वैन्द्रो यज्ञ आ  
संस्थातो रित्याहुरिन्द्रस्य वा एषा यज्ञिया तनूर्यद्यज्ञस्तामेव तद्यजन्ति य  
एवं वेदोपैनं यज्ञो नमति ॥७॥

आयुर्दा अग्ने हविषो जुषाणो घृतप्रतीको घृतयोनिरेधि । घृतम्पीत्वा मधु  
चारु गव्यम्पितेव पुत्रमभि रक्षतादिमम् ॥

आ वृश्चयते वा एतद्यजमानोऽग्निभ्यां यदेनयोः

शृतंकृत्याथान्यत्रावभृथम्वैत्यायुर्दा अग्ने हविषो जुषाण  
इत्यवभृथमवैष्यञ्जुहयादाहुत्यैवैनौ शमयति नार्तिमाच्छति यजमानो  
यत्कुसीदमप्रतीत्तम्मयि येन यमस्य बलिना चरामि । इहैव सन्निरवदये  
तदेतत्तदग्ने अनृणो भवामि ।

विश्वलोप विश्वदावस्य त्वासञ्जुहोम्यग्धादेकोऽहुतादेकः समसनादेकः ।

ते नः कृणवन्तु भेषजं सदः सहो वरैणयम् ॥

अयं नो नभसा पुरः सस्फानो अभि रक्षतु । गृहाणामसमत्यै ब्रहवो नो  
गृहा असन् ॥

स त्वं नो नभसस्पत ऊर्जं नो धेहि भद्रया । पुनर्नो नष्टमा कृधि पुनर्नो  
रयिमा कृधि ॥

देवं सस्फान सहस्रपोषस्यैशिषे स नो रास्वाज्यानिं रायस्पोषं  
सुवीर्यं संवत्सरीणां स्वस्तिम् ॥

अग्निर्वाव यम इयं यमी कुसीदं वा एतद्यमस्य यजमान आ दत्ते  
यदोषधीभिर्वेदिं स्तृणाति यदनुपौष्य प्रयायाद्ग्रीवबद्धमैनममुष्मिल्लोके  
नेनीयेरन्यत्कुसीदमप्रतीत्तम्मयीत्युपौषतीहैव सन्यमं कुसीदं  
निरवदायानृणः सुवर्गं लोकमेति यदि मिश्रमिव चरेदञ्जलिना

सक्तून्प्रदाव्यै जुहुयादेष वा अग्निर्वैश्वानरो यत्प्रदाव्यः स एवैनंम  
स्वदयत्य ह्नां विधान्यामेकाष्टकायामपूपं चतुःशरावम्पक्त्वा प्रातरेतेन  
कक्षमुपौषेद्यदि दहति पुरयसमम्भवति यदि न दहति पापसममेतेन ह  
स्म वा ऋषयः पुरा विज्ञानेन दीर्घसत्रमुप यन्ति यो वा  
उपद्रष्टारमुपश्रोतारमनुख्यातारं विद्वान्यजते सममुष्मिल्लोक इष्टापूर्तेन  
गच्छतेऽग्निर्वा उपद्रष्टा वायुरुपश्रोतादित्योऽनुख्याता तान्य एवं  
विद्वान्यजते सममुष्मिल्लोक इष्टापूर्तेन गच्छतेऽयं नो नभसा पुर  
इत्याहाग्निर्वै नभसा पुरोऽग्निमेव तदाहैतन्मै गोपायेति स त्वं नो  
नभसस्पत् इत्याह वायुर्वै नभसस्पतिर्वायुमेव तदाहैतन्मै गोपायेति देव  
संस्फानेत्याहासौ वा आदित्यो देवः संस्फानं आदित्यमेव तदाहैतन्मै  
गोपायेति ॥८॥

एतं युवानम्परि वो ददामि तेन क्रीडन्तीश्वरत प्रियेण । मा नः शाप्त  
जनुषा सुभागा रायस्पोषेण समिषा मदेम ॥  
नमो महिम्न उत चक्षुषे ते मरुताम्पितस्तदहं गृणामि । अनु मन्यस्व  
सुयजा यजाम जुष्टं देवानामिदमस्तु हव्यम् ॥  
देवानामेष उपनाह आसीदपां गर्भ ओषधीषु न्यक्तः । सोमस्य  
द्रप्समवृणीत पूषा बृहन्नद्रिरभवत्तदैषाम् ॥  
पिता वत्सानाम्पतिरघ्नियानामथो पिता महतां गर्गराणाम् । वत्सो जरायु  
प्रतिधुक्पीयूषं आमिक्षा मस्तु घृतमस्य रेतः ॥  
त्वां गावोऽवृणत राज्याय त्वां हवन्त मरुतः स्वर्काः । वर्षमन्नुत्रस्य  
ककुभि शिश्रियाणस्ततो न उग्रो वि भजा वसूनि ॥  
व्यूद्धेन वा एष पशुना यजते यस्यैतानि न क्रियन्त एष ह त्वै समृद्धेन

यजते यस्यैतानि क्रियन्ते ॥६॥

सूर्यो देवो दिविषद्भ्यो धाता क्षत्राय वायुः प्रजाभ्यः । बृहस्पतिस्त्वा  
प्रजापतये ज्योतिष्मतीं जुहोतु ॥

यस्यास्ते हरितो गर्भोऽथो योनिर्हिरण्ययी । अङ्गान्यहुता यस्यै तां देवैः  
समजीगमम् ॥

आ वर्तन वर्तय नि निवर्तन वर्तयेन्द्र नर्दबुद । भूम्याश्चतस्रः  
प्रदिशस्ताभिरा वर्तया पुनः ॥

वि ते भिनद्धि तकरीं वि योनिं वि गवीन्यौ । वि मातरं च पुत्रं च वि  
गर्भं च जरायुं च । बहिस्तै अस्तु बालिति । उरुद्रप्सो विश्वरूप इन्दुः  
पर्वमानो धीरं आनञ्जु गर्भम् ॥

एकपदी द्विपदी त्रिपदी चतुष्पदी पञ्चपदी षट्पदी सप्तपद्यष्टापदी भुवनानु  
प्रथताँ स्वाहा मही द्यौः पृथिवी च न इमं यज्ञमिमिक्षताम् । पिपृतां  
नो भरीमभिः ॥१०॥

इदं वामास्यै हविः प्रियमिन्द्राबृहस्पती । उक्थम्मदंश्च शस्यते ॥

अयं वाम्परिं षिच्यते सोमं इन्द्राबृहस्पती । चारुर्मदाय पीतयै ॥

अस्मे इन्द्राबृहस्पती रयिं धत्तँ शतग्विनम् । अश्वावन्तँ सहस्त्रिणाम् ॥

बृहस्पतिर्नः परिं पातु पश्चादुतोत्तरस्मादधरादघायोः । इन्द्रः पुरस्तादुत  
मध्यतो नः सखा सखिभ्यो वरिवः कृणोतु ॥

वि ते विष्वग्वातजूतासो अग्ने भामासः शुचे शुचयश्चरन्ति ।

तुविम्रक्षासौ दिव्या नवग्वा वना वनन्ति धृषता रुजन्तः ॥

त्वामग्ने मानुषीरीडते विशौ होत्राविदं विविचिँ रत्नधातमम् । गुहा

सन्तं सुभग विश्वदर्शतं तुविष्मणसं सुयजं घृतश्रियम् ॥  
 धाता ददातु नो रयिमीशानो जगतस्पतिः । स नः पूर्णेन वावनत् ॥  
 धाता प्रजाया उत राय ईशे धातेदं विश्वम्भुवनं जजान । धाता पुत्रं  
 यजमानाय दाता तस्मा उ हव्यं घृतवद्विधेम ॥  
 धाता ददातु नो रयिम्प्राचीं जीवातुमक्षिताम् । वयं देवस्य धीमहि  
 सुमतिं सत्यराधसः ॥  
 धाता ददातु दाशुषे वसूनि प्रजाकामाय मीढुषे दुरोणे । तस्मै देवा  
 अमृताः सं व्ययन्तां विश्वे देवासो अदितिः सजोषाः ॥  
 अनु नोऽद्यानुमतिर्यज्ञं देवेषु मन्यताम् । अग्निश्च हव्यवाहनो भवतां  
 दाशुषे मयः ॥  
 अन्विदनुमते त्वं मन्यासै शं च नः कृधि । क्रत्वे दक्षाय नो हिनु प्र ण  
 आयूंषि तारिषः ॥  
 अनु मन्यतामनुमन्यमाना प्रजावन्तं रयिमक्षीयमाणम् । तस्यै वयं  
 हेडसि मापि भूम सा नो देवी सुहवा शर्म यच्छतु ॥  
 यस्यामिदम्प्रदिशि यद्विरोचतेऽनुमतिम्प्रति भूषन्त्यायवः । यस्या उपस्थं  
 उर्वन्तरिक्षं सा नो देवी सुहवा शर्म यच्छतु राकामहं सुहवां सुष्टुती  
 हवे शृणोतु नः सुभगा बोधतु त्मना । सीव्यत्वपः सूच्याच्छिद्यमानया  
 ददातु वीरं शतदायमुक्थ्यम् ॥  
 यास्ते राके सुमतयः सुपेशसो याभिर्ददासि दाशुषे वसूनि । तार्भिर्नो  
 अद्य सुमना उपागहि सहस्रपोषं सुभगे रराणा ॥  
 सिनीवालि  
 या सुपाणिः ॥  
 कुहूमहं सुभगां विद्यनापसमस्मिन्यज्ञे सुहवां जोहवीमि । सा नो



ददातु श्रवणम्पितृणां तस्यास्ते देवि हविषा विधेम ॥  
कुहूर्देवानाममृतस्य पत्नी हव्या नो अस्य हविषश्चिकेतु । सं दाशुषे  
किरतु भूरि वामं रायस्पोषं चिकितुषे दधातु ॥११॥

डति तृतीयकारण्डे तृतीयः प्रपाठकः ३

अथ तृतीयकारण्डे चतुर्थः प्रपाठकः ४

वि वा एतस्य यज्ञ ऋध्यते यस्य हविरतिरिच्यते सूर्यो देवो दिविषद्भ्य  
इत्याह बृहस्पतिना चैवास्य प्रजापतिना च यज्ञस्य व्यृद्धमपि वपति  
रक्षांसि वा एतत्पशंसं सचन्ते यदैकदेवत्यं आलब्धो भूयान्भवति  
यस्यास्ते हरितो गर्भ इत्याह देवत्रैवैनां गमयति रक्षसामपहत्या आ वर्तन  
वर्तयेत्याह ब्रह्मणैवैनमा वर्तयति वि ते भिनद्धि तकरीमित्याह  
यथायजुरेवैत दुरुद्रप्सो विश्वरूप इन्दुरित्याह प्रजा वै पशव इन्दुः  
प्रजयैवैनम्पशुभिः समर्धयति दिवं वै यज्ञस्य व्यृद्धं गच्छति  
पृथिवीमतिरिक्तं तद्यन्न शमयेदार्तिमाच्छेद्यजमानो मही द्यौः पृथिवी च न  
इत्याह द्यावापृथिवीभ्यामेव यज्ञस्य व्यृद्धं चातिरिक्तं च शमयति  
नार्तिमाच्छेति यजमानो भस्मनाभि समूहति स्वगाकृत्या अथौ अनयोर्वा  
एष गर्भोऽनयोरेवैनं दधाति यदवद्येदति तद्रैचयेद्यन्नावद्येत्पशोरालब्धस्य  
नाव द्येत्पुरस्तान्नाभ्या अन्यदवद्येदुपरिष्ठादन्यत्पुरस्ताद्वै नाभ्यै प्राण  
उपरिष्ठादपानो यावानेव पशुस्तस्याव द्यति विष्णावे शिपिविष्टाय जुहोति  
यद्वै यज्ञस्यातिरिच्यते यः पशोर्भूमा या पुष्टिस्तद्विष्णुः शिपिविष्टोऽतिरिक्त  
एवातिरिक्तं दधात्यतिरिक्तस्य शान्त्या अष्टाप्रुङ्गिरायं दक्षिणाष्टापदी  
ह्येषात्मा नवमः पशोराप्त्या अन्तरकोश उष्णीषेणाविष्टितम्भवत्येवमिव  
हि पशुरुल्बमिव चर्मैव मांसमिवास्थीव यावानेव पशुस्तमाप्त्वाव

रुन्द्रे यस्यैषा यज्ञे प्रायश्चित्तिः क्रियते इष्ट्वा वसीयान्भवति ॥१॥

आ वायो भूष शुचिपा उप नः सहस्रं ते नियुतौ विश्ववार । उपौ ते  
अन्धो मद्यमयामि यस्य देव दधिषे पूर्वपेयम् ॥  
आकूत्यै त्वा कामाय त्वा समृधे त्वा किक्किटा ते मनः प्रजापतये स्वाहा  
किक्किटा ते प्राणं वायवे स्वाहा किक्किटा ते चक्षुः सूर्याय स्वाहा  
किक्किटा ते श्रोत्रं द्यावापृथिवीभ्याँ स्वाहा किक्किटा ते वाचँ  
सरस्वत्यै स्वाहा त्वं तुरीया वशिनी वशासि सकृद्यत्त्वा मनसा गर्भं  
आशयत् । वशा त्वं वशिनी गच्छ देवान्त्सत्याः संतु यजमानस्य  
कामाः ॥

अजासि रयिष्ठा पृथिव्याँ सीदोर्ध्वान्तरिक्षमुप तिष्ठस्व दिवि ते बृहद्भाः  
।

तन्तुं तन्वन्नजसो भानुमन्विहि ज्योतिष्मतः पथो रक्ष धिया कृतान् ।  
अनुल्ब्रणं वयत् जोगुवामपो मनुर्भव जनया दैव्यं जनम् ॥  
मनसो हविरसि प्रजापतेर्वर्णो गात्राणां ते गात्रभार्जो भूयास्म ॥२॥

इमे वै सहास्तां ते वायुर्व्यवात्ते गर्भमदधातां तँ सोमः  
प्राजनयद्गिरग्रसत् स एतम्प्रजापतिराग्नेयमृष्टार्कपालमपश्यत्तं  
निरवपत्तेनैवैनामग्नेरधि निरक्रीणात्तस्मादप्यन्यदेवत्यामालभमान  
आग्नेयमृष्टार्कपालम्पुरस्तान्निर्वपेद्ग्रेरेवैनामधि निष्क्रीयालभते  
यद्वायुर्व्यवात्तस्माद्वायव्यां यदिमे गर्भमदधातां तस्माद्वावापृथिव्यां  
यत्सोमः प्राजनयद्गिरग्रसत् तस्मादग्नीषोमीया  
यदनयोर्वियत्योर्वागवद्त्तस्मात्सारस्वती यत्प्रजापतिरग्नेरधि

निरक्रीणात्तस्मात्प्राजापत्या सा वा एषा सर्वदेवत्या यद्वा वृशा  
 वायुव्यामा लभेत भूतिकामो वायुर्वै क्षेपिष्ठा देवता वायुमेव स्वेन  
 भागधेयेनोप धावति स एवैनम्भूतिं गमयति द्यावापृथिव्यामा लभेत  
 कृषमाणः प्रतिष्ठाकामो दिव एवास्मै पर्जन्यो वर्षति व्यस्यामोषधयो  
 रोहन्ति समर्धुकमस्य सस्यम्भवत्य ग्रीषोमीयामा लभेत यः  
 कामयेतान्नवाननादः स्यामित्यग्निनैवान्नमव रुद्धे  
 सोमैन्नान्नद्यमन्नवानेवान्नादो भवति सारस्वतीमा लभेत य ईश्वरो वाचो  
 वदितोः सन्वाचं न वदेद्वाग्वै सरस्वती सरस्वतीमेव स्वेन भागधेयेनोप  
 धावति सैवास्मिन्वाचं दधाति प्राजापत्यामा लभेत यः  
 कामयेतानभिजितमभि जयेयमिति प्रजापतिः सर्वा देवता  
 देवताभिरेवानभिजितमभि जयति वायुव्ययोपाकरोति  
 वायोरेवैनामवरुध्या लभत आकृत्यै त्वा कामाय त्वेत्याह  
 यथायजुरेवैतत्किक्किटाकारं जुहोति किक्किटाकारेण वै ग्राम्याः पशवो  
 रमन्ते प्रारण्याः पतन्ति यत्किक्किटाकारं जुहोति ग्राम्याणांमपशूनां धृत्यै  
 पर्यग्नौ क्रियमाणे जुहोति जीवन्तीमेवैनां सुवर्गं लोकं गमयति त्वं  
 तुरीया वशिनी वशासीत्याह देवत्रैवैनां गमयति सत्याः सन्तु यजमानस्य  
 कामा इत्याहैष वै कामो यजमानस्य यदनार्त उदृचं गच्छति  
 तस्मादेवमाहा जासि रयिष्ठेत्याहैष्वैवैनां लोकेषु प्रति ष्ठापयति दिवि तै  
 बृहद्वा इत्याह सुवर्ग एवास्मै लोके ज्योतिर्दधाति तन्तुं तन्वन्नजसो  
 भानुमन्विहीत्याहेमानेवास्मै लोकाञ्ज्योतिष्मतः करोत्य नुल्ब्रणं वयत्  
 जोगुवामप इत्याह यदेव यज्ञ उल्ब्रणं क्रियते तस्यैवैषा शान्ति मनुर्भव  
 जनया दैव्यं जनमित्याह मानव्यो वै प्रजास्ता एवाद्याः कुरुते मनसो  
 हविरसीत्याह स्वगाकृत्यै गात्राणां ते गात्रभाजौ

भूयास्मेत्याहाशिषमेवैतामा शास्ते तस्यै वा एतस्या एकमेवादेवयजनं  
यदालब्धायामभ्रो भवति यदालब्धायामभ्रः स्यादप्सु वा प्रवेशयेत्सर्वा  
वा प्राशनीया द्यदप्सु प्रवेशयेद्यज्ञवेशसं कुर्यात्सर्वामिव  
प्राशनीयादिन्द्रियमेवात्मन्धत्ते सा वा एषा त्रयाणामेवावरुद्धा  
संवत्सरसदः सहस्रयाजिनो गृहमेधिनस्त एवैतया यजेरन्तेषामेवैषाम्ना  
॥३॥

चित्तं च चित्तिश्चा कूतं चा कूतिश्च विज्ञातं च विज्ञानं च मनश्च  
शक्वरीश्च दर्शश्च पूर्णमासश्च बृहच्च रथंतरं च प्रजापतिर्जयानिन्द्राय वृष्णे  
प्रायच्छदुग्रः पृतनाज्येषु तस्मै विशः समनमन्त सर्वाः स उग्रः स हि  
हव्यो बभूव देवासुराः संयत्ता आसन्त्स इन्द्रः प्रजापतिमुपाधावत्तस्मा  
एताञ्जयान्प्रायच्छत्तानजुहोत्ततो वै देवा असुरानजयन्त्यदजयन्तञ्जयानां  
जयत्वँ स्पर्धमानेनैते होतव्या जयत्येव ताम्पृतनाम् ॥४॥

अग्निर्भूतानामधिपतिः स मावत्विन्द्रो ज्येष्ठानां यमः पृथिव्या  
वायुरन्तरिक्षस्य सूर्यो दिवश्चन्द्रमा नक्षत्राणाम्बृहस्पतिर्ब्रह्मणो मित्रः  
सत्यानां वरुणोऽपाँ समुद्रः स्रोत्याना मन्नँ साम्राज्यानामधिपति  
तन्मावतु सोम ओषधीनाँ सविता प्रसवानाँ रुद्रः पशूनां त्वष्टा  
रूपाणां विष्णुः पर्वतानाम्मरुतो गणानामधिपतयस्ते मावन्तु पितरः  
पितामहाः परेऽवरे ततास्ततामहा इह मावत ।  
अस्मिन्ब्रह्मन्नस्मिन्क्षत्रेऽस्यामाशिष्यस्याम्पुरोधायाम्स्मिन्कर्मन्नस्यां  
देवहृत्याम् ॥५॥

दे॒वा वै यद्य॒ज्ञे ऽकुर्व॑त् तदसुरा अकुर्वत् ते दे॒वा  
 ए॒तान॑भ्या॒तानान॑पश्यन्तान॒भ्यात॑न्वत् यद्दे॒वानां॑ कर्मासी॒दार्ध्य॑त्  
 तद्यदसुराणां॑ न तदा॒र्ध्यत् येन॑ कर्म॒णोत्से॑त्तत्र॒ होत॑व्या ऋ॒ध्नोत्ये॒व तेन॑ कर्म॒णा  
 यद्विश्वे॑ दे॒वाः स॒मभ॑रन्तस्मा॒दभ्या॑ताना वैश्वदे॒वा  
 यत्प्र॒जाप॑तिर्ज॒यान्प्रा॑र्यच्छ॒त्तस्मा॒ज्जयाः॑ प्रा॒जाप॑त्याः यद्रा॒ष्ट्रभृ॑द्भी॒ र्णाष्ट्र॑माद॑दत्  
 तद्रा॒ष्ट्रभृ॑ताँ॒ राष्ट्र॑भृ॒त्त्वं ते दे॒वा अ॑भ्या॒तानै॑रसुरान॒भ्यात॑न्वत्  
 जयै॑रजयन्नाष्ट्रभृ॒द्भी॒ र्णाष्ट्र॑माद॑दत् यद्दे॒वा अ॑भ्या॒तानै॑रसुरान॒भ्यात॑न्वत्  
 तद॑भ्या॒तानाना॑मभ्या॒तान॑त्वं यज्जयै॑रजयन्तज्ज॒यानां॑ जय॒त्वं यद्रा॑ष्ट्रभृ॒द्भी॒  
 र्णाष्ट्र॑माद॑दत् तद्रा॒ष्ट्रभृ॑ताँ॒ राष्ट्र॑भृ॒त्त्वं ततो॑ दे॒वा अ॑भ॒वन्परा॑सुरा॒ यो  
 भ्रातृ॑व्यवा॒न्त्स्यात्स ए॒ताञ्जु॑हुयदभ्या॒तानै॑रे॒व भ्रातृ॑व्या॒नभ्या॑तनु॒ते जयै॑रजयति  
 राष्ट्र॑भृ॒द्भी॒ र्णाष्ट्र॑मा द॑त्ते भ॒वत्या॒त्मना॑ परा॑स्य॒ भ्रातृ॑व्यो भवति ॥६॥

ऋ॒ताषा॑ड॒तधा॑माग्निर्गन्ध॒र्वस्तस्यौष॑धयोऽप्सरस॒ ऊर्जो॑ नाम॒ स इ॒दम्ब्र॑ह्म  
 क्ष॒त्रम्पा॑तु॒ ता इ॒दम्ब्र॑ह्म क्ष॒त्रम्पान्तु॑ तस्मै॒ स्वाहा॑ ताभ्यः॒ स्वाहा॑ संहि॒तो  
 वि॒श्वसा॑मा॒ सूर्यो॑ गन्ध॒र्वस्तस्य॒ मरी॑चयोऽप्सरस॒ आयु॑र्वः सुषु॒म्नः  
 सूर्य॑रश्मिश्चन्द्र॒मा गन्ध॑र्वस्तस्य॒ नक्ष॑त्राण्यप्सरसो॒ बे॒कुर॑यो भु॒ज्युः सु॑प॒र्णो  
 य॒ज्ञो गन्ध॑र्वस्तस्य॒ दक्षि॑णा अ॒प्सरसः॑ स्त॒वाः प्र॒जाप॑तिर्वि॒श्वकर्मा॑ मनो॒  
 गन्ध॑र्वस्तस्य॒र्क्षामान्य॑प्सरसो॒ वह्न॑य इ॒षिरो॑ वि॒श्वव्य॑चा॒ वातो॑  
 गन्ध॑र्वस्तस्यापोऽप्सरसो॒ मु॒दा भु॑र्वनस्य प॒ते यस्य॑ त उ॒परि॑ गृ॒हा इ॒ह च॑ ।  
 स नो॑ रा॒स्वाज्या॑निँ॒ रा॒यस्पोषँ॑ सु॒वीर्यँ॑ संवत्स॒रीणाँ॑ स्व॒स्तिम् ॥  
 प्र॒मे॒ष्ठ्यधि॑पतिर्मृत्युर्गन्ध॒र्वस्तस्य॒ विश्व॑मप्सरसो॒ भुवः॑ सु॒क्षितिः॑  
 सु॒भूति॑र्भद्रकृत्सुर्व॒वान्प॑र्जन्यो॒ गन्ध॑र्वस्तस्य॒ विद्यु॑तोऽप्सरसो॒ रुचो॑  
 दू॒रेह॑तिरमृ॒ड्यो मृत्यु॑र्गन्ध॒र्वस्तस्य॒ प्र॒जा अ॑प्सरसो॒ भीरु॑व॒श्चारुः॑

कृष्णकाशी कामौ गन्धर्वस्तस्याधयोऽप्सरसः शोचयन्तीर्नाम स इदम्ब्रह्म  
क्षत्रम्पातु ता इदम्ब्रह्म क्षत्रम्पान्तु तस्मै स्वाहा ताभ्यः स्वाहा स नौ  
भुवनस्य पते यस्य त उपरि गृहा इह च । उरु ब्रह्मणोऽस्मै क्षत्राय महि  
शर्म यच्छ ॥७॥

राष्ट्रकामाय होतव्या राष्ट्रं वै राष्ट्रभृतौ राष्ट्रेणैवास्मै राष्ट्रमव रुद्धे राष्ट्रमेव  
भवत्यात्मनै होतव्या राष्ट्रं वै राष्ट्रभृतौ राष्ट्रम्प्रजा राष्ट्रम्पशवो राष्ट्रं  
यच्छ्रेष्ठो भवति राष्ट्रेणैव राष्ट्रमव रुद्धे वसिष्ठः समानानाम्भवति  
ग्रामकामाय होतव्या राष्ट्रं वै राष्ट्रभृतौ राष्ट्रं संजाता राष्ट्रेणैवास्मै राष्ट्रं  
संजातानव रुद्धे ग्राम्येव भवत्यधिदेवने जुहोत्यधिदेवन एवास्मै  
संजातानव रुद्धे त एनमवरुद्धा उप तिष्ठन्ते रथमुख ओजस्कामस्य  
होतव्या ओजो वै राष्ट्रभृत ओजो रथ ओजसैवास्मा ओजोऽव रुद्ध  
ओजस्वैव भवति यो राष्ट्रादपभूतः स्यात्तस्मै होतव्या यावन्तोऽस्य रथाः  
स्युस्तान्ब्रूयाद्युद्धमिति राष्ट्रमेवास्मै युनक्त्याहुतयो वा एतस्याक्लृप्ता  
यस्य राष्ट्रं न कल्पते स्वरथस्य दक्षिणं चक्रम्प्रवृह्य नाडीमभि  
जुहुयादाहुतीरेवास्य कल्पयति ता अस्य कल्पमाना राष्ट्रमनु कल्पते  
संग्रामे संयत्ते होतव्या राष्ट्रं वै राष्ट्रभृतौ राष्ट्रे खलु वा एते व्यायच्छन्ते ये  
संग्रामं संयन्ति यस्य पूर्वस्य जुहति स एव भवति जयति तं संग्रामं  
मान्धुक इध्मो भवत्यङ्गारा एव प्रतिवेष्टमाना अमित्राणामस्य सेनाम्प्रति  
वेष्टयन्ति य उन्माद्येत्तस्मै होतव्या गन्धर्वाप्सरसो वा एतमुन्मादयन्ति य  
उन्माद्येत्येते खलु वै गन्धर्वाप्सरसो यद्राष्ट्रभृतस्तस्मै स्वाहा ताभ्यः  
स्वाहेति जुहोति तेनैवैनाञ्छमयति नैर्यगोध औदुम्बर आश्वत्थः प्लाक्ष  
इतीध्मो भवत्येते वै गन्धर्वाप्सरसां गृहाः स्व एवैनानायतने

शमयत्य भिचरता प्रतिलोमं होतव्याः प्राणानेवास्य प्रतीचः प्रति यौति  
तं ततो येन केन च स्तृणुते स्वकृत इरिणे जुहोति प्रदरे वैतद्वा अस्यै  
निर्ऋतिगृहीतं निर्ऋतिगृहीत एवैनं निर्ऋत्या ग्राहयति यद्वाचः क्रूरं तेन  
वषट्करोति वाच एवैनं क्रूरेण प्र वृश्चति ताजगार्तिमाच्छति यस्य  
कामयेतान्नाद्यमा ददीयेति तस्य सभायामुत्तानो निपद्य भुवनस्य पत इति  
तृणानि सं गृह्णीयात्प्रजापतिर्वै भुवनस्य पतिः प्रजापतिनेवास्यान्नाद्यमा  
दत्त इदमहममुष्यामुष्यायणस्यान्नाद्यं हरामीत्याहान्नाद्यमेवास्य हरति  
षड्भिर्हरति षड्वा ऋतवः प्रजापतिनेवास्यान्नाद्यमादायर्तवोऽस्मा अनु प्र  
यच्छन्ति यो ज्येष्ठबन्धुरपभूतः स्यात् स्थलेऽवसाय्य ब्रह्मौदनं  
चतुःशरावम्पक्त्वा तस्मै होतव्या वर्ष्म वै राष्ट्रभृतो वर्ष्म स्थलं वर्ष्मणैवैनं  
वर्ष्म समानानां गमयति चतुःशरावो भवति दिद्वैव प्रति तिष्ठति क्षीरे  
भवति रुचमेवास्मिन्दधात्युद्धरति श्रुतत्वाय सर्पिष्वान्भवति मेध्यत्वाय  
चत्वारं आर्षेयाः प्राश्नन्ति दिशामेव ज्योतिषि जुहोति ॥८॥

देविका निर्वपेत्प्रजाकामश्छन्दांसि वै देविकाश्छन्दांसीव खलु वै  
प्रजाश्छन्दोभिरेवास्यै प्रजाः प्र जनयति प्रथमं धातारं करोति मिथुनी एव  
तेन करोत्यन्वेवास्मा अनुमतिर्मन्यते राते राका प्र सिनीवाली जनयति  
प्रजास्वेव प्रजातासु कुह्वा वाचं दधत्येता एव  
निर्वपेत्पशुकामश्छन्दांसि वै देविकाश्छन्दांसीव खलु वै  
पशवश्छन्दोभिरेवास्यै पशून् जनयति प्रथमं धातारं करोति प्रैव तेन  
वापयत्यन्वेवास्मा अनुमतिर्मन्यते राते राका प्र सिनीवाली जनयति  
पशूनेव प्रजातान्कुह्वा प्रति ष्ठापयत्येता एव  
निर्वपेद्ग्रामकामश्छन्दांसि वै देविकाश्छन्दांसीव खलु वै

ग्रामश्छन्दोभिरेवास्मै ग्राममव रुद्धे मध्यतो धातारं करोति मध्यत एवैनं  
ग्रामस्य दधात्येता एव निर्वपेज्जयोगामयावी छन्दांसि वै  
देविकाश्छन्दांसि खलु वा एतमभि मन्यन्ते यस्य ज्योगामयति  
छन्दोभिरेवैनमगदं करोति मध्यतो धातारं करोति मध्यतो वा  
एतस्याक्लृप्तं यस्य ज्योगामयति मध्यत एवास्य तेन कल्पयत्येता एव  
निर्वपेद्यं यज्ञो नोपनमेच्छन्दांसि वै देविकाश्छन्दांसि खलु वा एतं  
नोप नमन्ति यं यज्ञो नोपनमति प्रथमं धातारं करोति मुखत एवास्मै  
छन्दांसि दधात्युपैनं यज्ञो नमत्येता एव निर्वपेदीजानश्छन्दांसि वै  
देविका यातयामानीव खलु वा एतस्य छन्दांसि य ईजान उत्तमं  
धातारं करोत्युपरिष्ठादेवास्मै छन्दांस्ययातयामान्यव रुद्ध उपैनमुत्तरो  
यज्ञो नमत्येता एव निर्वपेद्यम्मेधा नोपनमेच्छन्दांसि वै  
देविकाश्छन्दांसि खलु वा एतं नोप नमन्ति यम्मेधा नोपनमति प्रथमं  
धातारं करोति मुखत एवास्मै छन्दांसि दधात्युपैनम्मेधा नमत्येता एव  
निर्वपेद्रुक्कामश्छन्दांसि वै देविकाश्छन्दांसि खलु वै  
रुक्छन्दोभिरेवास्मिन्नुचं दधाति क्षीरे भवन्ति रुचमेवास्मिन्दधति मध्यतो  
धातारं करोति मध्यत एवैनं रुचो दधाति गायत्री वा  
अनुमतिस्त्रिष्टुग्राका जगती सिनीवाल्त्यनुष्टुप्कुहूर्धाता वषट्कारः पूर्वपक्षो  
राकारपरपक्षः कुहूरमावास्या सिनीवाली पौर्णमास्यनुमतिश्चन्द्रमा धाताष्टौ  
वसवोऽष्टाक्षरा गायत्र्येकादश रुद्रा एकादशाक्षरा त्रिष्टुब्धादशादित्या  
द्वादशाक्षरा जगती प्रजापतिरनुष्टुब्धाता वषट्कार एतद्वै देविकाः सर्वाणि  
च छन्दांसि सर्वाश्च देवता वषट्कार स्ता यत्सह सर्वा निर्वपेदीश्वरा  
एनम्प्रदहो द्वे प्रथमे निरुप्य धातुस्तृतीयं निर्वपेत्तथौ एवोत्तरे निर्वपेत्तथैनं  
न प्र दहन्त्यथो यस्मै कामाय निरुप्यन्ते तमेवाभिरुपाप्नोति ॥६॥



वास्तोष्पते प्रति जानीह्यस्मान्त्स्वावेशो अनमीवो भवा नः । यत्त्वेमहे  
 प्रति तन्नौ जुषस्व शं न एधि द्विपदे शं चतुष्पदे ॥  
 वास्तोष्पते शग्मया स्रंसदा ते सक्षीमहि रणवया गातुमत्या । आवः  
 क्षेम उत योगे वरं नो यूयम्पात स्वस्तिभिः सदा नः ॥  
 यत्सायम्प्रातरग्निहोत्रं जुहोत्याहुतीष्टका एव ता उप धत्ते  
 यजमानोऽहोरात्राणि वा एतस्येष्टका य  
 आहिताग्निर्यत्सायम्प्रातर्जुहोत्यहोरात्राण्येवाप्त्वेष्टकाः कृत्वोप धत्ते दश  
 समानत्रं जुहोति दशाक्षरा विराड्विराजमेवाप्त्वेष्टकां कृत्वोप धत्तेऽथौ  
 विराज्येव यज्ञमाप्नोति चित्यश्चित्योऽस्य भवति तस्माद्यत्र दशोषित्वा  
 प्रयाति तद्यज्ञवास्त्ववास्त्वेव तद्यत्ततोऽर्वाचीनं रुद्रः खलु वै  
 वास्तोष्पतिर्यदहुत्वा वास्तोष्पतीयम्प्रयायाद्भुद्र एनम्भूत्वाग्निरनूत्थाय  
 हन्याद्वास्तोष्पतीयं जुहोति भागधेयैनेवैनं शमयति नार्तिमार्च्छति  
 यजमानो यद्युक्ते जुहुयाद्यथा प्रयाति वास्तावाहुतिं जुहोति तादृगेव  
 तद्यद्युक्ते जुहुयाद्यथा क्षेम आहुतिं जुहोति तादृगेव तदहुतमस्य  
 वास्तोष्पतीयं स्यादक्षिणो युक्तो भवति सव्योऽयुक्तोऽथ वास्तोष्पतीयं  
 जुहोत्युभयमेवाकरपरिवर्गमेवैनं शमयति यदेकया जुहुयाद्विहोमं  
 कुर्यात्पुरोऽनुवाक्यामनूच्य याज्यया जुहोति सदेवत्वाय यद्भुत  
 आदध्याद्भुद्रं गृहानन्वारोहयेद्यद्वक्षणा न्यसम्प्रक्षाप्य प्रयायाद्यथा  
 यज्ञवेशसं वादहनं वा तादृगेव तदयं ते योनिर्ऋत्विय इत्यरण्योः  
 समारोहयत्येष वा अग्नेर्योनिः स्व एवैनं योनौ समारोहयत्यथो  
 खल्वाहुर्यदरण्योः समारूढो नश्येदुदस्याग्निः सीदेत्पुनराधेयः स्यादिति  
 या तै अग्ने यज्ञिया तनूस्तयेह्या रोहेत्यात्मन्समारोहयते यजमानो वा

अग्नेर्योनिः स्वायामेवैनं योन्याँः समारोहयते ॥१०॥

त्वमग्ने बृहद्वयो दधासि देव दाशुषे । कविर्गृहपतिर्युवा ॥  
हव्यवाङ्गिरजरः पिता नो विभुर्विभावा सुदृशीको अस्मे । सुगार्हपत्याः  
समिषो दिदीह्यस्मद्रियक्सम्मिमीहि श्रवाँसि ॥

त्वं च सोम नो वशो जीवातुं न मरामहे । प्रियस्तोत्रो वनस्पतिः ॥  
ब्रह्मा देवानाम्पदवीः कवीनामृषिर्विप्राणाम्महिषो मृगाणाम् । श्येनो  
गृध्राणाँः स्वधितिर्वनानाँः सोमः पवित्रमत्यैति रेभन् ॥  
आ विश्वदैवँः सत्पतिँः सूक्तैरद्या वृणीमहे । सत्यसंवँः सवितारम् ॥  
आ सत्येन रजसा वर्तमानो निवेशयन्नमृतम्मर्त्यं च । हिरण्ययेन सविता  
रथेना देवो याति भुवना विपश्यन् ॥

यथा नो अदितिः करत्पश्चे नृभ्यो यथा गवे । यथा तोकार्य रुद्रियम् ॥  
मा नस्तोके तनये मा न आर्युषि मा नो गोषु मा नो अश्वेषु रीरिषः ।  
वीरान्मा नो रुद्र भामितो वधीर्हविष्मन्तो नमसा विधेम ते ॥  
उदप्रुतो न वयो रक्षमाणा वावदतो अभ्रियस्येव घोषाः । गिरिभ्रजो  
नोर्मयो मदन्तो बृहस्पतिमभ्यर्का अनावन् ॥

हँःसैरिव सखिभिर्वावदद्भिरश्मन्मयानि नहना व्यस्यन् ।  
बृहस्पतिरभिकर्निक्रदद्गा उत प्रास्तौदुच्च विद्वाँः अगायत् ॥ एन्द्र  
सानसिँः रयिँः सजित्वानँः सदासहम् । वर्षिष्ठमूतये भर ॥  
प्र संसाहिषे पुरुहूत शत्रूञ्जयेष्ठस्ते शुष्म इह रातिरस्तु । इन्द्रा भर  
दक्षिणेना वसूनि पतिः सिन्धूनामसि रेवतीनाम् ॥

त्वँः सुतस्य पीतये सद्यो वृद्धो अजायथाः । इन्द्र ज्यैष्ठ्याय सुक्रतो ॥  
भुवस्त्वमिन्द्र ब्रह्मणा महान्भुवो विश्वेषु सर्वनेषु यज्ञियः । भुवो

नृञ्चयौतो विश्वस्मिन्भरे ज्येष्ठश्च मन्त्रो विश्वचर्षणे ॥ मित्रस्य चर्षणीधृतः  
श्रवो देवस्य सानसिम् । सत्यं चित्रश्रवस्तमम् ॥

मित्रो जनान्यातयति प्रजानन्मित्रो दाधार पृथिवीमुत द्याम् । मित्रः  
कृष्टीरनिमिषाभि चष्टे सत्याय हव्यं घृतवद्विधेम ॥

प्र स मित्रं मर्तो अस्तु प्रयस्वान्यस्त आदित्य शिक्तं ब्रूतेन । न हन्यते  
न जीयते त्वोतो नैनमहो अशनोत्यन्तितो न दूरात् ॥

यच्चिद्धि ते विशो यथा प्र देव वरुण व्रतम् । मिमीमसि द्यविद्यवि ॥  
यत्किं चेदं वरुण दैव्ये जनेऽभिद्रोहम्मनुष्याश्चरामसि । अचिन्ती यत्तव  
धर्मा युयोपिम मा नस्तस्मादेनसो देव रीरिषः ॥

कित्वासो यद्रिरिपुर्न दीवि यद्वा घा सत्यमुत यन्न विद्य । सर्वा ता वि  
ष्यं शिथिरेव देवार्था ते स्याम वरुण प्रियासः ॥११॥

इति तृतीयकाण्डे चतुर्थः प्रपाठकः ४

अथ तृतीयकाण्डे पञ्चमः प्रपाठकः ५

पूर्णा पश्चादुत पूर्णा पुरस्तादुन्मध्यतः पौर्णमासी जिगाय ।  
तस्यां देवा अधि संवसन्त उत्तमे नाकं इह मादयन्ताम् ॥  
यत्ते देवा अर्धधुर्भागधेयममावास्ये संवसन्तो महित्वा ।  
सा नो यज्ञं पिपृहि विश्ववारे रयिं नो धेहि सुभगे सुवीरम् ॥  
निवेशनी सङ्गमनी वसूनां विश्वा रूपाणि वसून्यावेशयन्ती ।  
सहस्रपोषं सुभगा रराणा सा न आ गन्वर्चसा संविदाना ॥  
अग्नीषोमौ प्रथमौ वीर्येण वसून्नुद्रानादित्यानिह जिन्वतम् ।  
माध्यं हि पौर्णमासं जुषेथां ब्रह्मणा वृद्धौ सुकृतेन सातावथास्मभ्यं  
सहवीरां रयिं नि यच्छतम् ॥

आदित्याश्चाङ्गिरसश्चाग्नीनादधत् ते दर्शपूर्णमासौ प्रैप्सन्तेषामङ्गिरसां  
निरुप्तं हविरासीदथादित्या एतौ होमावपश्यन्तावजुहवुस्ततो वै ते  
दर्शपूर्णमासौ पूर्वं आलभन्त दर्शपूर्णमासावालभमान एतौ होमौ  
पुरस्ताञ्जुहुयात्साक्षादेव दर्शपूर्णमासावा लभते ब्रह्मवादिनो वदन्ति स  
त्वै दर्शपूर्णमासावा लभेत य एनयोरनुलोमं च प्रतिलोमं च  
विद्यादित्यिमावास्याया ऊर्ध्वं तदनुलोमं पौर्णमास्यै प्रतीचीनं तत्प्रतिलोमं  
यत्पौर्णमासीं पूर्वामालभेत प्रतिलोममेनावा लभेतामुमपक्षीयमाणमन्वप  
क्षीयेत सारस्वतौ होमौ पुरस्ताञ्जुहुयादमावास्या वै  
सरस्वत्यनुलोममेवेनावा लभतेऽमुमाप्यार्यमानमन्वा प्यायत  
आग्रावैष्णवमेकादशकपालं पुरस्तान्निर्वपेत्सरस्वत्यै चरुं सरस्वते  
द्वादशकपालं यदाग्नेयो भवत्यग्निर्वै यज्ञमुखं यज्ञमुखमेवद्धिं पुरस्ताद्धत्ते  
यद्वैष्णवो भवति यज्ञो वै विष्णुर्यज्ञमेवारभ्य प्र तनुते सरस्वत्यै चरुर्भवति  
सरस्वते द्वादशकपालोऽमावास्या वै सरस्वती पूर्णमासः सरस्वान्तावेव  
साक्षादा रभत ऋध्नोत्याभ्यां द्वादशकपालः सरस्वते भवति मिथुनत्वाय  
प्रजात्यै मिथुनौ गावौ दक्षिणा समृद्धयै ॥१॥

ऋषयो वा इन्द्रं प्रत्यक्षं नापश्यन्तं वसिष्ठः प्रत्यक्षम्पश्यत्सोऽब्रवीद्ब्राह्मणं  
ते वक्ष्यामि यथा त्वत्पुरोहिताः प्रजाः प्रजनिष्यन्तेऽथ मेतेरेभ्य ऋषिभ्यो  
मा प्र वोच इति तस्मा एतान्स्तोमभागानब्रवीत्ततो वसिष्ठपुरोहिताः प्रजाः  
प्राजायन्त तस्माद्वासिष्ठो ब्रह्मा कार्यः प्रैव जायते रश्मिरसि क्षयाय त्वा  
क्षयं जिन्वेत्याह देवा वै क्षयो देवेभ्य एव यज्ञं प्राह प्रेतिरसि धर्माय त्वा  
धर्मं जिन्वेत्याह मनुष्या वै धर्मो मनुष्येभ्य एव यज्ञं प्राहा न्वितिरसि  
दिवे त्वा दिवं जिन्वेत्याहैभ्य एव लोकेभ्यो यज्ञं प्राह विष्टम्भोऽसि वृष्ट्यै

त्वा वृष्टिं जिन्वेत्याह वृष्टिमेवाव रुद्धे प्रवास्यनुवासीत्याह  
 मिथुनत्वायो शिगंसि वसुभ्यस्त्वा वसूञ्जिन्वेत्याहाष्टौ वसव एकादश  
 रुद्रा द्वादशादित्या एतावन्तो वै देवास्तेभ्य एव यज्ञं प्राहौ जौंसि  
 पितृभ्यस्त्वा पितृञ्जिन्वेत्याह देवानेव पितृननु सं तनोति तन्तुरसि  
 प्रजाभ्यस्त्वा प्रजा जिन्वेत्याह पितृनेव प्रजा अनु सं तनोति पृतनाषाडसि  
 पशुभ्यस्त्वा पशूञ्जिन्वेत्याह प्रजा एव पशूननु सं तनोति  
 रेवदस्योषधीभ्यस्त्वौषधीर्जिन्वेत्याहौषधीष्वेव पशून्प्रति  
 ष्ठापयत्य भिजिदसि युक्तग्रावेन्द्राय त्वेन्द्रं जिन्वेत्याहाभिजित्या  
 अधिपतिरसि प्राणाय त्वा प्राणं जिन्वेत्याह प्रजास्वेव प्राणान्दधाति  
 त्रिवृदसि प्रवृदसीत्याह मिथुनत्वाय सँरोहौंसि नीरोहौंसित्याह  
 प्रजात्यै वसुकौंसि वेषश्रिरसि वस्यष्टिरसीत्याह प्रतिष्ठित्यै ॥२॥

अग्निना देवेन पृतना जयामि गायत्रेण च्छन्दसा त्रिवृता स्तोमेन रथन्तरेण  
 साम्ना वषट्कारेण वज्रेण पूर्वजान्भ्रातृव्यानधरान्पादयाम्यवैनान्बाधे  
 प्रत्यैनान्नुदेऽस्मिन्क्षयेऽस्मिन्भूमिलोके योऽस्मान्द्वेष्टि यं च वयं द्विष्मो  
 विष्णोः क्रमेणात्यैनान्क्रामामीन्द्रेण देवेन पृतना जयामि त्रैष्टुभेन  
 च्छन्दसा पञ्चदशेन स्तोमेन बृहता साम्ना वषट्कारेण वज्रेण  
 सहजान्विश्वैभिर्देवेभिः पृतना जयामि जागतेन च्छन्दसा सप्तदशेन  
 स्तोमेन वामदेव्येन साम्ना वषट्कारेण वज्रेणापरजा निन्द्रेण सयुजो  
 वयँ सासह्याम पृतन्यतः । घन्तौ वृत्रारयप्रति । यत्तै अग्ने तेजस्तेनाहं  
 तेजस्वी भूयासं यत्तै अग्ने वर्चस्तेनाहं वर्चस्वी भूयासं यत्तै अग्ने  
 हरस्तेनाहँ हरस्वी भूयासम् ॥३॥

ये देवा यज्ञहनों यज्ञमुषः पृथिव्यामध्यासते । अग्निर्मा तेभ्यो रक्षतु  
गच्छेम सुकृतौ वयम् ॥

आगन्म मित्रावरुणा वरेण्या रात्रीणाम्भागो युवयोर्यो अस्ति । नाकं  
गृह्णानाः सुकृतस्य लोके तृतीयै पृष्ठे अधि रोचने दिवः ॥

ये देवा यज्ञहनों यज्ञमुषोऽन्तरिक्षेऽध्यासते । वायुर्मा तेभ्यो रक्षतु गच्छेम  
सुकृतौ वयम् ॥

यास्ते रात्रीः सवितर्देवयानीरन्तरा द्यावापृथिवी वियन्ति । गृहैश्च सर्वैः  
प्रजयान्वग्रे सुवो रुहाणास्तरता रजांसि ॥

ये देवा यज्ञहनों यज्ञमुषो दिव्यध्यासते । सूर्यो मा तेभ्यो रक्षतु गच्छेम  
सुकृतौ वयम् ॥

येनेन्द्राय समभरः पयांस्युत्तमेन हविषा जातवेदः । तेनाग्रे त्वमुत  
वर्धयेम संजातानां श्रेष्ठ्य आ धेह्येनम् ॥

यज्ञहनों वै देवा यज्ञमुषः सन्ति त एषु लोकेष्वसत आददाना  
विमथ्नाना यो ददाति यो यजते तस्य । ये देवा यज्ञहनः  
पृथिव्यामध्यासते ये अन्तरिक्षे ये दिवीत्याहेमानेव लोकांस्तीर्त्वा  
सर्गहः सर्पशुः सुवर्गं लोकमेत्यप वै सोमैनेजानाद्देवताश्च यज्ञश्च  
क्रामन्त्याग्रेयम्पञ्चकपालमुदवसानियं निर्वपेदग्निः सर्वा देवताः पाङ्क्तौ  
यज्ञो देवताश्चैव यज्ञं चाव रुद्धे गायत्रो वा अग्निर्गायत्रच्छन्दास्तं छन्दसा  
व्यर्धयति यत्पञ्चकपालं करोत्यष्टाकपालः कार्योऽष्टाक्षरा गायत्री  
गायत्रोऽग्निर्गायत्रच्छन्दाः स्वेनैवैनं छन्दसा समर्धयति पङ्क्त्यौ  
याज्यानुवाक्यै भवतः पाङ्क्तौ यज्ञस्तेनैव यज्ञान्नेति ॥४॥

सूर्यो मा देवो देवेभ्यः पातु वायुरन्तरिक्षाद्यजमानोऽग्निर्मा पातु चक्षुषः ।

सन्न शूष सवितुर्विश्वचर्षण एतेभिः सोम नामभिर्विधेम ते तेभिः सोम नामभिर्विधेम ते ।

अहम्परस्तादहमवस्तादहं ज्योतिषा वि तमो ववार । यदन्तरिक्षं तदु मे पिताभूदहं सूर्यमुभयतौ ददर्शाहम्भूयासमुत्तमः समानानामा समुद्रादान्तरिक्षात्प्रजापतिरुद्धिं च्यावयातीन्द्रः प्र स्त्रौतु मरुतो वर्षयन्तू न्भय पृथिवीम्भिन्द्रीदं दिव्यं नभः । उदनो दिव्यस्य नो देहीशानो वि सृजा दृतिम् ॥

पशवो वा एते यदादित्य एष रुद्रो यदग्निरोषधीः प्रास्याग्नावादित्यं जुहोति रुद्रादेव पशून्तर्द्धात्यथो ओषधीष्वेव पशून्प्रतिष्ठापयति कविर्यज्ञस्य वि तनोति पन्थां नाकस्य पृष्ठे अर्धि रोचने दिवः । येन हव्यं वहसि यासि दूत इतः प्रचेता अमुतः सनीयान् ॥

यास्ते विश्वाः समिधः सन्त्यग्ने याः पृथिव्याम्बर्हिषि सूर्ये याः । तास्ते गच्छन्त्वाहुतिं घृतस्य देवायते यजमानाय शर्म ॥

आशासानः सुवीर्यं रायस्पोषं स्वश्वियम् । बृहस्पतिना राया स्वगाकृतो मह्यं यजमानाय तिष्ठ ॥५॥

सं त्वा नह्यामि पर्यसा घृतेन सं त्वा नह्याम्यप ओषधीभिः । सं त्वा नह्यामि प्रजयाहमद्य सा दीक्षिता संनवो वाजमुस्मे ॥

प्रैतु ब्रह्मणस्पती वेदिं वर्णेन सीदतु ।

अथाहमनुकामिनी स्वे लोके विशा इह ।

सुप्रजसस्त्वा वयं सुपतीरुप सेदिम । अग्ने सपत्नदम्भनमदब्धासो अदाभ्यम् ॥

इमं वि ष्यामि वरुणस्य पाशं यमबधीत सविता सुकेतः । धातुश्च योनौ

सुकृतस्य लोके स्योनम्मे सह पत्या करोमि ॥  
 प्रेह्युदेह्युतस्य वामीरन्वग्निस्तेऽग्रं नयत्वदितिर्मध्यं ददताँ रुद्रावसृष्टासि  
 युवा नाम मा मा हिँसी र्वसुभ्यो रुद्रेभ्य आदित्येभ्यो विश्वेभ्यो वो  
 देवेभ्यः पुत्रेजनीर्गृह्णामि यज्ञाय वः पुत्रेजनीः सादयामि विश्वस्य ते  
 विश्वावतो वृष्णिायावतः तवाग्ने वामीरनु संदृशि विश्वा रेताँसि  
 धिषीया गन्देवान्यज्ञो नि देवीर्देवेभ्यो यज्ञमशिषन्नस्मिन्त्सुन्वति यजमान  
 आशिषः स्वाहाकृताः समुद्रेष्ठा गन्धर्वमा तिष्ठतानु । वार्तस्य पत्मन्निड  
 ईडिताः ॥६॥

वषट्कारो वै गायत्रियै शिरौऽच्छिनत्तस्यै रसः परापतत्स  
 पृथिवीम्प्राविशत्स खदिरौऽभवद्यस्य खादिरः स्रुवो भवति च्छन्दसामेव  
 रसेनाव द्यति सरसा अस्याहुतयो भवन्ति तृतीयस्यामितो दिवि सोम  
 आसीत्तं गायत्र्याहृत्तस्य पर्णमच्छिद्यत तत्पर्णोऽभवत्तत्पर्णस्य पर्णत्वं यस्य  
 पर्णमयी जुहूर्भवति सौम्या अस्याहुतयो भवन्ति जुषन्तेऽस्य देवा  
 आहुती देवा वै ब्रह्मन्नवदन्त तत्पर्ण उपाशृणोत्सुश्रवा वै नाम यस्य  
 पर्णमयी जुहूर्भवति न पापँ श्लोकँ शृणोति ब्रह्म वै पर्णो विरामरुतोऽन्नं  
 विरामारुतोऽश्वत्थो यस्य पर्णमयी जुहूर्भवत्याश्वत्थ्युपभृद्ब्रह्मणैवान्नमव  
 रुन्देऽथो ब्रह्मैव विश्वध्यूहति राष्ट्रं वै पर्णो विडँश्वत्थो यत्पर्णमयी  
 जुहूर्भवत्याश्वत्थ्युपभृद्राष्ट्रमेव विश्वध्यूहति प्रजापतिर्वा अजुहोत्सा  
 यत्राहुतिः प्रत्यतिष्ठत्ततो विकङ्कत उदतिष्ठत्ततः प्रजा असृजत यस्य  
 वैकङ्कती ध्रुवा भवति प्रत्येवास्याहुतयस्तिष्ठन्त्यथो प्रैव जायत एतद्वै  
 स्रुवाँ रूपं यस्यैवँ रूपाः स्रुचो भवन्ति सर्वाण्येवैनँ रूपाणि  
 पशूनामुप तिष्ठन्ते नास्यापरूपमात्मजायते ॥७॥



उपयामगृहीतोऽसि प्रजापतये त्वा ज्योतिष्मते ज्योतिष्मन्तं गृह्णामि दक्षाय  
दक्षवृधे रातं देवेभ्योऽग्निजिह्वेभ्यस्त्वर्तायुभ्य इन्द्रज्येष्ठेभ्यो वरुणराजभ्यो  
वातापिभ्यः पर्जन्यात्मभ्यो दिवे त्वान्तरिक्षाय त्वा पृथिव्यै त्वापेन्द्र  
द्विषतो मनोऽप जिज्यासतो जुह्यप यो नोऽरातीयति तं जहि प्राणाय  
त्वापानाय त्वा व्यानाय त्वा सते त्वासते त्वाद्भ्यस्त्वौषधीभ्यो  
विश्वेभ्यस्त्वा भुतेभ्यो यतः प्रजा अक्खिद्रा अजायन्त तस्मै त्वा प्रजापतये  
विभूदान्ने ज्योतिष्मते ज्योतिष्मन्तं जुहोमि ॥८॥

यां वा अध्वर्युश्च यजमानश्च देवतामन्तरितस्तस्या आ वृश्चयेते  
प्राजापत्यं दधिग्रहं गृह्णीयात्प्रजापतिः सर्वा देवता देवताभ्य एव नि  
हुवाते ज्येष्ठो वा एष ग्रहाणां यस्यैष गृह्यते ज्येष्ठ्यमेव गच्छति सर्वासां  
वा एतद्देवतानां रूपं यदेष ग्रहो यस्यैष गृह्यते सर्वाण्येवैनं रूपाणि  
पशूनामुप तिष्ठन्त उपयामगृहीतोऽसि प्रजापतये त्वा ज्योतिष्मते  
ज्योतिष्मन्तं गृह्णामीत्याह ज्योतिरेवैनं समानानां  
करोत्यग्निजिह्वेभ्यस्त्वर्तायुभ्य इत्याहैतावतीर्वे देवतास्ताभ्य एवैनं  
सर्वाभ्यो गृह्णत्यपेन्द्र द्विषतो मन इत्याह भ्रातृव्यापनुत्त्यै प्राणाय  
त्वापानाय त्वेत्याह प्राणानेव यजमाने दधाति तस्मै त्वा प्रजापतये  
विभूदान्ने ज्योतिष्मते ज्योतिष्मन्तं जुहोमीत्याह प्रजापतिः सर्वा देवताः  
सर्वाभ्य एवैनं देवताभ्यो जुहोत्या ज्यग्रहं गृह्णीयात्तेजस्कामस्य तेजो वा  
आज्यं तेजस्व्यैव भवति सोमग्रहं गृह्णीयाद्ब्रह्मवर्चस्कामस्य ब्रह्मवर्चसं  
वै सोमो ब्रह्मवर्चस्यैव भवति दधिग्रहं गृह्णीयात्पशुकामस्योर्ग्वै  
दध्यूर्कपर्शव ऊर्जेवास्मा ऊर्जम्पशूनव रुद्धे ॥९॥

त्वे क्रतुमपि वृञ्जन्ति विश्वे द्विर्यदेते त्रिर्भवन्त्यूमाः । स्वादोः स्वादीयः  
स्वादुना सृजा समत ऊ षु मधु मधुनाभि योधि ॥  
उपयामगृहीतोऽसि प्रजापतये त्वा जुष्टं गृह्णाम्येष ते योनिः प्रजापतये त्वा ।  
प्राणग्रहान्गृह्णात्येतावद्वा अस्ति यावदेते ग्रहाः स्तोमाश्छन्दाँसि पृष्ठानि  
दिशो यावदेवास्ति तदव रुद्धे ज्येष्ठा वा एतान्ब्राह्मणाः पुरा  
विद्वामक्रन्तस्मात्तेषाँ सर्वा दिशोऽभिजिता अभूवन्वस्यैते गृह्यन्ते  
ज्येष्ठयमेव गच्छत्यभि दिशो जयति पञ्च गृह्यन्ते पञ्च दिशः सर्वास्वेव  
दिद्वृधुवन्ति नवनव गृह्यन्ते नव वै पुरुषे प्राणाः प्राणानेव यजमानेषु  
दधति प्रायणीये चोदयनीये च गृह्यन्ते प्राणा वै प्राणग्रहाः प्राणैरेव प्र  
यन्ति प्राणैरुद्यन्ति दशमेऽहंनृह्यन्ते प्राणा वै प्राणग्रहाः प्राणेभ्यः खलु वा  
एतत्प्रजा यन्ति यद्वामदेव्यं योनेश्चयवते दशमे ऽहंन्वामदेव्यं योनेश्चयवते  
यद्दशमेऽहंनृह्यन्ते प्राणेभ्य एव तत्प्रजा न यन्ति ॥१०॥

प्र देवं देव्या धिया भरता जातवेदसम् । हव्या नो वक्षदानुषक् ॥  
अयमुष्य प्र देवयुर्होता यज्ञाय नीयते । रथो न योरभीवृतो घृणीवाञ्चेतति  
त्मना ॥

अयमग्निरुष्यत्यमृतादिव जन्मनः । सहसश्चित्सहीयान्देवो जीवातवे  
कृतः ॥

इडायास्त्वा पदे वयं नाभा पृथिव्या अर्धि । जातवेदो नि धीमह्यग्ने  
हव्याय वोढवे अग्ने विश्वेभिः स्वनीक देवैरूणावन्तमप्रथमः सीद योनिम्  
। कुलायिनं घृतवन्तँ सवित्रे यज्ञं नय यजमानाय साधु ॥

सीद होतुः स्व उँ लोके चिकित्वान्त्सादया यज्ञँ सुकृतस्य योनौ ।

दे॒वा॒वी॒र्दे॒वान्ह॒विषां॑ य॒जा॒स्य॒ग्रे॑ बृ॒हद्य॑र्ज॒माने॑ व॒यो॒ धाः॑ ॥  
 नि॒ होता॑ हो॒तृष॑द॒ने॒ वि॒दान॑स्त्वे॒षो दी॑दि॒वाँ॒ अस॑दत्सु॒दक्षः॑ ।  
 अ॒द॒ब्ध॒व्रत॑प्र॒मति॑र्व॒सिष्ठः॑ स॒हस्र॑म्भ॒रः शु॒चि॑जिह्वो अ॒ग्निः ॥  
 त्वं दू॒तस्त्व॑मु॒ नः प॑र॒स्पास्त्वं॑ व॒स्य॒ आ वृ॑षभ॒ प्रणे॑ता । अ॒ग्ने॒ तो॒कस्य॑  
 न॒स्तने॑ त॒नूना॑म॒प्रयु॑च्छ॒न्दी॒द्यद्वो॑धि गो॒पाः ॥  
 अ॒भि त्वा॑ दे॒व स॒वि॒त॒री॒शा॒नं वा॒र्या॑णाम् । स॒दा॒व॒न्भा॒ग॒मी॒महे॑ ॥  
 म॒ही द्यौः॑ पृथि॒वी च॑ न इ॒मं य॒ज्ञमि॑मि॒क्षता॑म् । पि॒पृतां॑ नो॒ भरी॑मभिः ॥  
 त्वा॒म॒ग्ने पु॑ष्करा॒दध्य॑थ॒र्वा नि॑र॒मन्थ॑त । मू॒र्ध्नो॑ वि॒श्वस्य॑ वा॒घतः॑ ॥  
 तमु॒ त्वा द॒ध्य॒ङ्ङृषिः॑ पु॒त्र ई॒धे अ॒थर्व॑णः । वृ॒त्र॒ह॒ण॑म्पु॒रं॒द॒रम् ॥  
 तमु॒ त्वा पा॑थ्यो वृषा॒ समी॑धे द॒स्यु॒हन्त॑मम् । ध॒नं॒ज॒यँ र॑णै॒रणे ॥  
 उ॒त ब्रु॑वन्तु ज॒न्तव॑ उ॒द॒ग्नि॑र्वृ॒त्रहा॑र्जनि । ध॒नं॒ज॒यो र॑णै॒रणे ॥  
 आ यँ॑ ह॒स्ते न॒ खा॒दि॒नँ॑ शि॒शुं जा॒तं न॒ बिभ्र॑ति । वि॒शाम॑ग्निँ॒  
 स्व॑ध्व॒रम् ॥  
 प्र दे॒वं दे॒ववी॑तये॒ भर॑ता व॒सु॒वि॒त्त॑मम् । आ॒ स्वे यो॒नौ नि॑ षी॒दतु॑ ॥  
 आ जा॒तं जा॒तवे॑द॒सि प्रि॒यँ शि॑शी॒ताति॑थिम् । स्यो॒न आ॒ गृ॒हप॑तिम् ॥  
 अ॒ग्निना॑ग्निः स॒मि॒ध्यते॑ क॒वि॒र्गृ॒हप॑तिर्यु॒वा । ह॒व्य॒वा॒ङ्जु॒ह्वास्यः॑ ॥  
 त्वँ॑ ह्य॒ग्ने अ॒ग्निना॑ वि॒प्रो वि॒प्रैण॑ स॒न्त्स॒ता । स॒खा स॒ख्या॑ स॒मि॒ध्यसे॑ ॥  
 त॒मर्ज॑यन्त सु॒क्रतु॑म्पु॒रो॒यावा॑न॒मा॒जिषु॑ । स्वेषु॒ क्षये॑षु वा॒जिन॑म् ॥  
 य॒ज्ञेन॑ य॒ज्ञम॑य॒जन्त॑ दे॒वास्ता॑नि॒ धर्मा॑णि प्रथ॒मान्या॑सन् । ते ह  
 ना॒क॒म्म॒हि॒मानः॑ स॒चन्ते॑ यत्र॒ पूर्वे॑ सा॒ध्याः सन्ति॑ दे॒वाः ॥११॥

इति तृतीयकारण्डे पञ्चमः प्रपाठकः ॥५॥

इति तृतीयं कारण्डं सम्पूर्णम् ३

अथ चतुर्थं कारुडं ४

अथ चतुर्थकारुडे प्रथमः प्रपाठकः ॥१॥

युञ्जानः प्रथमम्मनस्तत्वाय सविता धियः । अग्निं ज्योतिर्निचाय्य  
पृथिव्या अध्याभरत् ॥

युक्त्वाय मनसा देवान्सुर्वर्यतो धिया दिवम् । बृहज्ज्योतिः करिष्यतः  
सविता प्र सुवाति तान् ॥ युक्तेन मनसा वयं देवस्य सवितुः सुवे ।  
सुवर्गेयाय शक्त्यै ॥

युञ्जते मन उत युञ्जते धियो विप्रा विप्रस्य बृहतो विपश्चितः । वि होत्रा  
दधे वयुनाविदेक इन्मही देवस्य सवितुः परिष्टुतिः ॥

युजे वाम्ब्रह्म पूर्य नमोभिर्वि श्लोका यन्ति पृथ्यैव सूरः । शृणवन्ति  
विश्वे अमृतस्य पुत्रा आ ये धामानि दिव्यानि तस्थुः ॥

यस्य प्रयाणमवन्य इद्ययुर्देवा देवस्य महिमानमर्चतः । यः पार्थिवानि  
विममे स एतशो रजाँसि देवः सविता महित्वना ॥

देव सवितुः प्र सुव यज्ञम् सुव यज्ञपतिम्भगाय दिव्यो गन्धर्वः । केतपूः  
केतं नः पुनातु वाचस्पतिर्वाचमद्य स्वदाति नः ॥

इमं नो देव सवितर्यज्ञम् सुव देवायुर्वँ सखिविदँ सत्राजितं  
धनजितँ सुवर्जितम् ॥

ऋचा स्तोमँ समर्धय गायत्रेण रथंतरम् । बृहद्गायत्रवर्तनि ॥

देवस्य त्वा सवितुः प्रसर्वेऽश्विनोर्बाहुभ्याम्पूष्णो हस्ताभ्यां गायत्रेण

छन्दसा ददेऽङ्गिरस्व दभ्रिरसि नारिरसि पृथिव्याः

सधस्थादग्निम्पुरीष्यमङ्गिरस्वदा भर त्रैष्टुभेन त्वा छन्दसा

ददेऽङ्गिरस्व द्भ्रिरसि नारिरसि त्वया वयँ सधस्थ आग्निँ शक्रेम

खनितुम्पुरीष्यं जागतेन त्वा छन्दसा ददे ऽङ्गिरस्व द्धस्त आधाय सविता

बिभ्रदभ्रिं॑ हिरण्ययीम् । तया ज्योतिरजस्रमिदग्निं खात्वी न आ  
भरानुष्टुभेन त्वा छन्दसा ददेऽङ्गिरस्वत् ॥१॥

इमामगृभ्णन्नशनामृतस्य पूर्वं आयुषि विदथेषु कव्या । तया देवाः  
सुतमा बभूवुर्ऋतस्य सामन्त्सरमारपन्ती ॥  
प्रतूर्तं वाजिन्ना द्रव वरिष्ठामनु संवतम् । दिवि ते जन्म परमन्तरिक्षे  
नाभिः पृथिव्यामधि योनिः ॥  
युञ्जाथा॑ रासभं युवमस्मिन्यामै वृषणवसू । अग्निम्भरन्तमस्मयुम् ॥  
योगेयोगे तवस्तरं वाजेवाजे हवामहे । सखाय इन्द्रमृतये ॥  
प्रतूर्वन्ने ह्यवक्रामन्नशस्ती रुद्रस्य गाणपत्यान्मयोभूरेहि ।  
उर्वन्तरिक्षमन्विहि स्वस्तिगव्यूतिरभयानि कृणवन् ॥  
पूष्णा सयुजा सह । पृथिव्याः  
सधस्थादग्निम्पुरीष्यमङ्गिरस्वदच्छैह्य ग्निम्पुरीष्यमङ्गिरस्वदच्छैमो ऽग्निम्पुर  
ीष्यमङ्गिरस्वद्भरिष्यामोऽग्निम्पुरीष्यमङ्गिरस्वद्भरामः ॥  
अन्वग्निरुषसामग्रमख्यदन्वहानि प्रथमो जातवेदाः । अनु सूर्यस्य पुरुत्रा  
च रश्मीननु द्यावापृथिवी आ ततान ॥  
आगत्य वाज्यध्वनः सर्वा मृधो वि धूनुते । अग्निं॑ सधस्थे महति  
चक्षुषा नि चिकीषते ॥  
आक्रम्य वाजिनपृथिवीमग्निमिच्छ रुचा त्वम् । भूम्या वृत्वार्य नो ब्रूहि  
यतः खनाम् तं वयम् ॥  
द्यौस्ते पृष्ठम्पृथिवी सधस्थमात्मान्तरिक्षं॑ समुद्रस्ते योनिः । विख्याय  
चक्षुषा त्वमभि तिष्ठ पृतन्यतः ॥  
उत्क्राम महते सौभगायास्मादास्थानाद्द्विणोदा वाजिन् । वयं॑ स्याम

सुम॒तौ पृ॒थि॒व्या अ॒ग्निं ख॑नि॒ष्यन्त॑ उ॒पस्थे॑ अ॒स्याः ॥  
उद॑क्र॒मीद्भ्रु॒वि॒णो॒दा वा॒ज्य॒वा॒कः स लो॒कं सु॒कृत॑म॒पृथि॒व्याः । ततः  
ख॒नेम॑ सु॒प्रती॑क॒म॒ग्निं सु॒वो रु॒हाणा॑ अ॒धि ना॒कं उ॒त्त॒मे ॥  
अ॒पो दे॒वीरु॑प॒ सृज॑ म॒धु॒मती॑र॒य॒क्ष्माय॑ प्र॒जाभ्यः॑ । तासा॑ं  
स्था॒ना॒दु॒ज्जि॒हता॑मोष॒धयः॑ सु॒पिप्प॒लाः ॥  
जिघ॑र्म्य॒ग्नि॒मन॑सा घृ॒तेन॑ प्र॒ति॒क्ष्यन्त॑भ्रु॒वनानि॑ वि॒श्वा । पृ॒थुं ति॑श्वा व॒यसा  
बृ॒हन्तं॑ व्य॒चि॒ष्टम॒न्नं र॒भसं॑ वि॒दान॑म् ॥  
आ त्वा॑ जिघ॒र्मि व॑च॒सा घृ॒तेना॑र॒क्षसा॑ मन॒सा त॒ज्जुष॑स्व । म॒र्यश्रीः  
स्पृ॒ह्यद्व॑र्णो अ॒ग्निर्ना॑भि॒मृशै॑ त॒नुवा॑ ज॒र्हषा॑णः ॥  
परि॑ वा॒ज॒पतिः॑ क॒विर॒ग्निर्ह॑व्या॒न्य॒क्रमी॑त् । द॒ध॒द्र॒त्नानि॑ दा॒शुषे॑ ॥  
परि॑ त्वाग्ने॒ पुरं॑ व॒यं वि॒प्रं स॒हस्य॑ धी॒महि॑ । धृ॒ष॒द्वर्णं॑ दि॒वेदि॑वे  
भे॒त्तार॑म्भ॒ङ्गुरा॑व॒तः ॥  
त्वम॑ग्ने॒ द्युभि॑स्त्वमा॒शुशु॑क्ष॒णिस्त्व॑म॒द्भ्यस्त्व॑म॒श्मन्॑स्परि॑ । त्वं  
वने॑भ्य॒स्त्वमो॑ष॒धीभ्य॑स्त्वं नृ॒णां नृ॑प॒ते जा॒यसे॑ शु॒चिः ॥२॥

दे॒वस्य॑ त्वा स॒वितुः॑ प्र॒स॒वैऽश्वि॑नो॒र्बा॒हु॒भ्याम्पू॒ष्णो ह॑स्ता॒भ्याम्पृ॒थि॒व्याः  
स॒ध॒स्थेऽग्नि॑म्पु॒री॒ष्यम॑ङ्गि॒र॒स्वत्वं॑नामि ॥  
ज्यो॒ति॑ष्मन्तं त्वाग्ने॒ सु॒प्रती॑क॒म॒ज॒स्त्रेण॑ भ्रा॒नुना॑ दी॒द्यान॑म् ।  
शि॒वम॑प्र॒जाभ्यो॑ऽहि॒सन्त॑म॒पृथि॒व्याः स॒ध॒स्थेऽग्नि॑म्पु॒री॒ष्यम॑ङ्गि॒र॒स्वत्वं॑नामि  
॥  
अ॒पाम्पृ॒ष्ठम॑सि स॒प्रथा॑ उ॒र्व॒ग्नि॒र्भरि॑ष्यद॒परा॑व॒पिष्ठ॑म् । वर्ध॑मान॒म॒ह आ च॑  
पु॒ष्करं॑ दि॒वो मा॑त्र॒या व॑रि॒णा प्र॑थस्व ॥

श॒र्म च॑ स्थो॒ वर्म॑ च॒ स्थो॒ अ॒च्छि॑द्रे बहु॒ले उ॒भे । व्य॒च॒स्वती॑ सं

वसाथाम्भर्तमग्निम्पुरीष्यम् ॥  
 सं वसाथाँ सुवर्विदा समीची उरसा त्मना । अग्निमन्तर्भरिष्यन्ती  
 ज्योतिष्मन्तमजस्रमित् ॥  
 पुरीष्योऽसि विश्वभराः । अथर्वा त्वा प्रथमो निरमन्थदग्ने ॥  
 त्वामग्ने पुष्करादध्यथर्वा निरमन्थत । मूर्ध्नो विश्वस्य वाघतः ॥  
 तमु त्वा दध्यङ्ङृषिः पुत्र ईधे अथर्वणः । वृत्रहणम्पुरं दरम् ॥  
 तमु त्वा पाथ्यो वृषा समीधे दस्युहन्तमम् । धनंजयँ रणैरणे ॥  
 सीदं होतः स्व उँ लोके चिकित्वान्त्सादया यज्ञँ सुकृतस्य योनौ ।  
 देवावीर्देवान्हविषा यजास्यग्ने बृहद्यजमाने वयो धाः ॥  
 नि होतां होतृषदने विदानस्त्वेषो दीदिवाँ असदत्सुदक्षः ।  
 अदब्धव्रतप्रमतिर्वसिष्ठः सहस्रम्भरः शुचिजिह्वो अग्निः ॥  
 सँ सीदस्व महाँ असि शोचस्व देववीतमः । वि धूममग्ने  
 अरुषमिन्नेध्य सृज प्रशस्त दर्शतम् ॥  
 जनिष्वा हि जेन्यो अग्ने अहाँ हितो हितेष्वरुषो वनेषु । दमेदमे सप्त  
 रत्ना दधानोऽग्निर्होता नि षसादा यजीयान् ॥३॥

सं ते वायुर्मातरिश्वा दधातूत्तानायै हृदयं यद्विलिष्टम् । देवानां यश्चरति  
 प्राणथेन तस्मै च देवि वर्षडस्तु तुभ्यम् ॥  
 सुजातो ज्योतिषा सह शर्म वरूथमासदः सुवः । वासो अग्ने विश्वरूपँ  
 सं व्ययस्व विभावसो ॥  
 उदु तिष्ठ स्वध्वरावा नो देव्या कृपा । दृशे च भासा बृहता  
 सुशुक्वनिराग्ने याहि सुशस्तिभिः ॥ ऊर्ध्व ऊ षु ण ऊतये तिष्ठा देवो न  
 सविता । ऊर्ध्वो वाजस्य सनिता यदञ्जिभिर्वाघद्भिर्विह्वयामहे ॥

स जातो गर्भो असि रोदस्योरग्रे चारुर्विभृत ओषधीषु । चित्रः शिशुः परि  
तमाँस्यक्तः प्र मातृभ्यो अधि कनिक्रदद्वाः ॥

स्थिरो भव वीड्वङ्ग आशुर्भव वाज्यर्वन् । पृथुर्भव सुषदस्त्वमग्नेः  
पुरीषवाहनः ॥

शिवो भव प्रजाभ्यो मानुषीभ्यस्त्वमङ्गिरः । मा द्यावापृथिवी अभि  
शूशुचो मान्तरिक्षम्मा वनस्पतीन् ॥

प्रेतु वाजी कनिक्रदन्नानदद्रासभः पत्वा । भरन्नग्निम्पुरीष्यम्मा पाद्यायुषः  
पुरा ॥

रासभो वां कनिक्रदत्सुयुक्तो वृषणा रथे । स वामग्निम्पुरीष्यमाशुर्दूतो  
वहादितः ॥

वृषाग्निं वृषणम्भरन्नपां गर्भँ समुद्रियम् । अग्न आ याहि वीतय ऋतँ  
सत्यम् ॥

ओषधयः प्रति गृह्णीताग्निमेतँ शिवमायन्तमभ्यत्र युष्मान् ।

व्यस्यन्विश्वा अमतीररातीर्निषीदन्नो अप दुर्मतिँ हनत् ॥

ओषधयः प्रति मोदध्वमेनम्पुष्पावतीः सुपिप्पलाः । अयं वो गर्भ

ऋत्वियः प्रत्तँ सधस्थमासदत् ॥४॥

वि पाजसा पृथुना शोशुचानो बाधस्व द्विषो रक्षसो अमीवाः ।

सुशर्मणो बृहतः शर्मणि स्यामग्नेरहँ सुहवस्य प्रणीतौ ॥

आपो हि ष्ठा मयोभुवस्ता न ऊर्जे दधातन । महे रणाय चक्षसे ॥

यो वः शिवतमो रसस्तस्य भाजयतेऽह नः । उशतीरिव मातरः ॥

तस्मा अरं गमाम वो यस्य क्षयाय जिन्वथ । आपो जनयथा च नः ॥

मित्रः सँसृज्य पृथिवीम्भूमिं च ज्योतिषा सह । सुजातं जातवेदसमग्निं



वैश्वानरं विभुम् ॥

अयद्धमायं त्वा सꣳ सृजामि प्रजाभ्यः । विश्वे त्वा देवा वैश्वानराः सꣳ  
सृजन्त्वानुष्टुभेन च्छन्दसाङ्गिरस्वत् ॥

रुद्राः सम्भृत्यं पृथिवीम्बृहज्ज्योतिः समीधिरे । तेषाम्भानुरजस्र इच्छुक्रो  
देवेषु रोचते ॥

सꣳसृष्टां वसुभी रुद्रैर्धीरैः कर्मणयाम्मृदम् । हस्ताभ्याम्मृद्धीं कृत्वा  
सिनीवाली करोतु ताम् ॥

सिनीवाली सुकपर्दा सुक्रीरा स्वौपशा । सा तुभ्यमदिते मह ओखां  
दधातु हस्तयोः ॥

उखां करोतु शक्त्या बाहुभ्यामदितिर्धिया । माता पुत्रं यथोपस्थे  
साग्निम्बिभर्तु गर्भं आ ॥

मुखस्य शिरौऽसि यज्ञस्य पदे स्थः ।

वसवस्त्वा कृणवन्तु गायत्रेण च्छन्दसाङ्गिरस्वत्पृथिव्यसि रुद्रास्त्वा  
कृणवन्तु त्रैष्टुभेन च्छन्दसाङ्गिरस्वदन्तरिक्षमस्या दित्यास्त्वा कृणवन्तु  
जागतेन च्छन्दसाङ्गिरस्वद्व्यौरसि विश्वे त्वा देवा वैश्वानराः

कृणवन्त्वानुष्टुभेन च्छन्दसाङ्गिरस्वद्विशौऽसि ध्रुवासि धारया मयि प्रजाꣳ  
रायस्पोषं गौपत्यꣳ सुरीर्यꣳ सजातान्यजमानाया दित्यै  
रास्त्रास्य दितिस्ते बिलं गृह्णातु पाङ्केन च्छन्दसाङ्गिरस्वत् ।  
कृत्वाय सा महीमुखाम्मृन्मयीं योनिमग्रये । ताम्पुत्रेभ्यः  
सम्प्रायच्छददितिः श्रपयानिति ॥५॥

वसवस्त्वा धूपयन्तु गायत्रेण च्छन्दसाङ्गिरस्व रुद्रास्त्वा धूपयन्तु त्रैष्टुभेन  
च्छन्दसाङ्गिरस्व दादित्यास्त्वा धूपयन्तु जागतेन च्छन्दसाङ्गिरस्व द्विश्वे

त्वा देवा वैश्वानरा धूपयन्त्वानुष्टुभेन च्छन्दसाङ्गिरस्व दिन्द्रस्त्वा  
 धूपयत्वङ्गिरस्वद्विष्णास्त्वा धूपयत्वङ्गिरस्वद्वरुणास्त्वा  
 धूपयत्वङ्गिरस्व ददितिस्त्वा देवी विश्वदैव्यावती पृथिव्याः  
 सधस्थैऽङ्गिरस्वत्वनत्ववट देवानां त्वा पत्नीर्देवीर्विश्वदैव्यावतीः  
 पृथिव्याः सधस्थैऽङ्गिरस्वद्धतूखे धिषणास्त्वा देवीर्विश्वदैव्यावतीः  
 पृथिव्याः सधस्थैऽङ्गिरस्वदभीन्धतामुखे ग्रास्त्वा देवीर्विश्वदैव्यावतीः  
 पृथिव्याः सधस्थैऽङ्गिरस्वच्छ्रपयन्तूखे वरूत्रयो जनयस्त्वा  
 देवीर्विश्वदैव्यावतीः पृथिव्याः सधस्थैऽङ्गिरस्वत्पचन्तूखे ।  
 मित्रैतामुखाम्पचैषा मा भैदि ।  
 एतां ते परि ददाम्यभित्त्यै अभीमां महिना दिवमित्रो बभूव सप्रथाः ।  
 उत श्रवसा पृथिवीम् ॥  
 मित्रस्य चर्षणीधृतः श्रवो देवस्य सानसिम् । द्युमं चित्रश्रवस्तमम् ॥  
 देवस्त्वा सवितोद्भपतु सुपाणिः स्वङ्गुरिः । सुबाहुरुत शक्त्या ॥  
 अपद्यमाना पृथिव्याशा दिश आ पृण । उत्तिष्ठ बृहती भवोर्ध्वा तिष्ठ  
 ध्रुवा त्वम् ॥  
 वसवस्त्वाच्छन्दन्तु गायत्रेण च्छन्दसाङ्गिरस्वद्द्रास्त्वाच्छन्दन्तु त्रैष्टुभेन  
 च्छन्दसाङ्गिरस्व दादित्यास्त्वाच्छन्दन्तु जागतेन च्छन्दसाङ्गिरस्वद्विश्वे  
 त्वा देवा वैश्वानरा आ च्छन्दन्त्वानुष्टुभेन च्छन्दसाङ्गिरस्वत् ॥६॥

समास्त्वाम् ऋतवो वर्धयन्तु संवत्सुरा ऋषयो यानि सत्या । सं दिव्येन  
 दीदिहि रोचनेन विश्वा आ भाहि प्रदिशः पृथिव्याः ॥  
 सं चेध्यस्वाग्ने प्र च बोधयैनमुच्च तिष्ठ महते सौभगाय । मा च  
 रिषदुपसृता तै अग्ने ब्रह्माणस्ते यशसः सन्तु मान्ये ॥

त्वामग्ने वृणते ब्राह्मणा इमे शिवो अग्ने सं वरणे भवा नः । सपत्नहा नो  
 अभिमातिजिच्च स्वे गये जागृह्यप्रयुच्छन् ॥  
 इहैवाग्ने अधि धारया रयिम्मा त्वा नि क्रन्पूर्वचितौ निकारिणः । क्षत्रमग्ने  
 सुयममस्तु तुभ्यमुपसृत्ता वर्धतां ते अनिष्टृतः ॥  
 क्षत्रेणाग्ने स्वायुः सँ रभस्व मित्रेणाग्ने मित्रधेये यतस्व ।  
 सजातानाम्मध्यमस्थाएधि राज्ञामग्ने विहव्यो दीदिहीह ॥  
 अति निहो अति स्त्रिधोऽत्यचित्तिमत्यरातिमग्ने । विश्वा ह्यग्ने दुरिता  
 सहस्वाथास्मभ्यँ सहवीराँ रयिं दाः ॥  
 अनाधृष्यो जातवेदा अनिष्टृतो विराडग्ने क्षत्रभृद्दीदिहीह । विश्वा आशाः  
 प्रमुञ्चन्मानुषीर्भियः शिवाभिरद्य परि पाहि नो वृधे ॥  
 बृहस्पते सवितर्बोधयैनुँ सँ शितं चित्संतराँ सँ शिशाधि ।  
 वर्धयैन्ममहते सौभगाय विश्व एनमनु मदन्तु देवाः ॥  
 अमुत्रभूयादध यद्यमस्य बृहस्पते अभिशस्तेरमुञ्चः । प्रत्यौहतामश्विना  
 मृत्युमस्माद्देवानामग्ने भिषजा शचीभिः ॥  
 उद्धयं तमसस्परि पश्यन्तो ज्योतिरुत्तरम् । देवं देवत्रा सूर्यमगन्म  
 ज्योतिरुत्तमम् ॥७॥

ऊर्ध्वा अस्य समिधो भवन्त्यूर्ध्वा शुक्रा शोचीँष्यग्नेः । द्युमत्तमा  
 सुप्रतीकस्य सूनोः ॥  
 तनूनपादसुरो विश्ववेदा देवो देवेषु देवः । पथ आनक्ति मध्वा घृतेन ॥  
 मध्वा यज्ञं नक्षसे प्रीणानो नराशँसौ अग्ने । सुकृद्देवः संविता  
 विश्ववारः ॥  
 अच्छायमेति शर्वसा घृतेनेडानो वह्निर्मसा । अग्निँ स्रुचौ अध्वरेषु

प्रयत्सु ॥

स यज्ञदस्य महिमानमग्नेः स ई मन्द्रासु प्रयसः । वसुश्चेतिष्ठो

वसुधार्तमश्च ॥

द्वारो देवीरन्वस्य विश्वे वृता ददन्ते अग्नेः । उरुव्यचंसो धाम्ना पत्यमानाः  
॥

ते अस्य योषणे दिव्ये न योनावुषासानक्ता । इमं यज्ञमवतामध्वरं नः ॥

दैव्या होतारावूर्ध्वमध्वरं नोऽग्नेर्जिह्वामभि गृणीतम् । कृणुतं नः स्वष्टिम्  
॥

तिस्रो देवीर्बहिरेदं सन्त्विडा सरस्वती भारती मही गृणाना ॥

तन्नस्तुरीपमद्भुतम्पुरुक्षु त्वष्टा सुवीरम् । रायस्पोषं विष्यतु नाभिमस्मे ॥

वनस्पतेऽव सृजा रराणस्मना देवेषु । अग्निर्हव्यं शमिता सूदयाति ॥

अग्ने स्वाहा कृणुहि जातवेद इन्द्राय हव्यम् । विश्वे देवा हविरिदं  
जुषन्ताम् ॥

हिरण्यगर्भः समवर्तताग्ने भूतस्य जातः पतिरेक आसीत् । स दाधार  
पृथिवीं द्यामुतेमां कस्मै देवाय हविषा विधेम ॥

यः प्राणतो निमिषतो महित्वैक इद्राजा जगतो बभूव । य ईशे अस्य  
द्विपदश्चतुष्पदः कस्मै देवाय हविषा विधेम ॥

य आत्मदा बलदा यस्य विश्व उपासते प्रशिषं यस्य देवाः । यस्य  
छायामृतं यस्य मृत्युः कस्मै देवाय हविषा विधेम ॥

यस्येमे हिमवन्तो महित्वा यस्य समुद्रं रसया सहाहुः । यस्येमाः  
प्रदिशो यस्य ब्राह्म कस्मै देवाय हविषा विधेम ॥

यं क्रन्दसी अरसा तस्तभाने अभ्यैक्षेताम्मनसा रेजमाने । यत्राधि सूर  
उदितौ व्येति कस्मै देवाय हविषा विधेम ॥

येन द्यौरुग्रा पृथिवी च दृढे येन सुवः स्तभितं येन नाकः । यो अन्तरिक्षे  
रजसो विमानः कस्मै देवाय हविषा विधेम ॥

आपो ह यन्महतीर्विश्वमायन्दन्नं दधाना जनयन्तीरग्निम् । ततो देवानां  
निरवर्ततासुरेकः कस्मै देवाय हविषा विधेम ॥

यश्चिदापो महिना पर्यपश्यदन्नं दधाना जनयन्तीरग्निम् । यो देवेष्वधि  
देव एक आसीत्कस्मै देवाय हविषा विधेम ॥८॥

आकूतिमग्निम्युजुं स्वाहा मनो मेधामग्निम्युजुं स्वाहा चित्तं  
विज्ञातमग्निम्युजुं स्वाहा वाचो विधृतिमग्निम्युजुं स्वाहा प्रजापतये  
मनवे स्वाहाग्रये वैश्वानराय स्वाहा विश्वे देवस्य नेतुर्मतो वृणीत सख्यं  
विश्वे राय इषुध्यसि द्युमं वृणीत पुष्यसे स्वाहा मा सु भित्था मा सु रिषो  
दृहंस्व वीडयस्व सु । अम्ब धृष्ण वीरयस्वाग्निश्चेदं करिष्यथः ॥

दृहंस्व देवि पृथिवि स्वस्तय आसुरी माया स्वधया कृतासि । जुष्टं  
देवानामिदमस्तु हव्यमरिष्टा त्वमुदिहि यज्ञे अस्मिन् ॥

मित्रैतामुखां तपैषा मा भैदि ।

एतां ते परि ददाम्यभित्त्यै ।

द्रवन्नः सर्पिरासुतिः प्रबो होता वरेणयः । सहसस्पुत्रो अबुद्धतः ॥

परस्या अधि संवतोऽवरां अभ्या तर । यत्राहमस्मि तां अव ॥

परमस्याः परावतो रोहिदश्च इहा गहि । पुरीष्यः पुरुप्रियोऽग्ने त्वं तरा  
मृधः ॥

सीद त्वम्मातुरस्या उपस्थे विश्वान्यग्ने व्युनानि विद्वान् । मैनामर्चिषा  
मा तपसाभि शूशुचोऽन्तरस्यां शुक्रज्योतिर्वि भाहि ॥

अन्तरग्ने रुचा त्वमुखायै सदेने स्वे । तस्यास्त्वं हरसा तपञ्जातवेदः

शिवो भव ॥

शिवो भूत्वा मह्यमग्नेऽथो सीद शिवस्त्वम् । शिवाः कृत्वा दिशः  
सर्वाः स्वां योनिमिहासदः ॥६॥

यदग्ने यानि कानि चाते दारूणि दध्मसि । तदस्तु तुभ्यमिद्धृतं तज्जुषस्व  
यविष्ठय ॥

यदत्युपजिह्विका यद्वम्रो अतिसर्पति । सर्वं तदस्तु ते घृतं तज्जुषस्व  
यविष्ठय ॥

रात्रिँरात्रिमप्रयावम्भरन्तोऽश्वायेव तिष्ठते घासमस्मै । रायस्पोषेण  
समिषा मदन्तोऽग्ने मा ते प्रतिवेशा रिषाम ॥

नाभां पृथिव्याः समिधानमग्निँ रायस्पोषाय बृहते हवामहे ।

इरम्मदम्बृहदुक्थं यजत्रं जेतारमग्निम्पृतनासु सासहिम् ॥

याः सेनां अभीत्वंरीराव्याधिनीरुगणा उत । ये स्तेना ये च  
तस्करास्ताँस्तै अग्नेऽपि दधाम्यास्ये ॥

दंष्ट्राभ्याम्मूलिम्लूञ्जम्भ्यैस्तस्कराँ उत । हनूभ्याँ स्तेनान्भगवस्ताँस्त्वं  
खाद् सुखादितान् ॥

ये जनेषु मूलिम्लवः स्तेनासस्तस्करा वने । ये कक्षेष्वघायवस्ताँस्तै  
दधामि जम्भयोः ॥

यो अस्मभ्यमरातीयाद्यश्च नो द्वेषते जनः । निन्दाद्यो अस्मान्दिप्साञ्च सर्वं  
तम्मस्मसा कुरु ॥

सँशितम्मे ब्रह्म सँशितं वीर्यम्बलम् । सँशितमन्त्रं जिष्णु  
यस्याहमस्मि पुरोहितः ॥

उदैषाम्बाहू अतिरमुद्वर्च उदू बलम् । क्षिणोमि ब्रह्मणामित्रानुन्नयामि

स्वाँ अहम् ।

दृशानो रुक्म उर्व्या व्यद्यौर्दुर्मर्षमायुः श्रिये रुचानः । अग्निर्मृतौ  
अभवद्वयोभिर्यदेनं द्यौरजनयत्सुरेताः ॥

विश्वा रूपाणि प्रति मुञ्चते कविः प्रासावीद्भद्रं द्विपदे चतुष्पदे । वि  
नाकमख्यत्सविता वरेणयोऽनु प्रयाणमुषसो वि राजति ॥  
नक्तोषासा समनसा विरूपे धापयैते शिशुमेकँ समीची । द्यावा क्षामा  
रुक्मो अन्तर्वि भाति देवा अग्निं धारयन्द्रविणोदाः ॥

सुपर्णोऽसि गरुत्मान्निवृत्ते शिरो गायत्रं चक्षु स्तोमं आत्मा सामं ते  
तनूर्वामदेव्यम्बृहद्रथन्तरे पक्षौ यज्ञायज्ञियम्पुच्छं छन्दाँस्यङ्गानि  
धिष्ण्याः शफा यजूँषि नाम ।

सुपर्णोऽसि गरुत्मान्दिवं गच्छ सुवः पत ॥१०॥

अग्ने यं यज्ञमध्वरं विश्वतः परिभूरसि । स इद्वेषु गच्छति ॥  
सोम यास्तै मयोभुव ऊतयः सन्ति दाशुषे । तार्भिर्नोऽविता भव ॥  
अग्निर्मूर्द्धा भुवः ॥ त्वं नः सोम या ते धामानि ॥  
तत्सवितुर्वरेण्यम्भर्गो देवस्य धीमहि । धियो यो नः प्रचोदयात् ॥  
अचित्ती यच्चकृमा दैव्ये जनै दीनैर्दक्षैः प्रभूती पूरुषत्वता  
।

देवेषु च सवितर्मानुषेषु च त्वं नो अत्र सुवतादनागसः ॥  
चोदयित्री सूनृतानां चेतन्ती सुमतीनाम् । यज्ञं दधे सरस्वती ॥  
पावीरवी कन्या चित्रायुः सरस्वती वीरपत्नी धियं धात् । गाभिरच्छिद्रँ  
शरणँ सजोषा दुराधर्षं गृणते शर्म यँसत् ॥  
पूषा गा अन्वैतु नः पूषा रक्षत्वर्वतः । पूषा वाजँ सनोतु नः ॥

शुक्रं ते अन्यद्यजतं ते अन्यद्विषुरूपे अहनी द्यौरिवासि । विश्वा हि माया  
अवसि स्वधावो भद्रा ते पूषन्निह रातिरस्तु ॥  
तेऽवर्धन्त स्वतवसो महित्वनानाकं तस्थुरु चक्रिरे सदः ।  
विष्णुर्यद्वावद्वृषणम्मदच्युतं वयो न सीदन्नधि बर्हिषि प्रिये ।  
प्र चित्रमर्कं गृणते तुराय मारुताय स्वतवसे भरध्वम् । ये सहांसि  
सहसा सहन्ते रेजते अग्ने पृथिवी मुखेभ्यः ॥  
विश्वे देवा विश्वे देवाः ॥ द्यावा नः पृथिवी इमं सिधमद्य दिविस्पृशम्  
। यज्ञं देवेषु यच्छताम् ॥  
प्र पूर्वजे पितरा नव्यसीभिर्गीर्भिः कृणुध्वं सदने ऋतस्य । आ नो  
द्यावापृथिवी दैव्येन जनैन यातम्महि वां वरूथम् ॥  
अग्निं स्तोमैर्न बोधय समिधानो अमर्त्यम् । हव्या देवेषु नो दधत् ॥  
स हव्यवाडमर्त्य उशिग्दूतश्चनोहितः । अग्निर्धिया समृणवति ॥  
शं नो भवन्तु वाजैवाजे ॥११॥

इति चतुर्थकारण्डे प्रथमः प्रपाठकः १

अथ चतुर्थकारण्डे द्वितीयः प्रपाठकः २

विष्णोः क्रमोऽस्यभिमातिहा गायत्रं छन्द आ रौह पृथिवीमनु वि क्रमस्व  
निर्भक्तः स यं द्विष्मो विष्णोः क्रमोऽस्यभिश्चिहा त्रैष्टुभं छन्द आ  
रौहान्तरिन्मनु वि क्रमस्व निर्भक्तः स यं द्विष्मो विष्णोः  
क्रमोऽस्यरातीयतो हुन्ता जागतं छन्द आ रौह दिवमनु वि क्रमस्व  
निर्भक्तः स यं द्विष्मो विष्णोः क्रमोऽसि शत्रूयतो हुन्तानुष्टुभं छन्द आ रौह  
दिशोऽनु वि क्रमस्व निर्भक्तः स यं द्विष्मः ।  
अक्रन्ददग्नि स्तनयन्निव द्यौः क्षामा रेरिहद्वीरुधः समञ्जन् । सद्यो जज्ञानो



वि हीमिद्धो अख्यदा रोदसी भानुना भात्यन्तः ॥  
अग्नेऽभ्यावर्तिन्नभि न आ वर्तस्वायुषा वर्चसा सन्या मेधया प्रजया धनेन  
॥

अग्ने अङ्गिरः शतं तै सन्त्वावृतः सहस्रं त उपावृतः । तासाम्पोषस्य  
पोषेण पुनर्नो नष्टमा कृधि पुनर्नो रयिमा कृधि ॥ पुनरूर्जा नि वर्तस्व  
पुनरग्र इषायुषा । पुनर्नः पाहि विश्वतः ॥

सह रय्या नि वर्तस्वाग्ने पिन्वस्व धारया । विश्वप्सिनया विश्वतस्परि ॥  
उदुत्तमं वरुण पाशमस्मदवाधमं वि मध्यमं श्रथाय । अथा  
व्यमादित्य वृते तवानागसो अदितये स्याम ॥

आ त्वाहार्षमन्तरभूर्ध्रुवस्तिष्ठाविचाचलिः । विशस्त्वा सर्वा  
वाञ्छन्त्वस्मिन्नाष्टमधि श्रय ॥

अग्ने बृहन्नृषसामूर्ध्वो अस्थान्निर्जग्मिवान्तमसो ज्योतिषागात् ।

अग्निर्भानुना रुशता स्वङ्ग आ जातो विश्वा सदान्यप्राः ॥

सीद त्वम्मातुरस्या उपस्थे विश्वान्यग्ने व्युनानि विद्वान् । मैनामर्चिषा  
मा तपसाभि शूशुचोऽन्तरस्यां शुक्रज्योतिर्वि भाहि ॥

अन्तरग्ने रुचा त्वमुखायै सदेने स्वे । तस्यास्त्वं हरसा तपञ्जातवेदः  
शिवो भव ॥

शिवो भूत्वा मह्यमग्नेऽथो सीद शिवस्त्वम् । शिवाः कृत्वा दिशः  
सर्वाः स्वां योनिमिहासदः ॥

हंसः शुचिषद्वसुरन्तरिक्षसद्धोता वेदिषदतिथिर्दुरोणसत् ।

नृषद्वरसदृतसद्व्यौ मसदब्जा गोजा ऋतजा अद्रिजा ऋतम्बृहत् ॥१॥

दिवस्परि प्रथमं जज्ञे अग्निरस्मदिद्वतीयम्परि जातवेदाः । तृतीयमप्सु

नृमणा अजस्रमिन्धान एनं जरते स्वाधीः ॥  
 विद्या ते अग्ने त्रेधा त्रयाणि विद्या ते सद्य विभृतम्पुरुत्रा । विद्या ते नाम  
 परमं गुहा यद्विद्या तमुत्सं यत आजगन्थ ॥  
 समुद्रे त्वा नृमणा अप्स्वन्तर्नृचक्षा ईधे दिवो अग्र ऊर्धन् । तृतीयै त्वा  
 रजसि तस्थिवा संमृतस्य योनौ महिषा अहिन्वन् ॥  
 अक्रन्ददग्निः स्तनयन्निव द्यौः क्षामा रेरिहद्वीरुधः समञ्जन् । सद्यो जज्ञानो  
 वि हीमिद्धो अख्यदा रोदसी भानुना भात्यन्तः ॥  
 उशिक्पावको अरतिः सुमेधा मर्तेष्वग्निर्मृतो नि धायि । इयर्ति  
 धूममरुषम्भरिभ्रदुच्छुक्रेण शोचिषा द्यामिनक्षत् ॥  
 विश्वस्य केतुर्भुवनस्य गर्भ आ रोदसी अपृणाज्जायमानः । वीडुं  
 चिदद्रिमभिनत्परायञ्जना यदग्निमयजन्त पञ्च ॥  
 श्रीणामुदारो धरुणो रयीणाम्मनीषाणाम्प्रार्पणः सोमगोपाः । वसोः सूनुः  
 सहसो अप्सु राजा वि भात्यग्र उषसामिधानः ॥  
 यस्तै अद्य कृणवद्भद्रशोचेऽपूपं देव घृतवन्तमग्ने । प्र तं नय प्रतरां वस्यो  
 अच्छाभि द्युमं देवभक्तं यविष्ठ ॥  
 आ तम्भज सौश्रवसेष्वग्र उक्थउक्थ आ भज शस्यमाने । प्रियः सूर्ये  
 प्रियो अग्रा भवात्युजातेन भिनददुञ्जनित्वैः ॥  
 त्वामग्ने यजमाना अनु द्यून्विश्वा वसूनि दधिरे वार्याणि । त्वया सह  
 द्रविणमिच्छमाना व्रजं गोमन्तमुशिजो वि ववुः ॥  
 दृशानो रुक्म उर्व्या व्यद्यौहुर्मर्षमारुः श्रिये रुचानः । अग्निर्मृतौ  
 अभवद्वयोभिर्यदेनं द्यौरजनयत्सुरेताः ॥२॥

अन्नपतेऽन्नस्य नो देह्यनमीवस्य शुष्मिणः । प्र प्रदातारं तारिष ऊर्जं नो

धेहि द्विपदे चतुष्पदे ॥  
 उदु त्वा विश्वे देवा अग्ने भरन्तु चित्तिभिः । स नो भव शिवतमः  
 सुप्रतीको विभावंसुः ॥  
 प्रेदग्ने ज्योतिष्मान्याहि शिवेभिर्चिभिस्त्वम् । बृहद्भिर्भानुभिर्भासन्मा  
 हिँसीस्तनुवा प्रजाः ॥  
 समिधाग्निं दुवस्यत घृतैर्बोधयतातिथिम् । आऽस्मिन्हव्या जुहोतन ॥  
 प्रप्रायमग्निर्भरतस्य शृणवे वि यत्सूर्यो न रोचते बृहद्भाः । अभि यः  
 पूरुम्पृतनासु तस्थौ दीदाय दैव्यो अतिथिः शिवो नः ॥  
 आपो देवीः प्रति गृह्णीत भस्मैतत्स्योने कृणुध्वँ सुरभारु लोके । तस्मै  
 नमन्तां जनयः सुपत्नीमतिव पुत्रम्बिभृता स्वेनम् ॥  
 अप्स्वग्ने सधिष्टव सौषधीरनु रुध्यसे । गर्भे सञ्जायसे पुनः ॥  
 गर्भो अस्योषधीनां गर्भो वनस्पतीनां । गर्भो विश्वस्य भूतस्याग्ने गर्भो  
 अपामसि ॥  
 प्रसद्य भस्मना योनिमपश्च पृथिवीमग्ने । सँसृज्य मातृभिस्त्वं  
 ज्योतिष्मान्पुनरासदः ॥ पुनरासद्य सदनमपश्च पृथिवीमग्ने । शेषै  
 मातुर्यथोपस्थेऽन्तरस्याँ शिवतमः ॥  
 पुनरूर्जा नि वर्तस्व पुनरग्र इषायुषा । पुनर्नः पाहि विश्वतः ॥  
 सह रय्या नि वर्तस्वाग्ने पिन्वस्व धारया । विश्वप्सिनया विश्वतस्परि ॥  
 पुनस्त्वादित्या रुद्रा वसवः समिन्धताम्पुनर्ब्रह्माणो वसुनीथ यज्ञैः ।  
 घृतेन त्वं तनुवो वर्धयस्व सत्याः सन्तु यजमानस्य कामाः ॥  
 बोधा नो अस्य वचसो यविष्ट मँहिष्टस्य प्रभृतस्य स्वधावः । पीयति  
 त्वो अनु त्वो गृणाति वन्दारुस्ते तनुवं वन्दे अग्ने ॥  
 स बोधि सूरिर्मघवा वसुदावा वसुपतिः । युयोध्यस्मद्द्वेषाँसि ॥३॥

अपैत॒ वीत॒ वि च॒ सर्पतातो॒ येऽत्र॒ स्थ पुरा॒णा ये च॒ नूतनाः॑ । अदादिदं  
 यमोऽव॒सानम्पृथि॒व्या अक्र॑न्निमम्पितरौ॒ लोकम॑स्मै ॥  
 अग्ने॑र्भस्मास्यग्नेः॒ पुरीष॑मसि संज्ञानमसि॒ काम॒धरण॑म्मयि॒ ते  
 काम॒धरण॑म्भूयात् ॥  
 सं या वः॑ प्रियास्तनुवः॒ सम्प्रिया॑ हृदयानि वः । आत्मा॒ वौ अस्तु  
 सम्प्रियः॑ सम्प्रियास्तनुवो॒ मम ॥  
 अयँ॑ सो अग्निर्यस्मिन्त्सोम॒मिन्द्रः॑ सुतं॒ दधे॒ जठरै॑ वावशानः । सह॒स्त्रियं  
 वाज॒मत्यं॑ न सप्तिँ॑ सस॒वान्त॑सन्त॒स्तूयसे॑ जातवेदः ॥  
 अग्ने॑ दिवो अ॒र्णम॑च्छा जिगा॒स्यच्छा॑ देवाँ॑ ऊचिषे॒ धिष्णि॑या॒ ये । याः  
 प॒रस्ता॑द्रोच॒ने सूर्य॑स्य॒ याश्चा॑वस्ता॒दुप॑तिष्ठन्त॒ आपः॑ ॥  
 अग्ने॑ यत्ते दि॒वि वर्चः॑ पृथि॒व्यां यदोष॑धीष्व॒प्सु वा॑ यजत्र ।  
 येना॒न्तरि॑क्षमु॒र्वात॑तन्थ॒ त्वेषः॑ स भानु॒रर्ण॑वो नृ॒चक्षाः॑ ॥  
 पुरी॑ष्यासो अ॒ग्नयः॑ प्राव॒णेभिः॑ स॒जोष॑सः । जुष॒न्ताँ॑ ह॒व्यमाहु॑तमनमी॒वा  
 इषो॑ म॒हीः ॥  
 इडा॑मग्ने पुरु॒दँसँ॑ स॒निं गोः॑ श॒श्वत्त॑मँ॒ हव॑मानाय साध । स्यान्नः  
 सु॒नुस्त॑नयो वि॒जावाग्ने॑ सा तै॒ सुम॑तिर्भू॒त्वस्मे ॥  
 अयं॑ ते योनिर्भू॒त्वियो॒ यतो॑ जा॒तो अ॒रोच॑थाः । तं जा॒नन्न॑ग्ना॒ आ रो॒हाथा॑ नो  
 वर्ध॑या र॒यिम् ॥  
 चिद॑सि॒ तथा॑ दे॒वत॑याङ्गि॒रवद्ध्रु॑वा सीद॒ परि॒चिद॑सि॒ तथा॑  
 दे॒वत॑याङ्गि॒रस्वद्ध्रु॑वा सीद ॥ लो॒कम्पृ॑ण॒ च्छिद्र॑म्पृ॒णार्थो॑ सीद॒ शि॒वा त्वम्  
 । इन्द्रा॑ग्नी॒ त्वा बृ॒हस्प॑तिर॒स्मिन्यो॑ना॒वसी॑षदन् ॥  
 ता अ॒स्य॒ सूद॑दोहसः॒ सोमँ॑ श्री॒णन्ति॒ पृश्न॑यः । जन्म॑न्दे॒वानां॑

विशस्त्रिष्वा रौचने दिवः ॥४॥

समित् सं कल्पेथां सम्प्रियौ रोचिष्णु सुमनस्यमानौ । इषमूर्जमभि  
संवसानौ सं वाम्मनांसि सं वृता समु चित्तान्याकरम् ॥  
अग्रै पुरीष्याधिपा भवा त्वं नः । इषमूर्जं यजमानाय धेहि ॥  
पुरीष्यस्त्वमग्रे रयिमान्पुष्टिमांसि । शिवाः कृत्वा दिशः सर्वाः स्वां  
योनिमिहासदः ॥

भवतं नः समनसौ समोकसावरेपसौ । मा यज्ञं हिंसिष्टुम्मा यज्ञपतिं  
जातवेदसौ शिवौ भवतमद्य नः ॥

मातेव पुत्रम्पृथिवी पुरीष्यमग्निं स्वे योनावभारुखा । तां  
विश्वैर्देवैर्ऋतुभिः संविदानः प्रजापतिर्विश्वकर्मा वि मुञ्चतु ॥  
यदस्य पारे रजसः शुक्रं ज्योतिरजायत । तन्नः पर्षदति द्विषोऽग्रै वैश्वानर  
स्वाहा ॥

नमः सु तै निर्ऋते विश्वरूपेऽयस्मयं वि चृता बन्धमेतम् । यमेन त्वं  
यम्यां संविदानोत्तमं नाकमधि रोहयेमम् ॥

यत्तै देवी निर्ऋतिराबन्धु दामं ग्रीवास्वविचर्त्यम् । इदं ते तद्वि  
ष्याम्यारुषो न मध्यादथा जीवः पितुर्मद्वि प्रमुक्तः ॥

यस्यास्ते अस्याः क्रूर आसञ्जुहोम्येषाम्बन्धानामवसर्जनाय । भूमिरिति  
त्वा जनां विदुर्निर्ऋतिरिति त्वाहम्परि वेद विश्वतः ॥

असुन्वन्तमयजमानमिच्छ स्तेनस्येत्यां तस्करस्यान्वेषि । अन्यमस्मदिच्छ  
सा त इत्या नमो देवि निर्ऋते तुभ्यमस्तु ॥

देवीमहं निर्ऋतिं वन्दमानः पितेव पुत्रं दसये वचोभिः । विश्वस्य या  
जायमानस्य वेदु शिरःशिरः प्रति सूरी वि चष्टे ॥

निवेशनः संगमनो वसूनां विश्वा रूपाभि चष्टे शचीभिः । देव इव  
सविता सत्यधर्मेन्द्रो न तस्थौ समरे पथीनाम् ॥  
सं वरत्रा दधातनु निराहावान्कृणोतन । सिञ्चामहा अवटमुद्रिणं वयं  
विश्वाहादस्तमक्षितम् ॥  
निष्कृताहावमवटं सुवरत्रं सुषेचनम् । उद्रिणं सिञ्चे अक्षितम् ॥  
सीरां युञ्जन्ति क्वयो युगा वि तन्वते पृथक् । धीरां देवेषु सुम्रया  
युनक्तु सीरा वि युगा तनोत कृते योनौ वपतेह बीजम् । गिरा च श्रुष्टिः  
सभरा असन्नो नेदीय इत्सूरया पक्वमायत् ॥  
लाङ्गलम्पवीरवं सुशेवं सुमतित्सरु । उदित्कृषति गामविम्प्रफुर्व्यं  
च पीवरीम् । प्रस्थावद्रथवाहनम् ॥  
शुनं नः फाला वि तुदन्तु भूमिं शुनं कीनाशा अभि यन्तु वाहान् ।  
शुनम्पर्जन्यो मधुना पर्योभिः शुनासीरा शुनमस्मासु धत्तम् ॥  
कामं कामदुषे धुक्व मित्राय वरुणाय च । इन्द्रायाग्रये पूष्ण ओषधीभ्यः  
प्रजाभ्यः ॥  
घृतेन सीता मधुना समक्ता विश्वैर्देवैरनुमता मरुद्धिः । ऊर्जस्वती पर्यसा  
पिन्वमानास्मान्सीति पर्यसाभ्याववृत्स्व ॥५॥  
या जाता ओषधयो देवेभ्यस्त्रियुगम्पुरा । मन्दांमि बभ्रूणामहं शतं  
धामानि सप्त च ॥  
शतं वो अम्बु धामानि सहस्रमुत वो रुहः । अथा शतक्रत्वो यूयमिममै  
अगदं कृत ॥  
पुष्पावतीः प्रसूवतीः फलिनीरफला उत । अश्वा इव सजित्वरीर्वीरुधः  
पारयिष्णवः ॥

ओषधीरिति मातरस्तद्वौ देवीरुपं ब्रुवे । रपाँसि विघ्नतीरित्  
रपश्चातयमानाः ॥

अश्वत्थे वौ निषदनम्पर्णे वौ वसतिः कृता । गोभाज् इत्किलासथ  
यत्सनवथ पूरुषम् ॥

यद्दहं वाजर्यन्निमा ओषधीर्हस्त आदधे । आत्मा यद्धर्मस्य नश्यति पुरा  
जीवगृभौ यथा ॥

यदोषधयः संगच्छन्ते राजानः समिताविव । विप्रः स उच्यते  
भिषग्रक्षोहामीवचार्तनः ॥

निष्कृतिर्नाम वो माताथा यूयँ स्थ संकृतीः । सराः पतत्रिणीः स्थन्  
यदामयति निष्कृत ॥

अन्या वौ अन्यामवत्वन्यान्यस्या उपावत । ताः सर्वा ओषधयः  
संविदाना इदम्मे प्रावता वचः ॥

उच्छुष्मा ओषधीनां गावौ गोष्ठादिवेरेते । धनँ सनिष्यन्तीनामात्मानं  
तव पूरुष ॥

अति विश्वाः परिष्ठा स्तेन इव व्रजमक्रमुः । ओषधयः प्राचुच्यवुर्यत्किं च  
तनुवाँ रपः ॥

याः त आतस्थुरात्मानं या आविविशुः परुःपरुः । तास्ते यद्धमं वि  
बाधन्तामुग्रो मध्यमशीरिव ॥

साकं यद्धमं प्र पत श्येनेन किकिदीविना । साकं वार्तस्य ध्राज्या साकं  
नश्य निहाकया ॥

अश्वावतीँ सौमवतीमूर्जयन्तीमुदौजसम् । आ वित्सि सर्वा  
ओषधीरस्मा अरिष्टतातये ॥

याः फलिनीर्या अफला अपुष्पा याश्च पुष्पिणीः । बृहस्पतिप्रसूतास्ता नौ

मुञ्चन्त्वँहसः ॥

या ओषधयः सोमराज्ञीः प्रविष्टाः पृथिवीमनु । तासां त्वमस्युत्तमा प्र णौ  
जीवार्तवे सुव ॥

अवपतन्तीरवदन्दिव ओषधयः परि । यं जीवमश्नवामहै न स रिष्याति  
पूरुषः ॥

याश्चेदमुपशृणवन्ति याश्च दूरम्परागताः । इह संगत्य ताः सर्वा अस्मै सं  
दत्त भेषजम् ॥

मा वौ रिषत्वनिता यस्मै चाहं खनामि वः । द्विपच्चतुष्पदस्माकँ  
सर्वमस्त्वनातुरम् ॥

ओषधयः सं वदन्ते सोमैः सह राज्ञा । यस्मै करोति ब्राह्मणस्तँ  
राजन्पारयामसि ॥६॥

मा नौ हिँसीञ्जनिता यः पृथिव्या यो वा दिवँ सत्यधर्मा ज्ञान ।

यश्चापश्चन्द्रा बृहतीर्ज्ञान कस्मै देवाय हविषा विधेम ॥

अभ्यावर्तस्व पृथिवि यज्ञेन पर्यसा सह । वृषां तै अग्निरिषितोऽव सर्पतु  
॥

अग्ने यत्ते शुक्रं यच्चन्द्रं यत्पूतं यद्यज्ञियम् । तद्देवेभ्यो भरामसि ॥

इषमूर्जमहमित आ दद ऋतस्य धाम्नो अमृतस्य योनेः । आ नो गोषु  
विशत्वौषधीषु जहामि सेदिमनिराममीवाम् ॥

अग्ने तव श्रवो वयो महि भ्राजन्त्यर्चयो विभावसो । बृहद्भानो शर्वसा  
वाजमुक्थ्यं दधासि दाशुषे कवे ॥

इरज्यन्नग्ने प्रथयस्व जन्तुभिरस्मे रायो अमर्त्य । स दर्शतस्य वपुषो वि  
राजसि पूणक्षि सानसिँ रयिम् ॥



ऊजौ नपाज्जातवेदः सुशस्तिभिर्मन्दस्व धीतिभिर्हितः । त्वे इषः सं  
 दधुर्भूरिरितसश्चित्रोतयो वामजाताः ॥  
 पावकवर्चाः शुक्रवर्चा अनूनवर्चा उदियर्षि भानुना । पुत्रः पितरा  
 विचरन्नुपावस्युभे पृणक्षि रोदसी ॥  
 ऋतावानम्महिषं विश्वचर्षणिमग्निं सुम्राय दधिरे पुरो जनाः ।  
 श्रुत्कर्णं सप्रथस्तमं त्वा गिरा दैव्यम्मानुषा युगा ॥  
 निष्कर्तारिमध्वरस्य प्रचेतसं क्षयन्तं राधसे महे । रातिम्भृगूणामुशिजं  
 कृविक्रतुम्पृणक्षि सानसि रयिम् ॥  
 चितः स्थ परिचित ऊर्ध्वचितः श्रयध्वं तथा देवतयाङ्गिरस्वद्ध्रुवाः  
 सीदत ॥  
 आप्यायस्व समेतु ते विश्वतः सोम वृष्णायम् । भवा वाजस्य संगथे ॥  
 सं ते पयांसि समु यन्तु वाजाः सं वृष्णयान्यभिमातिषाहः ।  
 आप्यायमानो अमृताय सोम दिवि श्रवांस्युत्तमानि धिष्व ॥७॥  
 अभ्यस्थाद्विश्वाः पृतना अरातीस्तदगिराह तदु सोम आह । बृहस्पतिः  
 सविता तन्म आह पुषा माधात्सुकृतस्य लोके ॥  
 यदक्रन्दः प्रथमं जायमान उद्यन्त्समुद्रादुत वा पुरीषात् । श्येनस्य पक्षा  
 हरिणस्य बाहू उपस्तुतं जनिम् तत्तै अर्वन् ॥  
 अपाम्पृष्ठमसि योनिर्ग्रेः समुद्रमभितः पिन्वमानम् । वर्धमानम्मह आ च  
 पुष्करं दिवो मात्रया वरिणा प्रथस्व ॥  
 ब्रह्म जज्ञानमप्रथमम्पुरस्ताद्वि सीमतः सुरुचौ वेन आवः । स बुधिया  
 उपमा अस्य विष्ठाः सतश्च योनिमसतश्च विवः ॥  
 हिरण्यगर्भः समवर्तताग्रे भूतस्य जातः पतिरेक आसीत् । स दाधार

पृथि॒वीं द्यामु॒तेमां कस्मै॑ दे॒वाय॑ ह॒विषा॑ वि॒धेम ॥  
द्र॒प्सश्च॑स्कन्द॒ पृथि॒वीमनु॒ द्यामि॑मं च॒ योनि॑मनु॒ यश्च॑ पूर्॒वः । तृ॒तीयं  
योनि॑मनु॒ संचर॑न्तं द्र॒प्सं जु॒होम्यनु॑ स॒प्त हो॒त्राः ॥  
नमो॑ अस्तु स॒र्पेभ्यो॑ ये के च॑ पृथि॒वीमनु॑ । ये अ॒न्तरि॑क्षे ये दि॒वि तेभ्यः॑  
स॒र्पेभ्यो॑ नमः ॥  
येऽदो॑ रौच॒ने दि॒वो ये वा॒ सूर्य॑स्य र॒श्मिषु॑ । येषा॑म॒प्सु स॒दः कृ॒तं तेभ्यः॑  
स॒र्पेभ्यो॑ नमः ॥  
या इ॒षवो॑ यातु॒धाना॑नां॒ ये वा॒ वन॒स्पती॑रनु॒ । ये वा॑व॒टेषु॑ शे॒रते॑ तेभ्यः  
स॒र्पेभ्यो॑ नमः ॥८॥

ध्रु॒वासि॑ ध॒रुणा॑स्तृ॒ता वि॒श्वक॑र्मणा॒ सुक्रि॑ता । मा त्वा॑ स॒मुद्र॑ उ॒द्धीन्मा॑  
सु॒पर्णो॑ऽव्यथ॒माना॑ पृथि॒वीं दृ॑ह ॥  
प्र॒जाप॑तिस्त्वा साद॒यतु॑ पृथि॒व्याः पृ॒ष्ठे व्य॑च॒स्वती॑म्प्रथ॒स्वती॑म्प्रथो॑ऽसि  
पृथि॒व्यसि॑ भूर॑सि॒ भूमि॑र॒स्यदि॑तिरसि॒ विश्व॑धा॒या विश्व॑स्य॒ भुव॑नस्य॒ धृत्री॑  
पृथि॒वीं यच्छ॑ पृथि॒वीं दृ॑ह॒ पृथि॒वीम्मा हि॑सी॒र्विश्व॑स्मै प्रा॒णाय॑पा॒नाय॑  
व्या॒नायो॑दा॒नाय॑ प्र॒तिष्ठा॑यै च॒रित्रा॑या॒ग्नि॑स्त्वा॒भि पा॑तु म॒ह्या स्व॒स्त्या  
च्छ॒र्दिषा॑ श॒तमे॑न॒ तया॑ दे॒वत॑याङ्गि॒रस्व॑द्ध्रु॒वा सी॑द ॥  
का॒राडा॑त्का॒राडा॑त्प्रो॒हन्ती॑ प॒रुषः॑प॒रुषः॑ परि॒ । ए॒वा नो॑ दूर्वे॒ प्र त॑नु  
स॒हस्रै॑ण श॒तेन॑ च ॥  
या श॒तेन॑ प्र॒तनो॑षि॒ सह॑स्रै॒ण वि॒रोह॑सि॒ तस्या॑स्ते दे॒वीष्ट॑के वि॒धेम॑ ह॒विषा॑  
व॒यम् ॥  
अ॒षाढा॑सि॒ सह॑मा॒ना सह॑स्वारा॒तीः सह॑स्वारा॒तीय॑तः सह॑स्व॒ पृत॑नाः  
सह॑स्व॒ पृत॑न्य॒तः सह॑स्रै॒वीर्या॑सि॒ सा मा॑ जि॒न्व ॥

मधु वाता ऋतायते मधु क्षरन्ति सिन्धवः । माध्वीर्नः सन्त्वोषधीः ॥  
मधु नक्तमुतोषसि मधुमत्पार्थिवं रजः । मधु द्यौरस्तु नः पिता ॥  
मधुमान्नो वनस्पतिर्मधुमां अस्तु सूर्यः । माध्वीर्गावो भवन्तु नः ॥  
मही द्यौः पृथिवी च न इमं यज्ञमिमिक्षताम् । पिपृतां नो भरीमभिः ॥  
तद्विष्णोः परमं पदं सदा पश्यन्ति सूर्यः । दिवीव चक्षुराततम् ॥  
ध्रुवासि पृथिवि सहस्व पृतन्यतः । स्यूता देवेभिरमृतेनागाः ॥  
यास्तै अग्ने सूर्ये रुच उद्यतो दिवमातन्वन्ति रश्मिभिः । ताभिः सर्वाभी  
रुचे जनाय नस्कृधि ॥  
या वो देवाः सूर्ये रुचो गोष्वश्वेषु या रुचः । इन्द्राग्नी ताभिः सर्वाभी रुचं  
नो धत्त बृहस्पते ॥  
विराट्ज्योतिरधारयत्सम्राट्ज्योतिरधारयत्स्वराट्ज्योतिरधारयत् ॥  
अग्ने युद्धवा हि ये तवाश्वासो देव साधवः । अरं वहन्त्याशवः ॥  
युद्धवा हि देवहूतमां अश्वां अग्ने रथीरिव । नि होता पूर्व्यः सदः ॥  
द्रप्सश्चस्कन्द पृथिवीमनु द्यामिमं च योनिमनु यश्च पूर्वः । तृतीयं  
योनिमनु संचरन्तं द्रप्सं जुहोम्यनु सप्त होत्राः ॥  
अभूदिदं विश्वस्य भुवनस्य वाजिनमग्नेर्वैश्वानरस्य च । अग्निर्ज्योतिषा  
ज्योतिष्मानुक्मो वर्चसा वर्चस्वान् ॥  
ऋचे त्वा रुचे त्वा समित्स्त्रवन्ति सरितो न धेनाः । अन्तर्हृदा मनसा  
पूयमानाः ॥ घृतस्य धारा अभि चाकशीमि । हिरण्ययो वेतसो मध्यं  
आसाम् ॥  
तस्मिन्त्सुपर्णो मधुकृत्कुलायी भजन्नास्ते मधु देवताभ्यः । तस्यासते  
हरयः सप्त तीरे स्वधां दुहाना अमृतस्य धाराम् ॥६॥

आदित्यं गर्भम्पर्यसा समञ्जन्त्सहस्रस्य प्रतिमां विश्वरूपम् । परि वृङ्गधि  
हरसा माभि मृक्षः शतायुषं कृणुहि चीयमानः ॥

इमम्मा हिंसीर्द्विपादम्पशूनां सहस्राक्षं मेध आ चीयमानः ।

मयुमारण्यमनु ते दिशामि तेन चिन्वानस्तनुवो नि षीद ॥

वातस्य ध्राजिं वरुणस्य नाभिमश्वं जज्ञानं सरिरस्य मध्ये । शिशुं

नदीनां हरिमद्रिबुद्धमग्ने मा हिंसीः परमे व्योमन् ॥

इमम्मा हिंसीरेकशफम्पशूनां कनिक्रदं वाजिनं वाजिनेषु ।

गौरमारण्यमनु ते दिशामि तेन चिन्वानस्तनुवो नि षीद ॥

अजस्रमिन्दुमरुषम्भुरण्यमग्निमीडे पूर्वचित्तौ नमोभिः । स पर्वभिर्ऋतुशः

कल्पमानो गाम्मा हिंसीरदितिं विराजम् ॥

इमं समुद्रं शतधारमुत्सं व्यच्यमानम्भुवनस्य मध्ये । घृतं

दुहानामदितिं जनायाग्ने मा हिंसीः परमे व्योमन् । गवयमारण्यमनु ते

दिशामि तेन चिन्वानस्तनुवो नि षीद ॥

वरुत्रिं त्वष्टुर्वरुणस्य नाभिमविं जज्ञानां रजसः परस्मात् । महीं

साहस्रीमसुरस्य मायामग्ने मा हिंसीः परमे व्योमन् ॥

इमामूर्णायुं वरुणस्य मायां त्वचम्पशूनां द्विपदां चतुष्पदाम् । त्वष्टुः

प्रजानाम्प्रथमं जनित्रमग्ने मा हिंसीः परमे व्योमन् । उष्ट्रमारण्यमनु ते

दिशामि तेन चिन्वानस्तनुवो नि षीद ॥

यो अग्निग्नेस्तपसोऽधि जातः शोचात्पृथिव्या उत वा दिवस्परि । येन

प्रजा विश्वकर्मा व्यानदत्तमग्ने हेडः परि ते वृणक्तु ॥

अजा ह्यग्नेरजनिष्टु गर्भात्सा वा अपश्यज्जनितारमग्ने । तथा रोहमायन्नुप

मेध्यासः तया देवा देवतामग्र आयन् । शरभमारण्यमानु ते दिशामि

तेन चिन्वानस्तनुवो नि षीद ॥१०॥

इन्द्राग्नी रोचना दिवः परि वाजेषु भूषथः । तद्वां चेति प्र वीर्यम् ॥  
 शनर्थद्वत्रमुत संनोति वाजमिन्द्रा यो अग्नी सहुरी सपर्यात् । इरज्यन्ता  
 वसव्यस्य भूरेः सहस्तमा सहसा वाजयन्ता ॥  
 प्र चर्षणिभ्यः पृतना हवेषु प्र पृथिव्या रिरिचाथे दिवश्च । प्र सिन्धुभ्यः प्र  
 गिरिभ्यो महित्वा प्रेन्द्राग्नी विश्वा भुवनात्यन्या ॥  
 मरुतो यस्य हि क्षयै पाथा दिवो विमहसः । स सुगोपातमो जनः ॥  
 यज्ञैर्वा यज्ञवाहसो विप्रस्य वा मतीनाम् । मरुतः श्रिणुता हवम् ॥  
 श्रियसे कम्भानुभिः सम्मिमिक्षिरे ते रश्मिभिस्त ऋक्वभिः सुखादयः । ते  
 वाशीमन्त इष्मिणो अभीरवो विद्रे प्रियस्य मारुतस्य धाम्नः ॥  
 अवं ते हेड उदुत्तमम् । कया नश्चित्र आ भुवदूती सदावृधुः सखा ।  
 कया शचिष्ठया वृता ॥  
 को अद्य युङ्क्ते धुरि गा ऋतस्य शिमीवतो भामिनो दुर्हणायून् ।  
 आसन्निषूहृत्स्वसौ मयोभून्य एषाम्भृत्यामृणधत्स जीवात् ॥  
 अग्ने नया देवानां शं नो भवन्तु वाजैवाजे ।  
 अप्स्वग्ने सधिष्टव सौषधीरनु रुध्यसे । गर्भे सञ्जायसे पुनः ॥  
 वृषा सोम द्युमां असि वृषा देव वृषव्रतः । वृषा धर्माणि दधिषे ॥  
 इमम्मे वरुण तत्त्वां यामि त्वं नो अग्ने स त्वं नो अग्ने ॥११॥

इति चतुर्थकारण्डे द्वितीयः प्रपाठकः २

अथ चतुर्थकारण्डे तृतीयः प्रपाठकः ३

अपां त्वेमन्त्सादयाम्य पां त्वोद्यन्त्सादयाम्य पां त्वा  
 भस्मन्त्सादयाम्य पां त्वा ज्योतिषि सादयाम्य पां त्वायने

सादयाम्यर्णवे स॒दने सीद॑ समु॒द्रे स॒दने सीद॑ सलिले स॒दने सीदा॑ पां  
क्षयै॑ सीदा॒ पां स॒धिषि॑ सीदा॒ पां त्वा॒ स॒दने सादयाम्य॑ पां त्वा  
स॒धस्थै॑ सादयाम्य॒ पां त्वा॒ पुरी॑षे सादयाम्य॒ पां त्वा॒ योनौ॑  
सादयाम्य॒ पां त्वा॒ पार्थ॑सि सादयामि गाय॒त्री छन्द॑ स्त्रिष्टु॒च्छन्दो॑ जगती  
छन्दो॑ ऽनुष्टु॒च्छन्दः॑ प॒ङ्क्तिश्छन्दः॑ ॥१॥

अ॒यम्पुरो॑ भुव॒स्तस्य॑ प्रा॒णो भौवा॑य॒नो वस॑न्तः प्रा॒णाय॑नो गाय॒त्री वास॑न्ती  
गाय॒त्रियै॑ गाय॒त्रं गाय॑त्रादु॒पां शुरु॑पां शोस्त्रि॒वृत्त्रि॒वृतौ॑ रथं॒तरं॑  
रथं॒तराद्व॑सिष्ट ऋषिः प्र॒जाप॑तिगृहीतया त्वया प्रा॒णं गृ॑ह्णामि प्र॒जाभ्यो॑ऽयं  
दक्षि॑णा वि॒श्वक॑र्मा तस्य॒ मनो॑ वैश्वक॒र्मणं॑ ग्री॒ष्मो मान॑सस्त्रिष्टु॒गृष्मी॑ त्रिष्टु॒भ  
ऐडमै॑डाद॒न्तर्या॑मोऽन्तर्या॒मात्पञ्च॑दशः पञ्चदशा॒हृहृहृ॑हृतो भ॒रद्वा॑ज ऋषिः  
प्र॒जाप॑तिगृहीतया त्वया॒ मनो॑ गृह्णामि प्र॒जाभ्यो॑ यम्पश्चाद्वि॒श्वव्य॑चास्तस्य  
चक्षु॑र्वैश्वव्यच॒सं व॒र्षाणि॑ चाक्षु॒षाणि॑ जगती वा॒र्षी जग॑त्या  
ऋक्ष॑म॒मृक्ष॑माच्छु॒क्रः शु॒क्रात्सप्त॑दशः सप्तदशा॒द्वैरूपं॑ वैरू॒पाद्वि॒श्वामि॑त्र  
ऋषिः प्र॒जाप॑तिगृहीतया त्वया चक्षु॑र्गृह्णामि प्र॒जाभ्य॑ इदमु॒त्तरा॑त्सुव॒स्तस्य॑  
श्रोत्रं॑ सौ॒व श॒रच्छ्रौ॒त्र्यन॑ष्टु॒ष्पार॑द्यनुष्टु॒भः स्वारं॑ स्वा॒रान्म॒न्थी म॒न्थिनं॑  
एक॒विंश॑ एक॒विंश॑ाद्वैरा॒जं वैरा॑जाज्ज॒मद॑ग्निर्ऋषिः प्र॒जाप॑तिगृहीतया  
त्वया श्रोत्रं॑ गृह्णामि प्र॒जाभ्य॑ इयमु॒परि॑ म॒तिस्तस्यै॑ वा॒ङ्माती॑ है॒मन्तो॑  
वा॒च्याय॑नः प॒ङ्क्तिर्है॑मन्ती प॒ङ्क्त्यै॑ नि॒धन॑वन्नि॒धन॑वत आग्रय॒ण  
आग्र॑य॒णात्त्रि॑णवत्रयस्त्रिंशौ त्रि॑णवत्रयस्त्रिंशाभ्यां॑ शाक्वरै॒वृते॑  
शाक्वरै॒वृता॑भ्यां वि॒श्वक॑र्मर्षिः प्र॒जाप॑तिगृहीतया त्वया वाचं॑ गृह्णामि  
प्र॒जाभ्यः॑ ॥२॥

प्राचीं दिशां वसन्त ऋतूनामग्निर्देवता ब्रह्म द्रविणं त्रिवृत्स्तोमः स उं  
 पञ्चदशवर्तनिस्र्यविवर्यः कृतमयानाम्पुरोवातो वातः सानगु  
 ऋषिर्दक्षिणा दिशां ग्रीष्म ऋतूनामिन्द्रो देवता क्षत्रं द्रविणम्पञ्चदशः  
 स्तोमः स उं सप्तदशवर्तनिर्दित्यवाड्वयस्त्रेतायानां दक्षिणाद्वातो वातः  
 सनातन ऋषिः प्रतीचीं दिशां वर्षा ऋतूनां विश्वे देवा देवता  
 विट्द्रविणं सप्तदशः स्तोमः स उं एकविंशवर्तनिस्रिवत्सो वयो  
 द्वापरोऽयानाम्पश्चाद्वातो वातोऽहभून् ऋषिर्रुदीचीं दिशां  
 शरदृतूनामित्रावरुणौ देवता पुष्टं द्रविणमेकविंशः स्तोमः स उं  
 त्रिणववर्तनिस्र्यवाड्वय आस्कन्दोऽयानामुत्तराद्वातो वातः प्रत्न  
 ऋषिर्रुध्वा दिशां हैमन्तशिशिरावृतूनाम्बृहस्पतिर्देवता वर्चो द्रविणं  
 त्रिणवः स्तोमः स उं त्रयस्त्रिंशवर्तनिः पष्ठवाद्योऽभिभूरयानां  
 विष्वग्वातो वातः सुपर्ण ऋषिः पितरः पितामहाः परेऽवरे ते नः पान्तु ते  
 नोऽवन्त्वस्मिन्ब्रह्मन्स्मिन्क्षत्रेऽस्यामाशिष्यस्याम्पुरोधायाम्स्मिन्कर्मन्स्यां  
 देवहृत्याम् ॥३॥

ध्रुवक्षितिर्ध्रुवयोनिर्ध्रुवासि ध्रुवां योनिमा सीद साध्या । उख्यस्य  
 केतुम्प्रथमम्पुरस्तादश्विनाध्वर्यू सादयतामिह त्वा ॥  
 स्वे दक्षे दक्षपितेह सीद देवत्रा पृथिवी बृहती रराणा । स्वासुस्था  
 तनुवा सं विशस्व पितेवैधि सूनव आसुशेवाश्विनाध्वर्यू सादयतामिह  
 त्वा ॥

कुलायिनी वसुमती वयोधा रयिं नो वर्ध बहुलं सुवीरम् ।  
 अपामतिं दुर्मतिम्बाधमाना रायस्पोषे यज्ञपतिमाभजन्ती सुवर्धेहि  
 यजमानाय पोषमश्विनाध्वर्यू सादयतामिह त्वा ॥

अग्नेः पुरीषमसि देवयानी तां त्वा विश्वे अभि गृणन्तु देवाः । स्तोमपृष्ठा  
घृतवतीह सीद प्रजावदस्मे द्रविणायजस्वाश्विनाध्वर्यू सादयतामिह त्वा  
॥

दिवो मूर्धासि पृथिव्या नाभिर्विष्टम्भनी दिशामधिपती भुवनानाम् ॥  
ऊर्मिर्द्रप्सो अपामसि विश्वकर्मा त ऋषिरश्विनाध्वर्यू सादयतामिह त्वा ॥  
सजूर्ऋतुभिः सजूर्विधाभिः सजूर्वसुभिः सजूर् रुद्रैः सजूर्ादित्यैः  
सजूर्विश्वैर्देवैः सजूर्देवैः सजूर्देवैर्वयोनाधैरग्र्यै त्वा वैश्वानरायाश्विनाध्वर्यू  
सादयतामिह त्वा ॥ प्राणम्मे पाह्यपानम्मे पाहि व्यानम्मे पाहि चक्षुर्म  
उर्व्या वि भाहि श्रोत्रम्मे श्लोकया पस्पिन्वौषधी जिन्व द्विपात्पाहि  
चतुष्पादव दिवो वृष्टिमेरय ॥४॥

त्र्यविर्वयस्त्रिष्टुच्छन्दो दित्यवाड्वयो विराट्छन्दः पञ्चाविर्वयो गायत्री  
छन्दस्त्रिवत्सो वय उष्णिहा छन्दस्तुर्यवाड्वयोऽनुष्टुच्छन्दः  
पष्टवाड्वयो बृहती छन्द उक्षा वयः सतोबृहती छन्द ऋषभो वयः  
ककुच्छन्दो धेनुर्वयो जगती छन्दोऽनुड्वान्वयः पङ्क्तिश्छन्दो ब्रुस्तो वयो  
विवलं छन्दो वृष्णिर्वयो विशालं छन्दः पुरुषो वयस्तन्द्रं छन्दो व्याघ्रो  
वयोऽनाधृष्टं छन्दः सिँहो वयश्छदिश्छन्दो विष्टम्भो वयोऽधिपतिश्छन्दः  
क्षत्रं वयो मयन्दं छन्दो विश्वकर्मा वयः परमेष्ठी छन्दो मूर्धा वयः  
प्रजापतिश्छन्दः ॥५॥

इन्द्राग्नी अव्यथमानामिष्टकां दँहतं युवम् । पृष्ठेन द्यावापृथिवी  
अन्तरिक्षं च वि बाधताम् ॥  
विश्वकर्मा त्वा सादयत्वन्तरिक्षस्य पृष्ठे व्यचस्वतीम्प्रथस्वतीम्भास्वतीँ



सूरिमतीमा या द्याम्भास्या पृथिवीमोर्वन्तरिक्षमन्तरिक्षं यच्छान्तरिक्षं  
दृहान्तरिक्षम्मा हिंसीर्विश्वस्मै प्राणायानाय व्यानायौदानाय  
प्रतिष्ठायै चरित्राय वायुस्त्वाभि पातु मद्या स्वस्त्या च्छर्दिषा शन्तमेन  
तया देवतयाङ्गिरस्वद्भुवा सीद ।

राज्ञयसि प्राची दिग्विराडसि दक्षिणा दिक्सम्राडसि प्रतीची  
दिक्स्वराडस्युदीची दिगधिपत्न्यसि बृहती दि गायुर्मे पाहि प्राणम्मे  
पाह्य पानम्मे पाहि व्यानम्मे पाहि चक्षुर्मे पाहि श्रोत्रम्मे पाहि मनो मे  
जिन्व वाचम्मे पिन्वात्मानम्मे पाहि ज्योतिर्मे यच्छ ॥६॥

मा छन्दः प्रमा छन्दः प्रतिमा छन्दोऽस्त्रीविश्वछन्दः पङ्क्तिश्छन्द उष्णिहा  
छन्दो बृहती छन्दोऽनुष्टुप्छन्दो विराट्छन्दो गायत्री छन्दस्त्रिष्टुप्छन्दो  
जगती छन्दः पृथिवी छन्दोऽन्तरिक्षं छन्दो द्यौश्छन्दः समाश्छन्दो नक्षत्राणि  
छन्दो मनश्छन्दो वाक्छन्दः कृषिश्छन्दो हिरण्यं छन्दो गौश्छन्दोऽजा  
छन्दोऽश्वश्छन्दः ॥

अग्निर्देवता वातो देवता सूर्यो देवता चन्द्रमा देवता वसवो देवता रुद्रा  
देवतादित्या देवता विश्वे देवा देवता मरुतो देवता बृहस्पतिर्देवतेन्द्रो  
देवता वरुणो देवता ।

मूर्धासि राङ्ध्रुवासि धरुणा यन्त्र्यसि यमित्री षे त्वो जे त्वा कृष्यै त्वा  
क्षेमाय त्वा यन्त्री राङ्ध्रुवासि धरणी धर्यसि धरित्र्या युषे त्वा वर्चसे  
त्वौ जसे त्वा बलाय त्वा ॥७॥

आशुस्त्रिवृद्भान्तः पञ्चदशो व्योम सप्तदशः प्रतूर्तिरष्टादशस्तपो  
नवदशोऽभिवर्तः सविंशो धरुण एकविंशो वर्चो द्वाविंशः

सुम्भरणस्त्रयोविंशो योनिश्चतुर्विंशो गर्भाः पञ्चविंश ओजस्त्रिणवः  
क्रतुरेकत्रिंशः प्रतिष्ठा त्रयस्त्रिंशो बृध्नस्य विष्टपं चतुस्त्रिंशो नार्कः  
षट्त्रिंशो विवर्तोऽष्टाचत्वारिंशो धृत्रश्चतुष्टोमः ॥८॥

अग्नेर्भागोऽसि दीक्षाया आधिपत्यम्ब्रह्म स्पृतं त्रिवृत्स्तोम इन्द्रस्य  
भागोऽसि विष्णोराधिपत्यं क्षत्रं स्पृतम्पञ्चदशः स्तोमौ  
नृचक्षसाम्भागोऽसि धातुराधिपत्यं जनित्रं स्पृतं सप्तदशः स्तोमौ  
मित्रस्य भागोऽसि वरुणस्याधिपत्यं दिवो वृष्टिर्वाताः स्पृता एकविंशः  
स्तोमोऽदित्यै भागोऽसि पूष्ण आधिपत्यमोजः स्पृतं त्रिणवः स्तोमो  
वसूनाम्भागोऽसि रुद्राणामाधिपत्यं चतुष्पात्स्पृतं चतुर्विंशः स्तोमं  
आदित्यानाम्भागोऽसि मरुतामाधिपत्यं गर्भाः स्पृताः पञ्चविंशः स्तोमौ  
देवस्य सवितुर्भागोऽसि बृहस्पतेराधिपत्यं समीचीर्दिशः स्पृताश्चतुष्टोमः  
स्तोमो यावानाम्भागोऽस्ययावानामाधिपत्यम्प्रजाः स्पृताश्चतुश्चत्वारिंशः  
स्तोमं ऋभूणाम्भागोऽसि विश्वेषां देवानामाधिपत्यम्भूतं निशान्तं स्पृतं  
त्रयस्त्रिंशः स्तोमः ॥९॥

एकयास्तुवत प्रजा अधीयन्त प्रजापतिरधिपतिरासीत्तिसृभिरस्तुवत  
ब्रह्मासृज्यत ब्रह्मणस्पतिरधिपतिरासीत्पञ्चभिरस्तुवत भूतान्यसृज्यन्त  
भूतानाम्पतिरधिपतिरासीत्सप्तभिरस्तुवत सप्तर्षयोऽसृज्यन्त  
धाताधिपतिरासीन्नवभिरस्तुवत  
पितरोऽसृज्यन्तादितिरधिपत्रयासी देकादशभिरस्तुवतर्तवोऽसृज्यन्तार्तवोऽ  
धिपतिरासीत्त्रयोदशभिरस्तुवत मासा असृज्यन्त  
संवत्सरोऽधिपतिरासीत्पञ्चदशभिरस्तुवत

क्षत्रमसृज्यतेन्द्रोऽधिपतिरासीत्सप्तदशभिरस्तुवत पशवोऽसृज्यन्त  
 बृहस्पतिरधिपतिरासीन्नवदशभिरस्तुवत शूद्रार्याविसृज्येतामहोरात्रे  
 अधिपती आस्ता मेकविंशत्यास्तुवतैकशफाः पशवोऽसृज्यन्त  
 वरुणोऽधिपतिरासीत्त्रयोविंशत्यास्तुवत क्षुद्राः पशवोऽसृज्यन्त  
 पूषाधिपतिरासीत्पञ्चविंशत्यास्तुवतारुणयाः पशवोऽसृज्यन्त  
 वायुरधिपतिरासीत्सप्तविंशत्यास्तुवत द्यावापृथिवी व्यैतां वसवो रुद्रा  
 आदित्या अनु व्यायन्तेषामाधिपत्यमासीन्नवविंशत्यास्तुवत  
 वनस्पतयोऽसृज्यन्त सोमोऽधिपतिरासीदेकत्रिंशतास्तुवत प्रजा  
 असृज्यन्त यावानां चायावानां चाधिपत्यमासीत्त्रयस्त्रिंशतास्तुवत  
 भूतान्यशाम्यन्प्रजापतिः परमेष्ठ्यधिपतिरासीत् ॥ १० ॥

इयमेव सा या प्रथमा व्यौच्छदन्तरस्यां चरति प्रविष्टा । वधूर्जजान  
 नवगजनित्री त्रय एनाम्महिमानः सचन्ते ॥  
 छन्दस्वती उषसा पेपिशाने समानं योनिमनु संचरन्ती । सूर्यपत्नी वि  
 चरतः प्रजानती केतुं कृण्वाने अजरे भूरिरतसा ॥  
 ऋतस्य पन्थामनु तिस्र आगुस्त्रयो घर्मासो अनु ज्योतिषागुः । प्रजामेका  
 रक्षत्यूर्जमेका व्रतमेका रक्षति देवयूनाम् ॥  
 चतुष्टोमो अभवद्द्या तुरीया यज्ञस्य पक्षावृषयो भवन्ती । गायत्रीं त्रिष्टुभं  
 जगतीमनुष्टुभम्बृहदृक् युञ्जानाः सुवराभरन्निदम् ॥  
 पञ्चभिर्धाता वि दधाविदं यत्तासां स्वसृरजनयत्पञ्चपञ्च । तासामु यन्ति  
 प्रयवेण पञ्च नाना रूपाणि क्रतवो वसानाः ॥  
 त्रिंशत्स्वसार उप यन्ति निष्कृतं समानं केतुम्प्रतिमुञ्चमानाः ।  
 ऋतं स्तन्वते क्वयः प्रजानतीर्मध्येच्छन्दसः परि यन्ति भास्वतीः ॥

ज्योतिष्मती प्रति मुञ्चते नभो रात्री देवी सूर्यस्य वृतानि । वि पश्यन्ति  
पशवो जायमाना नानारूपा मातुरस्या उपस्थे ॥  
एकाष्टका तपसा तप्यमाना जजानु गर्भम्महिमानमिन्द्रम् । तेन  
दस्यून्यसहन्त देवा हन्तासुराणामभवच्छचीभिः ॥  
अनानुजामनुजाम्मामकर्त सत्यं वदन्त्यन्विच्छ एतत् । भूयासमस्य  
सुमतौ यथा यूयमन्या वौ अन्यामति मा प्र युक्त ॥  
अभून्मम सुमतौ विश्ववेदा आष्ट प्रतिष्ठामविदद्धि गाधम् । भूयासमस्य  
सुमतौ यथा यूयमन्या वौ अन्यामति मा प्र युक्त ॥  
पञ्च व्युष्टीरनु पञ्च दोहा गाम्पञ्चनाम्नीमृतवोऽनु पञ्च । पञ्च दिशः पञ्चदशेन  
क्लृप्ताः समानमूर्ध्नीरभि लोकमेकम् ॥  
ऋतस्य गर्भः प्रथमा व्युषुष्यपामेका महिमानम्बिभर्ति । सूर्यस्यैका चरति  
निष्कृतेषु घर्मस्यैका सवितैकां नि यच्छति ॥  
या प्रथमा व्यौच्छत्सा धेनुरभवद्यमे । सा नः पर्यस्वती  
धुद्वोत्तरामुत्तराँ समाम् ॥  
शुक्रर्षभा नभसा ज्योतिषागाद्विश्वरूपा शबलीरग्निकैतुः । समानमर्थँ  
स्वपस्यमाना बिभ्रती जरामजर उष आगाः ॥  
ऋतूनाम्पत्नी प्रथमेयमागादह्नां नेत्री जनित्री प्रजानाम् । एका सती  
बहुधोषो व्युच्छस्यजीर्णा त्वं जरयसि सर्वमन्यत् ॥११॥

अग्रै जातान्प्र गुदा नः सपत्नान्प्रत्यजाताञ्जातवेदो नुदस्व । अस्मे दीदिहि  
सुमना अहेडन्तव स्याँ शर्मन्निवरूथ उद्धित् ॥  
सहसा जातान्प्र गुदा नः सपत्नान्प्रत्यजाताञ्जातवेदो नुदस्व । अधि नो  
ब्रूहि सुमनस्यमानो वयँ स्याम् प्र गुदा नः सपत्नान् ॥

चतुश्चत्वारिंशः स्तोमो वर्चो द्रविणं षोडशः स्तोमं ओजो द्रविणं  
 पृथिव्याः पुरीषमस्यप्सो नाम ।  
 एवश्छन्दो वरिवश्छन्दः शम्भूश्छन्दः परिभूश्छन्द आच्छछन्दो मनश्छन्दो  
 व्यचश्छन्दः सिन्धुश्छन्दः समुद्रं छन्दः सलिलं छन्दः संयच्छन्दो  
 वियच्छन्दो बृहच्छन्दो रथंतरं छन्दो निकायश्छन्दो विवधश्छन्दो  
 गिरश्छन्दो भ्रजश्छन्दः सष्टुष्छन्दोऽनुष्टुष्छन्दः ककुच्छन्द स्त्रिककुच्छन्दः  
 काव्यं छन्दोऽङ्कुपं छन्दः पदपङ्क्तिश्छन्दोऽक्षरपङ्क्तिश्छन्दो विष्टारपङ्क्तिश्छन्दः  
 क्षुरो भृज्वाञ्छन्दः प्रच्छछन्दः पक्षश्छन्द एवश्छन्दो वरिवश्छन्दो  
 वयश्छन्दो वयस्कृच्छन्दो विशालं छन्दो विषर्घाश्छन्द श्छदिश्छन्दो  
 दूरोहणं छन्दं स्तन्द्रं छन्दोऽङ्काङ्कं छन्दः ॥१२॥

अग्निर्वृत्राणि जङ्घनद्विविणस्युर्विपन्यया । समिद्धः शुक्र आहुतः ॥  
 त्वं सौमासि सत्पतिस्त्वं राजोत वृत्रहा । त्वम्भद्रो असि क्रतुः ॥  
 भद्रा तै अग्ने स्वनीक सदृघोरस्य सतो विषुणस्य चारुः । न यत्तै  
 शोचिस्तमसा वरन्त न ध्वस्मानस्तनुवि रेपु आ धुः ॥  
 भद्रं तै अग्ने सहसिन्ननीकमुपाक आ रौचते सूर्यस्य ।  
 रुशदृशे ददृशे नक्तया चिदरूक्षितं दृश आ रूपे अन्नम् ॥  
 सैनानीकेन सुविदत्रो अस्मे यष्टा देवां आयजिष्ठः स्वस्ति । अदब्धो  
 गोपा उत नः परस्पा अग्ने द्युमदुत रेवदिदीहि ॥  
 स्वस्ति नो दिवो अग्ने पृथिव्या विश्वार्युर्धेहि यजथाय देव । यत्सीमहि  
 दिविजात प्रशस्तं तदस्मासु द्रविणं धेहि चित्रम् ॥  
 यथा होतर्मनुषो देवताता यज्ञेभिः सूनो सहसो यजासि । एवा नो अद्य  
 समना समानानुशन्नग्र उशतो यच्चि देवान् ॥

अग्निमीडे पुरोहितं यज्ञस्य देवमृत्विजम् । होतारं रत्नधातमम् ॥  
 वृषा सोम द्युमां असि वृषा देव वृषव्रतः । वृषा धर्माणि दधिषे ॥  
 सांतपना इदं हविर्मरुतस्तज्जुष्टन । युष्माकोती रिशादसः ॥  
 यो नो मर्तो वसवो दुर्हणायुस्तिरः सत्यानि मरुतो जिघांसात् । द्रुहः  
 पाशम्प्रति स मुंचीष्ट तपिष्ठेन तपसा हन्तना तम् ॥  
 संवत्सरीणा मरुतः स्वर्का उरुक्षयाः सर्गणा मानुषेषु । तैऽस्मत्पाशान्प्र  
 मुञ्चन्त्वंहसः सांतपना मदिरा मादयिष्णवः ॥  
 पिप्रीहि देवां उशतो यविष्ठ विद्वां ऋतं ऋतुपते यजेह । ये दैव्या  
 ऋत्विजस्तेभिरग्ने त्वं होतृणामस्यायजिष्ठः ॥  
 अग्ने यद्य विशो अध्वरस्य होतः पार्वक शोचे वेष्ट्वं हि यज्वा । ऋता  
 यजासि महिना वि यद्ब्रह्मव्या वह यविष्ठ या तै अद्य ॥  
 अग्निना रयिमश्नवत्पोषमेव दिवेदिवे । यशसं वीरवत्तमम् ॥  
 गयस्फानो अमीवहा वसुवित्पुष्टिवर्धनः । सुमित्रः सोम नो भव ॥  
 गृहमेधास आ गत मरुतो माप भूतन । प्रमुञ्चन्तो नो अंहसः ॥  
 पूर्वाभिर्हि ददाशिम शरद्भिर्मरुतो वयम् । महोभिश्चचर्षणीनाम् ॥  
 प्र बुध्निया ईरते वो महांसि प्र णामानि प्रयज्यवस्तिरध्वम् । सहस्त्रियं  
 दम्यम्भागमेतं गृहमेधीयम्मरुतो जुषध्वम् ॥  
 उप यमेति युवतिः सुदक्षं दोषा वस्तोर्हविष्मती घृताची । उप  
 स्वैनमरमतिर्वसूयुः ॥  
 इमो अग्ने वीततमानि हव्याजस्रो वक्षि देवतातिमच्छ । प्रति न ईं  
 सुरभीणि वियन्तु क्रीडं वः शर्धो मारुतमनर्वाणं रथेशुभम् । कर्वा  
 अभि प्र गांयत ॥  
 अत्यासो न ये मरुतः स्वञ्चो यक्षदृशो न शुभयन्त मर्याः । ते हर्म्येष्ठाः

शिशवो न शुभ्रा वत्सासो न प्रक्रीडिनः पयोधाः ॥  
 प्रैषामज्मेषु विथुरेव रेजते भूमिर्यामेषु यद्ध युञ्जते शुभे । ते क्रीडयो  
 धुनयो भ्राजदृष्टयः स्वयम्महित्वम्पनयन्त धूतयः ॥  
 उपह्वरेषु यदचिध्वं ययिं वयं इव मरुतः केन चित्पथा । श्रोतन्ति कोशा  
 उप वो रथेष्ववा घृतमुक्षता मधुवर्णमर्चते ॥  
 अग्निर्मग्निं हवीमभिः सदा हवन्त विशपतिम् । हव्यवाहम्पुरुप्रियम् ॥  
 तं हि शश्वन्त ईडते स्रुचा देवं घृतश्रुता । अग्निं हव्याय वोढवे ॥  
 इन्द्राग्नी रोचना दिवः शनथद्वूत्रमिन्द्रं वो विश्वतस्परीन्द्रं नरो  
 विश्वकर्महविषा वावृधानो विश्वकर्महविषा वर्धनेन ॥१३॥

इति चतुर्थकारण्डे तृतीयः प्रपाठकः ३

अथ चतुर्थकारण्डे चतुर्थः प्रपाठकः ४

रश्मिरसि क्षयाय त्वा क्षयं जिन्व प्रेतिरसि धर्माय त्वा धर्मं  
 जिन्वा न्वितिरसि दिवे त्वा दिवं जिन्व संधिरस्यन्तरिक्षाय त्वान्तरिक्षं  
 जिन्व प्रतिधिरसि पृथिव्यै त्वा पृथिवीं जिन्व विष्टम्भोऽसि वृष्ट्यै त्वा  
 वृष्टिं जिन्व प्रवास्यहे त्वाहर्जिन्वा नुवासि रात्रियै त्वा रात्रिं  
 जिन्वो शिर्गसि वसुभ्यस्त्वा वसूञ्जिन्व प्रकेतोऽसि रुद्रेभ्यस्त्वा  
 रुद्राञ्जिन्व सुदीतिरस्यादित्येभ्यस्त्वादित्याञ्जिन्वो जोऽसि पितृभ्यस्त्वा  
 पितृञ्जिन्व तन्तुरसि प्रजाभ्यस्त्वा प्रजा जिन्व पतनाषाडसि पशुभ्यस्त्वा  
 पशूञ्जिन्व रेवदस्योषधीभ्यस्त्वौषधीर्जिन्वा भिजिदसि युक्तग्रावेन्द्राय  
 त्वेन्द्रं जिन्वा धिपतिरसि प्राणाय त्वा प्राणं जिन्व यन्तास्यपानाय  
 त्वापानं जिन्व ससर्पोऽसि चक्षुषे त्वा चक्षुर्जिन्व वयोधा असि श्रोत्राय  
 त्वा श्रोत्रं जिन्व त्रिवृदसि प्रवृदसि संवृदसि विवृदसि सरोहोऽसि

नीरोहोऽसि प्ररोहोऽस्यनु रोहोऽसि वसुकौऽसि वेषश्रिरसि वस्यष्टिरसि  
॥१॥

राज्ञयसि प्राची दिग्वसवस्ते देवा अधिपतयोऽग्निर्हेतीनाम्प्रतिधृता  
त्रिवृत्त्वा स्तोमः पृथिव्याँ श्रयत्वाज्यमुक्थमव्यथयत्स्तभ्नातु रथंतरँ  
साम् प्रतिष्ठित्यै विराडसि दक्षिणा दिगुद्रास्ते देवा अधिपतय इन्द्रो  
हेतीनाम्प्रतिधृता पञ्चदशस्त्वा स्तोमः पृथिव्याँ श्रयतु  
प्रउगमुक्थमव्यथयत्स्तभ्नातु बृहत्साम् प्रतिष्ठित्यै सम्राडसि प्रतीची  
दिगादित्यास्ते देवा अधिपतयः सोमो हेतीनाम्प्रतिधृता सप्तदशस्त्वा  
स्तोमः पृथिव्याँ श्रयतु मरुत्वतीयमुक्थमव्यथयत्स्तभ्नातु वैरूपँ साम्  
प्रतिष्ठित्यै स्वराडस्युदीची दिग्विश्वे ते देवा अधिपतयो वरुणो  
हेतीनाम्प्रतिधृतैकविँशस्त्वा स्तोमः पृथिव्याँ श्रयतु  
निष्कैवल्यमुक्थमव्यथयत्स्तभ्नातु वैराजँ साम् प्रतिष्ठित्या अधिपत्त्रयसि  
बृहती दिङ्गुरुते देवा अधिपतयो बृहस्पतिर्हेतीनाम्प्रतिधृता  
त्रिणवत्रयस्त्रिँशौ त्वा स्तोमो पृथिव्याँ श्रयतां वैश्वदेवाग्निमारुते उक्थे  
अव्यथयन्ती स्तभ्नीताँ शाक्वरैवृते सामनी प्रतिष्ठित्या  
अन्तरिक्षायर्षयस्त्वा प्रथमजा देवेषु दिवो मात्रया वरिणा प्रथन्तु विधृता  
चायमधिपतिश्च ते त्वा सर्वे संविदाना नाकस्य पृष्ठे सुवर्गे लोके  
यजमानं च सादयन्तु ॥२॥

अयम्पुरो हरिकेशः सूर्यरश्मिस्तस्य रथगृत्सश्च रथौजाश्च सेनानिग्रामरथौ  
पुञ्जिकस्थला च कृतस्थला चाप्सरसौ यातुधाना हेती रक्षाँसि  
प्रहेति रयं दक्षिणा विश्वकर्मा तस्य रथस्वनश्च रथैचित्रश्च सेनानिग्रामरथौ



मे॒न॒का च॑ सह॒ज॒न्या चा॑प्सर॒सौ द॒ङ्ग॒णवः॑ प॒शवो॑ हे॒तिः पौरु॑षेयो व॒धः  
 प्रहे॑ति॒र॒य॒म्प॒श्चाद्वि॒श्वव्य॑चा॒स्तस्य॒ रथे॑प्रो॒त॒श्चास॑म॒रथश्च॑ से॒नानि॑ग्राम॒ण्यौ  
 प्र॒म्लोच॑न्ती चा॒नु॒म्लोच॑न्ती चा॒प्सर॒सौ सर्पा॑ हे॒तिर्व्या॑घ्राः  
 प्रहे॑ति॒र॒य॒मु॒त्तरा॑त्सं॒यद्र॑सु॒स्तस्य॑ से॒नजि॑च्च सु॒षेण॑श्च से॒नानि॑ग्राम॒ण्यौ  
 वि॒श्वाची॑ च घृ॒ताची॑ चा॒प्सर॒सावा॑पो हे॒तिर्वा॑तुः  
 प्रहे॑ति॒र॒य॒मु॒पर्य॑वा॒ग्वसु॑स्तस्य॒ ताद॒र्य॑श्चा॒रि॒ष्टने॑मिश्च से॒नानि॑ग्राम॒ण्यौवु॑र्वशी  
 च पूर्॒वचि॑त्तिश्चा॒प्सर॒सौ वि॒द्युद्धे॑ति॒रव॑स्फूर्ज॒न्प्रहे॑ ति॒स्तेभ्यो॑ नम॒स्ते नो॑  
 मृड॑यन्तु ते यं द्वि॒ष्मो यश्च॑ नो द्वेष्टि॒ तं वो॒ जम्भे॑ द॒धाम्या॑ योस्त्वा॒ सदे॑ने  
 साद॑या॒म्यव॑त॒श्छा॒यायां॒ नमः॑ स॒मुद्राय॑ नमः॑ स॒मुद्रस्य॑ चक्ष॒से पर॑मे॒ष्ठी त्वा॑  
 साद॑यतु दि॒वः पृ॒ष्ठे व्य॑च॒स्वती॑म्प्रथ॒स्वतीं॑ वि॒भूर्मती॑म्प्र॒भूर्मती॑म्परि॒भूर्मतीं॑  
 दि॒वं यच्छ॑ दि॒वं दृ॑ह दि॒वम्मा हि॑सी॒र्विश्व॑स्मै प्रा॒णाय॑पा॒नाय॑  
 व्या॒नायो॑दा॒नाय॑ प्रति॒ष्ठायै॑ च॒रित्रा॑य॒ सूर्य॑स्त्वा॒भि पा॑तु म॒ह्या स्व॑स्त्या  
 च्छ॒र्दिषा॑ श॒न्तमे॑न॒ तथा॑ दे॒वत॑याङ्गि॒रस्व॑द्ध्रु॒वा सी॑द प्रो॒थद॑श्चो न यव॑से  
 अ॒वि॒ष्य॒न्यदा॑ म॒हः सं॒वरे॑णा॒द्वय॑स्थात् । आ॒दस्य॑ वा॒तो अ॒नु वा॑ति  
 शो॒चिर॑र्धं स्म ते व्र॒जनं॑ कृ॒ष्णम॑स्ति ॥३॥

अ॒ग्नि॒र्मूर्धा॑ दि॒वः क॒कुत्प॑तिः पृथि॒व्या अ॒यम् । अ॒पाँ रेताँ॑सि जि॒न्वति॑  
 ॥

त्वा॒मग्ने॑ पुष्करा॒दध्य॑थ॒र्वा नि॑र॒मन्थ॑त । मूर्ध्नो॑ विश्व॒स्य वा॒घतः॑ ॥  
 अ॒यम॒ग्निः स॒हस्त्रि॑णो वा॒जस्य॑ श॒तिन॑स्पतिः । मूर्धा॑ क॒वी र॑यी॒णाम् ॥  
 भुवो॑ य॒ज्ञस्य॑ र॒जस॑श्च ने॒ता यत्रा॑ नि॒युद्धिः॑ सच॒से शि॒वाभिः॑ । दि॒वि  
 मूर्धा॑नं दधि॒षे सु॒वर्षा॑ जि॒ह्वाम॑ग्ने च॒कृषे॑ ह॒व्यवा॑हम् ॥  
 अ॒बो॒ध्य॒ग्निः स॒मिधा॑ जना॒नां प्रति॑ धे॒नुमि॑वा॒यती॑मु॒षास॑म् । य॒हा इ॒व प्र

व॒यामु॒ज्जिहा॑नाः प्र भान॑वः सि॒स्रते॑ ना॒क॒म॒च्छ ॥  
 अ॒वो॒चाम॑ क॒वये॑ मे॒ध्याय॑ व॒चो व॒न्दारु॑ वृष॒भाय॑ वृ॒ष्णो । ग॒वि॒ष्ठिरो॑  
 न॒मसा॑ स्तो॒मम॒ग्नौ दि॒वीव॑ रु॒क्ममु॒र्व्यञ्च॑म॒श्रेत् ॥  
 ज॒नस्य॑ गो॒पा अ॒जनि॑ष्ट जा॒गृवि॑र॒ग्निः सु॒दक्षः॑ सु॒वि॒ताय॑ न॒व्यसे॑ ।  
 घृ॒तप्र॑ती॒को बृ॒हता॑ दि॒वि॒स्पृशा॑ द्यु॒मद्वि॑ भा॒ति भ॑र॒तेभ्यः॑ शु॒चिः ॥  
 त्वा॒मग्ने॑ अ॒ङ्गिर॑सो गु॒हा हि॑त॒मन्व॑वि॒न्दज्जि॑ष्ठि॒श्रिया॑णं व॒नैव॑ने । स जा॑य॒से  
 म॒थ्यमा॑नः स॒हो म॒हत्त्वा॑मा॒हुः स॒हस॑स्पु॒त्रम॒ङ्गिरः॑ ॥  
 य॒ज्ञस्य॑ के॒तुम॑प्र॒थम॒पुरो॑हि॒तम॒ग्निं न॑र॒स्त्रिष॑ध॒स्थे स॑मि॒न्धते॑ । इ॒न्द्रेण॑ दे॒वैः  
 स॒रथ॑ꣳ स ब॒र्हिषि॑ सी॒दन्नि॑ होता॒ यज॑था॒य सु॒क्रतुः॑ ॥  
 त्वां चि॑त्रश्र॒वस्त॑म॒ हव॑न्ते वि॒क्षु ज॒न्तवः॑ । शो॒चिष्वै॑श॒म्पुरु॑प्रि॒याग्रे॑ ह॒व्याय॑  
 वो॒ढवे॑ ॥  
 सखा॑यः सं वः स॒म्यञ्च॑मिष॒ꣳ स्तो॒मं चा॒ग्नये॑ । व॒र्षि॑ष्ठाय॒ क्षिती॑ना॒मूर्जो॑  
 न॒प्त्रे स॒हस्व॑ते ॥  
 सꣳस॒मिद्यु॑वसे वृष॒न्नग्ने॑ वि॒श्वान्य॑र्य आ । इ॒डस्प॑दे स॒मि॒ध्यसे॑ स नो  
 व॒सू॒न्या भ॑र ॥  
 ए॒ना वो॑ अ॒ग्निं न॑म॒सोर्जो॑ नपा॒त॒मा हु॑वे । प्रि॒यं चे॑ति॒ष्ठम॑र॒तिꣳ स्व॑ध्व॒रं  
 वि॒श्वस्य॑ दू॒तम॑मृ॒तम् ॥  
 स यो॑ज॒ते अ॒रुषो॑ वि॒श्वभौ॑जसा॒ स दु॑द्र॒व॒त्स्वा॑हुतः । सु॒ब्र॒ह्मा य॒ज्ञः सु॒शमी॑  
 व॒सू॒नां दे॒वꣳ रा॒धो ज॑ना॒नाम् ॥  
 उ॒दस्य॑ शो॒चिर॑स्थादा॒जुह्वान॑स्य मी॒ढुषः॑ । उ॒द्धू॒मासौ॑ अ॒रुषा॑सौ  
 दि॒वि॒स्पृशः॑ स॒म॒ग्निमि॑न्ध॒ते नरः॑ ॥  
 अ॒ग्ने वा॑र्जस्य॒ गोम॑त॒ ईशा॑नः स॒हसो॑ य॒हो । अ॒स्मे धै॑हि जा॒तवे॑दो म॒हि  
 श्र॑वः ॥

स इ॒ध॒ानो वसु॑ष्क॒विर॒ग्निरी॒डेन्यो॑ गिरा । रे॒वद॒स्मभ्य॑म्पुर्वणीक दीदिहि  
॥

क्ष॒पो रा॑जन्न॒त त्मना॑ग्ने वस्तो॒रुतो॑षसः । स ति॒ग्मज॑म्भ र॒क्षसो॑ दह॒ प्रति  
॥

आ ते॑ अ॒ग्न इ॒धीम॑हि द्यु॒मन्तं॑ दे॒वाज॑रम् । यद्ध॒ स्या ते॒ पनी॑यसी  
स॒मिद्दी॑दर्यति॒ द्यवी॑षं॒ स्तोतृ॑भ्य॒ आ भ॑र ॥

आ ते॑ अ॒ग्न ऋ॒चा ह॒विः शु॒क्रस्य॑ ज्योतिषस्पते । सु॒श्वन्द्र॑ दस्म॒ विश॑पते  
हव्य॑वा॒ट्त्तु॑भ्यं॒ हूय॑त॒ इषं॑ स्तोतृ॑भ्य॒ आ भ॑र ॥

उ॒भे सु॑श्वन्द्र स॒र्पिषो॑ दर्वी॒ श्रीणी॑ष आ॒सनि॑ । उ॒तो न॒ उत्पु॑पूर्या॒ उक्थे॑षु  
शव॑सस्पत॒ इषं॑ स्तोतृ॑भ्य॒ आ भ॑र ॥

अ॒ग्ने तम॑द्याश्वं न स्तो॒मैः क्र॑तुं न भ॒द्रं ह॑दिस्पृशम् । ऋ॒ध्यामा॑ त॒ ओहैः  
॥

अ॒धा ह्य॑ग्ने॒ क्रतो॑र्भ॒द्रस्य॑ दक्ष॒स्य सा॒धोः । र॒थीर्ऋ॑तस्य॒ बृहतो॑ ब॒भूथ॑ ॥  
आ॒भिष्टे॑ अ॒द्य गी॑र्भिर्गृ॒णन्तोऽग्ने॑ दाशेम । प्र ते॑ दि॒वो न स्त॑नयन्ति॒ शुष्माः  
॥

ए॒भिर्नो॑ अ॒कैर्भ॑वा॒ नो अ॒र्वाङ्ग॑सुव॒र्न ज्योतिः॑ । अ॒ग्ने वि॒श्वेभिः॑ सु॒मना॑  
अ॒नीकैः॑ ॥

अ॒ग्निं हो॑ता॒रम्म॑न्ये॒ दास्व॑न्त॒म्वसोः॑ सू॒नुं सह॑सो जा॒तवे॑दसम् । वि॒प्रं न  
जा॒तवे॑दसम् ॥

य ऊ॒र्ध्वया॑ स्व॒ध्वरो॑ दे॒वो दे॒वाच्या॑ कृ॒पा । घृ॒तस्य॑ वि॒भ्राष्टि॑मनु॒  
शु॒क्रशो॑चिष आ॒जुह्वान॑स्य स॒र्पिषः॑ ॥

अ॒ग्ने त्व॑मो॒ अन्त॑मः । उ॒त त्रा॒ता शि॒वो भ॑व वरू॒थ्यः ॥

तं त्वा॑ शोचिष्ठ दीदिवः । सु॒म्राय॑ नूनमीमहे सखि॑भ्यः ॥

वसुरग्निर्वसुश्रवाः । अच्छा नक्षि द्युमत्तमो रयिं दाः ॥४॥

इन्द्राग्निभ्यां त्वा सयुजा युजा युनज्या घाराभ्यां तेजसा वर्चसो कथेभिः  
स्तोमेभि श्छन्दोभी रय्यै पोषाय सजातानाम्मध्यमस्थेयाय मया त्वा  
सयुजा युजा युनज्यम्बा दुला नितति रभ्रयन्ती मेघयन्ती वर्षयन्ती  
चुपुणीका नामासि प्रजापतिना त्वा विश्वाभिर्धीभिरुप दधामि  
पृथिव्युदपुरमन्नैः विष्टा मनुष्यास्ते गोप्तारोऽग्निर्वियत्तोऽस्यां तामहम्प्र पद्ये  
सा मे शर्म च वर्म चा स्त्वधिद्यौरन्तरिक्षम्ब्रह्मणा विष्टा मरुतस्ते गोप्तारो  
वायुर्वियत्तोऽस्यां तामहम्प्र पद्ये सा मे शर्म च वर्म चास्तु  
द्यौरपराजितामृतैः विष्टादित्यास्तै गोप्तारः सूर्यो वियत्तोऽस्यां तामहम्प्र  
पद्ये सा मे शर्म च वर्म चास्तु ॥५॥

बृहस्पतिस्त्वा सादयतु पृथिव्याः पृष्ठे ज्योतिष्मतीं विश्वस्मै  
प्राणायानाय विश्वं ज्योतिर्यच्छाग्निस्तेऽधिपति विश्वकर्मा त्वा  
सादयत्वन्तरिक्षस्य पृष्ठे ज्योतिष्मतीं विश्वस्मै प्राणायानाय विश्वं  
ज्योतिर्यच्छ वायुस्तेऽधिपतिः प्रजापतिस्त्वा सादयतु दिवः पृष्ठे  
ज्योतिष्मतीं विश्वस्मै प्राणायानाय विश्वं ज्योतिर्यच्छ परमेष्ठी तेऽधिपतिः  
पुरोवातसनिरस्य भ्रसनिरसि विद्युत्सनिरसि स्तनयित्नुसनिरसि  
वृष्टिसनिरस्य ग्रेर्यान्यसि देवानामग्रेयान्यसि वायोर्यान्यसि देवानां  
वायोर्यान्यस्यन्तरिक्षस्य यान्यसि  
देवानामन्तरिक्षयान्यस्यन्तरिक्षमस्यन्तरिक्षाय त्वा सलिलाय त्वा  
सर्णीकाय त्वा सतीकाय त्वा केताय त्वा प्रचेतसे त्वा विवस्वते त्वा  
दिवस्त्वा ज्योतिष आदित्येभ्यस्त्वर्चे त्वा रुचे त्वा द्युते त्वा भासे त्वा

ज्योतिषे त्वा यशोदां त्वा यशसि तेजोदां त्वा तेजसि पयोदां त्वा पर्यसि  
वर्चोदां त्वा वर्चसि द्रविणोदां त्वा द्रविणे सादयामि तेनर्षिणा तेन  
ब्रह्मणा तया देवतयाङ्गिरस्वद्ध्रुवा सीद ॥६॥

भूयस्कृदसि वरिवस्कृदसि प्राच्यस्यूर्ध्वास्यन्तरिक्षसदस्यन्तरिक्षे  
सीदा प्सुषदसि श्येनसदसि गृध्रसदसि सुपर्णसदसि नाकसदसि  
पृथिव्यास्त्वा द्रविणे सादयाम्यन्तरिक्षस्य त्वा द्रविणे सादयामि  
दिवस्त्वा द्रविणे सादयामि दिशां त्वा द्रविणे सादयामि द्रविणोदां त्वा  
द्रविणे सादयामि प्राणम्मे पाह्य पानम्मे पाहि व्यानम्मे पाह्यायुर्मे पाहि  
विश्वायुर्मे पाहि सर्वायुर्मे पाह्यग्ने यत्ते परं हन्नाम् तावेहि सं रंभावहै  
पाञ्चजन्येष्वप्यैध्यग्ने यावा अयावा एवा ऊमाः सब्दः सर्गरः सुमेकः  
॥७॥

अग्निना विश्वाषाट्सूर्येण स्वराट्कृत्वा शचीपतिं ऋषभेण त्वष्टां यज्ञेन  
मघवान्दक्षिणया सुवर्गो मन्युना वृत्रहा सौहाद्येन तनूधा अन्नैनु गयः  
पृथिव्यासनो दृग्भिरन्नादो वषट्कारेणर्द्धः साम्ना तनूपा विराजा  
ज्योतिष्मान्ब्रह्मणा सोमपा गोभिर्यज्ञं दाधार क्षत्रेण मनुष्यां नश्वेन च रथेन  
च वज्रयं तुभिः प्रभुः संवत्सरेण परिभूस्तपसानाधृष्टः सूर्यः सन्तनूभिः  
॥८॥

प्रजापतिर्मनुसान्धोऽच्छेतो धाता दीक्षायां सविता भृत्यां पूषा  
सौमक्रयंशयां वरुण उपनद्धोऽसुरः क्रीयमाणो मित्रः क्रीतः शिपिविष्ट  
आसादितो नरंधिषः प्रोह्यमाणोऽधिपतिरागतः प्रजापतिः

प्रणीयमानोऽग्निराग्नीध्रे बृहस्पतिराग्नीध्रात्प्रणीयमान् इन्द्रो  
हविधनेऽदितिरासादितो विष्णुरुपावह्नियमाणोऽथर्वोपौत्तो  
यमोऽभिषुतोऽपूतपा आधूयमानो वायुः पूयमानो मित्रः क्षीरश्री मन्थी  
सक्तुश्री वैश्वदेव उन्नीतो रुद्र आहुतो वायुरावृत्तो नृचक्षाः प्रतिख्यातो  
भक्ष आगतः पितृणां नाराशंसोऽसुरात्तः  
सिन्धुरवभृथर्मवप्रयन्त्समुद्रोऽवगतः सलिलः प्रप्लुतः सुवर्दृचं गतः  
॥६॥

कृत्तिका नक्षत्रमग्निदेवताग्ने रुचः स्थ प्रजापतेर्धातुः सोमस्यर्चे त्वा रुचे  
त्वा द्युते त्वा भासे त्वा ज्योतिषे त्वा रोहिणी नक्षत्रम्प्रजापतिदेवता  
मृगशीर्षं नक्षत्रं सोमो देवताद्रा नक्षत्रं रुद्रो देवता पुनर्वसू  
नक्षत्रमदितिदेवता तिष्यो नक्षत्रम्बृहस्पतिदेवताश्रेषा नक्षत्रं सर्पा देवता  
मृधा नक्षत्रम्पितरो देवता फल्गुनी नक्षत्रमर्यमा देवता फल्गुनी  
नक्षत्रम्भगो देवता हस्तो नक्षत्रं सविता देवता चित्रा नक्षत्रमिन्द्रो देवता  
स्वाती नक्षत्रं वायुदेवता विशाखे नक्षत्रमिन्द्राग्नी देवतानूराधा  
नक्षत्रम्मित्रो देवता रोहिणी नक्षत्रमिन्द्रो देवता विचृतौ नक्षत्रम्पितरो  
देवताषाढा नक्षत्रमापो देवताषाढा नक्षत्रं विश्वे देवा देवता श्रोणा नक्षत्रं  
विष्णुदेवता श्रविष्ठा नक्षत्रं वसवो देवता शतभिषङ् नक्षत्रमिन्द्रो देवता  
प्रोष्ठपदा नक्षत्रमज एकपाद्देवता प्रोष्ठपदा नक्षत्रमहिर्बुध्नियो देवता रेवती  
नक्षत्रम्पूषा देवताश्वयुजौ नक्षत्रमश्विनौ देवतापभरणीर्नक्षत्रं यमो देवता  
पूर्णा पश्चाद्यत्तै देवा अर्दधुः ॥१०॥

मधुश्च माधवश्च वासन्तिकावृतू शुक्रश्च शुचिश्च ग्रैष्मावृतू नभश्च नभस्यश्च

वार्षिकावृतू इषश्चोर्जश्च शारदावृतू सहस्र सहस्यश्च हैमन्तिकावृतू तपश्च  
 तपस्यश्च शैशिरावृतू अग्नेरन्तःश्लेषोऽसि कल्पेतां द्यावापृथिवी  
 कल्पन्तामाप ओषधीः कल्पन्तामग्रयः पृथङ्गम ज्यैष्ठ्याय सव्रताः येऽग्रयः  
 समनसोऽन्तरा द्यावापृथिवी शैशिरावृतू अभि कल्पमाना इन्द्रमिव देवा  
 अभि सं विशन्तु संयच्च प्रचेताश्चाग्नेः सोमस्य सूर्यस्यो ग्रा च भीमा च  
 पितृणां यमस्येन्द्रस्य ध्रुवा च पृथिवी च देवस्य सवितुर्मरुतां वरुणस्य  
 धर्त्री च धरित्री च मित्रावरुणयोर्मित्रस्य धातुः प्राची च प्रतीची च  
 वसूनां रुद्राणामादित्यानां ते तेऽधिपतयस्तेभ्यो नमस्ते नो मृडयन्तु ते यं  
 द्विष्मो यश्च नो द्वेष्टि तं वो जम्भे दधामि सहस्रस्य प्रमा असि सहस्रस्य  
 प्रतिमा असि सहस्रस्य विमा असि सहस्रस्योन्मा असि साहस्रोऽसि  
 सहस्राय त्वे मा मे अग्र इष्टका धेनवः सन्त्वेका च शतं च सहस्रं  
 चायुतं च नियुतं च प्रयुतं चार्बुदं च न्यर्बुदं च समुद्रश्च मध्यं चान्तश्च  
 परार्धश्चेमा मे अग्र इष्टका धेनवः सन्तु षष्ठिः सहस्रमयुतमक्षीयमाणा  
 ऋतस्थाः स्थर्तावृधो घृतश्चुतौ मधुश्चुत ऊर्जस्वतीः स्वधाविनीस्ता मे अग्र  
 इष्टका धेनवः सन्तु विराजो नाम कामदुघा अमुत्रामुष्मिल्लोके ॥११॥

समिद्विशामाशया नः सुवर्विन्मधोरतो माधवः पात्वस्मान् । अग्निर्देवो  
 दुष्टरीतुरदाभ्य इदं क्षत्रं रक्षतु पात्वस्मान् ॥  
 रथंतरं सामभिः पात्वस्मान्गायत्री छन्दसां विश्वरूपा । त्रिवृन्नो विष्टया  
 स्तोमो अह्नां समुद्रो वात इदमोजः पिपर्तु ॥  
 उग्रा दिशामभिभूतिर्वयोधाः शुचिः शुक्रे अहन्योजसीना । इन्द्राधिपतिः  
 पिपृतादतौ नो महि क्षत्रं विश्वतौ धारयेदम् ॥  
 बृहत्सामं क्षत्रभृद्बृद्धवृष्णियं त्रिष्टुभौजः शुभितमुग्रवीरम् । इन्द्र स्तोमैर्न

पञ्चदशेन मध्यमिदं वातेन सगरेण रक्ष ॥  
 प्राची दिशां सहयशा यशस्वती विश्वे देवाः प्रावृषाह्नां सुर्वती ।  
 इदं क्षत्रं दुष्टरमस्त्वोजोऽनाधृष्टं सहस्त्रियं सहस्वत् ॥  
 वैरूपे सामन्निह तच्छकेम जगत्यैनं विद्ध्वा वैशयामः । विश्वे देवाः  
 सप्तदशेन वर्च इदं क्षत्रं सलिलवातमुग्रम् ॥  
 धृती दिशां क्षत्रमिदं दाधारोपस्थाशानाम्मित्रवदस्त्वोजः । मित्रावरुणा  
 शरदाह्नां चिकित्वा अस्मै राष्ट्राय महि शर्म यच्छतम् ॥  
 वैराजे सामन्नधि मे मनीषानुष्टुभा सम्भृतं वीर्यं सहः । इदं  
 क्षत्रमित्रवदार्रदानु मित्रावरुणा रक्षतमाधिपत्यैः ॥  
 सम्राड्दिशां सहसाम्नी सहस्वत्यृतुर्हेमन्तो विष्टया नः पिपर्तु ।  
 अवस्युवाताः बृहतीर्नु शक्वरीरिमं यज्ञमवन्तु नो घृताचीः ॥  
 सुर्वती सुदुधा नः पर्यस्वती दिशां देव्यवतु नो घृताची । त्वं गोपाः  
 पुरणतोत पश्चाद्बृहस्पते याम्यां युङ्गिध वाचम् ॥  
 ऊर्ध्वा दिशां रन्तिराशौषधीनां संवत्सरेण सविता नो अह्नाम् ।  
 रेवत्सामार्तिच्छन्दा उ च्छन्दोजातशत्रुः स्योना नो अस्तु ॥  
 स्तोमत्रयस्त्रिंशे भुवनस्य पत्नि विवस्वद्वाते अभि नो गृणाहि । घृतवती  
 सवितराधिपत्यैः पर्यस्वती रन्तिराशा नो अस्तु ॥  
 ध्रुवा दिशां विष्णुपत्न्यघौरास्येशाना सहसो या मनोता ।  
 बृहस्पतिर्मातरिश्चोत वायुः संधुवाना वाता अभि नो गृणन्तु ॥  
 विष्टम्भो दिवो धरुणः पृथिव्या अस्येशाना जगतो विष्णुपत्नी ।  
 विश्वव्यचा इषयन्ती सुभूतिः शिवा नो अस्त्वदितिरुपस्थे ॥ वैश्वानरो न  
 ऊत्या पृष्टो दिव्य नु नोऽद्यानुमति रन्विदनुमते त्वं कया नश्चित्र आ  
 भुवत्को अद्य युङ्क्ते ॥१२॥

इति चतुर्थकारण्डे चतुर्थः प्रपाठकः ४



अथ चतुर्थकारण्डे पञ्चमः प्रपाठकः ५

नमस्ते रुद्र मन्यव उतो त इषवे नमः । नमस्ते अस्तु धन्वने ब्राह्म्यामुत  
ते नमः ॥

या त इषुः शिवतमा शिवम्बभूव ते धनुः । शिवा शरव्या या तव तथा  
नो रुद्र मृडय ॥

या तै रुद्र शिवा तनूरघोरापापकाशिनी । तथा नस्तनुवा शंतमया  
गिरिशन्ताभि चाकशीहि ॥

यामिषुं गिरिशन्त हस्ते बिभर्ष्यस्तवे । शिवां गिरित्र तां कुरु मा  
हिंसीः पुरुषं जगत् ॥

शिवेन वचसा त्वा गिरिशाच्छा वदामसि । यथा नः  
सर्वमिज्जगदयद्मं सुमना असत् ॥

अर्ध्वोचदधिवक्ता प्रथमो दैव्यो भिषक् । अहींश्च  
सर्वाञ्जम्भयन्त्सर्वाश्च यातुधान्यः ॥

असौ यस्ताम्रो अरुण उत बभ्रुः सुमङ्गलः । ये चेमां रुद्रा अभितो दिक्षु  
श्रिताः सहस्रशोऽवैषां हेड ईमहे ॥

असौ योऽवसर्पति नीलग्रीवो विलौहितः । उतैनं गोपा  
अदृशन्नदृशन्नदहार्यः । उतैनं विश्वा भूतानि स दृष्टो मृडयाति नः ॥  
नमो अस्तु नीलग्रीवाय सहस्राक्षाय मीडुषै । अथो ये अस्य सत्वानोऽहं  
तेभ्योऽकरं नमः ॥

प्र मुञ्च धन्वन्स्त्वमुभयोरार्त्तियोज्याम् । याश्च ते हस्त इषवः परा ता  
भगवो वप ॥

अवतत्य धनुस्त्वं सहस्राक्ष शतैषुधे । निशीर्य शल्यानाम्मुखा शिवो  
नः सुमना भव ॥

विज्यं धनुः कपर्दिनो विशल्यो बाणवाँ उत । अनेशन्नस्येषव  
आभुरस्य निषङ्गथिः ॥

या तै हेतिर्मादुष्टम् हस्तै बभूव ते धनुः । तयास्मान्विश्वतस्त्वमयक्षमया  
परि भुज ॥

नमस्ते अस्त्वायुधायानातताय धृष्णवे । उभाभ्यामुत ते नमो बाहुभ्यां  
तव धन्वने ॥

परि ते धन्वनो हेतिरस्मान्वृणक्तु विश्वतः । अथो य इषुधिस्तवारे अस्मन्नि  
धैहि तम् ॥१॥

नमो हिरण्यबाहवे सेनान्यै दिशां च पतये नमो नमो वृक्षेभ्यो  
हरिकेशेभ्यः पशूनाम्पतये नमो नमः सस्पिञ्जराय त्विषीमते  
पथीनाम्पतये नमो नमो बभ्लुशाय विव्याधिनेऽन्नानाम्पतये नमो नमो  
हरिकेशायोपवीतिने पुष्टानाम्पतये नमो नमो भवस्य हेत्यै जगताम्पतये  
नमो नमो रुद्रायतताविने क्षेत्राणाम्पतये नमो नमः सूतायाहन्त्याय  
वनानाम्पतये नमो नमो रोहिताय स्थपतये वृक्षाणाम्पतये नमो नमो  
मन्त्रिणै वाणिजाय कक्षाणाम्पतये नमो नमो भुवन्तयै  
वारिवस्कृतायौषधीनाम्पतये नमो नम उच्चैर्घोषायाक्रन्दयते  
पत्तीनाम्पतये नमो नमः कृत्स्नवीताय धार्वते सत्वनाम्पतये नमः ॥२॥

नमः सहमानाय निव्याधिन आव्याधिनीनाम्पतये नमो नमः ककुभाय  
निषङ्गिणै स्तेनानाम्पतये नमो नमो निषङ्गिण इषुधिमते तस्कराणाम्पतये  
नमो नमो वञ्चते परिवञ्चते स्तायूनाम्पतये नमो नमो निचेरवे  
परिचरायारणयानाम्पतये नमो नमः सृक्काविभ्यो जिघाँसद्भ्यो

मुष्णताम्पतये नमो नमोऽसिमद्भ्यो नक्तं चरद्भ्यः प्रकृन्तानाम्पतये नमो  
 नम उष्णीषिणै गिरिचराय कुलुञ्चानाम्पतये नमो नम इषुमद्भ्यो  
 धन्वाविभ्यश्च वो नमो नम आतन्वानेभ्यः प्रतिदधानेभ्यश्च वो नमो  
 नम आयच्छद्भ्यो विसृजद्भ्यश्च वो नमो नमोऽस्यद्भ्यो विध्यद्भ्यश्च वो नमो  
 नम आसीनेभ्यः शयानेभ्यश्च वो नमो नमः स्वपद्भ्यो जाग्रद्भ्यश्च वो नमो  
 नमस्तिष्ठद्भ्यो धार्वद्भ्यश्च वो नमो नमः सभाभ्यः सभापतिभ्यश्च वो नमो  
 नमो अश्वेभ्योऽश्वपतिभ्यश्च वो नमः ॥३॥

नम आव्याधिनीभ्यो विविध्यन्तीभ्यश्च वो नमो नम  
 उगणाभ्यस्तृहतीभ्यश्च वो नमो नमो गृत्सेभ्यो गृत्सपतिभ्यश्च वो नमो  
 नमो व्रातेभ्यो व्रातपतिभ्यश्च वो नमो नमो गृणेभ्यो गृणपतिभ्यश्च वो  
 नमो नमो विरूपेभ्यो विश्वरूपेभ्यश्च वो नमो नमो महद्भ्यः  
 क्षुल्लकेभ्यश्च वो नमो नमो रथिभ्योऽरथेभ्यश्च वो नमो नमो रथेभ्यो  
 रथपतिभ्यश्च वो नमो नमः सेनाभ्यः सेनानिभ्यश्च वो नमो नमः  
 क्षत्रभ्यः संग्रहीतृभ्यश्च वो नमो नमस्तक्षभ्यो रथकारेभ्यश्च वो नमो  
 नमः कुलालेभ्यः कर्मारिभ्यश्च वो नमो नमः पुञ्जिष्टेभ्यो निषादेभ्यश्च वो  
 नमो नम इषुकृद्भ्यो धन्वकृद्भ्यश्च वो नमो नमो मृगयुभ्यः श्वनिभ्यश्च वो  
 नमो नमः श्वभ्यः श्वपतिभ्यश्च वो नमः ॥४॥

नमो भुवाय च रुद्राय च नमः शर्वाय च पशुपतये च नमो  
 नीलग्रीवाय च शितिकण्ठाय च नमः कपर्दिने च व्युप्तकेशाय च  
 नमः सहस्राक्षाय च शतधन्वने च नमो गिरिशाय च शिपिविष्टाय च  
 नमो मीढुष्टमाय चेषुमते च नमो ह्रस्वाय च वामनाय च नमो बृहते

च॒ वर्षी॑यसे च॒ नमो॑ वृ॒द्धाय॑ च॒ संवृ॑ध्वने च॒ नमो॑ अ॒ग्रिया॑य च॒ प्रथ॑माय॒  
च॒ नम॑ आ॒शवे॑ चा॒जिरा॑य च॒ नमः॑ शी॒घ्रिया॑य च॒ शी॒भ्याय॑ च॒ नम॑  
ऊ॒र्म्याय॑ चाव॒स्वन्या॑य च॒ नमः॑ स्त्रो॒तस्या॑य च॒ द्वी॒प्याय॑ च ॥५॥

नमो॑ ज्ये॒ष्ठाय॑ च॒ कनि॒ष्ठाय॑ च॒ नमः॑ पू॒र्वजा॑य चा॒पर॒जाय॑ च॒ नमो॑  
म॒ध्यमा॑य चा॒पग॒ल्भाय॑ च॒ नमो॑ जघ॒न्याय॑ च॒ बु॒ध्निया॑य च॒ नमः॑  
सो॒भ्याय॑ च॒ प्र॒तिस॒र्याय॑ च॒ नमो॑ या॒म्याय॑ च॒ क्षे॒म्याय॑ च॒ नम॑ उ॒र्वर्या॑य  
च॒ ख॒ल्याय॑ च॒ नमः॑ श्लो॒क्याय॑ चाव॒सान्या॑य च॒ नमो॑ व॒न्याय॑ च॒  
क॒द्याय॑ च॒ नमः॑ श्र॒वाय॑ च॒ प्र॒तिश्र॒वाय॑ च॒ नम॑ आ॒शुषे॑णाय चा॒शुर॑थाय  
च॒ नमः॑ शू॒राय॑ चाव॒भिन्द॑ते च॒

नमो॑ व॒र्मिणे॑ च॒ व॒रूथि॑ने च॒ नमो॑ बि॒ल्मि॑ने च॒ क॒वचि॑ने च॒ नमः॑  
श्रु॒ताय॑ च॒ श्रु॒तसे॒नाय॑ च ॥६॥

नमो॑ दु॒न्दुभ्या॑य चा॒हन॒व्याय॑ च॒ नमो॑ धृ॒ष्णवे॑ च॒ प्र॒मृशा॑य च॒ नमो॑  
दू॒ताय॑ च॒ प्र॒हि॒ताय॑ च॒ नमो॑ नि॒षङ्गि॑णे॒ चेषु॑धि॒मते॑ च॒ नम॑स्ती॒क्ष्णेषु॑वे  
चा॒युधि॑ने च॒ नमः॑ स्वा॒युधा॑य च॒ सु॒धन्व॑ने च॒ नमः॑ स्त्रु॒त्याय॑ च॒  
प॒थ्याय॑ च॒ नमः॑ क्रा॒ट्याय॑ च॒ नी॒प्याय॑ च॒ नमः॑ सू॒द्याय॑ च॒ सर॒स्याय॑  
च॒ नमो॑ ना॒द्याय॑ च॒ वैश॒न्ताय॑ च॒ नमः॑ कू॒प्याय॑ चाव॒ट्याय॑ च॒ नमो॑  
व॒र्ष्याय॑ चाव॒र्ष्याय॑ च॒ नमो॑ मे॒घ्याय॑ च॒ वि॒द्युत्या॑य च॒ नम॑ ई॒ध्रिया॑य  
चा॒त्प्या॑य च॒ नमो॑ वा॒त्याय॑ च॒ रे॒ष्मिया॑य च॒ नमो॑ वा॒स्त॒व्याय॑ च॒  
वा॒स्तु॒पाय॑ च ॥७॥

नमः॑ सो॒माय॑ च॒ रु॒द्राय॑ च॒ नम॑स्ता॒म्राय॑ चा॒रु॒णाय॑ च॒ नमः॑ श॒ङ्गाय॑ च॒

पशुपतये च नम उग्राय च भीमाय च नमो अग्रेवधाय च दूरेवधाय च  
 नमो हन्त्रे च हनीयसे च नमो वृद्धेभ्यो हरिकेशेभ्यो नमस्ताराय  
 नमः शम्भवे च मयोभवे च नमः शङ्कराय च मयस्कराय च नमः  
 शिवाय च शिवतराय च नमस्तीर्थ्याय च कूल्याय च नमः पार्याय  
 चावात्याय च नमः प्रतरणाय चोत्तरणाय च नम आतार्याय  
 चालाट्याय च नमः शष्प्याय च फेन्याय च नमः सिकत्याय च  
 प्रवाहाय च ॥८॥

नम इरियाय च प्रपथ्याय च नमः किंशिलाय च क्षयणाय च  
 नमः कपर्दिने च पुलस्तये च नमो गोष्ठ्याय च गृह्याय च  
 नमस्तल्प्याय च गेह्याय च नमः काट्याय च गह्वरेष्ठाय च  
 नमो हृदय्याय च निवेष्याय च नमः पांसुव्याय च रजस्याय च  
 नमः शुष्क्याय च हरित्याय च नमो लोप्याय चोलप्याय च नम  
 ऊर्व्याय च सूर्म्याय च नमः पर्याय च पर्णशद्याय च  
 नमोऽपगुरमाणाय चाभिघ्नते च नम आक्खदते च प्रक्खदते च नमो  
 वः किरिकेभ्यो देवानां हृदयेभ्यो नमो विक्षीणकेभ्यो नमो  
 विचिन्वत्केभ्यो नम अनिर्हतेभ्यो नम आमीवत्केभ्यः ॥९॥

द्रापे अन्धसस्पते दरिद्रनीललोहित । एषाम्पुरुषाणामेषाम्पशूनाम्मा  
 भेमारो मो एषां किं चनाममत् ॥

या तै रुद्र शिवा तनूः शिवा विश्वाहभेषजी । शिवा रुद्रस्य भेषजी तथा  
 नो मृड जीवसे ॥

इमां रुद्राय तवसै कपर्दिने क्षयद्वीराय प्र भ्रामहे मतिम् । यथा नः

शमसदिद्वपदे चतुष्पदे विश्वम्पुष्टं ग्रामे अस्मि ननातुरम् ॥  
 मृडा नो रुद्रोत नो मयस्कृधि क्षयद्वीराय नमसा विधेम ते । यच्छं च  
 योश्च मनुरायजे पिता तदश्याम् तव रुद्र प्रणीतौ ॥  
 मा नो महान्तमुत मा नो अर्भकम्मा न उक्षन्तमुत मा न उक्षितम् । मा  
 नो वधीः पितरम्मोत मातरम्प्रिया मा नस्तनुवो रुद्र रीरिषः ॥  
 मा नस्तोके तनये मा न आयुषि मा नो गोषु मा नो अश्वेषु रीरिषः ।  
 वीरान्मा नो रुद्र भामितो वधीर्हविष्मन्तो नमसा विधेम ते ॥  
 आरात्ते गोघ्न उत पूरुषघ्ने क्षयद्वीराय सुम्रमस्मे ते अस्तु । रक्षा च नो  
 अधि च देव ब्रूह्यधा च नः शर्म यच्छ द्विबर्हाः ॥  
 स्तुहि श्रुतं गर्तसदं युवानम्मृगं न भीममुपहतुमुग्रम् । मृडा जरित्रे रुद्र  
 स्तवानो अन्यं ते अस्मन्नि वपन्तु सेनाः ॥  
 परिणो रुद्रस्य हेतिर्वृणक्तु परि त्वेषस्य दुर्मतिरघायोः । अत्र स्थिरा  
 मघवद्व्यस्तनुष्व मीद्वस्तोकाय तनयाय मृडय ॥  
 मीदुष्टम् शिवतम शिवो नः सुमना भव । परमे वृक्ष आयुधं निधाय  
 कृत्तिं वसान् आ चर पिनां कं बिभ्रदा गहि ॥  
 विकिरिद् विलौहित नमस्ते अस्तु भगवः । यास्तै सहस्रं  
 हेतयोऽन्यमस्मन्नि वपन्तु ताः ॥  
 सहस्राणि सहस्रधा बाहुवोस्तव हेतयः । तासामीशानो भगवः  
 पराचीना मुखा कृधि ॥१०॥

सहस्राणि सहस्रो ये रुद्रा अधि भूम्याम् । तेषां सहस्रयोजनेऽव  
 धन्वानि तन्मसि ॥

अस्मिन्महत्पर्यवेऽन्तरिक्षे भुवा अधि ।

नीलग्रीवाः शितिकरठाः शर्वा अधः क्षमाचराः ॥  
 नीलग्रीवाः शितिकरठा दिवँ रुद्रा उपश्रिताः ।  
 ये वृक्षेषु सस्मिञ्जरा नीलग्रीवा विलोहिताः ।  
 ये भूतानामधिपतयो विशिखासः कपर्दिनः ।  
 ये अन्नैषु विविध्यन्ति पात्रेषु पिबतो जनान् ।  
 ये पथार्मथिरक्षय ऐलबृदा यव्युधः ।  
 ये तीर्थानि प्रचरन्ति सूकावन्तो निषङ्गिणः ।  
 य एतावन्तश्च भूयाँसश्च दिशौ रुद्रा वितस्थिरे । तेषाँ सहस्रयोजनेऽव  
 धन्वानि तन्मसि ॥

नमो रुद्रेभ्यो ये पृथिव्यां यैऽन्तरिक्षे ये दिवि येषामन्नं वातो  
 वर्षमिषवस्तेभ्यो दश प्राचीर्दश दक्षिणा दश  
 प्रतीचीर्दशोदीचीर्दशोर्ध्वास्तेभ्यो नमस्ते नो मृडयन्तु ते यं द्विष्मो यश्च नो  
 द्वेष्टि तं वो जम्भै दधामि ॥११॥

इति चतुर्थकारण्डे पञ्चमः प्रपाठकः ५

अथ चतुर्थकारण्डे षष्ठः प्रपाठकः ६

अश्मन्नूर्जम्पर्वते शिश्रियाणां वातैर्पर्जन्ये वरुणस्य शुष्मै । अद्भ्य  
 ओषधीभ्यो वनस्पतिभ्योऽधि सम्भृतां तां न इषमूर्जं धत्त मरुतः  
 सँरराणाः ॥

अश्मँस्ते क्षुद्रमुं ते शुगृच्छतु यं द्विष्मः ॥

समुद्रस्य त्वावाक्याग्ने परि व्ययामसि । पावको अस्मभ्यँ शिवो भव  
 ॥

हिमस्य त्वा जरायुणाग्ने परि व्ययामसि । पावको अस्मभ्यँ शिवो भव

॥

उप ज्मन्नुप वेतसेऽवत्तरं नदीष्ववा । अग्ने पित्तमपामसि ॥  
मण्डूकि ताभिरा गहि सेमं नो यज्ञम् । पावकवर्णं शिवं कृधि ॥  
पावक आ चितयन्त्या कृपा । क्षामन्नुरुच उषसो न भानुना ॥  
तूर्वन्न यामन्नेतशस्य नू रण आ यो घृणे । न ततृषाणो अजरः ॥  
अग्ने पावक रोचिषा मन्द्रया देव जिह्वया । आ देवान्वन्धि यन्नि च ॥  
स नः पावक दीदिवोऽग्ने देवा इहावह । उप यज्ञं हविश्च नः ॥  
अपामिदं न्ययनं समुद्रस्य निवेशनम् । अन्यं ते अस्मत्तपन्तु हेतयः  
पावको अस्मभ्यं शिवो भव ॥  
नमस्ते हरसे शोचिषे नमस्ते अस्त्वर्चिषे । अन्यं ते अस्मत्तपन्तु हेतयः  
पावको अस्मभ्यं शिवो भव ॥  
नृषदे वडप्सुषदे वड्वनसदे वड्वर्हिषदे वट्सुवविदे वट् ॥  
ये देवा देवानां यज्ञिया यज्ञियानां संवत्सुरीणमुप भागमासते ।  
अहुतादौ हविषौ यज्ञे अस्मिन्स्वयं जुहध्वम्मधुनो घृतस्य ॥  
ये देवा देवेष्वधि देवत्वमायन्ये ब्रह्मणः पुरणतारौ अस्य । येभ्यो नर्ते  
पर्वते धाम किं च न ते दिवो न पृथिव्या अधि स्नुषु ॥  
प्राणदा अपानदा व्यानदाश्चक्षुर्दा वर्चोदा वरिवोदाः । अन्यं ते  
अस्मत्तपन्तु हेतयः पावको अस्मभ्यं शिवो भव ॥  
अग्निस्तिग्मेन शोचिषा यं सद्भिश्च न्यत्रिणाम् । अग्निर्नो वसते रयिम् ॥  
सैनानीकेन सुविदत्रो अस्मे यष्टा देवा आयजिष्ठः स्वस्ति । अदब्धो  
गोपा उत नः परस्या अग्ने द्युमदुत रेवदिदीहि ॥१॥

य इमा विश्वा भुवनानि जुह्वदृषिर्होता निषसादा पिता नः । स आशिषा



द्रविणमिच्छमानः परमच्छदो वर आ विवेश ॥  
 विश्वकर्मा मनसा यद्विहाया धाता विधाता परमोत सन्दृक् ।  
 तेषामिष्टानि समिषा मदन्ति यत्र सप्तर्षीन्पर एकमाहुः ॥  
 यो नः पिता जनिता यो विधाता यो नः सतो अभ्या सज्जानं ।  
 यो देवानां नामधा एक एव तं सम्प्रश्नम्भुवना यन्त्यन्या ॥  
 त आर्यजन्तु द्रविणं समस्मा ऋषयः पूर्वे जरितारो न भूना । असूर्ता  
 सूता रजसो विमाने ये भूतानि समकृणवन्निमानि ॥  
 न तं विदाथु य इदं जजानान्यद्युष्माकमन्तरम्भवाति । नीहारेण प्रावृता  
 जल्प्या चासुतृप उक्थशासंश्चरन्ति ॥  
 परो दिवा पर एना पृथिव्या परो देवेभिरसुरैर्गुहा यत् । कं स्विद्गर्भं  
 प्रथमं दध्र आपो यत्र देवाः समगच्छन्त विश्वे ॥  
 तमिद्गर्भमप्रथमं दध्र आपो यत्र देवाः समगच्छन्त विश्वे । अजस्य  
 नाभावध्येकमर्पितं यस्मिन्निदं विश्वम्भुवनमधि श्रितम् ॥  
 विश्वकर्मा ह्यजनिष्ट देव आदिद्गन्धर्वो अभवद्द्वितीयः । तृतीयः पिता  
 जनिताषधीनामुपां गर्भं व्यदधात्पुरुत्रा ॥  
 चक्षुषः पिता मनसा हि धीरो घृतमैने अजनन्ननेमाने । यदेदन्ता  
 अददृहन्त पूर्व आदिद्द्यावापृथिवी अप्रथेताम् ॥  
 विश्वतश्चक्षुरुत विश्वतोमुखो विश्वतोहस्त उत विश्वतस्पात् । सम्बाहुभ्यां  
 नमन्ति सम्पतत्रैर्द्यावापृथिवी जनयन्देव एकः ॥  
 किं स्विदासीदधिष्ठानमारम्भणं कतमत्स्वित्किमासीत् । यदी भूमिं  
 जनयन्विश्वकर्मा वि द्यामौर्णोन्महिना विश्वचक्षाः ॥  
 किं स्विद्वनं क उ स वृक्ष आसीद्यतो द्यावापृथिवी निष्टतक्षुः ।  
 मनीषिणो मनसा पृच्छतेदु तद्यदध्यतिष्ठद्भुवनानि धारयन् ॥

या ते धामानि परमाणि यावमा या मध्यमा विश्वकर्मन्नुतेमा । शिञ्जा  
सखिभ्यो हविषि स्वधावः स्वयं यजस्व तनुवं जुषाणः ॥  
वाचस्पतिं विश्वकर्माणामृतये मनोयुजं वाजे अद्या हुवेम । स नो नेदिष्टा  
हवनानि जोषते विश्वशम्भूरवसे साधुकर्मा ॥  
विश्वकर्मन्हविषा वावृधानः स्वयं यजस्व तनुवं जुषाणः । मुह्यन्त्वन्ये  
अभितः सपता इहास्माकम्मघवा सूरिरस्तु ॥  
विश्वकर्मन्हविषा वर्धनेन त्रातारमिन्द्रमकृणोरवध्यम् । तस्मै विशः  
समनमन्त पूर्वोर्यमुग्रो विहव्यो यथासत् ॥  
समुद्राय वयुनाय सिन्धूनाम्पतये नमः । नदीनां सर्वासाम्पित्रे जुहुता  
विश्वकर्मणे विश्वाहामर्त्यं हविः ॥२॥

उदेनमुत्तरां नयाग्ने घृतेनाहुत । रायस्पोषेण सꣳ सृज प्रजया च धनेन च  
॥

इन्द्रेमप्रतरां कृधि सजातानामसद्वृशी । समेनं वर्चसा सृज देवेभ्यो  
भागधा असत् ॥

यस्य कुर्मो हविर्गृहे तमग्ने वर्धया त्वम् । तस्मै देवा अधि ब्रवन्नयं च  
ब्रह्मणस्पतिः ॥

उदु त्वा विश्वे देवा अग्ने भरन्तु चित्तिभिः । स नो भव शिवतमः  
सुप्रतीको विभार्वसुः ॥

पञ्च दिशो दैवीर्यज्ञमवन्तु देवीरुपामतिं दुर्मतिम्बाधमानाः । रायस्पोषे  
यज्ञपतिमाभजन्तीः ॥

रायस्पोषे अधि यज्ञो अस्थात्समिद्धे अग्नावधि मामहानः । उक्थपत्र  
ईड्यो गृभीतस्तप्तं घर्मम्परिगृह्यायजन्त ॥

ऊर्जा यद्यज्ञमशमन्त देवा दैव्याय धर्त्रे जोष्ट्रे । देवश्रीः श्रीमणाः  
 शतपयाः परिगृह्य देवा यज्ञमायन् ॥  
 सूर्यरश्मिर्हरिकेशः पुरस्तात्सविता ज्योतिरुदयाँ अजस्रम् । तस्य पूषा  
 प्रसवं याति देवः सम्पश्यन्विश्वा भुवनानि गोपाः ॥  
 देवा देवेभ्यो अध्वर्यन्तो अस्थुर्वीतँ शमित्रे शमिता यजध्यै । तुरीयो  
 यज्ञो यत्र हव्यमेति ततः पावका आशिषो नो जुषन्ताम् ॥  
 विमान एष दिवो मध्यं आस्त आपप्रिवान्नोदसी अन्तरिक्षम् । स  
 विश्वाचीरभि चष्टे घृताचीरन्तरा पूर्वमपरं च केतुम् ॥  
 उक्षा समुद्रो अरुणः सुपर्णः पूर्वस्य योनिम्पितुरा विवेश । मध्ये दिवो  
 निहितः पृश्निरश्मा वि चक्रमे रजसः पात्यन्तौ ॥  
 इन्द्रं विश्वा अवीवृधन्त्समुद्रव्यचसं गिरः । रथीतमँ रथीनां वाजानाँ  
 सत्पतिम्पतिम् ॥  
 सुम्रहूर्यज्ञो देवाँ आ च वक्षद्यक्षदग्निर्देवो देवाँ आ च वक्षत् ।  
 वाजस्य मा प्रसवेनौद्ग्राभेणोदग्रभीत् । अथा सपत्नाँ इन्द्रो मे  
 निग्राभेणाधराँ अकः ॥  
 उद्ग्राभं च निग्राभं च ब्रह्म देवा अवीवृधन् । अथा सपत्नानिन्द्राग्नी मै  
 विषूचीनान्व्यस्यताम् ॥३॥

आशुः शिशानो वृषभो न युध्मो घनाघ्नः क्षोभणश्चर्षणीनाम् ।  
 संक्रन्दनोऽनिमिष एकवीरः शतँ सेना अजयत्साकमिन्द्रः ॥  
 संक्रन्दनेनानिमिषेण जिष्णुना युत्कारेण दुश्च्यवनेन धृष्णुना । तदिन्द्रेण  
 जयत् तत्सहध्वं युधो नर इषुहस्तेन वृष्णा ॥  
 स इषुहस्तैः स निषङ्गिभिर्वशी सँ स्रष्टा स युध इन्द्रो गणेन ।

सु॑सृष्ट॒जित्सो॑म॒पा बा॑हु॒श्र्ध्व॑र्ध्व॒धन्वा॑ प्रति॒हिता॑भि॒रस्ता॑ ॥  
बृ॒हस्प॑ते॒ परि॑ दी॒या रथे॑न र॒क्षोहा॑मि॒त्राँ॑ अप॒बाध॑मानः । प्र॒भञ्ज॑न्त्सेनाः  
प्र॒मृ॒णो यु॒धा जय॑न्न॒स्माक॑मे॒ध्यवि॒ता रथा॑नाम् ॥  
गो॒त्रभि॑दं गो॒विदं॑ व॒ज्रबा॑हुं जय॑न्त॒मज्मं॑ प्र॒मृ॒णन्त॑मो॒जसा॑ । इ॒मँ॑ संजा॒ता  
अ॒नु वी॑रय॒ध्वमि॑न्द्रँ॑ सखा॒योऽनु॑ सँ॑ र॒भध्व॑म् ॥  
ब॒लवि॒ज्ञायः॑ स्थ॒विः प्र॒वीः स॒हस्वा॑न्वा॒जी स॒हमा॑न उ॒ग्रः । अ॒भिवी॑रो  
अ॒भिस॑त्वा स॒हो॒जा जै॑त्रमि॒न्द्र रथ॑मा तिष्ठ गो॒वित् ॥  
अ॒भि गो॒त्राणि॑ स॒हसा॑ गा॒हमा॑नोऽदा॒यो वी॑रः श॒तम॑न्युरि॒न्द्रः । दु॒श्च॒य॒वः  
पृ॒तना॑षाड॒युध्वो॑ऽस्माक॒ँ से॒ना अ॒वतु॑ प्र यु॒त्सु ॥  
इ॒न्द्र आ॑सां ने॒ता बृ॒हस्प॑ति॒र्दक्षि॑णा य॒ज्ञः पु॒र ए॒तु सोमः॑ ।  
दे॒वसे॑नाना॒मभि॑भञ्जती॒नां जय॑न्तीना॒म्रुतौ॑ य॒न्त्वग्रे॑ ॥  
इ॒न्द्रस्य॑ वृ॒ष्णो वरु॑णस्य॒ राज्ञ॑ आ॒दित्या॑ना॒म्रुता॑ँ श॒र्ध उ॒ग्रम् ।  
म॒हाम॑नसा॒म्भुव॑नच्य॒वानां॑ घोषो॒ देवा॑नां॒ जय॑ता॒मुद॑स्थात् ॥  
अ॒स्माक॑मि॒न्द्रः समृ॑तेषु ध्व॒जेष्व॑स्माकं॒ या इ॑ष॒वस्ता॑ जयन्तु । अ॒स्माकं  
वी॒रा उत्त॑रे भवन्त्व॒स्मानु॑ दे॒वा अ॒वता॑ ह॒वेषु॑ ॥  
उ॒द्धर्ष॑य म॒घव॑न्नायु॒धान्यु॑त्स॒त्वंना॑म्मा॒मकाना॑म्महाँ॑सि । उ॒द्ध॑त्रह॒न्वाजि॑नां  
वा॒र्जि॒नान्यु॑द्रथानां॒ जय॑तामे॒तु घोषः॑ ॥  
उ॒प प्रे॒त जय॑ता नरः स्थि॒रा वः॑ सन्तु ब्रा॒हवः॑ । इ॒न्द्रो वः॑ शर्म  
यच्छ॑त्वनाधृष्या यथासंथ ॥  
अ॒वसृ॑ष्टा॒ परा॑ प॒त शर॑व्ये ब्र॒ह्मसँ॑शिता । गच्छा॑मि॒त्रान्प्र॑ वि॒शु मैषां॑ कं  
च॒नोच्छि॑षः ॥  
म॒र्माणि॑ ते॒ वर्म॑भिश्छादयामि॒ सोम॑स्त्वा॒ राजा॑मृ॒तेना॑भिऽव॒स्ताम् ।  
उ॒रोर्व॑रीयो॒ वरि॑वस्ते अस्तु॒ जय॑न्तं॒ त्वाम॑नु॒ मदन्तु॑ दे॒वाः ॥

यत्र ब्राणाः सम्पतन्ति कुमारा विशिखा इव । इन्द्रो नस्तत्र वृत्रहा  
विश्वहा शर्म यच्छतु ॥४॥

प्राचीमनुं प्रदिशम्प्रेहि विद्वानग्नेरग्ने पुरोअग्निर्भवेह । विश्वा आशा दीद्यानो  
वि भाह्यूर्ज नो धेहि द्विपदे चतुष्पदे ॥

क्रमध्वमग्निना नाकमुख्यहस्तेषु बिभ्रतः । दिवः पृष्ठं सुवर्गत्वा  
मिश्रा देवेभिराध्वम् ॥

पृथिव्या अहमुदन्तरिक्षमारुहमन्तरिक्षादिवमारुहम् । दिवो नाकस्य  
पृष्ठात्सुवर्ज्योतिरगामहम् ॥

सुवर्यन्तो नापेक्षन्त आ द्यां रोहन्ति रोदसी । यज्ञं ये विश्वतोधारं  
सुविद्वांसो वितेनिरे ॥

अग्ने प्रेहि प्रथमो देवयतां चक्षुर्देवानामुत मर्त्यानाम् । इयक्षमाणा  
भृगुभिः सजोषाः सुवर्यन्तु यजमानाः स्वस्ति ॥

नक्तोषासा समनसा विरूपे धापयैते शिशुमेकं समीची । द्यावा क्षामा  
रुक्मो अन्तर्वि भाति देवा अग्निं धारयन्द्रविणोदाः ॥

अग्ने सहस्राक्ष शतमूर्धञ्छतं ते प्राणाः सहस्रमपानाः । त्वं साहस्रस्य  
राय ईशिषे तस्मै ते विधेम वाजाय स्वाहा ॥

सुपर्णोऽसि गुरुत्मान्पृथिव्यां सीद पृष्ठे पृथिव्याः सीद भासान्तरिक्षमा  
पृण ज्योतिषा दिवमुत्तभान तेजसा दिश उद्वह ॥

आजुह्वानः सुप्रतीकः पुरस्तादग्ने स्वां योनिमा सीद साध्या ।

अस्मिन्सधस्थे अध्येत्तरस्मिन्विश्वे देवा यजमानश्च सीदत ॥

प्रेद्धो अग्ने दीदिहि पुरो नोऽजस्रया सूम्या यविष्ठ । त्वां शश्वन्त उप  
यन्ति वाजाः ॥

विधेम ते परमे जन्मन्ने विधेम स्तोमैरवरै सुधस्थै । यस्माद्योनैरुदारिथा  
यजे तम्प्र त्वे हवींषि जुहुरे समिद्धे ॥  
तां सवितुर्वरैरयस्य चित्रामाहं वृणे सुमतिं विश्वजन्याम् । यामस्य  
कण्वो अदुहृत्प्रपीनां सहस्रधारां पर्यसा महीं गाम् ॥  
सप्त तै अग्ने समिधः सप्त जिह्वाः सप्तर्षयः सप्त धाम प्रियाणि । सप्त  
होत्राः सप्तधा त्वा यजन्ति सप्त योनीरा पृणस्वा घृतेन ॥  
ईदृङ्चान्यादृङ् चैतादृङ् च प्रतिदृङ् च मितश्च सम्मितश्च सभराः ।  
शुक्रज्योतिश्च चित्रज्योतिश्च सत्यज्योतिश्च ज्योतिष्मांश्च  
सत्यश्चर्तपाश्चात्यंहाः ॥ ऋतजिच्च सत्यजिच्च सेनजिच्च  
सुषेणश्चान्त्यमित्रश्च दूरेअमित्रश्च गुणः ।  
ऋतश्च सत्यश्च ध्रुवश्च ध्रुवश्च धरुणश्च धर्ता च विधर्ता च विधारयः ।  
ईदृक्षास एतादृक्षास ऊ षु णः सदृक्षासः प्रतिसदृक्षास एतन ।  
मितासश्च सम्मितासश्च न ऊतये सभरसो मरुतो यजे अस्मिन्निन्द्रं  
दैवीर्विशो मरुतोऽनुवर्त्मानो यथेन्द्रं दैवीर्विशो मरुतोऽनुवर्त्मान एवमिमं  
यजमानं दैवीश्च विशो मानुषीश्चानुवर्त्मानो भवन्तु ॥५॥

जीमूतस्येव भवति प्रतीकं यद्वर्मा याति समदामुपस्थै । अनाविद्धया  
तनुवा जय त्वं स त्वा वर्मणो महिमा पिपर्तु ॥  
धन्वना गा धन्वनाजिं जयेम धन्वना तीव्राः समदौ जयेम । धनुः  
शत्रौरपकामं कृणोति धन्वना सर्वाः प्रदिशो जयेम ॥  
वृक्ष्यन्तीवेदा गनीगन्ति कर्णम्रियं सखायम्परिषस्वजाना । योषैव  
शिङ्के वितताधि धन्वन्ज्या इयं समने पारयन्ती ॥  
ते आचरन्ती समनेव योषा मातेव पुत्रम्बिभृतामुपस्थै । अप्

शत्रून्विध्यताँ संविदाने आर्त्नी इमे विष्फुरन्ती अमित्रान् ॥  
 ब्रह्मीनाम्पिता ब्रह्मरस्य पुत्रश्चिश्चा कृणोति समनावगत्य । इषुधिः सङ्घाः  
 पृतनाश्च सर्वाः पृष्ठे निनद्धो जयति प्रसूतः ॥  
 रथे तिष्ठन्नयति वाजिनः पुरो यत्रयत्र कामयते सुषारथिः ।  
 अभीशूनाम्महिमानं पनायत मनः पश्चादनु यच्छन्ति रश्मयः ॥  
 तीव्रान्घोषान्कृणवते वृषपाणयोऽश्वा रथैभिः सह वाजयन्तः ।  
 अवक्रामन्तः प्रपदैरमित्रान्द्विगन्ति शत्रूँरनपव्ययन्तः ॥  
 रथवाहनँ हविरस्य नाम यत्रायुधं निहितमस्य वर्म । तत्रा रथमुप  
 श्मँ सदेम विश्वाहा वयँ सुमनस्यमानाः ॥  
 स्वादुषँसदः पितरो वयोधाः कृच्छ्रेश्रितः शक्तीवन्तो गभीराः ।  
 चित्रसेना इषुबला अमृधाः सतोवीरा उरवो वातसाहाः ॥  
 ब्राह्मणासः पितरः सोम्यासः शिवे नो द्यावापृथिवी अनेहसा । पूषा नः  
 पातु दुरितादृतावृधो रक्षा मार्किर्नो अघशँस ईशत ॥  
 सुपर्णं वस्ते मृगो अस्या दन्तो गोभिः सन्नद्धा पतति प्रसूता । यत्रा नरः  
 सं च वि च द्रवन्ति तत्रास्मभ्यमिषवः शर्म यँसन् ॥  
 अर्जीते परि वृङ्गिधु नोऽश्मा भवतु नस्तनूः । सोमो अधि ब्रवीतु  
 नोऽदितिः शर्म यच्छतु ॥  
 आ जङ्घन्ति सान्वेषां जघनाँ उप जिघ्रते । अश्वाजनि  
 प्रचैतसोऽश्वान्त्समत्सु चोदय ॥  
 अहिरिव भोगैः पर्येति ब्राह्मं ज्याया हेतिर्म्परिबाधमानः । हस्तघ्नो विश्वा  
 वयुनानि विद्वान्पुमान्पुमाँसम्परि पातु विश्वतः ॥  
 वनस्पते वीड्वङ्गो हि भूया अस्मत्सखा प्रतरणः सुवीरः । गोभिः सन्नद्धो  
 असि वीडयस्वास्थाता तै जयतु जेत्वानि ॥

दिवः पृथिव्याः पर्योरिज उद्धृतं वनस्पतिभ्यः पर्याभृतं सहः ।  
 अपामोज्मानम्परि गोभिरावृतमिन्द्रस्य वज्रं हविषा रथं यज ॥  
 इन्द्रस्य वज्रो मरुतामनीकम्मित्रस्य गर्भो वरुणस्य नाभिः । सेमां नो  
 हव्यदाति जुषाणो देव रथ प्रति हव्या गृभाय ॥  
 उप श्वासय पृथिवीमुत द्याम्पुरुत्रा ते मनुतां विष्टितं जगत् । स दुन्दुभे  
 स्रूरिन्द्रेण देवैर्दूराद्वीयो अप सेधु शत्रून् ॥  
 आ क्रन्दय बलमोजो न आ धा निष्टनिहि दुरिता बाधमानः । अप प्रोथ  
 दुन्दुभे दुच्छुनां इत इन्द्रस्य मुष्टिरसि वीडयस्व ॥  
 आमूरज प्रत्यावर्तयेऽमाः कैतुमहुन्दुभिर्वावदीति । समश्वपर्णाश्चरन्ति नो  
 नरो ऽस्माकमिन्द्र रथिनो जयन्तु ॥६॥

यदक्रन्दः प्रथमं जायमान उद्यन्त्समुद्रादुत वा पुरीषात् । श्येनस्य पक्षा  
 हरिणस्य बाहू उपस्तुत्यम्महि जातं ते अर्वन् ॥  
 यमेन दत्तं त्रित एनमायुनगिन्द्र एणम्प्रथमो अर्ध्यतिष्ठत् । गन्धर्वो अस्य  
 रशनामगृष्णात्सूरादश्वं वसवो निरतष्ट ॥  
 असि यमो अस्यादित्यो अर्वन्नसि त्रितो गुह्येन वृतेन । असि सोमेन  
 समया विपृक्त आहुस्ते त्रीणि दिवि बन्धनानि ॥  
 त्रीणि त आहुर्दिवि बन्धनानि त्रीण्यप्सु त्रीण्यन्तः समुद्रे । उतेव मे  
 वरुणश्छन्त्स्यर्वन्यत्रा त आहुः परमं जनित्रम् ॥  
 इमा ते वाजिन्नवमार्जनानीमा शफानां सनितुर्निधाना । अत्रा ते भद्रा  
 रशना अपश्यमृतस्य या अभिरक्षन्ति गोपाः ॥  
 आत्मानं ते मनसारादजानामवो दिवा पतयन्तम्पतङ्गम् । शिरो  
 अपश्यम्पृथिभिः सुगेभिररेणुभिर्जेहमानम्पतत्रि ॥



अत्रा ते रूपमुत्तममपश्यं जिगीषमाणमिष आ पदे गोः । यदा ते मर्तो  
 अनु भोगमानडादिद्ग्रसिष्ठ ओषधीरजीगः ॥  
 अनु त्वा रथो अनु मर्यो अर्वन्ननु गावोऽनु भगः कनीनाम् । अनु  
 वातासस्तव सख्यमीयुरनु देवा ममिरे वीर्यं ते ॥  
 हिरण्यशृङ्गोऽयो अस्य पादा मनोजवा अर्वर इन्द्र आसीत् । देवा इदस्य  
 हविरद्यमायन्यो अर्वन्तम्प्रथमो अर्ध्यतिष्ठत् ॥  
 ईर्मान्तासः सिलिकमध्यमासः सँ शूरणासो दिव्यासो अत्याः । हँसा  
 इव श्रेणिशो यतन्ते यदाक्षिषुर्दिव्यमज्ममश्वाः ॥  
 तव शरीरम्पतयिष्वर्वन्तव चित्तं वात इव धर्जीमान् । तव शृङ्गाणि  
 विष्टिता पुरुत्रारण्येषु जर्भुराणा चरन्ति ॥  
 उप प्रागाच्छसनं वाज्यवा देवद्रीचा मनसा दीध्यानः । अजः पुरो नीयते  
 नाभिरस्यानु पश्चात्कवयो यन्ति रेभाः ॥  
 उप प्रागात्परमं यत्सुधस्थमवाँ अच्छा पितरम्मातरं च । अद्या  
 देवाञ्जुष्टतमो हि गम्या अथाशास्ते दाशुषे वार्याणि ॥७॥

मा नो मित्रो वरुणो अर्यमायुरिन्द्र ऋभुक्षा मरुतः परि ख्यन् । यद्वाजिनो  
 देवजातस्य सप्तैः प्रवक्ष्यामो विदथे वीर्याणि ॥  
 यन्निर्णिजा रेक्णासा प्रावृतस्य रातिं गृभीताम्मुखतो नयन्ति । सुप्राङ्जो  
 मेर्म्यद्विश्वरूप इन्द्रापूष्णोः प्रियमप्येति पार्थः ॥  
 एष छागः पुरो अश्वेन वाजिना पूष्णो भागो नीयते विश्वदैव्यः ।  
 अभिप्रियं यत्पुरोडाशमर्वता त्वष्टेदेनँ सौश्रवसाय जिन्वति ॥  
 यद्द्विष्यमृतुशो देवयानं त्रिर्मानुषाः पर्यश्वं नयन्ति । अत्रा पूष्णः प्रथमो  
 भाग एति यज्ञं देवेभ्यः प्रतिवेदयन्नजः ॥

होताध्वर्युरावया अग्निमिन्धो ग्रावग्राभ उत शंस्ता सुविप्रः । तेन यज्ञेन  
स्वरंकृतेन स्विष्टेन वक्षणा आ पूणध्वम् ॥

यूपवस्का उत ये यूपवाहाश्चषालं ये अश्वयूपाय तक्षति । ये चार्वते  
पचनं सम्भरन्त्युतो तेषामभिगूर्तिर्न इन्वतु ॥

उप प्रागात्सुमन्मैऽधायि मन्म देवानामाशा उप वीतपृष्ठः । अन्वेनं विप्रा  
ऋषयो मदन्ति देवानाम्पुष्टे चकृमा सुबन्धुम् ॥

यद्वाजिनो दामं सदानमर्वतो या शीर्षश्या रशना रजुरस्य । यद्वा घास्य  
प्रभृतमास्यै तृणं सर्वा ता ते अपि देवेष्वस्तु ॥

यदश्वस्य क्रविषो मक्षिकाश यद्वा स्वरौ स्वधितौ रिप्तमस्ति । यद्धस्तयोः  
शमितुर्यन्नखेषु सर्वा ता ते अपि देवेष्वस्तु ॥

यदूर्ध्वमुदरस्यापवाति य आमस्य क्रविषो गन्धो अस्ति । सुकृता  
तच्छमितारः कृणवन्तु मेधं शृतपाकम्पचन्तु ॥

यत्ते गात्राद्गिना पच्यमानादभि शूलं निहतस्यावधावति । मा  
तद्भूम्यामा श्रिषन्मा तृणेषु देवेभ्यस्तदुशङ्घौ रातमस्तु ॥८॥

ये वाजिनम्परिपश्यन्ति पक्वं य ईमाहुः सुरभिर्निहरेति । ये चार्वतो  
मांसभिन्नामुपासत उतो तेषामभिगूर्तिर्न इन्वतु ॥

यन्नीक्षणांमांस्पचन्त्या उखाया या पात्राणि यूष्ण आसेचनानि ।

ऊष्मण्यापिधाना चरूणामङ्गाः सूनाः परि भूषन्त्यश्वम् ॥

निक्रमणं निषदनं विवर्तनं यच्च पड्बीशमर्वतः । यच्च पपौ यच्च घ्रासिं  
जघास सर्वा ता ते अपि देवेष्वस्तु ॥

मा त्वाग्निध्वनयिद्धमगन्धिर्मोखा भ्राजन्त्यभि विक्त जघिः । इष्टं  
वीतमभिगूर्तं वर्षटकृतं तं देवासुः प्रति गृह्णन्त्यश्वम् ॥

यदश्वायु वास उपस्तृणन्त्यधीवासं या हिरण्यान्यस्मै ।  
 सन्दानमर्वन्तम्पड्बीशम्प्रिया देवेष्वामयन्ति ॥  
 यत्ते सादे महसा शूकृतस्य पाष्ण्या वा कशया वा तुतोद । स्रुचेव ता  
 हविषो अध्वरेषु सर्वा ता ते ब्रह्मणा सूदयामि ॥  
 चतुस्त्रिंशद्वाजिनो देवबन्धोर्वङ्क्रीरश्वस्य स्वधितिः समैति । अच्छिद्रा  
 गात्रा वयुना कृणोत परुषपरुनुघुष्या वि शस्त ॥  
 एकस्त्वष्टुरश्वस्या विशस्ता द्वा यन्तारा भवतस्तथर्तुः । या ते  
 गात्राणामृतुथा कृणोमि ताता पिण्डानाम्प्र जुहोम्यग्नौ ॥  
 मा त्वा तपत्प्रिय आत्मापियन्तम्मा स्वधितिस्तनुव आ तिष्ठिपत्ते । मा तै  
 गृधुरविशस्तातिहाय च्छिद्रा गात्राणयसिना मिथू कः ॥  
 न वा उवेतन्म्रियसे न रिष्यसि देवा इदैषि पृथिभिः सुगेभिः । हरी ते  
 युञ्जा पृषती अभूतामुपास्थाद्वाजी धुरि रासभस्य ॥  
 सुगव्यं नो वाजी स्वश्वियम्पुंसः पुत्रा उत विश्वापुषं रयिम् ।  
 अनागास्त्वं नो अदितिः कृणोतु क्षत्रं नो अश्वौ वनता हविष्मान् ॥६॥

इति चतुर्थकारण्डे षष्ठः प्रपाठकः ६

अथ चतुर्थकारण्डे सप्तमः प्रपाठकः ७

अग्नाविष्णु सजोषसेमा वर्धन्तु वां गिरः । द्युमैर्वाजैभिरा गतम् ॥  
 वाजश्च मे प्रसवश्च मे प्रयतिश्च मे प्रसितिश्च मे धीतिश्च मे क्रतुश्च मे स्वरश्च  
 मे श्लोकश्च मे श्रावश्च मे श्रुतिश्च मे ज्योतिश्च मे सुवश्च मे प्राणश्च मेऽपानश्च  
 मे व्यानश्च मेऽसुश्च मे चित्तं च म आधीतं च मे वाक्च मे मनश्च मे चक्षुश्च  
 मे श्रोत्रं च मे दक्षश्च मे बलं च म ओजश्च मे सहश्च म आयुश्च मे जरा च  
 म आत्मा च मे तनूश्च मे शर्म च मे वर्म च मेऽङ्गानि च मेऽस्थानि च मे

परूँषि च मे शरीराणि च मे ॥१॥

ज्यैष्ठ्यं च म् आधिपत्यं च मे मन्युश्च मे भामश्च मेऽमश्च मेऽम्भश्च मे जेमा  
च मे महिमा च मे वरिमा च मे प्रथिमा च मे वर्ष्मा च मे द्राघुया च मे  
वृद्धं च मे वृद्धिश्च मे सत्यं च मे श्रद्धा च मे जगच्च मे धनं च मे वशश्च  
मे त्विषिश्च मे क्रीडा च मे मोदश्च मे जातं च मे जनिष्यमाणं च मे सूक्तं  
च मे सुकृतं च मे वित्तं च मे वेद्यं च मे भूतं च मे भविष्यच्च मे सुगं च  
मे सुपथं च म ऋद्धं च म् ऋद्धिश्च मे क्लृप्तं च मे क्लृप्तिश्च मे मृतिश्च मे  
सुमृतिश्च मे ॥२॥

शं च मे मयश्च मे प्रियं च मेऽनुकामश्च मे कामश्च मे सौमनसश्च मे भद्रं च  
मे श्रेयश्च मे वस्यश्च मे यशश्च मे भगश्च मे द्रविणं च मे यन्ता च मे धर्ता  
च मे क्षेमश्च मे धृतिश्च मे विश्वं च मे महश्च मे संविच्च मे ज्ञात्रं च मे सूश्च  
मे प्रसूश्च मे सीरं च मे लयश्च म ऋतं च मेऽमृतं च मेऽयद्धमं च  
मेऽनामयच्च मे जीवातुश्च मे दीर्घायुत्वं च मेऽनमित्रं च मेऽभयं च मे सुगं  
च मे शयनं च मे सूषा च मे सुदिनं च मे ॥३॥

ऊर्क्च मे सूनृता च मे पर्यश्च मे रसश्च मे घृतं च मे मधु च मे सग्धिश्च मे  
शपीतिश्च मे कृषिश्च मे वृष्टिश्च मे जैत्रं च म् औद्भिद्यं च मे रयिश्च मे  
रायश्च मे पुष्टं च मे पुष्टिश्च मे विभु च मे प्रभु च मे बहु च मे भूयश्च मे  
पूर्णं च मे पूर्णतरं च मेऽक्षितिश्च मे कूर्यवाश्च मेऽन्नं च मेऽक्षुच्च मे ब्रीहयश्च  
मे यवाश्च मे माषाश्च मे तिलाश्च मे मुद्गाश्च मे खल्वाश्च मे गोधूमाश्च मे  
मसुराश्च मे प्रियङ्गवश्च मेऽणवश्च मे श्यामाकाश्च मे नीवाराश्च मे ॥४॥

अश्मा च मे मृत्तिका च मे गिरयश्च मे पर्वताश्च मे सिकताश्च मे  
 वनस्पतयश्च मे हिरण्यं च मेऽयश्च मे सीसं च मे त्रपुश्च मे श्यामं च मे  
 लोहं च मेऽग्निश्च म आपश्च मे वीरुधश्च म ओषधयश्च मे कृष्टपुच्यं च  
 मेऽकृष्टपुच्यं च मे ग्राम्याश्च मे पशव आरुगयाश्च यज्ञेन कल्पन्तां वित्तं च  
 मे वित्तश्च मे भूतं च मे भूतिश्च मे वसु च मे वसुतिश्च मे कर्म च मे  
 शक्तिश्च मेऽर्थश्च म एमश्च म इतिश्च मे गतिश्च मे ॥५॥

अग्निश्च म इन्द्रश्च मे सोमश्च म इन्द्रश्च मे सविता च म इन्द्रश्च मे सरस्वती  
 च म इन्द्रश्च मे पूषा च म इन्द्रश्च मे बृहस्पतिश्च म इन्द्रश्च मे मित्रश्च म  
 इन्द्रश्च मे वरुणश्च म इन्द्रश्च मे त्वष्टा च म इन्द्रश्च मे धाता च म इन्द्रश्च मे  
 विष्णुश्च म इन्द्रश्च मेऽश्विनौ च म इन्द्रश्च मे मरुतश्च म इन्द्रश्च मे विश्वे च मे  
 देवा इन्द्रश्च मे पृथिवी च म इन्द्रश्च मेऽन्तरिक्षं च म इन्द्रश्च मे द्यौश्च म  
 इन्द्रश्च मे दिशश्च म इन्द्रश्च मे मूर्धा च म इन्द्रश्च मे प्रजापतिश्च म इन्द्रश्च मे  
 ॥६॥

अँशुश्च मे रश्मिश्च मेऽदाभ्यश्च मेऽधिपतिश्च म उपाँशुश्च मेऽन्तर्यामश्च म  
 ऐन्द्रवायवश्च मे मैत्रावरुणश्च म आश्विनश्च मे प्रतिप्रस्थानश्च मे शुक्रश्च मे  
 मन्थी च म आग्रयणश्च मे वैश्वदेवश्च मे ध्रुवश्च मे वैश्वानरश्च म ऋतुग्रहाश्च  
 मेऽतिग्राह्याश्च म ऐन्द्राग्रश्च मे वैश्वदेवश्च मे मरुत्वतीयाश्च मे माहेन्द्रश्च म  
 आदित्यश्च मे सावित्रश्च मे सारस्वतश्च मे पौष्णश्च मे पात्नीवतश्च मे  
 हारियोजनश्च मे ॥७॥

इध्मश्च मे बृर्हिश्च मे वेदिश्च मे धिष्णिायाश्च मे स्तुचश्च मे चमसाश्च मे  
ग्रावाणश्च मे स्वरवश्च म उपरवाश्च मेऽधिषवणे च मे द्रोणकलशश्च मे  
वायुव्यानि च मे पूतभृच्च म आधवनीयश्च म आग्नीध्रं च मे हविर्धानं च  
मे गृहाश्च मे सदश्च मे पुरोडाशाश्च मे पचताश्च मेऽवभृथश्च मे स्वगाकारश्च  
मे ॥८॥

अग्निश्च मे घर्मश्च मेऽर्कश्च मे सूर्यश्च मे प्राणश्च मेऽश्वमेधश्च मे पृथिवी च  
मेऽदितिश्च मे दितिश्च मे द्यौश्च मे शक्वरीरङ्गुलयो दिशश्च मे यज्ञेन  
कल्पन्तामृक्च मे सामं च मे स्तोमश्च मे यजुश्च मे दीक्षा च मे तपश्च म  
ऋतुश्च मे व्रतं च मेऽहोरात्रयौर्वृष्ट्या बृहद्रथन्तरे च मे यज्ञेन कल्पेताम्  
॥९॥

गर्भाश्च मे वत्साश्च मे त्र्यविश्च मे त्र्यवी च मे दित्यवाट्च मे दित्यौही च  
मे पञ्चाविश्च मे पञ्चावी च मे त्रिवत्सश्च मे त्रिवत्सा च मे तुर्यवाट्च मे  
तुर्यौही च मे पष्ठवाच्च मे पष्ठौही च म उक्षा च मे वशा च म ऋषभश्च मे  
वेहच्च मेऽनुड्वाच्च मे धेनुश्च म आयुर्यज्ञेन कल्पतां प्राणो यज्ञेन  
कल्पतामपानो यज्ञेन कल्पतां व्यानो यज्ञेन कल्पतां चक्षुर्यज्ञेन कल्पतां  
श्रोत्रं यज्ञेन कल्पतां मनो यज्ञेन कल्पतां वाग्यज्ञेन कल्पतामात्मा यज्ञेन  
कल्पतां यज्ञो यज्ञेन कल्पताम् ॥१०॥

एका च मे तिस्रश्च मे पञ्च च मे सप्त च मे नव च म एकादश च मे  
त्रयोदश च मे पञ्चदश च मे सप्तदश च मे नवदश च म एकविंशतिश्च  
मे त्रयोविंशतिश्च मे पञ्चविंशतिश्च मे सप्तविंशतिश्च मे

नवविंशतिश्च म॒ एकत्रिंशच्च॑ मे॒ त्रयस्त्रिंशच्च॑ मे॒ चतस्रश्च॑ मेऽष्टौ च॑ मे॒  
 द्वादश॑ च॒ मे षोडश॑ च॒ मे विंशतिश्च॑ मे॒ चतुर्विंशतिश्च॑ मेऽष्टाविंश-  
 तिश्च॑ मे॒ द्वात्रिंशच्च॑ मे॒ षट्त्रिंशच्च॑ मे॒ चत्वारिंशच्च॑ मे॒  
 चतुश्चत्वारिंशच्च॑ मेऽष्टाचत्वारिंशच्च॑ मे॒ वाजश्च॑ प्रसवश्चापिजश्च॑ क्रतुश्च॑  
 सुवश्च॑ मूर्धा च॒ व्यशिनयश्चान्त्यायनश्चान्त्यश्च॑ भौवनश्च॑ भुवनश्चाधिपतिश्च॑  
 ॥११॥

वाजो॑ नः स॒प्त प्र॒दिश॒श्चत॑स्रो वा॒ परा॒वतः॑ । वाजो॑ नो  
 विश्वैर्दे॒वैर्धन॑साताविहावतु ॥

विश्वे॑ अ॒द्य म॒रुतो॑ विश्वं॒ ऊती॑ विश्वे॑ भवन्त्व॒ग्रयः॑ समिद्धाः । विश्वे॑ नो  
 दे॒वा अ॒वसा॑र्गमन्तु विश्वमस्तु॒ द्रवि॑णं॒ वाजो॑ अ॒स्मे ॥  
 वाज॑स्य प्रस॒वं दे॒वा रथै॑र्याता हिर॒ण्ययैः॑ । अ॒ग्निरिन्द्रो॑ बृह॒स्पति॑र्म॒रुतः॑  
 सोम॑पीतये ॥

वाजे॑वाजेऽवत वाजिनो नो॒ धने॑षु विप्रा अ॒मृता॑ ऋत॒ज्ञाः । अस्य॑ मध्वः  
 पिबत॑ मा॒दय॑ध्वं॒ तृप्ता॑ यात॒ पृथि॑भिर्दे॒व्यानैः॑ ॥

वाजः॑ पु॒रस्ता॑दुत म॒ध्यतो॑ नो॒ वाजो॑ दे॒वा ऋ॒तुभिः॑ कल्पयाति । वाज॑स्य  
 हि प्र॑स॒वो न॒न्नमी॑ति॒ विश्वा॑ आशा॒ वाज॑पतिर्भवेयम् ॥

पयः॑ पृथि॒व्याम्य॑ अ॒र्षधी॑षु॒ पयो॑ दि॒व्यन्तरि॑क्षे॒ पयो॑ धाम् । पय॑स्वतीः  
 प्र॒दिशः॑ सन्तु॒ मह्य॑म् ॥

सम्मा॑ सृ॒जामि॑ पय॑सा॒ घृते॑न॒ सम्मा॑ सृ॒जाम्य॑प अ॒र्षधी॑भिः । सौ॑ऽहं  
 वाज॑स्य॒ सने॑यमग्ने ॥

नक्तो॑षासा॒ सम॑नसा॒ विरू॑पे धा॒पये॑ते शिशु॒मेकं॑ समी॒ची । द्यावा॑ क्षामा  
 रु॒क्मो अ॒न्तर्वि॑ भाति॒ दे॒वा अ॒ग्निं धा॑रयन्द्रवि॒णोदाः॑ ॥

समुद्रोऽसि नभस्वानार्द्रदानुः शम्भूर्मयोभूरभि मा वाहि स्वाहा मारुतोऽसि  
मरुतां गणः शम्भूर्मयोभूरभि मा वाहि स्वाहावस्युरसि  
दुर्वस्वाञ्छम्भूर्मयोभूरभि मा वाहि स्वाहा ॥१२॥

अग्निं युनज्मि शर्वसा घृतेन दिव्यं सुपर्णं वयसा बृहन्तम् । तेन  
वयम्पतेम ब्रध्नस्यं विष्टपं सुवो रुहाणा अधि नाकं उत्तमे ॥  
इमौ ते पक्षावजरौ पतत्रिणो याभ्यां रक्षां स्यपहं स्यग्ने । ताभ्याम्पतेम  
सुकृतां लोको यत्रर्षयः प्रथमजा ये पुराणाः ॥  
चिदसि समुद्रयो निरिन्दुर्दक्षः श्येन ऋतावा । हिरण्यपक्षः शकुनो  
भुरगयुर्महान्तसुधस्थै ध्रुवः आ निषत्तः ॥  
नमस्ते अस्तु मा मा हिंसीर्विश्वस्य मूर्धन्नधि तिष्ठसि श्रितः । समुद्रे ते  
हृदयमन्तरायुर्धावापृथिवी भुवनेष्वर्पिते ॥  
उदनो दंतोदधिभिन्त दिवः पर्जन्यादन्तरिक्षात्पृथिव्यास्ततो नो वृष्ट्यावत  
। दिवो मूर्धासि पृथिव्या नाभिरूर्गपामोषधीनाम् । विश्वायुः शर्म  
सप्रथा नमस्पथे ॥  
येनर्षयस्तपसा सत्रमासतेन्धाना अग्निं सुवराभरन्तः । तस्मिन्नहं नि  
दधे नाकं अग्निमेतं यमाहुर्मनवः स्तीर्णबर्हिषम् ॥  
तम्पत्नीभिरनु गच्छेम देवाः पुत्रैर्भ्रातृभिरुत वा हिरण्यैः । नाकं गृह्णानाः  
सुकृतस्य लोके तृतीये पृष्ठे अधि रोचने दिवः ॥  
आ वाचो मध्यमरुहद्भुरगयुरयमग्निः सत्पतिश्चेकितानः । पृष्ठे पृथिव्या  
निहितो दविद्युतदधस्पदं कृणुते ये पृतन्यवः ॥  
अयमग्निर्वीरतमो वयोधाः सहस्त्रियो दीप्यतामप्रयुच्छन् । विभ्राजमानः  
सरिरस्य मध्य उप प्र यात दिव्यानि धाम ॥



सम्प्र च्यवध्वमनु सम्प्र याताग्रे पथो देवयानान्कृणुध्वम् ।  
अस्मिन्सुधस्थे अध्युत्तरस्मिन्विश्वे देवा यजमानश्च सीदत ॥  
येना सहस्रं वहसि येनाग्रे सर्ववेदसम् । तेनेमं यज्ञं नो वह देवयानो य  
उत्तमः ॥

उद्ध्व्यस्वाग्ने प्रति जागृह्येनमिष्टापूर्ते सँ सृजेथामयं च । पुनः  
कृणवँस्त्वा पितरं युवानमन्वाताँसीत्त्वयि तन्तुमेतम् ॥  
अयं ते योनिर्ऋत्वियो यतो जातो अरोचथाः । तं जानन्नग्र आ रोहाथा नो  
वर्धया रयिम् ॥१३॥

ममाग्ने वर्चो विह्वेष्वस्तु वयं त्वेन्धानास्तनुवम्पुषेम । मह्यं  
नमन्ताम्प्रदिशश्चतस्रस्त्वयाध्यक्षेण पृतना जयेम ॥  
मम देवा विह्वे सन्तु सर्व इन्द्रावन्तो मरुतो विष्णुरग्निः ।  
ममान्तरिक्षमुरु गोपमस्तु मह्यं वातः पवतां कामै अस्मिन् ॥  
मयि देवा द्रविणमा यजन्ताम्मय्याशीरस्तु मयि देवहृतिः । दैव्या  
होतारा वनिषन्तु पूर्वेरिष्टाः स्याम तनुवा सुवीराः ॥  
मह्यं यजन्तु मम यानि ह्व्याकूतिः सत्या मनसो मे अस्तु । एनो मा नि  
गां कतमच्चनाहं विश्वे देवासो अर्धि वोचता मे ॥  
देवीः षडुर्वीरुरु णः कृणोत विश्वे देवास इह वीरयध्वम् । मा हास्महि  
प्रजया मा तनूभिर्मा रंधाम द्विषते सौम राजन् ॥  
अग्निर्मन्युम्प्रतिनुदन्पुरस्ताददब्धो गोपाः परि पाहि नस्त्वम् । प्रत्यञ्चो यन्तु  
निगुतः पुनस्तेऽमैषां चित्तम्प्रबुधा वि नैशत् ॥  
धाता धातृणाम्भुवनस्य यस्पतिर्देवँ सवितारमभिमातिषाहम् । इमं  
यज्ञमश्विनोभा बृहस्पतिर्देवाः पान्तु यजमानं न्यर्थात् ॥

उरुव्यचा नो महिषः शर्म यँसदस्मिन्हवे पुरुहूतः पुरुक्षु । स नः  
प्रजायै हर्यश्च मृडयेन्द्र मा नो रीरिषो मा परा दाः ॥  
ये नः सपत्ना अप ते भवन्त्विन्द्राग्निभ्यामव बाधामहे तान् । वसवो रुद्रा  
आदित्या उपरिस्पृशम्भोग्रं चेतारमधिराजमक्रन् ॥  
अर्वाञ्चमिन्द्रमुमुतो हवामहे यो गोजिद्धनजिदश्चजिद्यः । इमं नो यज्ञं  
विहवे जुषस्वास्य कुर्मो हरिवो मेदिनं त्वा ॥१४॥

अग्नेर्मन्वे प्रथमस्य प्रचेतसो यम्पाञ्जजन्यम्बहवः समिन्धते । विश्वस्यां  
विशि प्रविविशिवाँ समीमहे स नो मुञ्चत्वँहसः ॥  
यस्येदम्प्राणत्रिमिषद्यदेजति यस्य जातं जनमानं च केवलम् । स्तौम्यग्निं  
नाथितो जोहवीमि स नो मुञ्चत्वँहसः ॥  
इन्द्रस्य मन्ये प्रथमस्य प्रचेतसो वृत्रघ्नः स्तोमा उप मामुपागुः । यो  
दाशुषः सुकृतो हवमुप गन्ता स नो मुञ्चत्वँहसः ॥  
यः संग्रामं नयति सं वशी युधे यः पुष्टानि सँसृजति त्रयाणि ।  
स्तौमीन्द्रं नाथितो जोहवीमि स नो मुञ्चत्वँहसः ॥  
मन्वे वाम्मित्रावरुणा तस्य वित्तँ सत्यौजसा दृँहणा यं नुदेथे । या  
राजानँ सरथं याथ उग्रा ता नो मुञ्चतुमागसः ॥  
यो वाँ रथं ऋजुरश्मिः सत्यधर्मा मिथुश्चरन्तमुपयाति दूषयन् । स्तौमि  
मित्रावरुणा नाथितो जोहवीमि तौ नो मुञ्चतुमागसः ॥  
वायोः सवितुर्विदथानि मन्महे यावात्मन्वद्विभृतो यौ च रक्षतः । यौ  
विश्वस्य परिभू बभूवतुस्तौ नो मुञ्चतुमागसः ॥  
उप श्रेष्ठा न आशिषो देवयोर्धर्मे अस्थिरन् । स्तौमि वायुँ सवितारं  
नाथितो जोहवीमि तौ नो मुञ्चतुमागसः ॥

रथीतमौ रथीनामह ऊतये शुभं गमिष्ठौ सुयमेभिरश्वैः । ययोर्वा देवौ  
 देवेष्वनिशितमोजस्तौ नो मुञ्चतमार्गसः ॥  
 यदयातं वहतुं सूर्यायास्त्रिचक्रेण ससदमिच्छमानौ । स्तौमि  
 देवावशिनौ नाथितो जोहवीमि तौ नो मुञ्चतमार्गसः ॥  
 मरुताम्मन्वे अधि नो ब्रुवन्तु प्रेमां वाचं विश्वामवन्तु विश्वे । आशून्हुवे  
 सुयमानूतये ते नो मुञ्चन्त्वेनसः ॥  
 तिग्ममार्युधं वीडितं सहस्वद्विव्यं शर्धः पृतनासु जिष्णु । स्तौमि  
 देवान्मरुतौ नाथितो जोहवीमि ते नो मुञ्चन्त्वेनसः ॥  
 देवानाम्मन्वे अधि नो ब्रुवन्तु प्रेमां वाचं विश्वामवन्तु विश्वे । आशून्हुवे  
 सुयमानूतये ते नो मुञ्चन्त्वेनसः ॥  
 यदिदम्माभिशोचति पौरुषेयेण दैव्येन । स्तौमि विश्वान्देवान्नाथितो  
 जोहवीमि ते नो मुञ्चन्त्वेनसः ॥  
 अनु नोऽद्यानुमति रन्विदनुमते त्वं वैश्वानरो न ऊत्या पृष्टो दिवि  
 ये अप्रथेताममितेभिरोजोभिर्ये प्रतिष्ठे अभवतां वसूनाम् । स्तौमि  
 द्यावापृथिवी नाथितो जोहवीमि ते नो मुञ्चतमहसः ॥  
 उर्वी रोदसी वरिवः कृणोतं क्षेत्रस्य पत्नी अधि नो ब्रूयातम् । स्तौमि  
 द्यावापृथिवी नाथितो जोहवीमि ते नो मुञ्चतमहसः ॥  
 यत्ते वयम्पुरुषत्रा यविष्ठाविद्वांसश्चकृमा कञ्चनागः । कृधी स्वस्मां  
 अदितेरनागा व्येनांसि शिश्रथो विष्वगग्ने ॥  
 यथा ह तद्वसवो गौर्यं चित्पदि षिताममुञ्चता यजत्राः । एवा त्वमस्मत्प्र  
 मुञ्चा व्यहः प्रातार्यग्ने प्रतरां न आर्युः ॥१५॥

इति चतुर्थकारण्डे सप्तमः प्रपाठकः ७

इति चतुर्थं कारण्डं सम्पूर्णम् ४

अथ पञ्चमं कारुडम्

अथ प्रथमः प्रपाठकः १

सावित्राणि जुहोति प्रसूत्यै चतुर्गृहीतेन जुहोति चतुष्पादः पशवः  
 पशूनेवाव रुद्धे चतस्रो दिशो दिक्ष्वेव प्रति तिष्ठति च्छन्दांसि  
 देवेभ्योऽपाक्रामन्न वोऽभागानि हव्यं वक्ष्याम् इति तेभ्य  
 एतच्चतुर्गृहीतमधारयन्पुरोऽनुवाक्यायै याज्यायै देवतायै वषट्काराय  
 यच्चतुर्गृहीतं जुहोति च्छन्दांस्येव तत्प्रीणाति तान्यस्य प्रीतानि देवेभ्यो  
 हव्यं वहन्ति यं कामयेत् पापीयान्त्स्यादित्येकैकं तस्य  
 जुहुयादाहुतीभिरेवैनमप गृह्णाति पापीयान्भवति यं कामयेत्  
 वसीयान्त्स्यादिति सर्वाणि तस्यानुद्गत्य जुहुयादाहुत्यैवैनमभि क्रमयति  
 वसीयान्भवत्यथो यज्ञस्यैवैषाभिक्रान्ति रेति वा एष यज्ञमुखादृद्ध्या  
 योऽग्नेर्देवताया एत्यष्टावेतानि सावित्राणि भवन्त्यष्टाक्षरा गायत्री  
 गायत्रोऽग्निस्तेनैव यज्ञमुखादृद्ध्या अग्नेर्देवतायै नैत्यष्टौ सावित्राणि  
 भवन्त्याहुतिर्नवमी त्रिवृतमेव यज्ञमुखे वि यातयति यदि कामयेत्  
 च्छन्दांसि यज्ञयशसेनार्पयेयमित्यृचमन्तमां कुर्याच्छन्दांस्येव  
 यज्ञयशसेनार्पयति यदि कामयेत् यजमानं यज्ञयशसेनार्पयेयमिति  
 यजुरन्तमं कुर्याद्यजमानमेव यज्ञयशसेनार्पयत्यृचा स्तोमं समर्धयेत्याह  
 समृद्ध्यै चतुर्भिरग्निमा दत्ते चत्वारि च्छन्दांसि च्छन्दोभिरेव देवस्य त्वा  
 सवितुः प्रसव इत्याह प्रसूत्या अग्निर्देवेभ्यो निलायत् स वेणुम्प्राविशत्स  
 एतामूतिमनु समचरद्यद्वेणोः सुषिरं सुषिराभिर्भवति सयोनित्वायु स  
 यत्रयत्रावसत्तत्कृष्णमभवत्कल्माषी भवति रूपसमृद्ध्या उभयतः  
 द्गूर्भवतीतश्चामुतश्चार्कस्यावरुद्ध्यै व्याममात्री भवत्येतावद्वै पुरुषे वीर्यं  
 वीर्यसम्मितापरिमिता भवत्यपरिमितस्यावरुद्ध्यै यो

वनस्पतीनाम्फलग्रहिः स एषां वीर्यावान्फलग्रहिवर्णुर्वैशुवी भवति  
वीर्यस्यावरुद्ध्यै ॥१॥

वृद्धं वा एतद्यज्ञस्य यदयजुष्कैण क्रियत  
इमामगृभ्णन्नशनामृतस्येत्यश्वाभिधानीमा दत्ते यजुष्कृत्यै यज्ञस्य समृद्ध्यै  
प्रतूर्तं वाजिन्ना द्रुवेत्यश्वमभि दधाति रूपमेवास्यैतन्महिमानं व्याचष्टे  
युञ्जाथाँ रासभं युवमिति गर्दभमसत्येव गर्दभमप्रति ष्ठापयति  
तस्मादश्वाद्गर्दभोऽसत्तरो योगेयोगे तवस्तरमित्याह योगेयोग एवैनं युङ्क्ते  
वाजैवाजे हवामह इत्याहान्नं वै वाजोऽन्नमेवाव रुद्धे सखाय इन्द्रमृतय  
इत्याहेन्द्रियमेवाव रुद्धेऽग्निदेवेभ्यो निलायत  
तम्प्रजापतिरन्वविन्दत्प्राजापत्योऽश्वोऽश्वेन सम्भरत्यनुवित्त्यै पापवस्यसं वा  
एतत्क्रियते यच्छ्रेयसा च पापीयसा च समानं कर्म कुर्वन्ति  
पापीयान्द्वश्वाद्गर्दभोऽश्वम्पूर्वं नयन्ति पापवस्यसस्य व्यावृत्त्यै  
तस्माच्छ्रेयाँसं पापीयान्पश्चादन्वेति बहुवै भवतो भ्रातृव्यो भवतीव खलु  
वा एष योऽग्निं चिनुते वज्रयश्वः प्रतूर्वनेह्यवक्रामन्नशस्तीरित्याह वज्रैशैव  
पाप्मानभ्रातृव्यमव क्रामति रुद्रस्य गाणपत्यादित्याह रौद्रा वै पशवो  
रुद्रादेव पशून्निर्याच्यात्मने कर्म कुरुते पूष्णा सयुजा सहेत्याह पूषा वा  
अध्वनाँ सन्नेता समष्ट्यै पुरीषायतनो वा एष यद्गिरिङ्गिरसो वा एतमग्रै  
देवतानाँ समभरन्पृथिव्याः सधस्थाद्गिम्पुरीष्यमङ्गिरस्वदच्छेहीत्याह  
सार्यतनमेवैनं देवताभिः सम्भरत्यग्निम्पुरीष्यमङ्गिरस्वदच्छेम् इत्याह येन  
सङ्गच्छते वाजमेवास्य वृद्धे प्रजापतये प्रतिप्रोच्याग्निः सम्भृत्य इत्याहुरियं  
वै प्रजापतिस्तस्या एतच्छ्रोत्रं यद्वल्मीकोऽग्निम्पुरीष्यमङ्गिरस्वद्वरिष्याम्  
इति वल्मीकवृषामुप तिष्ठते साक्षादेव प्रजापतये प्रतिप्रोच्याग्निँ

सम्भरत्य् ग्रिम्पुरीष्यमङ्गिरस्वद्भराम् इत्याहु येन सङ्गच्छते वाजमेवास्य  
वृङ्क्तेऽन्वग्रिरुषसामग्रमख्यदित्याहानुरुख्यात्या आगत्य वाज्यध्वन  
आक्रम्य वाजिनृथिवीमित्याहेच्छत्येवैनम्पूर्वया विन्दत्युत्तरया द्वाभ्यामा  
क्रमयति प्रतिष्ठित्या अनुरूपाभ्यां तस्मादनुरूपाः पशवः प्र जायन्ते द्यौस्तै  
पृष्ठम्पृथिवी सधस्थमित्याहैभ्यो वा एतं लोकेभ्यः प्रजापतिः  
समैरयद्रूपमेवास्यैतन्महिमानं व्याचष्टे वज्री वा एष यदश्वौ  
दद्भिरन्यतौदद्भ्यो भूयाँल्लोमभिरुभयादद्भ्यो यं द्विष्यात्तमधस्पदं  
ध्यायेद्वज्रैशैवैनं स्तृणुते ॥२॥

उत्क्रामोदक्रमीदिति द्वाभ्यामुत्क्रमयति प्रतिष्ठित्या अनुरूपाभ्यां  
तस्मादनुरूपाः पशवः प्र जायन्तेऽप उप सृजति यत्र वा आप उपगच्छन्ति  
तदोषधयः प्रति तिष्ठन्त्योषधीः प्रतितिष्ठन्तीः पशवोऽनु प्रति तिष्ठन्ति  
पशून्यज्ञो यज्ञं यजमानो यजमानम्प्रजास्तस्मादप उप सृजति प्रतिष्ठित्यै  
यदध्वर्युरनग्नावाहुतिं जुहुयादन्धोऽध्वर्युः स्याद्रक्षाँसि यज्ञं  
हन्युर्हिरण्यमुपास्य जुहोत्यग्नित्येव जुहोति नान्धोऽध्वर्युर्भवति न यज्ञं  
रक्षाँसि घ्नन्ति जिघर्म्यग्निमनसा घृतेनेत्याहु मनसा हि पुरुषो  
यज्ञमभिगच्छति प्रतिदयन्तम्भुवनानि विश्वेत्याहु सर्वं ह्येष प्रत्यङ्गिति पृथुं  
तिरश्वा वयसा बृहन्तमित्याहाल्पो ह्येष जातो महान्भवति व्यचिष्टमन्नं  
रभसं विदानमित्याहान्नमेवास्मै स्वदयति सर्वमस्मै स्वदते य एवं  
वेदा त्वा जिघर्मि वचसा घृतेनेत्याहु तस्माद्यत्पुरुषो मनसाभिगच्छति  
तद्वाचा वदत्य रक्षसेत्याहु रक्षसामपहत्यै मर्त्यश्रीः स्पृहयद्वर्णो  
अग्निरित्याहापचितिमेवास्मिन्दधात्य पचितिमान्भवति य एवं वेद  
मनसा त्वै तामामुमर्हति यामध्वर्युरनग्नावाहुतिं जुहोति मनस्वतीभ्यां

जुहोत्याहृत्योराप्त्यै द्वाभ्यां प्रतिष्ठित्यै यज्ञमुखेयज्ञमुखे वै क्रियमाणे यज्ञं  
 रक्षांसि जिघांसन्त्येतर्हि खलु वा एतद्यज्ञमुखं यर्ह्येनदाहृतिरश्नुते परि  
 लिखति रक्षसामपहत्यै तिसृभिः परि लिखति त्रिवृद्धा  
 अग्निर्यावानेवाग्निस्तस्माद्रक्षांस्यप हन्ति गायत्रिया परि लिखति तेजो वै  
 गायत्री तेजसैवैनम्परि गृह्णाति त्रिष्टुभा परि लिखतीन्द्रियं वै  
 त्रिष्टुगिन्द्रियेणैवैनम्परि गृह्णात्यनुष्टुभा परि लिखत्यनुष्टुप्सर्वाणि  
 च्छन्दांसि परिभूः पर्याप्त्यै मध्यतोऽनुष्टुभा वाग्वा अनुष्टुप्सर्वाण्युतो  
 वाचा वदामो गायत्रिया प्रथमया परि लिखत्यथानुष्टुभार्थं त्रिष्टुभा तेजो  
 वै गायत्री यज्ञोऽनुष्टुगिन्द्रियं त्रिष्टुप्तेजसा चैवेन्द्रियेण चोभयतो यज्ञम्परि  
 गृह्णाति ॥३॥

देवस्य त्वा सवितुः प्रसव इति खनति प्रसूत्या अथो धूममेवैतेन जनयति  
 ज्योतिष्मन्तं त्वाग्ने सुप्रतीकमित्याह ज्योतिरिवैतेन जनयति सोऽग्निर्जातः  
 प्रजाः शुचार्पयत्तं देवा अर्धर्चेनाशमयञ्छिवम्प्रजाभ्योऽर्हिंसन्तमित्याह  
 प्रजाभ्य एवैनं शमयति द्वाभ्यां खनति प्रतिष्ठित्या अपाम्पृष्टमसीति  
 पुष्करपर्णमा हरत्यपां वा एतत्पृष्ठं यत्पुष्करपर्णं रूपेणैवैनदा हरति  
 पुष्करपर्णेन सम्भरति योनिर्वा अग्नेः पुष्करपर्णं सयोनिमेवाग्निं  
 सम्भरति कृष्णाजिनेन सम्भरति यज्ञो वै कृष्णाजिनं यज्ञेनैव यज्ञं  
 सम्भरति यद्ग्राम्याणां पशूनां चर्मणा  
 सम्भरैद्ग्राम्यान्पशूञ्छुचार्पयेत्कृष्णाजिनेन सम्भरत्यारुणयानेव  
 पशून्शुचार्पयति तस्मात्समावत्पशूनाम्प्रजायमानानामारुणयाः पशवः  
 कनीयांसः शुचा हृता लोमतः सम्भरत्यतो ह्यस्य मेध्यं कृष्णाजिनं च  
 पुष्करपर्णं च स स्तृणातीयं वै कृष्णाजिनमसौ

पुष्करपर्णमाभ्यामेवैनमुभयतः परि गृह्णात्यग्निर्देवेभ्यो निलायत  
तमथर्वान्वपश्यदथर्वा त्वा प्रथमो निरमन्थदग््न इत्याह य  
एवैनमन्वपश्यत्तेनैवैनं सम्भरति त्वामग्ने पुष्करादधीत्याह पुष्करपर्णे  
ह्यैनमुपश्रितमविन्दत्तमु त्वा दध्यइडृषिरित्याह दध्यइवा  
आथर्वणस्तेजस्व्यासीत्तेज एवास्मिन्दधाति तमु त्वा पाथ्यो वृषेत्याह  
पूर्वमेवोदितमुत्तरेणाभि गृणाति चतसृभिः सम्भरति चत्वारि च्छन्दांसि  
च्छन्दोभिरेव गायत्रीभिर्ब्राह्मणस्य गायत्रो हि ब्राह्मणस्त्रिष्टुग्भी राजन्यस्य  
त्रैष्टुभो हि राजन्यो यं कामयेत वसीयान्त्स्यादित्युभयीभिस्तस्य  
सम्भरतेजश्चैवास्मा इन्द्रियं च समीचीं दधात्यष्टाभिः सम्भरत्यष्टाक्षरा  
गायत्री गायत्रोऽग्निर्यावानेवाग्निस्तं सम्भरति सीदं होतरित्याह देवता  
एवास्मै ससादयति नि होतेति मनुष्यान्त्ससीदस्वेति वयांसि  
जनिष्वा हि जेन्यो अग्ने अहामित्याह देवमनुष्यानेवास्मै ससन्नान्प्र  
जनयति ॥४॥

क्रूरमिव वा अस्य एतत्करोति यत्वनत्यप उप सृजत्यापो वै शान्ताः  
शान्ताभिरेवास्यै शुचं शमयति सं ते वायुर्मातरिश्वा दधात्वित्याह प्राणो  
वै वायुः प्राणेनैवास्यै प्राणं सं दधाति सं ते वायुरित्याह  
तस्माद्वायुप्रच्युता दिवो वृष्टिरीते तस्मै च देवि वर्षडस्तु तुभ्यमित्याह  
षड्वा ऋतव ऋतुष्वेव वृष्टिं दधाति तस्मात्सर्वानृतूर्वर्षति  
यद्वषट्कुर्याद्यातयामास्य वषट्कारः स्याद्यन्न वषट्कुर्याद्रक्षांसि यज्ञं  
हन्युर्वडित्याह परोऽक्षमेव वषट्करोति नास्य यातयामा वषट्कारो  
भवति न यज्ञं रक्षांसि घ्नन्ति सुजातो ज्योतिषा सहेत्यनुष्टुभोप  
नह्यत्यनुष्टुप्सर्वाणि च्छन्दांसि खलु वा अग्नेः प्रिया तनूः प्रिययैवैनं



तनुवा परि दधाति वेदुको वासो भवति य एवं वेद वारुणो वा  
 अग्निरुपनद्ध उदु तिष्ठ स्वध्वरोर्ध्व ऊ षु णा ऊतय इति  
 सावित्रीभ्यामुत्तिष्ठति सवितृप्रसूत एवास्योर्ध्वा वरुणमेनिमुत्सृजति  
 द्वाभ्यां प्रतिष्ठित्यै स जातो गर्भो असि रोदस्योरित्याहेमे वै रोदसी तयोरेष  
 गर्भो यदग्निस्तस्मादेवमाहा ग्रे चारुर्विभृत ओषधीष्वित्याह यदा ह्यैतं  
 विभरन्त्यथ चारुतरो भवति प्र मातृभ्यो अधि कनिक्रदद्वा इत्याहौषधयो  
 वा अस्य मातरस्ताभ्य एवैनम्प्र च्यावयति स्थिरो भव वीड्वङ्ग इति  
 गर्दभ आ सादयति सं नह्यत्येवैनमेतया स्थेन्ने गर्दभेन सम्भरति  
 तस्माद्गर्दभः पशूनाम्भारभारितमो गर्दभेन सम्भरति  
 तस्माद्गर्दभोऽप्यनालेशेऽत्यन्यान्पशून्मैद्यत्यन्नं ह्यैनेनार्कं सम्भरन्ति  
 गर्दभेन सम्भरति तस्माद्गर्दभो द्विरेताः सन्कनिष्ठम्पशूनाम्प्र जायतेऽग्निर्ह्यस्य  
 योनिं निर्दहति प्रजासु वा एष एतर्ह्यारूढः स ईश्वरः प्रजाः शुचा प्रदहः  
 शिवो भव प्रजाभ्य इत्याह प्रजाभ्य एवैनं शमयति मानुषीभ्यस्त्वमङ्गिर  
 इत्याह मानव्यो हि प्रजा मा द्यावापृथिवी अभि शूशुचो मान्तरिक्षम्मा  
 वनस्पतीनित्याहैभ्य एवैनं लोकेभ्यः शमयति प्रैतु वाजी कनिक्रददित्याह  
 वाजी ह्येष नानद्द्रासभः पत्वेत्याह रासभ इति  
 ह्यैतमृषयोऽवदन्भरन्त्रग्निम्पुरीष्यमित्याहाग्निं ह्येष भरति मा पाद्यायुषः  
 पुरेत्याहार्युरेवास्मिन्दधाति तस्माद्गर्दभः सर्वमार्युरेति तस्माद्गर्दभे पुरायुषः  
 प्रमीते बिभ्यति वृषाग्निं वृषणम्भरन्नित्याह वृषा ह्येष वृषाग्नि र्पां गर्भं  
 समुद्रियमित्याहापां ह्येष गर्भो यदग्नि रग्ना आ याहि वीतय इति वा  
 इमौ लोकौ व्यैतामग्ना आ याहि वीतय इति यदाहानयोर्लोकयोर्वीत्यै  
 प्रच्युतो वा एष आयतनादगतः प्रतिष्ठां स एतर्ह्यध्वर्यु च यजमानं च  
 ध्यायत्यृतं सत्यमित्याहेयं वा ऋतमसौ सत्यमनयोरेवैनम्प्रति ष्ठापयति

नार्तिमाच्छत्यध्वर्युर्न यजमानो वरुणो वा एष यजमानमभ्यैति  
यदग्निरुपनद्ध ओषधयः प्रति गृहीताग्निमेतमित्याह शान्त्यै व्यस्यन्विश्वा  
अमतीररातीरित्याह रक्षसामप हत्यै निषीदन्नो अप दुर्मतिः हनदित्याह  
प्रतिष्ठित्या ओषधयः प्रति मोदध्वमेनमित्याहौषधयो वा अग्नेर्भागधेयं  
ताभिरेवैनः समर्धयति पुष्पावतीः सुपिप्पला इत्याह तस्मादोषधयः फलं  
गृह्णन्त्यं वो गर्भं ऋत्वियः प्रत्तः सधस्थमासददित्याह याभ्यं  
एवैनमप्रच्यावयति तास्वेवैनमप्रति ष्ठापयति द्वाभ्यामुपावहरति प्रतिष्ठित्यै  
॥५॥

वारुणो वा अग्निरुपनद्धो वि पाजसेति वि स्रंसयति सवितृप्रसूत  
एवास्य विषूचीं वरुणमेनिं वि सृजत्यप उप सृजत्यापो वै शान्ताः  
शान्ताभिरेवास्य शुचं शमयति तिसृभिरुप सृजति त्रिवृद्वा  
अग्निर्यावानेवाग्निस्तस्य शुचं शमयति मित्रः ससृज्य पृथिवीमित्याह  
मित्रो वै शिवो देवानां तेनैवैनः ससृजति शान्त्यै  
यद्ग्राम्याणाम्पात्राणां कपालैः ससृजेद्ग्राम्याणि पात्राणि  
शुचार्पयेदर्मकपालैः ससृजत्येतानि वा अनुपजीवनीयानि तान्येव  
शुचार्पयति शर्कराभिः ससृजति धृत्या अथो शन्त्वाया जलोमैः स  
सृजत्येषा वा अग्नेः प्रिया तनूर्यदजा प्रिययैवैनं तनुवा ससृजत्यथो  
तेजसा कृष्णाजिनस्य लोमभिः ससृजति यज्ञो वै कृष्णाजिनं यज्ञेनैव  
यज्ञः ससृजति रुद्राः सम्भृत्य पृथिवीमित्याहैता वा एतं देवता अग्ने  
समभरन्ताभिरेवैनः सम्भरति मुखस्य शिरोऽसीत्याह यज्ञो वै  
मुखस्तस्यैतच्छिरो यदुखा तस्मादेवमाह यज्ञस्य पदे स्थ इत्याह यज्ञस्य  
ह्येते पदे अथो प्रतिष्ठित्यै प्रान्याभिर्यच्छत्यन्वन्यैर्मन्त्रयते मिथुनत्वाय

त्र्युद्धं करोति त्रयं इमे लोका एषां लोकानामाप्तये छन्दोभिः करोति वीर्यं  
 वै छन्दांसि वीर्यैश्वैनां करोति यजुषा बिलं करोति व्यावृत्त्या इयतीं  
 करोति प्रजापतिना यज्ञमुखेन सम्मितां द्विस्तनां करोति  
 द्यावापृथिव्योर्दोहाय चतुःस्तनां करोति पशूनां दोहायाष्टास्तनां करोति  
 छन्दसां दोहाय नवाश्रिमभिचरतः कुर्यात्त्रिवृतमेव वज्रं सम्भृत्य  
 भ्रातृव्याय प्र हरति स्तृत्यै कृत्वाय सा महीमुखामिति नि दधाति  
 देवतास्वेवैनाम्प्रति ष्ठापयति ॥६॥

सप्तभिर्धूपयति सप्त वै शीर्षण्याः प्राणाः शिरं एतद्यज्ञस्य यदुखा  
 शीर्षन्नेव यज्ञस्य प्राणान्दधाति तस्मात्सप्त शीर्षन्प्राणा अश्वशकेन धूपयति  
 प्राजापत्यो वा अश्वः सयोनित्वाया दितिस्त्वेत्याहेयं वा  
 अदितिरदित्यैवादित्यां खनत्यस्या अक्रूरङ्गाराय न हि स्वः स्वं हिनस्ति  
 देवानां त्वा पत्नीरित्याह देवानां वा एताम्पत्नयोऽग्रैऽकुर्वन्ताभिरेवैनां  
 दधाति धिषणास्त्वेत्याह विद्या वै धिषणा विद्याभिरेवैनामभीन्द्रे  
 ग्रास्त्वेत्याह छन्दांसि वै ग्राश्छन्दोभिरेवैनांसि श्रपयति  
 वरूत्रयस्त्वेत्याह होत्रा वै वरूत्रयो होत्राभिरेवैनाम्पचति जनयस्त्वेत्याह  
 देवानां वै पत्नी जर्नयस्ताभिरेवैनाम्पचति षड्भिः पंचति षड्वा ऋतव  
 ऋतुभिरेवैनाम्पचति द्विः पचन्त्वित्याह तस्माद्द्विः संवत्सरस्य  
 सस्यम्पच्यते वारुण्युखाभीद्धा मैत्रियोपैति शान्त्यै देवस्त्वा  
 सवितोर्द्वपत्वित्याह सवितृप्रसूत एवैनाम्ब्रह्मणा  
 देवताभिरुर्द्वपत्य पद्यमाना पृथिव्याशा दिश आ पृशेत्याह तस्माद्दिग्भिः  
 सर्वा दिशोऽनु वि भ्रात्युत्तिष्ठ बृहती भवोर्ध्वा तिष्ठ ध्रुवा त्वमित्याह  
 प्रतिष्ठित्या असुर्यम्पात्रमनाच्छृणुमा च्छृणुति देवत्राक रजक्षीरेणा

च्छृणत्ति परमं वा एतत्पयो यदजक्षीरं  
परमेणैवैनाम्पयसाच्छृणत्ति यजुषा व्यावृत्त्यै छन्दोभिरा च्छृणत्ति  
छन्दोभिर्वा एषा क्रियते छन्दोभिरेव च्छन्दाँस्या च्छृणत्ति ॥७॥

एकविँशत्या माषैः पुरुषशीर्षमच्छैत्यमेध्या वै माषा  
अमेध्यम्पुरुषशीर्षममेध्यैरेवास्यामेध्यं निरवदाय मेध्यं  
कृत्वाहरत्ये कविँशतिर्भवन्त्येकविँशो वै पुरुषः पुरुषस्याप्त्यै व्यद्धं  
वा एतत्प्राणैरमेध्यं यत्पुरुषशीर्षं सप्तधा वितृण्णां वल्मीकवपाम्प्रति नि  
दधाति सप्त वै शीर्षण्याः प्राणाः प्राणैरेवैत्समर्धयति मेध्यत्वाय यावन्तो  
वै मृत्युबन्धवस्तेषां यम आधिपत्यम्परीयाय यमगाथाभिः परि गायति  
यमादेवैनद्वृङ्गे तिसृभिः परि गायति त्रय इमे लोका एभ्य एवैनल्लोकेभ्यो  
वृङ्गे तस्माद्गायते न देयं गाथा हि तद्वृङ्गेऽग्निभ्यः पशूना लभते कामा वा  
अग्रयः कामानेवाव रुन्दे

यत्पशूनालभेतानवरुद्धा अस्य पशवः स्युर्यत्पर्यग्निकृतानुत्सृजेद्यज्ञवेशसं  
कुर्याद्यत्सँस्थापयेद्यातयामानि शीर्षाणि स्युर्यत्पशूनालभते तेनैव  
पशूनाव रुन्दे यत्पर्यग्निकृतानुत्सृजति शीर्षामयातयामत्वाय प्राजापत्येन  
सँस्थापयति यज्ञो वै प्रजापतिर्यज्ञ एव यज्ञम्प्रति ष्ठापयति प्रजापतिः  
प्रजा असृजत् स रिरिचानौऽमन्यत्

स एता आप्रीरपश्यत्ताभिर्वै स मुख्त आत्मानमाप्रीणीत् यदेता आप्रियो  
भवन्ति यज्ञो वै प्रजापतिर्यज्ञमेवैताभिर्मुख्त आ  
प्रीणात्य परिमितच्छन्दसो भवन्त्यपरिमितः प्रजापतिः प्रजापतेराप्त्या  
ऊनातिरिक्ता मिथुनाः प्रजात्यै लोमशं वै नामैतच्छन्दः प्रजापतेः पशवो  
लोमशाः पशूनेवाव रुन्दे सर्वाणि वा एता रूपाणि सर्वाणि रूपाण्यग्नौ

चित्ये क्रियन्ते तस्माद्देता अग्नेश्चित्यस्य भवन्त्ये कविँशतिँ  
 सामिधेनीरन्वाह रुग्वा एकविँशो रुचमेव गच्छत्यथौ प्रतिष्ठामेव  
 प्रतिष्ठा ह्येकविँशश्चतुर्विँशतिमन्वाह चतुर्विँशतिरर्धमासाः  
 संवत्सरः संवत्सरोऽग्निर्वैश्वानरः साक्षादेव वैश्वानरमव रुद्धे पराचीरन्वाह  
 पराडिव हि सुवर्गो लोकः समास्त्वाम् ऋतवो वर्धयन्त्वित्याह  
 समाभिरेवाग्निं वर्धयत्यृतुभिः संवत्सरं विश्वा आ भाहि प्रदिशः पृथिव्या  
 इत्याह तस्माद्ग्निः सर्वा दिशोऽनु वि भाति प्रत्यौहतामश्विना  
 मृत्युमस्मादित्याह मृत्युमेवास्मादप नुदत्यु द्वयं तमसुस्परीत्याह पाप्मा वै  
 तमः पाप्मानमेवास्मादप हन्त्य गन्म ज्योतिरुत्तममित्याहासौ वा  
 आदित्यो ज्योतिरुत्तममादित्यस्यैव सायुज्यं गच्छति न संवत्सरस्तिष्ठति  
 नास्य श्रीस्तिष्ठति यस्यैताः क्रियन्ते ज्योतिष्मतीमुत्तमामन्वाह  
 ज्योतिरेवास्मा उपरिष्ठाद्घाति सुवर्गस्य लोकस्यानुख्यात्यै ॥८॥

षड्भिर्दीक्षयति षड्वा ऋतव ऋतुभिरेवैनं दीक्षयति सप्तभिर्दीक्षयति सप्त  
 च्छन्दाँसि च्छन्दोभिरेवैनं दीक्षयति विश्वे देवस्य नेतुरित्यनुष्टुभौत्तमया  
 जुहोति वाग्वा अनुष्टुप्समात्प्राणानां  
 वागुत्तमै कस्माद्क्षरादनाप्तमप्रथमम्पदं तस्माद्यद्वाचोऽनाप्तं तन्मनुष्या उप  
 जीवन्ति पूर्णया जुहोति पूर्ण इव हि प्रजापतिः प्रजापतेरापत्यै न्यूनया  
 जुहोति न्यूनाद्धि प्रजापतिः प्रजा असृजत प्रजानाँ सृष्ट्यै  
 यदर्चिषि प्रवृञ्ज्याद्भूतमव रुन्धीत यदङ्गरेषु भविष्यदङ्गरेषु प्र वृणक्ति  
 भविष्यदेवाव रुद्धे भविष्यद्धि भूयो भूताद्वाभ्याम्प्र वृणक्ति  
 द्विपाद्यजमानः प्रतिष्ठित्यै ब्रह्मणा वा एषा यजुषा सम्भृता यदुखा सा  
 यद्धिद्येतातिमार्च्छेद्यजमानो हन्येतास्य यज्ञो मित्रैतामुखां तपेत्याह ब्रह्म वै

मित्रो ब्रह्मन्नेवैनाम्प्रति ष्ठापयति नार्तिमाच्छति यजमानो नास्य यज्ञो हन्यते  
यदि भिद्येत तैरेव कपालैः सँसृजेत्सैव ततः प्रायश्चित्तिर्यो गतश्रीः  
स्यान्मथित्वा तस्याव दध्याद्भूतो वा एष स स्वां देवतामुपैति यो  
भूतिकामः स्याद्य उखायै सम्भवेत्स एव तस्य स्यादतो ह्येष सम्भवत्येष  
वै स्वयम्भूर्नाम् भवत्येव यं कामयैतु भ्रातृव्यमस्मै  
जनयेयमित्यन्यतस्तस्याहत्याव दध्यात्साक्षादेवास्मै भ्रातृव्यं  
जनयत्यम्बरीषादन्नकामस्याव दध्यादम्बरीषे वा अन्नम्भियते  
सयोन्येवान्नमव रुद्धे मुञ्जानव दधात्यूर्वा उर्जमेवास्मा अपि  
दधात्यग्निर्देवेभ्यो निलायत स क्रुमुकम्प्राविशक्रुमुकमव दधाति  
यदेवास्य तत्र न्यक्तं तदेवाव रुद्ध आज्येन सं यौत्येतद्वा अग्नेः प्रियं धाम  
यदाज्यं प्रियेणैवैनं धाम्ना समर्धयत्यथो तेजसा वैकङ्कतीमा दधाति भा  
एवाव रुद्धे शमीमयीमा दधाति शान्त्यै सीद त्वम्मातुरस्या उपस्थ इति  
तिसृभिर्जातमुप तिष्ठते त्रय इमे लोका एष्वेव लोकेष्वविदं गच्छत्यथो  
प्राणानेवात्मन्धत्ते ॥६॥

न हं स्म वै पुराग्निरपरशुवृक्णां दहति तदस्मै प्रयोग एवर्षिरस्वदयद्यदग्ने  
यानि कानि चेति समिधमा दधात्यपरशुवृक्णामेवास्मै स्वदयति सर्वमस्मै  
स्वदते य एवं वेदो दुम्बरीमा दधात्यूर्वा उदुम्बर उर्जमेवास्मा अपि  
दधाति प्रजापतिरग्निर्मसृजत तँ सृष्टँ रक्षाँस्यजिघाँसन्त्स  
एतद्राक्षोघ्नमपश्यत्तेन वै स रक्षाँस्यपाहत यद्राक्षोघ्नम्भवत्यग्नेरेव तेन  
जाताद्रक्षाँस्यप हन्त्याश्वत्थीमा दधात्यश्वत्थो वै वनस्पतीनाँ  
सपत्नसाहो विजित्यै वैकङ्कतीमा दधाति भा एवाव रुद्धे शमीमयीमा  
दधाति शान्त्यै सँशितम्मे ब्रह्मोदेषाम्बाहू अतिरमित्युत्तमे औदुम्बरी

वाचयति ब्रह्मणैव क्षत्रं सं श्यति क्षत्रेण ब्रह्म तस्माद्ब्राह्मणो  
 राजन्यवानत्यन्यम्ब्राह्मणं तस्माद्राजन्यो ब्राह्मणवानत्यन्यं राजन्यं  
 मृत्युर्वा एष यदग्निरमृतं हिरण्यं रुक्ममन्तरम्प्रति मुञ्चतेऽमृतमेव  
 मृत्योरन्तर्धत्त एकविंशतिनिर्बाधो भवत्येकविंशतिर्वै देवल्लोका  
 द्वादश मासाः पञ्चवस्त्रय इमे लोका असावादित्य एकविंश एतावन्तो  
 वै देवल्लोकास्तेभ्य एव भ्रातृव्यमन्तरेति निर्बाधैर्वै देवा  
 असुरान्निर्बाधैऽकुर्वन्त तन्निर्बाधानां निर्बाधत्वं निर्बाधी भवति  
 भ्रातृव्यानेव निर्बाधे कुरुते सावित्रिया प्रति मुञ्चते प्रसूत्यै  
 नक्तोषासेत्युत्तरयाहोरात्राभ्यामेवैनमुद्यच्छते देवा अग्निं धारयन्द्रविणोदा  
 इत्याह प्राणा वै देवा द्रविणोदा अहोरात्राभ्यामेवैनमुद्यत्य  
 प्राणैर्दाधारा सीनः प्रति मुञ्चते तस्मादासीनाः प्रजाः प्र जायन्ते  
 कृष्णाजिनमुत्तरं तेजो वै हिरण्यम्ब्रह्म कृष्णाजिनं तेजसा चैवैनम्ब्रह्मणा  
 चोभयतः परि गृह्णाति षडुद्यामं शिष्यं भवति षड्वा ऋतव  
 ऋतुभिरेवैनमुद्यच्छते यद्द्वादशोद्यामं संवत्सरेणैव मौञ्जम्भवत्यूर्ग्वै मुञ्जा  
 ऊर्जैर्वैनं समर्धयति सुपर्णोऽसि गरुत्मानित्यवैक्षते  
 रूपमेवास्थैतन्महिमानं व्याचष्टे दिवं गच्छ सुवः पतेत्याह सुवर्गमेवैनं  
 लोकं गमयति ॥१०॥

समिद्धो अञ्जन्कृदरम्मतीनां घृतमग्ने मधुमत्पिन्वमानः । वाजी  
 वहन्वाजिनं जातवेदो देवानां वक्षि प्रियमा सधस्थम् ॥  
 घृतेनाञ्जन्सम्पथो देवयानान्प्रजानन्वाज्यप्येतु देवान् । अनु त्वा सप्ते  
 प्रदिशः सचन्तां स्वधामस्मै यजमानाय धेहि ॥  
 ईड्यश्वासि वन्द्यश्च वाजिन्नाशुश्वासि मेध्यश्च सप्ते । अग्निष्वा देवैर्वसुभिः

स॒जोषाः प्री॑तं वहिँ॑ वहतु जा॒तवे॑दाः ॥  
 स्ती॒र्णा ब॒र्हिः सु॒ष्टरी॑मा जुषा॒णोरु॑ पृथु प्रथ॑मानम्पृथि॒व्याम् ।  
 दे॒वेभि॑र्यु॒क्तम॑दि॒तिः स॒जोषाः स्यो॑नं कृ॒शवा॒ना सु॑वि॒ते द॑धातु ॥  
 ए॒ता उ॑ वः सु॒भगा॑ वि॒श्वरू॑पा वि प॒क्षौभिः॑ श्रय॑माणा उ॒दातैः॑ । ऋ॒ष्वाः  
 स॒तीः क॒वषः॑ शु॒भमा॒ना द्वा॒रौ दे॒वीः सु॑प्रा॒यणा॑ भवन्तु ॥  
 अ॒न्तरा॑ मि॒त्रावरु॑णा चर॑न्ती॒ मुखं॑ य॒ज्ञाना॑म॒भि सं॑वि॒दाने॑ । उ॒षासा॑ वाꣳ  
 सु॒हिर॑गये सु॒शिल्पे॑ ऋ॒तस्य॑ योना॒विह॑ सा॒दयामि॑ ॥  
 प्र॒थ॒मा वाꣳ सर॑थि॒ना सु॒वर्णा॑ दे॒वौ प॑श्यन्तौ भुव॑नानि॒ विश्वा॑ । अपि॑प्रयं  
 चो॒द॑ना वा॒म्मिमा॑ना॒ होता॑रा॒ ज्योतिः॑ प्र॒दिशा॑ दि॒शन्ता॑ ॥  
 आ॒दि॒त्यैर्नो॑ भार॑ती वष्टु॒ यज्ञꣳ सर॑स्वती स॒ह रु॒द्रैर्न॑ आ॒वीत् । इ॒डोप॑हृता  
 वसु॑भिः स॒जोषा॑ य॒ज्ञं नो॑ दे॒वीर॑मृ॒तैषु॑ धत्त ॥  
 त्वष्टा॑ वी॒रं दे॒वका॑मं ज॒जान् त्वष्टु॑रवा॒ जायत॑ आ॒शुर॑श्वः त्वष्टे॑दं वि॒श्वम्भु॑वनं  
 ज॒जान॑ ब॒होः क॒र्तारि॑मि॒ह य॑च्चि होतः ॥  
 अ॒श्वौ घृ॒तेन॑ त्म॒न्या॒ सम॑क्त॒ उप॑ दे॒वाꣳ ऋ॑तु॒शः पा॑थ एतु ।  
 वन॑स्पति॒र्दे॒वलोक॑म्प्र॒जान॑न्न॒ग्निना॑ ह॒व्या स्व॑दि॒तानि॑ व॒क्षत् ॥  
 प्र॒जाप॑ते॒स्तप॑सा वावृ॒धानः॑ स॒द्यो जा॒तो द॑धिषे॒ यज्ञ॑म॒ग्ने । स्वा॒हाकृ॑तेन  
 ह॒विषा॑ पु॒रोगा॑ या॒हि सा॒ध्या ह॒विर॑दन्तु दे॒वाः ॥११॥

इति पञ्चमकारण्डे प्रथमः प्रपाठकः १

अथ पञ्चमकारण्डे द्वितीयः प्रपाठकः २

विष्णु॑मुखा॒ वै

दे॒वाश्छ॑न्दो॒भिरि॑माँल्लो॒कान॑नप॒ज्य्यम॑भ्य॒जय॑न्त्यद्वि॒ष्णुक्र॑मान्कर्म॒ते वि॑ष्णुरिव  
 भू॒त्वा य॑ज॒मान॑श्छ॒न्दो॒भिरि॑माँल्लो॒कान॑नप॒ज्य्यम॑भि॒ जय॑ति॒ विष्णोः॑



क्रमोऽस्यभिमातिहेत्याह गायत्री वै पृथिवी त्रैष्टुभमन्तरिक्षं जागती  
 द्यौरानुष्टुभीर्दिशश्छन्दोभिरेवेमाँल्लोकान्यथापूर्वमभि जयति  
 प्रजापतिरग्निमसृजत् सौऽस्मात्सृष्टः पराङ्गैत्तमेतयान्वैदक्रन्ददिति तथा वै  
 सौऽग्नेः प्रियं धामावारुद्ध  
 यदेतामन्वाहाग्नेरेवैतया प्रियं धामाव रुद्ध ईश्वरो वा एष पराङ्प्रदधो यो  
 विष्णुक्रमान्क्रमते चतसृभिरा वर्तते चत्वारि च्छन्दाँसि  
 च्छन्दाँसि खलु वा अग्नेः प्रिया तनूः प्रियामेवास्य तनुवमभि पर्यावर्तते  
 दक्षिणा पर्यावर्तते स्वमेव वीर्यमनु पर्यावर्तते तस्माद्दक्षिणोऽर्ध आत्मनो  
 वीर्यावत्तरोऽथो आदित्यस्यैवावृतमनु पर्यावर्तते शुनःशेषमाजीगर्ति  
 वरुणोऽगृह्णात्स एताम्वारुणीमपश्यत्तया वै स आत्मानं  
 वरुणपाशादमुञ्चद्वरुणो वा एतं गृह्णाति य उखाम्प्रतिमुञ्चत् उदुत्तमं  
 वरुणपाशमस्मदित्याहात्मानमेवैतया वरुणपाशान्मुञ्चत्या  
 त्वाहार्षमित्याहाह्यैनुँ हरेति ध्रुवस्तिष्ठाविचाचलिरित्याह प्रतिष्ठित्यै  
 विशस्त्वा सर्वा वाञ्छन्त्वित्याह विशैवैनुँ समर्धयत्यस्मिन्नाष्ट्रमधि  
 श्रयेत्याह राष्ट्रमेवास्मिन्ध्रुवमकुर्यं कामयेत राष्ट्रँ स्यादिति तम्मनसा  
 ध्यायेद्राष्ट्रमेव भवत्यग्रे बृहन्नुषसामूर्ध्वो अस्थादित्याहाग्रमेवैनुँ  
 समानानां करोति निर्जग्मिवान्तमस इत्याह तम एवास्मादप हन्ति  
 ज्योतिषागादित्याह ज्योतिरेवास्मिन्दधाति चतसृभिः सादयति चत्वारि  
 च्छन्दाँसि च्छन्दोभिरेवा तिच्छन्दसोत्तमया वर्ष्म वा एष च्छन्दसां  
 यदतिच्छन्दा वर्ष्मैवैनुँ समानानां करोति सद्गती भवति सत्त्वमेवैनुँ  
 गमयति वात्सप्रेणोप तिष्ठत एतेनु वै वत्सप्रीर्भालन्दनोऽग्नेः प्रियं  
 धामावारुद्धाग्नेरेवैतेन प्रियं धामाव रुद्ध एकादशम्भवत्येकधैव यजमाने  
 वीर्यं दधाति स्तोमेनु वै देवा अस्मिँल्लोक

आर्ध्वञ्छन्दोभिर्मुष्मिन्स्तोमस्येव खलु वा एतद्रूपं यद्वात्सप्रं  
यद्वात्सप्रेणोपतिष्ठत इममेव तेन लोकमभि जयति  
यद्विष्णुक्रमान्क्रमतेऽमुमेव तैर्लोकमभि जयति पूर्वेद्युः प्र क्रामत्युत्तरेद्युरूपं  
तिष्ठते तस्माद्योगेऽन्यासाम्प्रजानाम्मनः क्षेमेऽन्यासां तस्माद्यायावरः  
क्षेम्यस्यैशे तस्माद्यायावरः क्षेम्यमध्यवस्यति मुष्टी करोति वाचं यच्छति  
यज्ञस्य धृत्यै ॥१॥

अन्नपतेऽन्नस्य नो देहीत्याहाग्निर्वा अन्नपतिःस एवास्मा  
अन्नप्रयच्छत्य नमीवस्य शुष्मिण इत्याहायद्धमस्येति वावैतदाह प्र  
प्रदातारं तारिष ऊर्जं नो धेहि द्विपदे चतुष्पद इत्याहाशिषमेवैतामा शास्त  
उदु त्वा विश्वे देवा इत्याह प्राणा वै विश्वे देवाः प्राणैरेवैनमुद्यच्छतेऽग्ने  
भरन्तु चित्तिभिरित्याह यस्मा एवैनं चित्तायोद्यच्छते तेनैवैनं समर्धयति  
चतसृभिरा सादयति चत्वारि च्छन्दांसि च्छन्दोभिरेवातिच्छन्दसोत्तमया  
वर्ष्म वा एषा छन्दसां यदतिच्छन्दा वर्ष्मैवैनं समानानां करोति सद्वती  
भवति सत्त्वमेवैनं गमयति प्रेदग्ने ज्योतिष्मान्याहीत्याह  
ज्योतिरेवास्मिन्दधाति तनुवा वा एष हिनस्ति यं हिनस्ति मा  
हिंसीस्तनुवा प्रजा इत्याह प्रजाभ्य एवैनं शमयति रक्षांसि वा  
एतद्यज्ञं सचन्ते यदनं उत्सर्जत्यक्रन्ददित्यन्वाह रक्षसामपहत्या अनसा  
वहन्त्यपचितिमेवास्मिन्दधाति तस्मादनस्वी च रथी  
चातिथीनामपचिततमौ अपचितिमान्भवति य एवं वेद समिधाग्निं  
दुवस्यतेति घृतानुषिक्तामवसिते समिधमा दधाति यथातिथय आगताय  
सर्पिष्वदातिथ्यं क्रियते तादृगेव तद्गायत्रिया ब्राह्मणस्य गायत्रो हि  
ब्राह्मणस्त्रिष्टुभा राजन्यस्य त्रैष्टुभो हि राजन्योऽप्सु भस्म प्र

वैशयत्यप्सु योनिर्वा अग्निः स्वामेवैनं योनिं गमयति तिसृभिः प्र वैशयति  
 त्रिवृद्वा अग्निर्यावानेवाग्निस्तम्प्रतिष्ठानं गमयति परा वा एषोऽग्निं वपति  
 योऽप्सु भस्मं प्रवेशयति ज्योतिष्मतीभ्यामव दधाति  
 ज्योतिरेवास्मिन्दधाति द्वाभ्याम्प्रतिष्ठित्यै परा वा एष प्रजाम्पशून्वपति  
 योऽप्सु भस्मं प्रवेशयति पुनरूर्जा सह रय्येति पुनरुदैति प्रजामेव  
 पशूनात्मन्धत्ते पुनस्त्वादित्या रुद्रा वसवः समिन्धतामित्याहैता वा एतं  
 देवता अग्रे समैन्धत ताभिरैवैनं स समिन्द्रे बोधा स बोधीत्युप तिष्ठते  
 बोधयत्येवैनं तस्मात्सुप्त्वा प्रजाः प्र बुध्यन्ते यथास्थानमुप तिष्ठते  
 तस्माद्यथास्थानम्पशवः पुनरेत्योप तिष्ठन्ते ॥२॥

यावती वै पृथिवी तस्यै यम आधिपत्यम्परीयाय यो वै यमं  
 देवयजनमस्या अनिर्याच्याग्निं चिनुते यमायैनं स  
 चिनुतेऽपेतेत्यध्यवसाययति यममेव देवयजनमस्यै निर्याच्यात्मनेऽग्निं  
 चिनुत इष्वग्रेण वा अस्य अनामृतमिच्छन्तो नाविन्दन्ते देवा  
 एतद्यजुरपश्यन्नपेतेति यदेतेनाध्यवसाययत्यनामृत एवाग्निं चिनुत उद्धन्ति  
 यदेवास्या अमेध्यं तदप हन्त्य पोऽवोक्षति शान्त्यै सिकता नि वपत्येतद्वा  
 अग्रेवैश्वानरस्य रूपं रूपेणैव वैश्वानरमव रुद्ध ऊषान्नि वपति पुष्टिर्वा  
 एषा प्रजननं यदूषाः पुष्ट्यामेव प्रजननेऽग्निं चिनुतेऽथो संज्ञानं यव  
 संज्ञानं ह्येतत्पशूनां यदूषा द्यावापृथिवी सहास्तां ते वियती  
 अब्रूतामस्त्वेव नौ सह यज्ञियमिति यदमुष्या यज्ञियमासीत्तदस्यामदधात्त  
 ऊषा अभवन्त्यदस्या यज्ञियमासीत्तदमुष्यामदधात्तददश्चन्द्रमसि  
 कृष्णामूषान्निवपन्नदो ध्यायेद्द्यावापृथिव्योरेव यज्ञियेऽग्निं चिनुतेऽयं सो  
 अग्निरिति विश्वा मित्रस्य सूक्तम्भवत्येतेन वै विश्वामित्रोऽग्रेः प्रियं

धामावारुन्द्वाग्नेर्वैतेन प्रियं धामाव रुन्द्रे छन्दोभिर्वै देवाः सुवर्गं  
लोकमायञ्चतस्रः प्राचीरुप दधाति चत्वारि च्छन्दाँसि च्छन्दोभिरेव  
तद्यजमानः सुवर्गं लोकमैति तेषाँ सुवर्गं लोकं यतां दिशः समव्लीयन्त  
ते द्वे पुरस्तात्समीची उपादधत् द्वे पश्चात्समीची ताभिर्वै ते  
दिशोऽदृँहन्यद्वे पुरस्तात्समीची उपदधाति द्वे पश्चात्समीची दिशां  
विधृत्या

अथो पशवो वै छन्दाँसि पशूनेवास्मै समीचौ दधात्यष्टावुप  
दधात्यष्टाक्षरा गायत्री गायत्रोऽग्निर्यावानेवाग्निस्तं चिनुतेऽष्टावुप  
दधात्यष्टाक्षरा गायत्री सुवर्गं लोकमञ्जसा वेद सुवर्गस्य लोकस्य प्रज्ञात्यै  
त्रयोदश लोकम्पृणा उप दधात्येकविँशतिः सम्पद्यन्ते  
प्रतिष्ठा वा एकविँशः प्रतिष्ठा गार्हपत्य एकविँशस्यैव प्रतिष्ठां  
गार्हपत्यमनु प्रति तिष्ठति प्रत्यग्निं चिक्यानस्तिष्ठति य एवं वेद  
पञ्चचितीकं चिन्वीत प्रथमं चिन्वानः पाङ्गौ यज्ञः पाङ्गाः पशवो यज्ञमेव  
पशूनव रुन्द्रे त्रिचितीकं चिन्वीत द्वितीयं चिन्वानस्त्रय इमे लोका एष्वैव  
लोकेषु प्रति तिष्ठन्त्ये कचितीकं चिन्वीत तृतीयं चिन्वान एकधा वै  
सुवर्गो लोक एकवृत्तैव सुवर्गं लोकमैति पुरीषेणाभ्यूहति  
तस्मान्माँसेनास्थि च्छन्नं न दुश्चर्मा भवति य एवं वेद पञ्च चितयो  
भवन्ति पञ्चभिः पुरीषैरभ्यूहति दश सम्पद्यन्ते दशाक्षरा विराडन्नं  
विराड्विराज्येवान्नाद्ये प्रति तिष्ठति ॥३॥

वि वा एतौ द्विषाते यश्च पुराग्निर्यश्चोखायाँ समितमिति चतसृभिः सं नि  
वपति चत्वारि च्छन्दाँसि च्छन्दाँसि खलु वा अग्नेः प्रिया तनूः  
प्रिययैवैनौ तनुवा सँ शास्ति समितमित्याह तस्माद्ब्रह्मणा क्षत्रँ

समैति यत्सं न्युष्यं वि हरति तस्माद्ब्रह्मणा क्षत्रं व्येत्यु तुभिर्वा एतं  
दीक्षयन्ति स ऋतुभिरेव विमुच्यो मातेव पुत्रम्पृथिवी  
पुरीष्यमित्याहर्तुभिरेवैनं दीक्षयित्वर्तुभिर्वि मुञ्चति वैश्वानर्या शिष्यमा दत्ते  
स्वदयत्येवैनं नैर्ऋतीः कृष्णास्तिस्त्रस्तुषपक्वा भवन्ति निर्ऋत्यै वा  
एतद्भागधेयं यत्तुषा निर्ऋत्यै रूपं कृष्णं रूपेणैव निर्ऋतिं निरवदयत  
इमां दिशं यन्त्येषा वै निर्ऋत्यै दिक्स्वायामेव दिशि निर्ऋतिं निरवदयते  
स्वकृत इरिण उप दधाति प्रदरे वैतद्वै निर्ऋत्या आयतनं स्व एवायतने  
निर्ऋतिं निरवदयते शिष्यमभ्युप दधाति नैर्ऋतो वै पाशः साक्षादेवैनं  
निर्ऋतिपाशान्मुञ्चति तिस्र उप दधाति त्रेधाविहितो वै पुरुषो यावानेव  
पुरुषस्तस्मान्निर्ऋतिमव यजते पराचीरुप दधाति पराचीमेवास्मान्निर्ऋतिम्प्र  
णुदतेऽप्रतीक्षमा यन्ति निर्ऋत्या अन्तर्हित्यै मार्जयित्वोप तिष्ठन्ते  
मेध्यत्वाय गार्हपत्यमुप तिष्ठन्ते निर्ऋतिलोक एव चरित्वा पूता  
दैवलोकमुपावर्तन्त एकयोप तिष्ठन्त एकधैव यजमाने वीर्यं दधति  
निवेशनः सङ्गमनो वसूनामित्याह प्रजा वै पशवो वसु प्रजयैवैनम्पशुभिः  
समर्धयन्ति ॥४॥

पुरुषमात्रेण वि मिमीते यज्ञेन वै पुरुषः सम्मितो यज्ञपुरुषैवैनं वि मिमीते  
यावान्पुरुष ऊर्ध्वबाहुस्तावाभवत्येतावद्वै पुरुषे वीर्यं  
वीर्येणैवैनं वि मिमीते पक्षी भवति न ह्यपक्षः पतितुमर्हत्य रत्विना पक्षौ  
द्राघीयांसौ भवतस्तस्मात्पक्षप्रवयांसि वयांसि  
व्याममात्रौ पक्षौ च पुच्छं च भवत्येतावद्वै पुरुषे वीर्यं वीर्यसम्मितो वेणुना  
वि मिमीत आग्नेयो वै वेणुः सयोनित्वाय यजुषा युनक्ति यजुषा कृषति  
व्यावृत्यै षड्गवेन कृषति षड्वा ऋतव ऋतुभिरेवैनं कृषति

यद्द्वादशगुवेन संवत्सरेणैवे यं वा  
 अग्नेरतिदाहादबिभेत्सैतद्विगुणमपश्यत्कृष्टं चाकृष्टं च ततो वा इमां  
 नात्यदहद्यत्कृष्टं चाकृष्टं च भवत्यस्या अनतिदाहाय द्विगुणं त्वा  
 अग्निमुद्यन्तुमर्हतीत्याहुर्यत्कृष्टं चाकृष्टं च भवत्यग्नेरुद्यत्या एतावन्तो वै  
 पशवो द्विपादश्च चतुष्पादश्च तान्यत्प्राच उत्सृजेद्द्रुद्रायापि दध्याद्यद्दक्षिणा  
 पितृभ्यो नि धुवेद्यत्प्रतीचो रक्षांसि हन्युरुदीच उत्सृजत्येषा वै  
 देवमनुष्याणां शान्ता दिक्तामेवैनाननूत्सृजत्यथो खल्विमां  
 दिशमुत्सृजत्यसौ वा आदित्यः प्राणः प्राणमेवैनाननूत्सृजति दक्षिणा  
 पर्यावर्तन्ते स्वमेव वीर्यमनु पर्यावर्तन्ते तस्माद्दक्षिणोऽर्ध आत्मनो  
 वीर्यावत्तरोऽथो आदित्यस्यैवावृतमनु पर्यावर्तन्ते तस्मात्पराञ्चः पशवो वि  
 तिष्ठन्ते प्रत्यञ्च आ वर्तन्ते तिस्रस्तिस्त्रः सीताः कृषति त्रिवृतमेव यज्ञमुखे  
 वि यातयत्यो षधीर्वपति ब्रह्मणान्नमव रुद्धेऽर्केऽर्कश्चीयते  
 चतुर्दशभिर्वपति सप्त ग्राम्या ओषधयः सप्तारया उभयीषामवरुद्ध्या  
 अन्नस्यान्नस्य वपत्यन्नस्यान्नस्यावरुद्ध्यै कृष्टे वपति कृष्टे ह्योषधयः  
 प्रतितिष्ठन्त्य नुसीतं वपति  
 प्रजात्यै द्वादशसु सीतासु वपति द्वादश मासाः संवत्सरः  
 संवत्सरेणैवास्मा अन्नम्पचति यदग्निचिदनवरुद्धस्याशनीयादवरुद्धेन  
 व्युध्येत ये वनस्पतीनाम्फलग्रहयस्तानिध्मेऽपि प्रोक्षेदनवरुद्धस्यावरुद्ध्यै  
 दिग्भ्यो लोष्टान्तसमस्यति दिशामेव वीर्यमवरुध्य दिशां वीर्येऽग्निं चिनुते  
 यं द्विष्याद्यत्र स स्यात्तस्यै दिशो लोष्टमा हरेदिषमूर्जमहमित आ दद  
 इतीषमेवोर्जं तस्यै दिशोऽव रुद्धे क्षोधुको भवति यस्तस्यां दिशि  
 भवत्युत्तरवेदिमुप वपत्युत्तरवेद्यां ह्यग्निश्चीयतेऽथो पशवो वा  
 उत्तरवेदिः पशूनेवाव रुद्धेऽथो यज्ञपुरुषोऽनन्तरित्यै ॥५॥

अग्ने तव श्रवो वय इति सिकता नि वपत्येतद्वा अग्नेर्वैश्वानरस्य सूक्तं  
 सूक्तेनैव वैश्वानरमव रुद्धे षड्भिर्नि वपति षड्वा ऋतवः संवत्सरः  
 संवत्सरोऽग्निर्वैश्वानरः साक्षादेव वैश्वानरमव रुद्धे समुद्रं वै नामैतच्छन्दः  
 समुद्रमनु प्रजाः प्र जायन्ते यदेतेन सिकता नि वपति  
 प्रजानाम्प्रजननायेन्द्रो वृत्राय वज्रम्प्राहर्त्स त्रेधा व्यभवत्स्फ्यस्तृतीयं  
 रथस्तृतीयं यूपस्तृतीयं येऽन्तः शरा अशीर्यन्त ताः शर्करा  
 अभवन्तच्छर्कराणां शर्करत्वं वज्रो वै शर्कराः  
 पशुरग्निर्यच्छर्कराभिरग्निम्परिमिनोति वज्रैश्चैवास्मै पशून्परि गृह्णाति  
 तस्माद्ब्रह्मैण पशवः परिगृहीतास्तस्मात्स्थेयानस्थेयसो नोप हरते  
 त्रिसप्तभिः पशुकामस्य परि मिनुयात्सप्त वै शीर्षण्याः प्राणाः प्राणाः  
 पशवः प्राणैरेवास्मै पशून्व रुद्धे त्रिणवाभिर्भ्रातृव्यवतस्त्रिवृतमेव वज्रं  
 सम्भृत्य भ्रातृव्याय प्र हरति स्तृत्या अपरिमिताभिः परि  
 मिनुयादपरिमितस्यावरुद्ध्यै यं कामयेतापशुः स्यादित्यपरिमित्य तस्य  
 शर्कराः सिकता व्यूहेदपरिगृहीत एवास्य विषूचीनं रेतः परा  
 सिञ्चत्यपशुरेव भवति यं कामयेत पशुमान्त्स्यादिति परिमित्य तस्य  
 शर्कराः सिकता व्यूहेत्परिगृहीत एवास्मै समीचीनं रेतः सिञ्चति  
 पशुमानेव भवति सौम्या व्यूहति सोमो वै रेतोधा रेत एव तद्दधाति  
 गायत्रिया ब्राह्मणस्य गायत्रो हि ब्राह्मणस्त्रिष्टुभा राजन्यस्य त्रैष्टुभो हि  
 राजन्यः शम्युम्बार्हस्पत्यम्मधो नोपानमत्सोऽग्निम्प्राविशत्सोऽग्नेः कृष्णो  
 रूपं कृत्वोदायत्  
 सोऽश्चम्प्राविशत्सोऽश्वस्यावान्तरशफोऽभवद्यदश्वमाक्रमयति य एव  
 मेधोऽश्चम्प्राविशत्तमेवाव रुद्धे प्रजापतिनाग्निश्चेतव्य इत्याहुः

प्राजापत्योऽश्वो यदश्वमाक्रमयति प्रजापतिनैवाग्निं चिनुते पुष्करपर्णमुप  
दधाति योनिर्वा अग्नेः पुष्करपर्णं स योनिमेवाग्निं चिनुतेऽपामृष्टमसीत्युप  
दधात्युपां वा एतत्पृष्ठं यत्पुष्करपर्णं रूपेणैवैन्दुपं दधाति ॥६॥

ब्रह्म जज्ञानमिति रुक्ममुप दधाति ब्रह्ममुखा वै प्रजापतिः प्रजा असृजत  
ब्रह्ममुखा एव तत्प्रजा यजमानः सृजते ब्रह्म जज्ञानमित्याह  
तस्माद्ब्राह्मणो मुख्यो मुख्यो भवति य एवं वेद ब्रह्मवादिनो वदन्ति न  
पृथिव्यां नातरिक्षे न दिव्यग्निश्चेतव्य इति यत्पृथिव्यां चिन्वीत पृथिवीं  
शुचार्पयेन्नौषधयो न वनस्पतयः प्र जायेरन्यदन्तरिक्षे चिन्वीतान्तरिक्षं  
शुचार्पयेन्न वयांसि प्र जायेरन्यद्विचिन्वीत दिवं शुचार्पयेन्न पर्जन्यो  
वर्षेद्रुक्ममुप दधात्यमृतं वै हिरण्यममृतं एवाग्निं चिनुते प्रजात्यै  
हिरण्यमम्पुरुषमुप दधाति यजमानलोकस्य विधृत्यै यदिष्टकाया  
आतृणमनूपदध्यात्पशूनां च यजमानस्य च प्राणमपि दध्यादक्षिणतः  
प्राञ्चमुप दधाति  
दाधारं यजमानलोकं न पशूनां च यजमानस्य च प्राणमपि दधात्यथो  
खल्विष्टकाया आतृणमनूप दधाति प्राणानामुत्सृष्ट्यै द्रप्सश्चस्कन्देत्यभि  
मृशति होत्रास्वेवैनम्प्रति ष्ठापयति स्रुचावुप दधात्या ज्यस्य पूर्णा  
कार्ष्ण्यमयीं दध्नः पूर्णामौदुम्बरी मियं वै कार्ष्ण्यमय्यसावौदुम्बरीमे  
एवोप धत्ते तूष्णीमुप दधाति न हीमे यजुषामुमर्हति दक्षिणां  
कार्ष्ण्यमयीमुत्तरामौदुम्बरीं तस्मादस्या असावुत्तराज्यस्य पूर्णा  
कार्ष्ण्यमयीं वज्रो वा आज्यं वज्रः कार्ष्ण्यो वज्रैणैव यज्ञस्य दक्षिणतो  
रक्षांस्यप हन्ति दध्नः पूर्णामौदुम्बरीं  
पशवो वै दध्यूर्गुदुम्बरः पशुष्वेवोर्ज दधाति पूर्णे उप दधाति पूर्णे



एवैनममुष्मिल्लोक उप तिष्ठेते विराज्यग्निश्चेतव्य इत्याहुः स्रुग्वै  
 विराड्यत्स्रुचावुप दधाति विराज्येवाग्निं चिनुते यज्ञमुखेयज्ञमुखे वै  
 क्रियमाणे यज्ञं रक्षांसि जिघांसन्ति यज्ञमुखं रुक्मो यद्रुक्मं  
 व्याघारयति यज्ञमुखादेव रक्षांस्यप हन्ति पञ्चभिर्व्याघारयति पाङ्क्तौ यज्ञो  
 यावानेव यज्ञस्तस्माद्रक्षांस्यप हन्त्य द्दणया व्याघारयति तस्माद्दणया  
 पशवोऽङ्गानि प्र हरन्ति प्रतिष्ठित्यै ॥७॥

स्वयमातृणामुप दधातीयं वै स्वयमातृणामेवोप धृत्तेऽश्वमुप घ्रापयति  
 प्राणमेवास्यां दधात्यथौ प्राजापत्यो वा अश्वः प्रजापतिनैवाग्निं चिनुते  
 प्रथमेष्टकोपधीयमाना पशूनां च यजमानस्य च प्राणमपि दधाति  
 स्वयमातृणा भवति प्राणानामुत्सृष्ट्या अथौ सुवर्गस्य  
 लोकस्यानुख्यात्या अग्नावग्निश्चेतव्य इत्याहुरेष वा अग्निर्वैश्वानरो  
 यद्ब्राह्मणस्तस्मै प्रथमामिष्टकां यजुष्कृताम्प्र  
 यच्छेत्ताम्ब्राह्मणश्चोपदध्यातामग्नावेव तदग्निं चिनुत ईश्वरो वा एष  
 आर्तिमार्तोऽर्विद्वानिष्टकामुपदधाति त्रीन्वरान्दद्यात्त्रयो वै प्राणाः  
 प्राणानां स्तृत्यै द्वावेव देयौ द्वौ हि प्राणावेक एव देय एको हि प्राणः  
 पशुर्वा एष यदग्निर्न खलु वै पशव आर्यवसे रमन्ते दूर्वेष्टकामुप दधाति  
 पशूनां धृत्यै द्वाभ्याम्प्रतिष्ठित्यै कारडात्कारडात्प्ररोहन्तीत्याहु  
 कारडेनकारडेन ह्येषा प्रतिष्ठित्यै वा नो दूर्वे प्र तनु सहस्रेण शतेन  
 चेत्याह साहस्रः प्रजापतिः प्रजापतेराप्त्यै देवलक्ष्मं वै त्र्यालिखिता  
 तामुत्तरलक्ष्माणं देवा उपादधृताधरलक्ष्माणमसुरा यं कामयैत  
 वसीयान्त्स्यादित्युत्तरलक्ष्माणं तस्योप दध्याद्वसीयानेव भवति यं  
 कामयैत पापीयान्त्स्यादित्यधरलक्ष्माणं तस्योप दध्यादसुरयोनिमेवैनमनु

परां भावयति पापीयान्भवति त्र्यालिखिता भवतीमे वै  
 लोकास्त्र्यालिखितैभ्य एव लोकेभ्यो भ्रातृव्यमन्तरेत्यङ्गिरसः सुवर्गं  
 लोकं यतः पुरोडाशः कूर्मो भूत्वानु प्रासर्पत्यत्कूर्ममुपदधाति यथा  
 क्षेत्रविदञ्जसा नयत्येवमेवैनं कूर्मः सुवर्गं लोकमञ्जसा नयति मेधो वा  
 एष पशूनां यत्कूर्मो यत्कूर्ममुपदधाति स्वमेव मेधम्पश्यन्तः पशव उप  
 तिष्ठन्ते श्मशानं वा एतत्क्रियते यन्मृतानाम्पशूनां शीर्षाण्युपधीयन्ते  
 यज्जीवन्तं कूर्ममुपदधाति तेनाश्मशानचिद्वास्तव्यौ वा एष यत्कूर्मो मधु  
 वाता ऋतायत इति दध्ना मधुमिश्रेणाभ्यनक्ति स्वदयत्येवैनं ग्राम्यं वा  
 एतदन्नं यद्दध्याण्यममधु यद्दध्ना मधुमिश्रेणाभ्यनक्त्युभयस्यावरुद्ध्यै  
 मही द्यौः पृथिवी च न इत्याहाभ्यामेवैनमुभयतः परि गृह्णाति  
 प्राञ्चमुप दधाति सुवर्गस्य लोकस्य समष्ट्यै पुरस्तात्प्रत्यञ्चमुप दधाति  
 तस्मात्पुरस्तात्प्रत्यञ्चः पशवो मेधमुप तिष्ठन्ते यो वा अपनाभिमग्निं चिनुते  
 यजमानस्य नाभिमनु प्र विशति स एनमीश्वरो हिंसितोरूलूखलमुप  
 दधात्येषा वा अग्नेर्नाभिः सनाभिमैवाग्निं चिनुते हिंसाया  
 औदुम्बरम्भवत्यूर्वा उदुम्बर ऊर्जमेवाव रुद्धे  
 मध्यत उप दधाति मध्यत एवास्मा ऊर्जं दधाति तस्मान्मध्यत ऊर्जा  
 भुञ्जत इयद्भवति प्रजापतिना यज्ञमुखेन सम्मितं मव  
 हन्त्यन्नमेवाक वैष्णव्यर्चोप दधाति विष्णुर्वै यज्ञो वैष्णवा वनस्पतयो  
 यज्ञ एव यज्ञम्प्रति ष्ठापयति ॥८॥

एषां वा एतल्लोकानां ज्योतिः सम्भृतं यदुखा यदुखामुपदधात्यैभ्य एव  
 लोकेभ्यो ज्योतिरव रुद्धे मध्यत उप दधाति मध्यत एवास्मै  
 ज्योतिर्दधाति तस्मान्मध्यतो ज्योतिरुपास्महे सिकताभिः पूरयत्येतद्वा

अग्नेर्वैश्वानरस्य रूपं रूपेणैव वैश्वानरमव रुद्धे यं कामयेत क्षोधुकः  
 स्यादित्यूनां तस्योप दध्यात्क्षोधुक एव भवति यं  
 कामयेतानुपदस्यदन्नमद्यादिति पूर्णं तस्योप दध्यादनुपदस्यदेवान्नमत्ति  
 सहस्रं वै प्रति पुरुषः पशूनां यच्छति सहस्रमन्ये पशवो  
 मध्ये पुरुषशीर्षमुप दधाति सवीर्यत्वायो खायामपि दधाति  
 प्रतिष्ठामेवैनद्गमयति व्यृद्धं वा एतत्प्राणैरमेध्यं यत्पुरुषशीर्षमृतं खलु वै  
 प्राणा अमृतं हिरण्यं प्राणेषु हिरण्यशल्कान्प्रत्यस्यति  
 प्रतिष्ठामेवैनद्गमयित्वा प्राणैः समर्धयति दध्ना मधुमिश्रेण पूरयति  
 मध्व्योऽसानीति श्रुतातङ्क्येन मेध्यत्वाय ग्राम्यं वा एतदन्नं  
 यद्दधारण्यम्मधु यद्दध्ना मधुमिश्रेण पूरयत्युभयस्यावरुद्ध्यै पशुशीर्षायुप  
 दधाति पशवो वै पशुशीर्षाणि पशूनेवाव रुद्धे यं कामयेतापशुः  
 स्यादिति विषूचीनानि तस्योप दध्याद्विषूच एवास्मात्पशून्दधात्यपशुरेव  
 भवति यं कामयेत पशुमान्तस्यादिति समीचीनानि तस्योप दध्यात्समीचं  
 एवास्मै पशून्दधाति पशुमानेव भवति पुस्तात्प्रतीचीनमश्चस्योप दधाति  
 पश्चात्प्राचीनमृषभस्यापशवो वा अन्ये गौश्वेभ्यः पशवो गोश्वानेवास्मै  
 समीचो दधात्ये तावन्तो वै पशवो द्विपादश्च चतुष्पादश्च तान्वा एतद्गौ  
 प्र दधाति यत्पशुशीर्षायुपदधात्यमुमारण्यमनु ते दिशामीत्याह ग्राम्येभ्य  
 एव पशुभ्य आरण्यान्यशूञ्चमनूत्सृजति  
 तस्मात्समावत्पशूनाम्प्रजायमानानामारण्याः पशवः कनीयांसः शुचा  
 ह्यताः  
 सर्पशीर्षमुप दधाति यैव सर्पे त्विषिस्तामेवाव रुद्धे  
 यत्समीचीनम्पशुशीर्षैरुप दध्याद्ग्राम्यान्यशून्दंशुकाः  
 स्युर्यद्विषूचीनमारण्यान्यजुरेव वदेदव तां त्विषिं रुद्धे या सर्पे न

ग्राम्यान्पशून्हिनस्ति नारण्या नथो खलूपधेयमेव यदुपदधाति तेन तां  
त्वेषिमव रुद्धे या सर्पे यद्यजुर्वदति तेन शान्तम् ॥६॥

पशुर्वा एष यदग्निर्योनिः खलु वा एषा पशोर्वि क्रियते  
यत्प्राचीनमैष्टकाद्यजुः क्रियते रेतोऽपस्या अपस्या उप दधाति योनावेव  
रेतो दधाति पञ्चोप दधाति पाङ्गाः पशवः पशूनेवास्मै प्र जनयति  
पञ्च दक्षिणतो वज्रो वा अपस्या वज्रैरेव यज्ञस्य दक्षिणतो रक्षाँस्यप  
हन्ति पञ्च पश्चात्प्राचीरुप दधाति पश्चाद्वै प्राचीनँ रेतो धीयते पश्चादेवास्मै  
प्राचीनँ रेतो दधाति पञ्च पुरस्तात्प्रतीचीरुप दधाति पञ्च  
पश्चात्प्राचीस्तस्मात्प्राचीनँ रेतो धीयते प्रतीचीः प्रजा जायन्ते  
पञ्चोत्तरतश्छन्दस्याः पशवो वै छन्दस्याः पशूनेव प्रजातान्स्वमायतनमभि  
पर्यहत् इयं वा अग्नेरतिदाहादबिभेत्सैता अपस्या अपश्यत्ता उपाधत्त ततो  
वा इमां नात्यदहद्यदपस्या उपदधात्यस्या अनतिदाहायो वाच  
हेयमददित्स ब्रह्मणान्नं यस्यैता उपधीयान्तै य उ चैना एवं वेददिति  
प्राणभृत् उप दधाति रेतस्येव प्राणान्दधाति  
तस्माद्ददन्प्राणन्पश्यञ्छृणवन्पशुर्जायतेऽयम्पुरो भुव इति पुरस्तादुप दधाति  
प्राणमेवैताभिर्दाधारायं दक्षिणा विश्वकर्मेति दक्षिणतो मन  
एवैताभिर्दाधारायम्पश्चाद्विश्वव्यचा इति  
पश्चाच्चक्षुरेवैताभिर्दाधारेदमुत्तरात्सुवरित्युत्तरतः श्रोत्रमेवैताभिर्दाधारेयमुपरि  
मृतिरित्युपरिष्ठाद्वाचमेवैताभिर्दाधार दशदशोप दधाति  
सवीर्यत्वायां क्षणोप दधाति तस्मादक्षण्या पशवोऽङ्गानि प्र हरन्ति  
प्रतिष्ठित्यै याः प्राचीस्ताभिर्वसिष्ठ आर्ध्रोद्या दक्षिणा ताभिर्भरद्वाजो  
याः प्रतीचीस्ताभिर्विश्वामित्रो या उदीचीस्ताभिर्जमदग्निर्या

ऊर्ध्वास्ताभिर्विश्वकर्मा य एवमेतासामृद्धिं वेदध्नोत्येव य  
 आसामेवम्बन्धुतां वेद बन्धुमान्भवति य आसामेवं क्लृप्तं वेद कल्पतेऽस्मै  
 य आसामेवमायतनं वेदायतनवान्भवति य आसामेवम्प्रतिष्ठां वेद प्रत्येव  
 तिष्ठति प्राणभृत उपधाय संयत उप दधाति प्राणानेवास्मिन्धित्वा  
 संयद्भिः सं यच्छति तत्संयतां संयत्त्वमथौ प्राण एवापानं दधाति  
 तस्मात्प्राणापानौ सं चरतो विषूचीरुप दधाति  
 तस्माद्विष्वञ्चौ प्राणापानौ यद्वा अग्नेरसंयतमसुवर्ग्यमस्य  
 तत्सुवर्ग्योऽग्निर्यत्संयत उप दधाति समेवैनं यच्छति  
 सुवर्ग्यमेवाक् रूयविवर्यः कृतमयानामित्याह वयोभिरेवायानव  
 रुन्देऽयैर्वयांसि सर्वतो वायुमतीर्भवन्ति तस्माद्यं सर्वतः पवते  
 ॥१०॥

गायत्री त्रिष्टुब्जगत्यनुष्टुप्पङ्क्त्या सह । बृहत्युष्णिहा ककुत्सूचीभिः  
 शिम्यन्तु त्वा ॥  
 द्विपदा या चतुष्पदा त्रिपदा या च षट्पदा । सच्छन्दा या च विच्छन्दाः  
 सूचीभिः शिम्यन्तु त्वा ॥  
 महानाम्नी रेवतयो विश्वा आशाः प्रसूवरीः । मेघ्या विद्युतो वाचः  
 सूचीभिः शिम्यन्तु त्वा ॥  
 रजता हरिणीः सीसा युजौ युज्यन्ते कर्मभिः । अश्वस्य वाजिनस्त्वचि  
 सूचीभिः शिम्यन्तु त्वा ॥  
 नारीस्ते पतयो लोम वि चिन्वन्तु मनीषया । देवानाम्पत्नीर्दिशः सूचीभिः  
 शिम्यन्तु त्वा ॥  
 कुविदङ्ग यवमन्तो यवं चिद्यथा दान्त्यनुपूर्वं वियूय । इहेहैषां कृणुत

भोर्जनानि ये बर्हिषो नमोवृक्तिं न जग्मुः ॥११॥

कस्त्वा छयति कस्त्वा वि शास्ति कस्ते गात्राणि शिम्यति । क उ ते शमिता कविः ॥

ऋतवस्त ऋतुधा परुः शमितारो वि शासतु । संवत्सरस्य धार्यसा शिमीभिः शिम्यन्तु त्वा ॥

दैव्या अध्वर्यवस्त्वा छयन्तु वि च शासतु । गात्राणि पर्वशस्ते शिमाः कृणवन्तु शिम्यन्तः ॥

अर्धमासाः परुषि ते मासाश्छयन्तु शिम्यन्तः । अहोरात्राणि मरुतो विलिष्टं सूदयन्तु ते ॥

पृथिवी तेऽन्तरिक्षेण वायुश्छिद्रभिषज्यतु । द्यौस्ते नक्षत्रैः सह रूपं कृणोतु साधुया ॥

शं ते परेभ्यो गात्रेभ्यः शमस्त्वरेभ्यः । शमस्थभ्यो मज्जभ्यः शमु ते तनुवै भुवत् ॥१२॥

इति पञ्चमकारण्डे द्वितीयः प्रपाठकः २

अथ पञ्चमकारण्डे तृतीयः प्रपाठकः ३

उत्सन्नयज्ञो वा एष यद्ग्नः किं वाहैतस्य क्रियते किं वा न यद्वै यज्ञस्य क्रियमाणस्यान्तर्यन्ति पूर्यति वा अस्य तदाश्विनीरुपं दधात्यश्विनौ वै देवानाम्भिषजौ ताभ्यामेवासमै भेषजं करोति पञ्चोपं दधाति पाङ्क्तौ यज्ञो यावानेव यज्ञस्तस्मै भेषजं करोत्युत्सव्या उपं दधात्युत्सव्यां क्लृप्त्यै पञ्चोपं दधाति पञ्च वा ऋतवो यावन्त एवर्तवस्तान्कल्पयति समानप्रभृतयो भवन्ति समानोदर्कास्तस्मात्समाना ऋतव एकेन पदेन व्यावर्तन्ते

तस्माद्दृतवो व्यावर्तन्ते प्राणभृत उप दधात्यृतुष्वेव प्राणान्दधाति  
 तस्मात्समानाः सन्त ऋतवो न जीर्यन्त्यथो प्र जनयत्येवैना नेष वै  
 वायुर्यत्प्राणो यदृतव्या उपधाय प्राणभृत उपदधाति तस्मात्सर्वानृतूननु  
 वायुरा वरीवर्ति वृष्टिसनीरुप दधाति वृष्टिमेवाव रुद्धे  
 यदेकधोपदध्यादेकमृतुं वर्षेदनुपरिहारं सादयति तस्मात्सर्वानृतून्वर्षति  
 यत्प्राणभृत उपधाय वृष्टिसनीरुपदधाति तस्माद्वायुप्रच्युता दिवो वृष्टिरीते  
 पशवो वै वयस्या नानामनसः खलु वै पशवो नानाव्रतास्तैऽप एवाभि  
 समनसो यं कामयैतापशुः स्यादिति वयस्यास्तस्योपधायापस्या उप  
 दध्यादसंज्ञानमेवास्मै पशुभिः करोत्यपशुरेव भवति यं कामयैत  
 पशुमान्त्स्यादित्यपस्यास्तस्योपधाय वयस्या उप दध्यात्संज्ञानमेवास्मै  
 पशुभिः करोति पशुमानेव भवति चतस्रः पुरस्तादुप दधाति  
 तस्माच्चत्वारि चक्षुषो रूपाणि द्वे शुक्ले द्वे कृष्णे मूर्धन्वतीर्भवन्ति  
 तस्मात्पुरस्तान्मूर्धा पञ्च दक्षिणायां श्रोण्यामुप दधाति पञ्चोत्तरस्यां  
 तस्मात्पश्चाद्वर्षीयान्पुरस्तात्प्रवणः पशु ब्रस्तो वय इति दक्षिणेऽसु उप  
 दधाति वृष्णिर्वय इत्युत्तरेऽसावेव प्रति दधाति व्याघ्रो वय इति दक्षिणे  
 पक्ष उप दधाति सिहो वय इत्युत्तरे पक्षयोरेव वीर्यं दधाति पुरुषो वय  
 इति मध्ये तस्मात्पुरुषः पशूनामधिपतिः ॥१॥

इन्द्राग्नी अव्यथमानामिति स्वयमातृणामुप दधातीन्द्राग्निभ्यां वा इमौ  
 लोकौ विधृतावनयौलोकयोर्विधृत्या अधृतेव वा एषा यन्मध्यमा  
 चित्तिरन्तरिक्षमिव वा एषेन्द्राग्नी इत्याहेन्द्राग्नी वै  
 देवानामोजोभृतावोजसैवैनामन्तरिक्षे चिनुते धृत्यै स्वयमातृणामुप  
 दधात्यन्तरिक्षं वै स्वयमातृणान्तरिक्षमेवोप धृत्तेऽश्चमुप घ्रापयति

प्राणमेवास्यां दधात्यथौ प्राजापत्यो वा अश्वः प्रजापतिनैवाग्निं चिनुते  
स्वयमातृणा भवति प्राणानामुत्सृष्ट्या अथौ सुवर्गस्य लोकस्यानुख्यात्यै  
देवानां वै सुवर्गं लोकं यतां दिशः समव्लीयन्त  
त एता दिश्या अपश्यन्ता उपादधत् ताभिर्वै ते दिशोऽदृह्यद्विश्यौ  
उपदधाति दिशां विधृत्यै दशं प्राणभृतः पुरस्तादुपं दधाति  
नव वै पुरुषे प्राणा नाभिर्दशमी प्राणानेव पुरस्ताद्धत्ते तस्मात्पुरस्तात्प्राणा  
ज्योतिष्मतीमुत्तमामुपं दधाति तस्मात्प्राणानां वाग्ज्योतिरुत्तमा दशोपं  
दधाति दशाक्षरा विराड्विराट्छन्दसां ज्योतिर्ज्योतिरेव पुरस्ताद्धत्ते  
तस्मात्पुरस्ताज्ज्योतिरुपास्महे छन्दांसि  
पशुष्वजिमयुस्तान्बृहत्युदजयत्तस्माद्बार्हताः पशवं उच्यन्ते मा छन्द इति  
दक्षिणत उपं दधाति तस्माद्दक्षिणावृतो मासाः पृथिवी छन्द इति  
पश्चात्प्रतिष्ठित्या अग्निर्देवतेत्युत्तरत ओजो वा अग्निरोज एवोत्तरतो धत्ते  
तस्मादुत्तरतोऽभिप्रयायी जयति षट्त्रिंशत्सं पद्यन्ते षट्त्रिंशदक्षरा  
बृहती बार्हताः पशवो बृहत्यैवास्मै पशूनवं रुद्धे बृहती छन्दसां  
स्वाराज्यम्परीयाय यस्यैता उपधीयन्ते गच्छति स्वाराज्यं सप्त  
वालखिल्याः पुरस्तादुपं दधाति सप्त पश्चात्सप्त वै शीर्षश्याः प्राणा  
द्वाववाञ्चौ प्राणानां सवीर्यत्वाय मूर्धासि राडिति पुरस्तादुपं दधाति  
यन्त्री राडिति पश्चात्प्राणानेवास्मै समीचौ दधाति ॥२॥

देवा वै यद्यज्ञेऽकुर्वत् तदसुरा अकुर्वत् ते देवा एता अक्षयास्तोमीया  
अपश्यन्ता अन्यथानूच्यान्यथोपादधत् तदसुरा नान्ववायन्ततौ देवा  
अभवन्परासुरा यदक्षयास्तोमीया अन्यथानूच्यान्यथोपदधाति  
भ्रातृव्याभिभूत्यै भवत्यात्मना परास्य भ्रातृव्यो भवत्या शुस्त्रिवृदिति



पुरस्तादुप दधाति यज्ञमुखं वै त्रिवृद्दक्षमुखमेव पुरस्ताद्वि यातयति व्योम  
 सप्तदश इति दक्षिणतोऽन्नं वै व्योमान्नं सप्तदशोऽन्नमेव दक्षिणतो धत्ते  
 तस्माद्दक्षिणेनान्नमद्यते धरुणं एकविंश इति पश्चात्प्रतिष्ठा वा  
 एकविंशः प्रतिष्ठित्यै भान्तः पञ्चदश इत्युत्तरत ओजो वै भान्त ओजः  
 पञ्चदश ओज एवोत्तरतो धत्ते  
 तस्मादुत्तरतोऽभिप्रयायी जयति प्रतूर्तिरष्टादश इति पुरस्तादुप दधाति द्वौ  
 त्रिवृतावभिपूर्वं यज्ञमुखे वि यातयत्यभिवर्तः सविंश इति  
 दक्षिणतोऽन्नं वा अभिवर्तोऽन्नं सविंशोऽन्नमेव दक्षिणतो धत्ते  
 तस्माद्दक्षिणेनान्नमद्यते वर्चो द्वाविंश इति पश्चाद्यद्विंशतिर्द्वे तेन विराजौ  
 यद्वे प्रतिष्ठा तेन विराजोरेवाभिपूर्वमन्नाद्ये प्रति तिष्ठति तपो नवदश  
 इत्युत्तरतस्तस्मात्सव्यो हस्तयोस्तपस्वितरो योनिश्चतुर्विंश इति  
 पुरस्तादुप दधाति चतुर्विंशत्यक्षरा गायत्री गायत्री यज्ञमुखं यज्ञमुखमेव  
 पुरस्ताद्वि यातयति गर्भाः पञ्चविंश इति दक्षिणतोऽन्नं वै गर्भा  
 अन्नम्पञ्चविंशोऽन्नमेव दक्षिणतो धत्ते तस्माद्दक्षिणेनान्नमद्यत ओजस्त्रिणव  
 इति पश्चादिमे वै लोकास्त्रिणव एष्वेव लोकेषु प्रति तिष्ठति  
 सम्भरणस्त्रयोविंश इत्युत्तरतस्तस्मात्सव्यो हस्तयोः सम्भार्यतरः  
 क्रतुरेकत्रिंश इति पुरस्तादुप दधाति वाग्वै क्रतुर्यज्ञमुखं वाग्यज्ञमुखमेव  
 पुरस्ताद्वि यातयति ब्रध्नस्य विष्टपं चतुस्त्रिंश इति दक्षिणतोऽसौ वा  
 आदित्यो ब्रध्नस्य विष्टपं ब्रह्मवर्चसमेव दक्षिणतो धत्ते तस्माद्दक्षिणोऽर्धो  
 ब्रह्मवर्चसितरः प्रतिष्ठा त्रयस्त्रिंश इति पश्चात्प्रतिष्ठित्यै नार्कः षट्त्रिंश  
 इत्युत्तरतः सुवर्गो वै लोको नार्कः सुवर्गस्य लोकस्य समष्ट्यै ॥३॥

अग्नेर्भागोऽसीति पुरस्तादुप दधाति यज्ञमुखं वा अग्निर्यज्ञमुखं दीक्षा

यज्ञमुखम्ब्रह्मं यज्ञमुखं त्रिवृद्यज्ञमुखमेव पुरस्ताद्वि यातयति  
 नृचक्षसाम्भागोऽसीति दक्षिणतः शुश्रुवाँसो वै नृचक्षसोऽन्नं धाता  
 जातायैवास्मा अन्नमपि दधाति तस्माज्जातोऽन्नमत्ति जनित्रँ स्पृतँ  
 सप्तदशः स्तोम इत्याहान्नं वै जनित्रमन्नँ सप्तदशोऽन्नमेव दक्षिणतो धत्ते  
 तस्माद्दक्षिणेनान्नमद्यते मित्रस्य भागोऽसीति पश्चात्प्राणो वै मित्रोऽपानो  
 वरुणः प्राणापानावेवास्मिन्दधाति दिवो वृष्टिर्वाताः स्पृता एकविँशः  
 स्तोम इत्याह प्रतिष्ठा वा एकविँशः प्रतिष्ठित्या इन्द्रस्य  
 भागोऽसीत्युत्तरतो ओजो वा इन्द्र ओजो विष्णुरोजः क्षत्रमोजः पञ्चदश  
 ओज एवोत्तरतो धत्ते तस्मादुत्तरतोऽभिप्रयायी जयति वसूनाम्भागोऽसीति  
 पुरस्तादुप दधाति यज्ञमुखं वै वसवो यज्ञमुखँ रुद्रा यज्ञमुखं  
 चतुर्विँशो यज्ञमुखमेव पुरस्ताद्वि यातयत्या दित्यानाम्भागोऽसीति  
 दक्षिणतोऽन्नं वा आदित्या अन्नम्रुतोऽन्नं गर्भा अन्नम्पञ्चविँशोऽन्नमेव  
 दक्षिणतो धत्ते तस्माद्दक्षिणेनान्नमद्यतेऽदित्यै भागोऽसीति पश्चात्प्रतिष्ठा वा  
 अदितिः प्रतिष्ठा पूषा प्रतिष्ठा त्रिणवः प्रतिष्ठित्यै देवस्य  
 सवितुर्भागोऽसीत्युत्तरतो ब्रह्म वै देवः सविता ब्रह्म बृहस्पतिर्ब्रह्म  
 चतुष्टोमो ब्रह्मवर्चसमेवोत्तरतो धत्ते तस्मादुत्तरोऽर्धो ब्रह्मवर्चसितरः  
 सावित्रवती भवति प्रसूत्यै तस्माद्ब्राह्मणानामुदीची सनिः प्रसूता  
 धर्त्रश्चतुष्टोम इति पुरस्तादुप दधाति यज्ञमुखं वै धर्त्रो यज्ञमुखं चतुष्टोमो  
 यज्ञमुखमेव पुरस्ताद्वि यातयति यावानाम्भागोऽसीति दक्षिणतो  
 मासा वै यावा अर्धमासा अयावास्तस्माद्दक्षिणावृतो मासा अन्नं वै यावा  
 अन्नम्प्रजा अन्नमेव दक्षिणतो धत्ते तस्माद्दक्षिणेनान्नमद्यत  
 ऋभूणाम्भागोऽसीति पश्चात्प्रतिष्ठित्यै विवर्तोऽष्टाचत्वारिँश  
 इत्युत्तरतोऽनयोर्लोकयोः सवीर्यत्वाय तस्मादिमौ लोकौ समावद्दीर्यो यस्य

मुख्यवतीः पुरस्तादुपधीयन्ते मुख्य एव भवत्यास्य मुख्यो जायते  
यस्यान्नवतीर्दक्षिणतोऽत्यन्नमास्यान्नादो जायते यस्य प्रतिष्ठावतीः  
पश्चात्प्रत्येव तिष्ठति यस्यौजस्वतीरुत्तरत औजस्व्यैव भवत्यास्यौजस्वी  
जायतेऽर्को वा एष यदग्निस्तस्यैतदेव स्तोत्रमेतच्छस्त्रं यदेषा विधा  
विधीयतेऽर्क एव तद्वर्चमनु विधीयतेऽत्यन्नमास्यान्नादो जायते यस्यैषा  
विधा विधीयते य उ चैनामेवं वेद सृष्टीरुप दधाति यथासृष्टमेवाव रुद्धे  
न वा इदं दिवा न नक्तमासीदव्यावृत्तं ते देवा एता व्युष्टीरपश्यन्ता  
उपादधत् ततो वा इदं व्यौच्छद्यस्यैता उपधीयन्ते व्यैवास्मा उच्छत्यथो  
तम एवाप हते ॥४॥

अग्नें जातान्प्र शुंदा नः सपत्नानिति पुरस्तादुप दधाति जातानेव भ्रातृव्यान्प्र  
शुदते सहसा जातानिति पश्चाज्जनिष्यमाणानेव प्रति नुदते  
चतुश्चत्वारिंशः स्तोम इति दक्षिणतो ब्रह्मवर्चसं वै चतुश्चत्वारिंशो  
ब्रह्मवर्चसमेव दक्षिणतो धत्ते तस्माद्दक्षिणोऽर्धो ब्रह्मवर्चसितरः षोडश  
स्तोम इत्युत्तरत ओजो वै षोडश ओज एवोत्तरतो धत्ते  
तस्मादुत्तरतोऽभिप्रयायी जयति वज्रो वै चतुश्चत्वारिंशो वज्रः षोडशो  
यदेते इष्टके उपदधाति जाताश्चैव जनिष्यमाणाश्च भ्रातृव्यान्प्रशुद्य  
वज्रमनु प्र हरति स्तृत्यै पुरीषवतीम्मध्य उप दधाति पुरीषं वै  
मध्यमात्मनः सात्मानमेवाग्निं चिनुते सात्मानुष्मिल्लोके भवति य एवं  
वेदै ता वा असपत्ना नामेष्टका यस्यैता उपधीयन्ते नास्य सपत्नौ भवति  
पशुर्वा एष यदग्निर्विराज उत्तमायां चित्यामुप दधाति  
विराजमेवोत्तमाम्पशुषु दधाति तस्मात्पशुमानुत्तमां वाचं वदति  
दशदशोप दधाति सवीर्यत्वाया द्दणयोप दधाति तस्माद्दक्ष्या

पशवोऽङ्गानि प्र हरन्ति प्रतिष्ठित्यै यानि वै छन्दांसि  
सुवर्ग्याण्यसन्नैर्देवाः सुवर्गं लोकमायन्तेनर्षयोऽश्राम्यन्ते तपोऽतप्यन्त  
तानि तपसापश्यन्तेभ्य एता इष्टका निरमिमतेवश्छन्दो वरिवश्छन्द इति  
ता उपादधत ताभिर्वै ते सुवर्गं लोकमायन्तेदेता इष्टका उपदधाति  
यान्येव छन्दांसि सुवर्ग्याणि तैरेव यजमानः सुवर्गं लोकमैति यज्ञेन वै  
प्रजापतिः प्रजा असृजत ताः स्तोमभागैरेवासृजत यत्स्तोमभागा  
उपदधाति प्रजा एव तद्यजमानः सृजते बृहस्पतिर्वा एतद्यज्ञस्य तेजः  
समभरद्यत्स्तोमभागा यत्स्तोमभागा उपदधाति सतेजसमेवाग्निं चिनुते  
बृहस्पतिर्वा एतां यज्ञस्य प्रतिष्ठामपश्यद्यत्स्तोमभागा यत्स्तोमभागा  
उपदधाति यज्ञस्य प्रतिष्ठित्यै सप्तसप्तोप दधाति सवीर्यत्वार्य तिस्रो मध्ये  
प्रतिष्ठित्यै ॥५॥

रश्मिरित्येवादित्यमसृजत प्रेतिरिति धर्ममन्वितिरिति दिवं  
सन्धिरित्यन्तरिक्षं प्रतिधिरिति पृथिवीं विष्टम्भ इति वृष्टिं प्रवेत्यहरनुवेति  
रात्रिमुशिगिति वसून्प्रकेत इति रुद्रान्तसुदीतिरित्यादित्यानोज इति पितृ  
स्तन्तुरिति प्रजाः पृतनाषाडिति पशून्नेवदित्योषधी रभिजिदसि  
युक्तग्रावेन्द्राय त्वेन्द्रं जिन्वेत्येव दक्षिणतो वज्रम्पर्योहदभिजित्यै ताः प्रजा  
अपप्राणा असृजत तास्वधिपतिरसीत्येव प्राणमदधाद्यन्तेत्यपानं ससर्प  
इति चक्षुर्वयोधा इति श्रोत्रं

ताः प्रजाः प्राणतीरपानतीः पश्यन्तीः शृण्वतीर्न मिथुनी अभवन्तासु  
त्रिवृद्सीत्येव मिथुनमदधात्ताः प्रजा मिथुनी भवन्तीर्न प्राजायन्त ताः  
संरोहोऽसि नीरोहोऽसीत्येव प्राजनयत्ताः प्रजाः प्रजाता न प्रत्यतिष्ठन्ता  
वसुकौऽसि वेषश्रिरसि वस्यष्टिरसीत्येवैषु लोकेषु प्रत्यस्थापयद्यदाह

वसुकौऽसि वेषश्चिरसि वस्यष्टिरसीति प्रजा एव प्रजाता एषु लोकेषु प्रति  
ष्ठापयति सात्मान्तरिक्षं रोहति सप्राणोऽमुष्मिल्लोके प्रति  
तिष्ठत्यव्यर्धुकः प्राणापानाभ्याम्भवति य एवं वेद ॥६॥

नाकसद्भिर्वै देवाः सुवर्गं लोकमायन्तन्नाकसदां नाकसत्त्वं यन्नाकसदं  
उपदधाति नाकसद्भिरेव तद्यजमानः सुवर्गं लोकमेति सुवर्गो वै लोको  
नाको यस्यैता उपधीयन्ते नास्मा अकम्भवति यजमानायतनं वै नाकसदो  
यन्नाकसदं उपदधात्यायतनमेव तद्यजमानः कुरुते पृष्ठानां वा एतत्तेजः  
सम्भृतं यन्नाकसदो यन्नाकसदं उपदधाति पृष्ठानामेव तेजोऽव रुद्धे  
पञ्चचोडा उप दधात्यप्सरसं एवैनमेता भूता अमुष्मिल्लोक उप शोरेऽथो  
तनूपानीरिवैता यजमानस्य यं द्विष्यात्तमुपदधद्ध्यायेदेताभ्य एवैनं  
देवताभ्य आ वृश्चति ताजगार्तिमार्च्छत्यु त्तरा नाकसद्भ्य उप दधाति यथा  
जायामानीय गृहेषु निषादयति तादृगेव तत्पश्चात्प्राचीमुत्तमामुप दधाति  
तस्मात्पश्चात्प्राची पत्रचन्वास्ते स्वयमातृरणां च विक्रणीं चौत्तमे उप  
दधाति प्राणो वै स्वयमातृरणायुर्विक्रणीं प्राणं चैवायुश्च प्राणानामुत्तमौ  
धत्ते तस्मात्प्राणश्चायुश्च प्राणानामुत्तमौ नान्यामुत्तरामिष्टकामुप  
दध्याद्यदन्यामुत्तरामिष्टकामुपदध्यात्पशूनां च यजमानस्य च प्राणं  
चायुश्चापि दध्यात्तस्मान्नान्योत्तरेष्टकोपधेयां स्वयमातृरणामुप दधात्यसौ वै  
स्वयमातृरणामूमेवोप धत्तेऽश्चमुप घ्रापयति प्राणमेवास्यां दधात्यथौ  
प्राजापत्यो वा अश्वः प्रजापतिनैवाग्निं चिनुते स्वयमातृरणा भवति  
प्राणानामुत्सृष्ट्या अथौ सुवर्गस्य लोकस्यानुख्यात्या एषा वै देवानां  
विक्रान्तिर्यद्विक्रणीं यद्विक्रणीमुपदधाति देवानामेव विक्रान्तिमनु वि  
क्रमत उत्तरत उप दधाति तस्मादुत्तरत उपचारोऽग्निं वायुमती भवति

समिद्धयै ॥७॥

छन्दाँस्युप दधाति पशवो वै छन्दाँसि पशूनेवाव रुद्धे छन्दाँसि वै  
 देवानां वामम्पशवो वाममेव पशूनव रुद्ध एताँह वै  
 यज्ञसैनश्चैत्रियायणश्चितिं विदां चकार तथा वै स पशूनवारुद्ध  
 यदेतामुपदधाति पशूनेवाव रुद्धे गायत्रीः पुरस्तादुप दधाति  
 तेजो वै गायत्री तेज एव मुखतो धत्ते मूर्धन्वतीर्भवन्ति मूर्धानमेवैनँ  
 समानानां करोति त्रिष्टुभ उप दधातीन्द्रियं वै त्रिष्टुगिन्द्रियमेव मध्यतो  
 धत्ते जगतीरुप दधाति जागता वै पशवः पशूनेवाव रुद्धेऽनुष्टुभ उप  
 दधाति प्राणा वा अनुष्टुप्प्राणानामुत्सृष्ट्यै बृहतीरुष्णिहाः  
 पङ्कीरक्षरपङ्कीरिति विषुरूपाणि छन्दाँस्युप दधाति  
 विषुरूपा वै पशवः पशवश्छन्दाँसि विषुरूपानेव पशूनव रुद्धे  
 विषुरूपमस्य गृहे दृश्यते यस्यैता उपधीयन्ते य उँ चैना एव  
 वेदा तिच्छन्दसमुप दधात्यतिच्छन्दा वै सर्वाणि छन्दाँसि  
 सर्वेभिरेवैनँ छन्दोभिश्चिनुते वर्ष्म वा एषा छन्दसां यदतिच्छन्दा  
 यदतिच्छन्दसमुपदधाति वर्ष्मेवैनँ समानानां करोति द्विपदा उप दधाति  
 द्विपाद्यजमानः प्रतिष्ठित्यै ॥८॥

सर्वाभ्यो वै देवताभ्योऽग्निश्चीयते यत्सयुजो नोपदध्याद्देवता अस्याग्निं  
 वृञ्जीरन्यत्सयुजं उपदधात्यात्मनैवैनँ सयुजं चिनुते नाग्निना व्यृध्यतेऽथो  
 यथा पुरुषः स्रावभिः सन्तत एवमेवैताभिर्ग्निः सन्ततोऽग्निना वै देवाः  
 सुवर्गं लोकमायन्ता अमूः कृत्तिका अभवन्त्यस्यैता उपधीयन्ते सुवर्गमेव  
 लोकमैति गच्छति प्रकाशं चित्रमेव भवति मण्डलेष्टका उप दधातीमे वै

लो॒का म॑ण्डलेष्ट॒का

इ॒मे ख॒लु वै लो॒का दे॒वपु॒रा दे॒वपु॒रा ए॒व प्र वि॑शति॒ नार्ति॑माच्छ॒त्यग्निं॑  
चि॒क्या॒नो वि॒श्वज्यो॑तिष॒ उप॑ दधाती॒माने॒वैताभि॑र्लो॒काञ्ज्यो॑तिष्मतः  
कुरु॑तेऽथो प्रा॒णाने॒वैता य॑जमानस्य दाधत्ये॒ता वै दे॒वताः॑ सुव॒र्ग्यास्ता  
ए॒वान्वा॒रभ्य॑ सुव॒र्ग लो॒कमे॑ति ॥६॥

वृष्टि॑सनीरुपं दधाति॒ वृष्टि॑मे॒वाव रु॒द्धे यदे॑क॒धोप॑द॒ध्यादे॑क॒मृतुं  
वर्षे॑दनुपरि॒हारं॑ सादयति॒ तस्मा॑त्सर्वा॒नृतू॑न्वर्षति॒ पुरो॒वात॑स॒निर॒सीत्या॑हैतद्वै  
वृष्ट्यै॑ रू॒पं रू॒पेणै॒व वृष्टि॑मव॒ रुद्धे॑ सं॒यानी॑भिर्वै दे॒वा  
इ॒माँल्लो॒कान्त्स॑म॒युस्त॑त्सं॒यानी॑नां॒ संयानि॑त्वं यत्सं॒यानी॑रुप॒दधाति॑  
यथा॑प्सु ना॒वा सं॒यात्ये॒वमे॒वैताभि॑र्यजमान इ॒माँल्लो॒कान्त्सं या॑ति प्ल॒वो  
वा ए॒षोऽग्ने॑र्यत्सं॒यानी॑र्यत्सं॒यानी॑रुप॒दधाति॑ प्ल॒वमे॒वैत॑म॒ग्रय॑ उप॑ दधात्यु॒त  
यस्यै॒तासू॑प॒हिता॒स्वापोऽग्निं॑ ह॒रन्त्य॑ह॒त ए॒वास्या॑ग्नि॒ रादि॑त्येष्ट॒का उप॑  
दधात्यादि॒त्या वा ए॒तम्भू॑त्यै प्रति॑ नुदन्ते॒ योऽल॑म्भूत्यै स॒न्भूतिं॑ न  
प्राप्नो॑त्यादि॒त्या ए॒वैन॑म्भूतिं॑ गमयन्त्य॒सौ वा ए॒तस्या॑दि॒त्यो रुच॑मा द॒त्ते  
योऽग्निं॑ चि॒त्वा न रो॑चते॒ यदा॑दि॒त्येष्ट॒का उ॑प॒दधा॑त्य॒सावे॒वास्मि॑न्नादि॒त्यो  
रुचं॑ दधाति॒ यथा॑सौ दे॒वाना॑ रोच॒त ए॒वमे॒वैष म॑नुष्याणां॒ रोच॑ते  
घृ॒तेष्ट॒का उप॑ दधात्ये॒तद्वा अ॒ग्नेः प्रि॑यं धाम् यद्भू॒तं प्रि॑येणै॒वैनं॑ धाम्ना  
स॒मर्ध॑यत्यथो॒ तेज॑साऽनुपरि॒हारं॑ सादयत्य॒परि॒वर्गमे॒वास्मि॑न्तेजो॑ दधाति  
प्र॒जाप॑तिर॒ग्निम॑चिनु॒त स यश॑सा॒ व्या॑र्ध्य॒त स ए॒ता यशो॑दा अ॒पश्य॑त्ता  
उपा॑धत्त॒ ताभि॑र्वै स यश॑ आ॒त्मन्न॑धत्त॒ यद्यशो॑दा उ॑प॒दधा॑ति॒ यश॑ ए॒व  
ताभि॑र्यजमान आ॒त्मन्ध॑त्ते पञ्चो॒प दधा॑ति॒ पाङ्कः॑ पुरु॒षो या॒वाने॒व  
पुरु॑ष॒स्तस्मि॑न् यशो॑ दधाति ॥१०॥

दे॒वा॒सु॒राः सं॒य॒त्ता आ॒स॒न्कनी॒याँसो दे॒वा आ॒स॒न्भू॒याँसोऽसु॒रास्ते दे॒वा  
ए॒ता इ॒ष्ट॒का अ॒प॒श्य॒न्ता उ॒पा॒द॒धत भू॒य॒स्कृ॒द॒सी॒त्ये॒व  
भू॒याँसोऽभ॒व॒न्व॒न॒स्प॒ति॒भि॒रोष॑धीभिर्वरि॒व॒स्कृ॒द॒सी॒ती॒माम॑ज॒य॒न्प्रा॒च्य॒सी॒ति  
प्रा॒चीं दि॒श॑म॒ज॒य॒न्नु॒र्ध्वा॒सी॒त्य॒मूर्म॑ज॒य॒न्न॒न्तरि॑क्ष॒सद॑स्य॒न्तरि॑क्षे  
सी॒दे॒त्य॒न्तरि॑क्ष॒म॒ज॒य॒न्त॒तौ दे॒वा अ॒भ॒व॒न्प॒रा॒सु॒रा य॒स्यै॒ता उ॑प॒धी॒य॒न्ते भू॒याने॒व  
भ॒व॒त्य॒भी॒माँल्लो॒काञ्ज॑यति भ॒व॒त्या॒त्म॒ना॒ परा॑स्य॒ भ्रातृ॑व्यो  
भ॒व॒त्य॒प्सु॒षद॑सि श्ये॒न॒स॒द॒सी॒त्या॒है॒तद्वा अ॒ग्ने रू॒पँ रू॒पे॒णै॒वाग्नि॑म॒व॒ रु॒द्धे  
पृ॒थि॒व्या॒स्त्वा द्र॒वि॒णे सा॒द॒या॒मी॒त्या॒हे॒माने॒वैताभि॑र्लोकान्द्रवि॒णा॒व॒तः कुरु॑त  
आ॒यु॒ष्या॑ उ॒प॒ द॒धा॒त्या॒यु॒रे॒वास्मि॑न्द॒धा॒त्य॒ग्ने य॒त्ते प॒रँ ह॒न्नामे॒त्या॒है॒तद्वा  
अ॒ग्नेः प्रि॒यं धाम॑ प्रि॒यमे॒वा॒स्य॒ धामो॑पा॒प्नोति॑ तावे॒हि सँ र॑भाव॒हा इ॒त्या॒ह  
व्यै॒वैने॑न॒ परि॑ ध॒त्ते पाञ्च॑ज॒न्येष्व॒प्यै॒ध्य॒ग्ने इ॒त्या॒हैष॑ वा अ॒ग्निः पाञ्च॑ज॒न्यो यः  
पञ्च॑चि॒ती॒क॒स्त॒स्मादे॒व॒मा॒ह॒ त॒व्या॑ उ॒प॒ द॒धा॒त्ये॒तद्वा ऋ॒तूना॑म्प्रि॒यं धाम॑  
यदृ॑त॒व्या॑ ऋ॒तूना॑मे॒व प्रि॒यं धामा॑व॒ रु॒द्धे सु॒मे॒क इ॒त्या॒ह सं॒वत्स॒रो वै  
सु॒मे॒कः  
सं॒वत्स॒रस्यै॒व प्रि॒यं धामो॑पा॒प्नोति॑ ॥११॥

प्र॒जाप॑ते॒र॒क्ष्य॑श्च॒य॒त्त॒प॒रा॑प॒त्त॒द॒श्वोऽभ॒व॒द्य॒द॒श्व॑य॒त्त॒द॒श्व॑स्याश्च॒त्वं तद्दे॒वा  
अ॒श्व॑मे॒धे॒नै॒व प्र॒त्य॑द॒धुरे॑ष॒ वै प्र॒जाप॑तिँ॒ सर्वं॑ करोति॒ योऽश्व॑मे॒धेन॒ यज॑ते॒ सर्वं॑  
ए॒व भ॑वति॒ सर्व॑स्य॒ वा ए॒षा प्रा॑र्यश्चित्तिः॒ सर्व॑स्य॒ भेष॑जँ॒ सर्वं॑ वा ए॒तेन॑  
पा॒प्मानं॑ दे॒वा अ॒न्तर॑न्न॒पि वा ए॒तेन॑ ब्रह्म॒ह॒त्याम॑न्तर॒न्सर्व॑म्पा॒प्मानं॑ तरति  
तर॑ति ब्रह्म॒ह॒त्यां योऽश्व॑मे॒धेन॒ यज॑ते॒ य उ॑ चैनमे॒वं वेदो॑त्तरं॒ वै  
तत्प्र॒जाप॑ते॒र॒क्ष्य॑श्च॒य॒त्त॒स्मा॒द॒श्व॑स्योत्तर॒तोऽव॑ द्यन्ति



दक्षिणतोऽन्येषाम्पशूनाम्वैतसः कटौ भवत्यप्सुयोनिर्वा अश्वौऽप्सुजो  
वैतसः स्व एवैनं योनौ प्रति ष्ठापयति चतुष्टोमः स्तोमौ भवति सरङ्ग वा  
अश्वस्य सक्थ्यावृहत्तद्देवाश्चतुष्टोमेनैव प्रत्यदधुर्यच्चतुष्टोम स्तोमो  
भवत्यश्वस्य सर्वत्वाय ॥१२॥

इति पञ्चमकारण्डे तृतीयः प्रपाठकः ३

अथ पञ्चमकारण्डे चतुर्थः प्रपाठकः ४

देवासुराः संयत्ता आसन्ते न व्यजयन्त स एता इन्द्रस्तनूरपश्यन्ता उपाधत्त  
ताभिर्वै स तनुर्वमिन्द्रियं वीर्यमात्मन्नधत्त ततो देवा अभवन्परासुरा  
यदिन्द्रस्तनूरुपदधाति तनुर्वमेव ताभिरिन्द्रियं वीर्यं यजमान आत्मन्धत्तेऽथो  
सेन्द्रमेवाग्निं सतनुं चिनुते भवत्यात्मना परास्य भ्रातृव्यो भवति यज्ञो  
देवेभ्योऽपाक्रामत्तमवरुधं नाशक्नुवन्त एता यज्ञस्तनूरपश्यन्ता उपाधत्त  
ताभिर्वै ते यज्ञमवारुन्धत् यद्यज्ञस्तनूरुपदधाति यज्ञमेव ताभिर्यजमानोऽव  
रुद्धे त्रयस्त्रिंशत्मुप दधाति त्रयस्त्रिंशद्दे देवता देवता एवाव  
रुद्धेऽथो सात्मानमेवाग्निं सतनुं चिनुते सात्मानुष्मिल्लोके भवति य  
एवं वेद

ज्योतिष्मतीरुप दधाति ज्योतिरेवास्मिन्दधात्येताभिर्वा अग्निश्चितो ज्वलति  
ताभिरेवैनं समिन्द्र उभयोरस्मै लोकयोज्योतिर्भवति

नक्षत्रेष्टका उप दधात्येतानि वै दिवो ज्योतींषि तान्येवाव रुद्धे सुकृतां  
वा एतानि ज्योतींषि यन्नक्षत्राणि तान्येवाप्रोत्यथो अनूकाशमेवैतानि  
ज्योतींषि कुरुते सुवर्गस्य लोकस्यानुख्यात्यै

यत्संस्पृष्टा उपदध्याद्वृष्ट्यै लोकमपि दध्यादवर्षुकः पर्जन्यः

स्यादसंस्पृष्टा उप दधाति वृष्ट्या एव लोकं करोति वर्षुकः पर्जन्यौ

भवति पुरस्तादन्याः प्रतीचीरुपं दधाति पश्चादन्याः  
प्राचीस्तस्मात्प्राचीनानि च प्रतीचीनानि च नक्षत्राण्यवा वर्तन्ते ॥१॥

ऋतव्या उपं दधात्पृतूनां क्लृप्तयै द्वन्द्वमुपं दधाति तस्माद्द्वन्द्वमृतवोऽधृतेव  
वा एषा यन्मध्यमा चित्तिरन्तरिक्षमिव वा एषा द्वन्द्वमन्यासु चितीषूपं  
दधाति चतस्रो मध्ये धृत्या अन्तःश्लेषणं वा एताश्चितीनां यदृतव्या  
यदृतव्या उपदधाति चितीनां विधृत्या अर्वाकामनूपं दधात्येषा वा  
अग्नेर्योनिः सयोनियेवाग्निं चिनुत उवाच ह विश्वामित्रोऽददित्स ब्रह्मणान्नं  
यस्यैता उपधीयान्तै य उ चैना एवं वेददिति संवत्सरो वा एतम्प्रतिष्ठायै  
नुदते योऽग्निं चित्वा न प्रतितिष्ठति पञ्च पूर्वाश्चितयो भवन्त्यथषष्ठीं चितिं  
चिनुते षड्वा ऋतवः संवत्सर ऋतुष्वेव संवत्सरे प्रति तिष्ठत्ये ता वा  
अधिपत्नीनामेष्टका यस्यैता उपधीयन्तेऽधिपतिरेव समानानाम्भवति  
यं द्विष्यात्तमुपदधद्दद्यायेदेताभ्य एवैनं देवताभ्य आ वृश्चति  
ताजगार्तिमार्च्छत्यङ्गिरसः सुवर्गं लोकं यन्तो या यज्ञस्य  
निष्कृतिरासीत्तामृषिभ्यः प्रत्यौहन्तद्विरगयमभवद्यद्विरगयशलकैः प्रोक्षति  
यज्ञस्य निष्कृत्या अथो भेषजमेवास्मै करोत्यथो रूपेणैवैनं  
समर्धयत्यथो हिरण्यज्योतिषैव सुवर्गं लोकमेति साहस्रवता प्रोक्षति  
साहस्रः प्रजापतिः प्रजापतेराप्तया इमा मे अग्र इष्टका धेनवः सन्वित्याह  
धेनूरेवैनाः कुरुते ता एनं कामदुघा अमुत्रामुष्मिल्लोक उपं तिष्ठन्ते ॥२॥

रुद्रो वा एष यदग्निः स एतर्हि जातो यर्हि सर्वश्चितः स यथा वत्सो जातः  
स्तनम्प्रेप्सत्येवं वा एष एतर्हि भागधेयम्प्रेप्सति तस्मै यदाहुतिं न  
जुहुयादध्वर्युं च यजमानं च ध्यायेच्छतरुद्रीयं जुहोति भागधेयैनेवैनं

शमयति नार्तिमाच्छत्यध्वर्युर्न यजमानो यद्ग्राम्याणांमपशूनां पर्यसा  
 जुहुयाद्ग्राम्यान्पशूञ्चुर्चापयेद्यदारुणयानामारुणयाञ्जर्तिलयवाग्वा वा  
 जुहुयाद्गवीधुकयवाग्वा वा न ग्राम्यान्पशून्हिनस्ति नारुणयानथो  
 खल्वाहरनाहुतिर्वै जर्तिलाश्च गवीधुकाश्चेत्यजक्षीरेण जुहोत्याग्नेयी वा  
 एषा यद्जाहुत्यैव जुहोति  
 न ग्राम्यान्पशून्हिनस्ति नारुणयानङ्गिरसः सुवर्गं लोकं यन्तोऽजायां  
 घर्मम्प्रासिञ्चन्त्सा शोचन्ती पर्णम्पराजिहीत सोऽर्को  
 ऽभवत्तदुर्कस्यार्कत्वमर्कपर्णेन जुहोति सयोनित्वायो दृङ्तिष्ठञ्जुहोत्येषा वै  
 रुद्रस्य दिक्स्वायामेव दिशि रुद्रं निरवदयते चरमायामिष्टकायां  
 जुहोत्यन्त एव रुद्रं निरवदयते त्रेधाविभक्तं जुहोति त्रयं इमे लोका  
 इमानेव लोकान्त्सुमावद्वीर्यान्करोती यत्यग्रे जुहोत्यथेयत्यथेयति त्रयं इमे  
 लोका एभ्य एवैनं लोकेभ्यः शमयति तिस्र उत्तरा आहुतीर्जुहोति  
 षट्सम्पद्यन्ते षड्वा ऋतव ऋतुभिरेवैनं शमयति यदनुपरिक्रामं  
 जुहुयादन्तरवचारिणं रुद्रं कुर्यादथो खल्वाहुः कस्यां वाहं दिशि रुद्रः  
 कस्यां वेत्यनुपरिक्राममेव होतव्यमपरिवर्गमेवैनं शमयत्येता वै देवताः  
 सुवर्गा या उत्तमास्ता यजमानं वाचयति ताभिरेवैनं सुवर्गं लोकं  
 गमयति यं द्विष्यात्तस्य सञ्चरे पशूनां न्यस्येद्यः प्रथमः पशुरभितिष्ठति स  
 आर्तिमाच्छति ॥३॥

अश्मन्नूर्जमिति परि षिञ्चति मार्जयत्येवैनमथौ तर्पयत्येव स एनं  
 तृप्तोऽक्षुध्यन्नशौचन्नमुष्मिल्लोक उप तिष्ठते तृप्यति प्रजयां पशुभिर्य एव  
 वेद तां न इषमूर्जं धत्त मरुतः स रराणा इत्याहान्नं वा  
 ऊर्गन्नम्रुतोऽन्नमेवाव रुद्धेऽश्मंस्ते क्षुद्रमुं ते शुगृच्छतु यं द्विष्म इत्याह

यमेव द्वेष्टि तमस्य क्षुधा च शुचा चार्पयति त्रिः परिषिञ्चन्पर्येति त्रिवृद्वा  
 अग्निर्यावानेवाग्निस्तस्य शुचं शमयति त्रिः पुनः पर्येति षट्सम्पद्यन्ते  
 षड्वा ऋतव ऋतुभिरेवास्य शुचं शमयत्य पां वा एतत्पुष्पं  
 यद्वेतसोऽपां शरोऽवका वेतसशाखया चावकाभिश्च वि कर्षत्यापो वै  
 शान्ताः शान्ताभिरेवास्य शुचं शमयति यो वा अग्निं चितम्प्रथमः  
 पशुरधिक्कामतीश्वरो वै तं शुचा प्रदहौ मरुडूकेन वि कर्षत्येष वै  
 पशूनामनुपजीवनीयो न वा एष ग्राम्येषु पशुषु हितो नारगयेषु तमेव  
 शुचा र्पयत्यष्टाभिर्वि कर्षत्यष्टाक्षरा गायत्री गायत्रोऽग्निर्यावानेवाग्निर्यस्य  
 शुचं शमयति पावकवतीभिरन्नं वै पावकोऽन्नैरेवास्य शुचं शमयति  
 मृत्युर्वा एष यदग्निर्ब्रह्मण एतद्रूपं यत्कृष्णाजिनं कार्ष्णी उपानहावुप मुञ्चते  
 ब्रह्मणैव मृत्योरन्तर्धत्तेऽन्तर्मृत्योर्धत्तेऽन्तरन्नाद्यादित्याहुरन्यामुपमुञ्चतेऽन्यां  
 नान्तरेव मृत्योर्धत्तेऽवान्नाद्यं रुद्धे नमस्ते हरसे शोचिष इत्याह  
 नमस्कृत्य हि वसीयां समुपचरन्त्य न्यं तै अस्मत्तपन्तु हेतय इत्याह  
 यमेव द्वेष्टि तमस्य शुचार्यति पावको अस्मभ्यं शिवो भवेत्याहान्नं वै  
 पावकोऽन्नमेवाव रुद्धे द्वाभ्यामधि क्रामति प्रतिष्ठित्या अपुस्यवतीभ्यां  
 शान्त्यै ॥४॥

नृषदे वडिति व्याघारयति पङ्कचाहुत्या यज्ञमुखमा रभतेऽद्वयाया  
 व्याघारयति तस्मादद्वयाया पशवोऽङ्गानि प्र हरन्ति प्रतिष्ठित्यै  
 यद्वषट्कुर्याद्यातयामास्य वषट्कारः स्याद्यन्न वषट्कुर्याद्रक्षांसि यज्ञं  
 हन्युर्वडित्याह पुरोऽन्नमेव वषट् करोति नास्य यातयामा वषट्कारो  
 भवति न यज्ञं रक्षांसि घ्नन्ति हुतादो वा अन्ये देवा अहुतादोऽन्ये  
 तानग्निचिदेवोभयान्प्रीणाति ये देवा देवानामिति दध्ना मधुमिश्रेणावोक्षति

हुतादश्चैव देवानहुतादश्च यजमानः प्रीणाति ते यजमानम्प्रीणन्ति दधैव  
हुतादः प्रीणाति मधुषाहुतादौ ग्राम्यं वा एतदन्नं यद्दध्यारण्यम्मधु यद्दध्ना  
मधुमिश्रेणावोक्षत्युभयस्यावरुद्धयै गुमुष्टिनावोक्षति प्राजापत्यो वै गुमुष्टिः  
संयोनित्वाय द्वाभ्याम्प्रतिष्ठित्या

अनुपरिचारमवोक्षत्यपरिवर्गमेवैनान्प्रीणाति वि वा एष प्राणैः प्रजया  
पशुभिर्त्र्यध्यते योऽग्निं चिन्वन्नधिक्रामति प्राणदा अपानदा इत्याह  
प्राणानेवात्मन्धत्ते वर्चोदा वरिवोदा इत्याह प्रजा वै वर्चः पशवो वरिवः  
प्रजामेव पशूनात्मन्धत्त इन्द्रो वृत्रमहन्तं वृत्रो हतः षोडशभिर्भोगैरसिनात्स  
एतामग्नयेऽनीकवत् आहृतिमपश्यत्तामजुहोत्तस्याग्निरनीकवान्त्स्वेन  
भागधेयेन प्रीतः षोडशधा वृत्रस्य भोगानप्यदहद्वैश्वकर्मणेन पाप्मनो  
निर्मुच्यत यद्ग्नयेऽनीकवत् आहृतिं जुहोत्यग्निरेवास्यानीकवान्त्स्वेन  
भागधेयेन प्रीतः पाप्मानमपि दहति वैश्वदर्मणेन पाप्मनो निर्मुच्यते  
यं कामयेत चिरम्पाप्मनो निर्मुच्येतेत्येकैकं तस्य जुहुयाच्चिरमेव पाप्मनो  
निर्मुच्यते यं कामयेत ताजक्पाप्मनो निर्मुच्येतेति सर्वाणि तस्यानुद्गत्य  
जुहुयात्ताजगेव पाप्मनो निर्मुच्यतेऽथो खलु नानैव सूक्ताभ्यां जुहोति  
नानैव सूक्तयोर्वीर्यं दधात्यथो प्रतिष्ठित्यै ॥५॥

उदेनमुत्तरां नयेति समिध आ दधाति यथा जनं यतेऽवसं करोति तादृगेव  
त तिस्र आ दधाति त्रिवृद्धा अग्निर्यावानेवाग्निस्तस्मै भागधेयं  
करोत्यौ दुम्बरीर्भवन्त्यूर्वा उदुम्बर ऊर्जमेवास्मा अपि दधात्यु दु त्वा  
विश्वे देवा इत्याह प्राणा वै विश्वे देवाः प्राणैरेवैनमुद्यच्छतेऽग्ने भरन्तु  
चित्तिभिरित्याह यस्मा एवैनं चित्तायोद्यच्छते तेनैवैनं समर्धयति पञ्च  
दिशो दैवीर्यज्ञमवन्तु देवीरित्याह दिशो ह्येषोऽनु प्रच्यवतेऽपामतिं

दुर्मतिम्बाधमाना इत्याह रक्षसामपहत्यै रायस्पोषे  
 यज्ञपतिमाभजन्तीरित्याह पशवो वै रायस्पोषः पशूनेवाव रुद्धे  
 षड्भिर्हरति षड्वा ऋतव ऋतुभिरेवैनं हरति द्वे परिगृह्यवती भवतो  
 रक्षसामपहत्यै सूर्यरश्मिर्हरिकेशः पुरस्तादित्याह प्रसूत्यै ततः पावका  
 आशिषो नो जुषन्तामित्याहान्नं वै पावकोऽन्नमेवाव रुद्धे देवासुराः  
 संयत्ता आसन्ते देवा एतदप्रतिरथमपश्यन्तेन वै तै  
 प्रत्यसुरानजयन्तदप्रतिरथस्याप्रतिरथत्वं यदप्रतिरथं द्वितीयो  
 होतान्वाहाप्रत्यैव तेन यजमानो भ्रातृव्याञ्जयत्यथो अनेभिजितमेवाभि  
 जयति दशर्चम्भवति दशाक्षरा विराड्विराजेमौ लोकौ  
 विधृतावनयौलोकयोर्विधृत्या अथो दशाक्षरा विराडन्नं  
 विराड्विराज्येवान्नाद्ये प्रति तिष्ठत्यसदिव वा  
 अन्तरिक्षमन्तरिक्षमिवाग्नीध्रमाग्नीध्रेऽश्मानं नि दधाति सत्त्वाय द्वाभ्यां  
 प्रतिष्ठित्यै विमान एष दिवो मध्य आस्त इत्याह व्यैवैतया मिमीते मध्ये  
 दिवो निहितः पृश्निरश्मेत्याहान्नं वै पृश्न्यन्नमेवाव रुद्धे चतसृभिरा  
 पुच्छादेति चत्वारि च्छन्दांसि च्छन्दोभिरेवेन्द्रं विश्वा अवीवृधन्नित्याह  
 वृद्धिमेवोपावर्तते वाजानांसि सत्पतिम्पतिमित्याहान्नं वै वाजोऽन्नमेवाव  
 रुद्धे सुम्रहूर्यज्ञो देवांसि आ च वक्षदित्याह प्रजा वै पशवः सुम्रम्रजामेव  
 पशूनात्मन्धत्ते यक्षदग्निर्देवो देवांसि आ च वक्षदित्याह स्वगाकृत्यै  
 वाजस्य मा प्रसवेनौद्ग्राभेणोद्ग्रभीदित्याहासौ वा आदित्य उद्यन्तुद्ग्राभ  
 एष निम्रोचन्नग्राभो ब्रह्मणैवात्मानमुद्गृह्णाति ब्रह्मणा भ्रातृव्यं नि गृह्णाति  
 ॥६॥

प्राचीमनु प्रदिशम्प्रेहि विद्वानित्याह देवलोकमेवैतयोपावर्तते

क्रमध्वमग्निना नाकमित्याहेमानेवैतया लोकान्क्रमते पृथिव्या  
 अहमुदन्तरिक्षमारुहमित्याहेमानेवैतया लोकान्त्समारौहति सुवयन्तो  
 नापैक्षन्त इत्याह सुवर्गमेवैतया लोकमेत्यग्ने प्रेहि प्रथमो  
 देवयतामित्याहोभयेष्वेवैतया देवमनुष्येषु चक्षुर्दधाति पञ्चभिरधि क्रामति  
 पाङ्क्तौ यज्ञो यावानेव यज्ञस्तेन सह सुवर्गं लोकमेति नक्तोषासेति  
 पुरोऽनुवाक्यामन्वाह प्रत्या अग्ने सहस्राक्षेत्याह साहस्रः प्रजापतिः  
 प्रजापतेराप्त्यै तस्मै ते विधेम वाजाय स्वाहेत्याहान्नं वै वाजोऽन्नमेवाव  
 रुन्दे दध्नः पूर्णामौदुम्बरीं स्वयमातृणायां जुहोत्यूर्वे दध्यूर्गुदुम्बरोऽसौ  
 स्वयमातृणामुष्यामेवोर्जं दधाति तस्मादमुतोऽर्वाचीमूर्जमुप  
 जीवामस्ति सृभिः सादयति त्रिवृद्धा अग्निर्यावानेवाग्निस्तम्प्रतिष्ठां  
 गमयति प्रेद्धौ अग्ने दीदिहि पुरो न इत्यौदुम्बरीमा दधात्येषा वै सूर्मी  
 कर्णकावत्येतया ह स्म वै देवा असुराणां शततर्हांस्तृहन्ति यदेतया  
 समिधमादधाति वज्रमेवैतच्छतघ्नीं यजमानो भ्रातृव्याय प्र हरति स्तृत्या  
 अच्छम्बट्कारं विधेम ते परमे जन्मन्नग्र इति वैकङ्कतीमा दधाति भा  
 एवाव रुन्दे तां सवितुर्वरेण्यस्य चित्रामिति शमीमयीं शान्त्या  
 अग्निर्वा ह वा अग्निचितं दुहेऽग्निचिद्वाग्निं दुहे तां सवितुर्वरेण्यस्य  
 चित्रामित्याहैष वा अग्नेर्दोहस्तमस्य कण्व एव श्रायसोऽवेत्तेन ह स्मैनुं  
 स दुहे यदेतया समिधमादधात्यग्निचिदेव तदग्निं दुहे सप्त तै अग्ने समिधः  
 सप्त जिह्वा इत्याह सप्तैवास्य साप्तानि प्रीणाति पूर्णया जुहोति पूर्ण इव हि  
 प्रजापतिः प्रजापतेराप्त्यै न्यूनया जुहोति न्यूनाद्धि प्रजापतिः प्रजा असृजत  
 प्रजानां सृष्ट्या अग्निर्देवेभ्यो निलायत स दिशोऽनु प्राविशज्जुह्वन्मनसा  
 दिशो ध्यायेद्दिग्भ्य एवैनमव रुन्दे दध्ना  
 पुरस्ताज्जुहोत्याज्येनोपरिष्ठात्तेजश्चैवास्मा इन्द्रियं च समीचीं दधाति

द्वादशकपालो वैश्वानरो भवति द्वादश मासाः संवत्सरः  
संवत्सरौऽग्निर्वैश्वानरः साक्षादेव वैश्वानरमव रुद्धे  
यत्प्रयाजानूयाजान्कुर्याद्विकेस्तिः सा यज्ञस्य दर्विहोमं करोति यज्ञस्य  
प्रतिष्ठित्यै राष्ट्रं वै वैश्वानरो विण्मरुतो वैश्वानरं हुत्वा मारुताञ्जुहोति राष्ट्र  
एव विश्वमनु बध्नात्यु चैर्वैश्वानरस्या श्रावयत्युपांशु मारुताञ्जुहोति  
तस्माद्वाष्ट्रं विश्वमति वदति मारुता भवन्ति मरुतो वै देवानां विशौ  
देवविशेनैवास्मै मनुष्यविशमव रुद्धे सप्त भवन्ति सप्तगणा वै मरुतो  
गणश एव विश्वमव रुद्धे गणेन गणमनुद्रुत्य जुहोति विश्वमेवास्मा  
अनुवर्तमानं करोति ॥७॥

वसोर्धारां जुहोति वसोर्मे धारासदिति वा एषा हूयते घृतस्य वा एनमेषा  
धारामुष्मिल्लोके पिन्वमानोप तिष्ठत आज्येन जुहोति  
तेजो वा आज्यं तेजो वसोर्धारा तेजसैवास्मै तेजोऽव रुद्धेऽथो कामा वै  
वसोर्धारा कामानेवाव रुद्धे यं कामयेत प्राणानस्यान्नाद्यं वि  
च्छिन्द्यामिति विग्राहं तस्य जुहुयात्प्राणानेवास्यान्नाद्यं वि च्छिनत्ति यं  
कामयेत प्राणानस्यान्नाद्यं सं तनुयामिति संततां तस्य  
जुहुयात्प्राणानेवास्यान्नाद्यं सं तनोति द्वादश द्वादशानि जुहोति द्वादश  
मासाः संवत्सरः संवत्सरेणैवास्मा अन्नमव रुद्धेऽन्नं च मेऽक्षुच्च म  
इत्याहैतद्वा अन्नस्य रूपं रूपेणैवान्नमव रुद्धेऽग्निश्च म आपश्च म  
इत्याहैषा वा अन्नस्य योनिः सयोन्येवान्नमव रुद्धेऽर्धेन्द्राणि जुहोति देवता  
एवाव रुद्धे यत्सर्वेषामर्धमिन्द्रः प्रति तस्मादिन्द्रो देवतानाम्भूयिष्ठभाक्तम्  
इन्द्रमुत्तरमाहेन्द्रियमेवास्मिन्नुपरिष्ठाद्धाति यज्ञायुधानि जुहोति यज्ञो वै  
यज्ञायुधानि यज्ञमेवाव रुद्धेऽथो एतद्वै यज्ञस्य रूपं रूपेणैव यज्ञमव



रुद्धेऽवभृथश्च मे स्वगाकारश्च म् इत्याह स्वगाकृत्या अग्निश्च मे घर्मश्च म्  
 इत्याहैतद्वै ब्रह्मवर्चसस्य रूपं रूपेणैव ब्रह्मवर्चसमव रुद्ध ऋक्च मे  
 सामं च म् इत्याहैतद्वै छन्दसां रूपं रूपेणैव च्छन्दांस्यव रुद्धे  
 गर्भाश्च मे वत्साश्च म् इत्याहैतद्वै पशूनां रूपं रूपेणैव पशूनव रुद्धे  
 कल्पाञ्जुहोत्यक्लृप्तस्य क्लृप्त्यै युग्मदयुजे जुहोति  
 मिथुनत्वायो त्तरावती भवतोऽभिक्रान्त्या एका च मे तिस्रश्च म् इत्याह  
 देवच्छन्दसं वा एका च तिस्रश्च मनुष्यच्छन्दसं चतस्रश्चाष्टौ च  
 देवच्छन्दसं चैव मनुष्यच्छन्दसं चाव रुद्ध आ त्रयस्त्रिंशतो जुहोति  
 त्रयस्त्रिंशद्वै देवता देवता एवाव रुद्ध आष्टाचत्वारिंशतो  
 जुहोत्यष्टाचत्वारिंशदक्षरा जगती जागताः पशवो  
 जगत्यैवास्मै पशूनव रुद्धे वाजश्च प्रसवश्चेति द्वादशं जुहोति द्वादश  
 मासाः संवत्सरः संवत्सर एव प्रति तिष्ठति ॥८॥

अग्निर्देवेभ्योऽपाक्रामद्भागधेयमिच्छमानस्तं देवा अब्रुवन्नुप न आ वर्तस्व  
 हव्यं नो वहेति सोऽब्रवीद्वरं वृणो मह्यमेव वाजप्रसवीयं जुहवन्निति  
 तस्माद्ग्रयै वाजप्रसवीयं जुहति यद्वाजप्रसवीयं जुहोत्यग्निमेव  
 तद्भागधेयै न समर्धयत्यथो अभिषेक एवास्य स चतुर्दशभिर्जुहोति सप्त  
 ग्राम्या ओषधयः सप्तारया उभयीषामवरुद्ध्या अन्नस्यान्नस्य  
 जुहोत्यन्नस्यान्नस्यावरुद्ध्या औदुम्बरेण स्रुवेण जुहोत्यूर्वा उदुम्बर  
 ऊर्गन्नमूर्जेवास्मा ऊर्जमन्नमव रुद्धेऽग्निर्वै  
 देवानामभिषिक्तोऽग्निचिन्मनुष्याणां तस्मादग्निचिद्वर्षति न धावे दवरुद्धं  
 ह्यस्यान्नमन्नमिव खलु वै वर्ष यद्वावेदन्नाद्याद्वावेदुपावर्तेतान्नाद्यमेवाभि  
 उपावर्तते नक्तोषासेति कृष्णायै श्वेतवत्सायै पर्यसा जुहोत्यह्वैवास्मै रात्रिं

प्र दापयति रात्रियाहरहोरात्रे एवास्मै प्रत्ते काममन्नाद्यं दुहाते राष्ट्रभृतौ  
जुहोति राष्ट्रमेवाव रुन्दे षड्भिर्जुहोति षड्वा ऋतव ऋतुष्वेव प्रति  
तिष्ठति भुवनस्य पत् इति रथमुखे पञ्चाहुतीर्जुहोति वज्रो वै रथो वज्रैरेव  
दिशोऽभि जयत्यग्निचितं ह वा अमुष्मिल्लोके वातोऽभि पवते  
वातनामानि जुहोत्यभ्येवैनमुष्मिल्लोके वातः पवते त्रीणि जुहोति त्रयं  
इमे लोका एभ्य एव लोकेभ्यो वातमव रुन्दे समुद्रौऽसि  
नभस्वानित्याहैतद्वै वातस्य रूपं रूपेणैव वातमव रुन्देऽञ्जलिना  
जुहोति न ह्येतेषामन्यथाहुतिरवकल्पते ॥६॥

सुवर्गाय वै लोकार्यं देवरथो युज्यते यत्राकूतार्यं मनुष्यरथ एष खलु वै  
देवरथो यदग्निं रग्निं युनक्ति शर्वसा घृतेनेत्याह युनक्त्येवैनं स एनं  
युक्तः सुवर्गं लोकमभि वहति यत्सर्वाभिः पञ्चभिर्युञ्ज्याद्युक्तौऽस्याग्निः  
प्रच्युतः स्यादप्रतिष्ठिता आहुतयः स्युरप्रतिष्ठिताः स्तोमा  
अप्रतिष्ठितान्युक्थानि तिसृभिः प्रातःसवनैऽभि मृशति त्रिवृद्वा  
अग्निर्यावानेवाग्निस्तं युनक्ति यथानसि युक्त आधीयत एवमेव  
तत्प्रत्याहुतयस्तिष्ठन्ति प्रति स्तोमाः प्रत्युक्थानि यज्ञायज्ञिर्यस्य स्तोत्रे  
द्वाभ्यामभि मृशत्येतावान्वै यज्ञो यावानग्निष्टोमो भूमा त्वा अस्यात ऊर्ध्वः  
क्रियते यावानेव यज्ञस्तमंततौऽन्वारोहति द्वाभ्यामप्रतिष्ठित्या  
एकयाप्रस्तुतम्भवत्यथाभि मृशत्युपैनमुत्तरो यज्ञो नमत्यथो संतत्यै प्र वा  
एषोऽस्माँल्लोकाच्चयवते योऽग्निं चिनुते न वा एतस्यानिष्टक आहुतिरव  
कल्पते यां वा एषोऽनिष्टक आहुतिं जुहोति स्रवति वै सा तां स्रवन्तीं  
यज्ञोऽनु परा भवति यज्ञं यजमानो यत्पुनश्चितिं चिनुत  
आहुतीनामप्रतिष्ठित्यै प्रत्याहुतयस्तिष्ठन्ति न यज्ञः पराभवति न

यजमानोऽष्टावुपं दधात्यष्टाक्षरा गायत्री गायत्रेणैवैनं छन्दसा चिनुते  
 यदेकादश त्रैष्टुभेन यद्द्वादश जागतेन च्छन्दोभिरेवैनं चिनुते नपात्को वै  
 नामैषोऽग्निर्यत्पुनश्चितिर्य एवं विद्वान्पुनश्चितिं चिनुत आ  
 तृतीयात्पुरुषादन्नमत्ति  
 यथा वै पुनराधेय एवम्पुनश्चितिर्योऽग्न्याधेयेन नर्धोति स पुनराधेयमा धत्ते  
 योऽग्निं चित्वा नर्धोति स पुनश्चितिं चिनुते यत्पुनश्चितिं चिनुत ऋद्ध्या  
 अथो खल्वाहुर्न चेतव्येति रुद्रो वा एष यद्ग्निर्यथा व्याघ्रं सुप्तम्बोधयति  
 तादृगेव तदथो खल्वाहुश्चेतव्येति यथा वसीयां सम्भागधेयेन बोधयति  
 तादृगेव तन्मनुरग्निमचिनुत तेन नार्धोत्स एताम्पुनश्चितिमपश्यत्तामचिनुत  
 तथा वै स आर्धोद्यत्पुनश्चितिं चिनुत ऋद्धयै ॥१०॥

छन्दश्चितं चिन्वीत पशुकामः पशवो वै छन्दांसि पशुमानेव भवति  
 श्येनचितं चिन्वीत सुवर्गकामः श्येनो वै वयसाम्पतिष्ठः श्येन एव भूत्वा  
 सुवर्गं लोकम्पतति कङ्कचितं चिन्वीत यः कामयेत  
 शीर्षगवानमुष्मिल्लोके स्यामिति शीर्षगवानेवामुष्मिल्लोके  
 भवत्यलज्चितं चिन्वीत चतुःसीतम्प्रतिष्ठाकामश्चतस्रो दिशो दिक्ष्वैव  
 प्रति तिष्ठति प्रउगचितं चिन्वीत भ्रातृव्यवान्प्रैव भ्रातृव्यानुदत उभयतः  
 प्रउगं चिन्वीत यः कामयेत प्रजातान्भ्रातृव्यानुदेय प्रतिजनिष्यमाणानिति  
 प्रैव जातान्भ्रातृव्यानुदते प्रति जनिष्यमाणान्नथचक्रचितं चिन्वीत  
 भ्रातृव्यवान्वज्रो वै रथो वज्रमेव भ्रातृव्येभ्यः प्र हरति द्रोणचितं  
 चिन्वीतान्नकामो द्रोणे वा अन्नम्भ्रियते सयोन्येवान्नमव रुद्धे समूहं  
 चिन्वीत पशुकामः पशुमानेव भवति परिचाय्यं चिन्वीत ग्रामकामो  
 ग्राम्यैव भवति श्मशानचितं चिन्वीत यः कामयेत पितृलोक ऋधुयामिति

पितृलोक एवर्धोति विश्वामित्रजमदग्नी वसिष्ठेनास्पर्धेताँ स एता  
जमदग्निर्विहृव्या अपश्यत्ता उपाधत्ता ताभिर्वै स वसिष्ठस्येन्द्रियं  
वीर्यमवृङ्क्ते यद्विहृव्या उपदधातीन्द्रियमेव ताभिर्वीर्यं यजमानो भ्रातृव्यस्य  
वृङ्क्ते होतुर्धिष्णिय उप दधाति यजमानायतनं वै होता स्व एवास्मा  
आयतन इन्द्रियं वीर्यमव रुन्दे द्वादशोप दधाति द्वादशाक्षरा जगती  
जागताः पशवो जगत्यैवास्मै पशूनव रुन्देऽष्टावष्टावन्येषु धिष्णियेषुप  
दधात्यष्टाशफाः पशवः पशूनेवाव रुन्दे षण्माजर्जालीये षड्वा ऋतव  
ऋतवः खलु वै देवाः पितरं ऋतूनेव देवान्पितृन्प्रीणाति ॥११॥

पवस्व वाजसातय इत्यनुष्टुक्प्रतिपद्भवति तिस्रोऽनुष्टुभश्चतस्रो गायत्रियो  
यत्तिस्रोऽनुष्टुभस्तस्मादश्वस्त्रिभिस्तिष्ठँस्तिष्ठति यच्चतस्रो  
गायत्रियस्तस्मात्सर्वाँश्चतुरः पदः प्रतिदधत्पलायते परमा वा एषा  
छन्दसां यदनुष्टुक्परमश्चतुष्टोमः स्तोमानां परमस्त्रिरात्रो यज्ञानां परमोऽश्वः  
पशूनां परमेणैवैनम्परमतां गमयत्ये कविँशमहर्भवति यस्मिन्नश्वं  
आलभ्यते द्वादश मासाः पञ्चतवस्त्रय इमे लोका असावादित्य  
एकविँश एष प्रजापतिः प्राजापत्योऽश्वस्तमेव साक्षादृधोति शक्वरयः  
पृष्ठम्भवन्त्यन्यदन्त्यच्छन्दोऽन्येन्ये वा एते पशव आ लभ्यन्त उतेव ग्राम्या  
उतेवारणया यच्छक्वरयः पृष्ठम्भवन्त्यश्वस्य सर्वत्वाय  
पार्थुरश्मम्ब्रह्मसामम्भवति रश्मिना वा अश्वो यत ईश्वरो वा  
अश्वोऽयतोऽप्रतिष्ठितः पराम्परावतं गन्तोर्यत्पार्थुरश्मम्ब्रह्मसामम्भवत्यश्वस्य  
यत्यै धृत्यै संकृत्यच्छावाकसामम्भवत्युत्सन्नयज्ञो वा एष यदश्वमेधः  
कस्तद्वेदेत्याहुर्यदि सर्वो वा क्रियते न वा सर्व इति  
संकृत्यच्छावाकसामम्भवत्यश्वस्य सर्वत्वाय पर्याप्त्या अनन्तरायाय

सर्वस्तोमोऽतिरात्र उत्तममहर्भवति सर्वस्याप्त्यै सर्वस्य जित्यै सर्वमेव  
तेनाप्रोति सर्वं जयति ॥१२॥

इति पञ्चमकारण्डे चतुर्थः प्रपाठकः ४

अथ पञ्चमकारण्डे पञ्चमः प्रपाठकः ५

यदेकैः सँस्थापयति यज्ञस्य संतत्या अविच्छेदायैन्द्राः पशवो ये  
मुष्करा यदैन्द्राः सन्तोऽग्निभ्यं आ लभ्यन्ते देवताभ्यः समदं  
दधात्याग्नेयीस्त्रिष्टुभौ याज्यानुवाक्याः कुर्याद्यदाग्नेयीस्तेनाग्नेया  
यत्त्रिष्टुभस्तेनैन्द्राः समृद्धयै न देवताभ्यः समदं दधाति वायवे नियुत्वते  
तूपरमा लभते तेजोऽग्नेर्वायुस्तेजस एष आ लभ्यते  
तस्माद्यद्रियं वायुर्वाति तद्रियं इन्द्रिर्दहति स्वमेव तत्तेजोऽन्वेति यन्न  
नियुत्वते स्यादुन्माद्येद्यजमानो नियुत्वते भवति यजमानस्यानुन्मादाय  
वायुमतीं श्वेतवती याज्यानुवाक्यै भवतः सतेजस्त्वायं  
हिरण्यगर्भः समवर्तताग्र इत्याघारमा घारयति प्रजापतिर्वै हिरण्यगर्भः  
प्रजापतेरनुरूपत्वाय सर्वाणि वा एष रूपाणि पशूनाम्प्रत्या लभ्यते  
यच्छर्मश्रुणस्तत्पुरुषाणाँ रूपं यत्तूपरस्तदश्वानां यदन्यतोदन्तद्रवां यदव्या  
इव शफास्तदवीनां यदजस्तदजानां वायुर्वै पशूनाम्प्रियं धाम् यद्वायुव्यौ  
भवत्येतमेवैनमुभि संजानानाः पशव उप तिष्ठन्ते वायुव्यः कार्याः  
प्राजापत्याः इत्याहुर्यद्वायुव्यं कुर्यात्प्रजापतेरियाद्यत्प्राजापत्यं  
कुर्याद्वायोरियाद्यद्वायुव्यः पशुर्भवति तेन वायोर्नैति यत्प्राजापत्यः  
पुरोडाशो भवति तेन प्रजापतेर्नैति यद्द्वादशकपालस्तेन  
वैश्वानुरान्नैत्यां ग्रावैष्णवमेकादशकपालं निर्वपति दीक्षिष्यमाणोऽग्निः  
सर्वा देवता विष्णुर्यज्ञो देवताश्चैव यज्ञं चा रभतेऽग्निरवमो देवतानां

विष्णाः परमो यदाग्रावैष्णवमेकादशकपालं निर्वपति देवता एवोभयतः  
परिगृह्य यजमानोऽव रुद्धे पुरोडाशेन वै देवा अमुष्मिल्लोक  
आर्ध्वञ्चरुणास्मिन्यः कामयेतामुष्मिल्लोक ऋधुयामिति स पुरोडाशं  
कुर्वीतामुष्मिन्नेव लोक ऋधोति यदष्टाकपालस्तेनाग्नेयो यत्त्रिकपालस्तेन  
वैष्णवः समृद्धये यः कामयेतास्मिल्लोक ऋधुयामिति स चरुं  
कुर्वीताग्नेर्घृतं विष्णोस्तरडुलास्तस्माञ्चरुः कार्योस्मिन्नेव लोक  
ऋधोत्या दित्यो भवतीयं वा अदितिरस्यामेव प्रति तिष्ठत्यथौ  
अस्यामेवाधि यज्ञं तनुते यो वै संवत्सरमुख्यमभृत्वाग्निं चिनुते यथा  
सामि गर्भोऽवपद्यते तादृगेव तदार्तिमाच्छेद्वैश्वानरं  
द्वादशकपालम्पुरस्तान्ननिर्वपेत्संवत्सरो वा अग्निर्वैश्वानरो यथा  
संवत्सरमाप्त्वा काल आगते विजायत एवमेव संवत्सरमाप्त्वा काल  
आगतेऽग्निं चिनुते नार्तिमाच्छेत्येषा वा अग्नेः प्रिया तनूर्यद्वैश्वानरः  
प्रियामेवास्य तनुवमव रुद्धे त्रीण्येतानि हवीँषि भवन्ति त्रय इमे लोका  
एषां लोकानाँ रोहाय ॥१॥

प्रजापतिः प्रजाः सृष्ट्वा प्रेणानु प्राविशत्ताभ्यः पुनः सम्भवितुं  
नाशक्नोत्सोऽब्रवीदध्रवदित्स यो मेऽतः पुनः संचिनवदिति तं देवाः  
समचिन्वन्ततो वै त आर्ध्वन्यत्समचिन्वन्तच्चित्यस्य चित्यत्वं य एवं  
विद्वानग्निं चिनुत ऋधोत्येव कस्मै कमग्निश्चीयत इत्याहुरग्निवानसानीति  
वा अग्निश्चीयतेऽग्निवानेव भवति कस्मै कमग्निश्चीयत इत्याहुर्देवा मा  
वेदन्निति वा अग्निश्चीयते विदुरेनं देवाः कस्मै कमग्निश्चीयत  
इत्याहुर्गृह्यसानीति वा अग्निश्चीयते गृह्यैव भवति कस्मै कमग्निश्चीयत  
इत्याहुः पशुमानसानीति वा अग्निश्चीयते पशुमानेव भवति कस्मै

कमग्निश्चीयतु इत्याहुः सप्त मा पुरुषा उप जीवानिति वा अग्निश्चीयते त्रयः  
 प्राञ्चस्त्रयः प्रत्यञ्च आत्मा सप्तम एतावन्त एवैनमुष्मिल्लोक उप  
 जीवन्ति प्रजापतिरग्निमचिकीषत तम्पृथिव्यब्रवीन्न मय्यग्निं चेष्यसेति मा  
 धदयति सा त्वातिदह्यमाना वि धविष्ये स पापीयान्भविष्यसीति  
 सौऽब्रवीत्तथा वा अहं करिष्यामि यथा त्वा नातिधदयतीति स  
 इमामभ्यमृशत्प्रजापतिस्त्वा सादयतु तथा देवतयाङ्गिरस्वद्ध्रुवा  
 सीदेतीमामेवेष्टकां कृत्वोपाधत्तानतिदाहाय यत्प्रत्यग्निं चिन्वीत तदभि  
 मृशेत्प्रजापतिस्त्वा सादयतु तथा देवतयाङ्गिरस्वद्ध्रुवा  
 सीदेतीमामेवेष्टकां कृत्वोप धत्तेऽनतिदाहाय प्रजापतिरकामयतु प्र  
 जायेयेति स एतमुख्यमपश्यत् संवत्सरमभिभस्ततो वै स प्राजायतु  
 तस्मात्संवत्सरम्भार्यः प्रैव जायते तं वसवोऽब्रुवन् त्वमजनिष्ठा वयम्प्र  
 जायामहा इति तं वसुभ्यः प्रायच्छत् त्रीण्यहान्यबिभरुस्तेन त्रीणि च  
 शतान्यसृजन्त त्रयस्त्रिंशत् च तस्मात्सहस्रम्भार्यः प्रैव जायते  
 तान्नुद्रा अब्रुवन् यूयमजनिद्वं वयम्प्र जायामहा इति तं रुद्रेभ्यः  
 प्रायच्छन्त षडहान्यबिभरुस्तेन त्रीणि च शतान्यसृजन्त त्रयस्त्रिंशत् च  
 तस्मात्षडहस्रम्भार्यः प्रैव जायते तानादित्या अब्रुवन् यूयमजनिद्वं वयं प्र  
 जायामहा इति तमादित्येभ्यः प्रायच्छन्त द्वादशाहान्यबिभरुस्तेन त्रीणि च  
 शतान्यसृजन्त त्रयस्त्रिंशत् च तस्माद्द्वादशाहस्रम्भार्यः प्रैव जायते तेन वै  
 ते सहस्रमसृजन्तोखां सहस्रतमीं य एवमुख्यं साहस्रं वेद प्र  
 सहस्रम्पशूनाप्रोति ॥ २॥

यजुषा वा एषा क्रियते यजुषा पच्यते यजुषा वि मुच्यते यदुखा सा वा  
 एषैतर्हि यातयाम्नी सा न पुनः प्रयुज्येत्याहुरग्रे युद्धवा हि ये तव युद्धवा

हि देवहृतमाँ इत्युखायां जुहोति तेनैवैनाम्पुनः प्र युङ्क्ते तेनायातयाम्नी यो  
वा अग्निं योग् आगते युनक्ति युङ्क्ते युञ्जानेष्वग्रे युद्धवा हि ये तव युद्धवा  
हि देवहृतमाँ इत्याहैष वा अग्नेर्योग्स्तेनैवैनं युनक्ति युङ्क्ते युञ्जानेषु  
ब्रह्मवादिनो वदन्ति न्यङ्ङिश्चैतव्याः उक्तानाः इति वयसां वा एष  
प्रतिमया चीयते यदग्निर्यन्नयन्नं चिनुयात्पृष्टित एनमाहुतय ऋच्छेयुर्यदुत्तानं  
न पतितुँ शक्नुयादसुवर्ग्योऽस्य स्यत्प्राचीनमुत्तानं पुरुषशीर्षमुप दधाति  
मुखत एवैनमाहुतय ऋच्छन्ति नोत्तानं चिनुते सुवर्ग्योऽस्य भवति सौर्या  
जुहोति चक्षुरेवास्मिन्प्रति दधाति द्विर्जुहोति द्वे हि चक्षुषी समान्या  
जुहोति समानँ हि चक्षुः समृद्धयै देवासुराः संयत्ता आसन्ते वामं वसु  
सं न्यदधत् तद्देवा वामभृतावृञ्जत् तद्वामभृतौ वामभृत्त्वं  
यद्वामभृतमुपदधाति वाममेव तया वसु यजमानो भ्रातृव्यस्य वृङ्क्ते  
हिरण्यमूर्ध्नी भवति ज्योतिर्वै हिरण्यं ज्योतिर्वामं ज्योतिषैवास्य  
ज्योतिर्वामं वृङ्क्ते द्वियजुर्भवति प्रतिष्ठित्यै ॥३॥

आपो वरुणस्य पत्न्य आसन्ता अग्निरभ्यध्यायत्ताः समभवत्तस्य रेतः  
परापत्तदियमभवद्यदिद्वितीयम्परापत्तदसार्वभवदियं वै विराडसौ  
स्वराड्यद्विराजावुपदधातीमे एवोप धत्ते यद्वा असौ रेतः सिञ्चति  
तदस्याम्प्रति तिष्ठति तत्प्र जायते ता ओषधयो वीरुधौ भवन्ति ता  
अग्निरंति य एवं वेद् प्रैव जायतेऽन्नादो भवति यो रेतस्वी स्यात्प्रथमायां  
तस्य चित्यामुभे उप दध्यादिमे एवास्मै समीची रेतः सिञ्चतो यः  
सिक्तरैताः स्यात्प्रथमायां तस्य चित्यामन्यामुप दध्यादुत्तमायामन्याँ रेतं  
एवास्यं सिक्तमाभ्यामुभयतः परि गृह्णाति संवत्सरं न कञ्चन प्रत्यवरोहेन्न  
हीमे कं च न प्रत्यवरोहतस्तदेनयोर्वृतं यो वा अपशीर्षाणमग्निं



चिनुतेऽपशीर्षामुष्मिल्लोके भवति यः सशीर्षाणं चिनुते  
 सशीर्षामुष्मिल्लोके भवति चित्तिं जुहोमि मनसा घृतेन यथा देवा  
 इहागमन्वीतिहोत्रा ऋतावृधः समुद्रस्य वयुनस्य पत्नञ्जुहोमि विश्वकर्मणे  
 विश्वाहामर्त्यं हवि रिति स्वयमातृरणामुपधाय जुहोत्येतद्वा अग्नेः शिरः  
 सशीर्षाणमेवाग्निं चिनुते सशीर्षामुष्मिल्लोके भवति य एवं वेद सुवर्गाय  
 वा एष लोकाय चीयते यदग्निस्तस्य यदयथापूर्वं क्रियतेऽसुवर्ग्यमस्य  
 तत्सुवर्ग्योऽग्निश्चित्तमुपधायामि मृशे च्चि त्तिमचित्तिं चिनवद्वि  
 विद्वान्पृष्ठेवं वीता वृजिना च मर्तान्नाये च नः स्वपत्याय देव दितिं च  
 रास्वादितिमुरुष्येति यथापूर्वमेवैनामुप धत्ते प्राञ्चमेनं चिनुते सुवर्ग्योऽस्य  
 भवति ॥४॥

विश्वकर्मा दिशाम्पतिः स नः पशून्पातु सौऽस्मान्पातु तस्मै नमः प्रजापती  
 रुद्रो वरुणोऽग्निर्दिशाम्पतिः स नः पशून्पातु सौऽस्मान्पातु तस्मै नम एता  
 वै देवता एतेषाम्पशूनामधिपतयस्ताभ्यो वा एष आ वृश्चयते यः  
 पशुशीर्षायुपदधाति हिरण्येष्टका उप दधात्येताभ्य एव देवताभ्यो  
 नमस्करोति ब्रह्मवादिनो वदन्त्यग्नौ ग्राम्यान्पशून् दधाति  
 शुचारणयानर्पयति किं तत् उच्छिषतीति यद्विरण्येष्टका उपदधात्यमृतं  
 वै हिरण्यममृतैव ग्राम्येभ्यः पशुभ्यो भेषजं करोति नैनान्हिनस्ति प्राणो  
 वै प्रथमा स्वयमातृरणा व्यानो द्वितीयापानस्तृतीयानु प्राणयात्प्रथमा  
 स्वयमातृरणामुपधाय प्राणेनैव प्राणं समर्धयति व्यन्यादिद्वितीयामुपधाय  
 व्यानेनैव व्यानं समर्धयत्यपान्यात्तृतीयामुपधायानेनैवापानं  
 समर्धयत्यथो प्राणैरेवै न समिन्द्रे भूर्भुवः सुवरिति स्वयमातृरणा उप  
 दधातीमे वै लोकाः स्वयमातृरणा एताभिः खलु वै व्याहृतीभिः

प्रजापतिः प्राजायत यदेताभिव्याहृतीभिः स्वयमातृरणा उ॑प॒दधा॑ती॒माने॒व  
लो॒कानु॑प॒धायै॑षु लो॒केष्वधि॑ प्र जायते प्राणाय व्यानाया पानाय वाचे  
त्वा चक्षुषे त्वा तया देवतयाङ्गिरस्वद्ध्रुवा सीदा ग्निना वै देवाः सुव॒र्गं  
लो॒कम॑जिगा॑सन्तेन पतितुं नाशक्नुवन्त एताश्चतस्रः स्वयमातृरणा  
अपश्यन्ता दिक्षूपादधत् तेन सर्वतश्चक्षुषा सुव॒र्गं लो॒कमा॑य॒न्यच्च॑तस्रः  
स्वयमातृरणा दिक्षूपदधाति सर्वतश्चक्षुषैव तद्ग्निना यजमानः सुव॒र्गं  
लो॒कमे॑ति ॥५॥

अग्र आ याहि वीतय इत्याहाह्वतैवैनमग्निं दूतं वृणीमह इत्याह हुत्वैवैनं  
वृणीतेऽग्निनाग्निः समिध्यत इत्याह समिद्ध एवैनमग्निर्वृत्राणि  
जङ्घनदित्याह समिद्ध एवास्मिन्निन्द्रियं दधात्यग्नेः स्तोमम्मनामह इत्याह  
मनुत एवैनं मेतानि वा अह्नां॑ रूपाण्यन्वहमेवैनं चिनुतेऽवाह्नां॑  
रूपाणि रुद्धे ब्रह्मवादिनो वदन्ति कस्मात्सत्याद्यातयाम्नीरन्या इष्टका  
अयातयाम्नी लोकम्पृणेत्यैन्द्राग्नी हि बार्हस्पत्येति ब्रूयादिन्द्राग्नी च हि  
देवानाम्बृहस्पतिश्चायातयामानोऽनुचरवती भवत्यजामित्वायानुष्टुभानुं  
चरत्यात्मा वै लोकम्पृणा प्राणोऽनुष्टुप्तस्मात्प्राणः सर्वाण्यङ्गान्यनु चरति ता  
अस्य सूददोहस इत्याह तस्मात्परुषिपरुषि रसः सोमं॑ श्रीणन्ति पृश्नय  
इत्याहान्नं वै पृश्नयन्नमेवाव रुद्धेऽको वा अग्निक्रोऽन्नमन्नमेवाव रुद्धे  
जन्मन्देवानां विशस्त्रिष्वा रौचने दिव इत्याहेमानेवास्मै  
लो॒काञ्ज॑योतिष्मतः करोति यो वा इष्टकानाम्प्रतिष्ठां वेद प्रत्येव तिष्ठति  
तया देवतयाङ्गिरस्वद्ध्रुवा सीदेत्याहैषा वा इष्टकानाम्प्रतिष्ठा य एवं वेद  
प्रत्येव तिष्ठति ॥६॥

सुवर्गाय वा एष लोकार्य चीयते यदग्निर्वज्र एकादशिनी  
यद्ग्रावैकादशिनीमिनुयाद्वज्रैणैः सुवर्गाल्लोकादन्तर्दध्याद्यन्न  
मिनुयात्स्वरुभिः पशून्यर्धयेदेकयूपमिनोति नैनं वज्रैण  
सुवर्गाल्लोकादन्तर्दधाति न स्वरुभिः पशून्यर्धयति वि वा एष इन्द्रियेण  
वीर्येणर्धयते योऽग्निं चिन्वन्नधि क्रामत्यैन्द्रियर्चा क्रमणम्प्रतीष्टकामुप  
दध्यान्नेन्द्रियेण वीर्येण व्यृध्यते रुद्रो वा एष यदग्निस्तस्य तिस्रः शरव्याः  
प्रतीची तिरश्चयनूची ताभ्यो वा एष आ वृश्चयते योऽग्निं चिनुतैऽग्निं  
चित्वा तिसृधन्वमयाचितम्ब्राह्मणाय दद्यात्ताभ्य एव नमस्करोत्यतिथो  
ताभ्य एवात्मानं निष्क्रीणीते यत्तै रुद्र पुरो धनुस्तद्वातो अनु वातु ते तस्मै ते  
रुद्र संवत्सरेण नमस्करोमि यत्तै रुद्र दक्षिणा धनुस्तद्वातो अनु वातु ते  
तस्मै ते रुद्र परिवत्सरेण नमस्करोमि यत्तै रुद्र पश्चाद्धनुस्तद्वातो अनु वातु  
ते तस्मै ते रुद्रेदावत्सरेण नमस्करोमि यत्तै रुद्रोत्तराद्धनुस्तद्वातो अनु वातु  
ते तस्मै ते रुद्रेदुवत्सरेण नमस्करोमि यत्तै रुद्रोपरि धनुस्तद्वातो अनु वातु  
ते तस्मै ते रुद्र वत्सरेण नमस्करोमि रुद्रो वा एष यदग्निः स यथा व्याघ्रः  
क्रुद्धस्तिष्ठत्येवं वा एष एतर्हि संचितमेतैरुप तिष्ठते नमस्कारैरेवैनं  
शमयति यैऽग्रयः पुरीष्याः प्रविष्टाः पृथिवीमनु ।

तेषां त्वमस्युत्तमः प्र णौ जीवातवे सुव ॥

आपं त्वाग्ने मनसापं त्वाग्ने तपसापं त्वाग्ने दीक्षयापं त्वाग्ने उपसद्भि रापं  
त्वाग्ने सुत्ययापं त्वाग्ने दक्षिणाभिरापं त्वाग्नेऽवभृथेनापं त्वाग्ने वशयापं  
त्वाग्ने स्वगाकारेणेत्याहैषा वा अग्नेराग्निस्तयैवैनमाप्नोति ॥७॥

गायत्रेण पुरस्तादुप तिष्ठते प्राणमेवास्मिन्दधाति बृहद्रथंतराभ्याम्पक्षावोजं  
एवास्मिन्दधात्यृतुस्थायज्ञायज्ञियैः पुच्छमृतुष्वेव प्रति तिष्ठति पृष्ठैरुप

तिष्ठते तेजो वै पृष्ठानि तेज एवास्मिन्दधाति प्रजापतिरग्निमसृजत्  
सोऽस्मात्सृष्टः पराङ्गैत्तं वारवन्तीयैनावारयत् तद्वारवन्तीयस्य  
वारवन्तीयत्वँ श्यैतेन श्येती अकुरुत् तच्छ्यैतस्य श्यैतत्वं  
यद्वारवन्तीयैनोपतिष्ठते वारयत एवैनँ श्यैतेन श्येती कुरुते  
प्रजापतेर्हृदयेनापिपक्षम्प्रत्युप तिष्ठते प्रेमाणमेवास्य गच्छति प्राच्यां त्वा  
दिशा सादयामि गायत्रेण च्छन्दसाग्निना देवतयाग्नेः शीष्णाग्नेः शिर उप  
दधामि दक्षिणया त्वा दिशा सादयामि त्रैष्टुभेन च्छन्दसेन्द्रेण देवतयाग्नेः  
पक्षेणाग्नेः पक्षमुप दधामि प्रतीच्यां त्वा दिशा सादयामि जागतेन  
च्छन्दसा सवित्रा देवतयाग्नेः पुच्छैनाग्नेः पुच्छमुप दधाम्यु दीच्यां त्वा  
दिशा सादयाम्यानुष्टुभेन च्छन्दसा मित्रावरुणाभ्यां देवतयाग्नेः पक्षेणाग्नेः  
पक्षमुप दधाम्यु ध्वयां त्वा दिशा सादयामि पाङ्केन च्छन्दसा  
बृहस्पतिना देवतयाग्नेः पृष्ठेनाग्नेः पृष्ठमुप दधामि यो वा अपात्मानमग्निं  
चिनुतेऽपात्मानमुष्मिल्लोके भवति यः सात्मानं चिनुते सात्मानमुष्मिल्लोके  
भवत्यात्मेष्टका उप दधात्येष वा अग्नेरात्मा सात्मानमेवाग्निं चिनुते  
सात्मानमुष्मिल्लोके भवति य एवं वेद ॥८॥

अग्रं उदधे या त इषुर्युवा नाम तथा नो मृड तस्यास्ते नमस्तस्यास्त उप  
जीवन्तो भूयास्माग्ने दुध गह्य किँशिल वन्य या त इषुर्युवा नाम तथा  
नो मृड तस्यास्ते नमस्तस्यास्त उप जीवन्तो भूयास्म पञ्च वा एतेऽग्नयो  
यच्चितय उदधिरेव नाम प्रथमो दुधो द्वितीयो गह्यस्तृतीयः  
किँशिलश्चतुर्थो वन्यः पञ्चमस्तेभ्यो यदाहृतीर्न जुहुयादध्वर्यु च यजमानं  
च प्र दहेयुर्यदेता आहृतीर्जुहोति भाग्धेयेनैवैनाञ्छमयति  
नार्तिमार्च्छत्यध्वर्युर्न यजमानो वाङ् आसन्नसोः प्राणोऽद्योश्चक्षुः कर्णयोः

श्रोत्रम्बाहुवोर्बलमूरुवोरोजोऽरिष्टा विश्वान्यङ्गानि तनूः तनुवा मे सह  
 नमस्ते अस्तु मा मा हिंसीरप वा एतस्मात्प्राणाः क्रामन्ति योऽग्निं  
 चिन्वन्नधिक्रामति वाङ् आसन्नसोः प्राण इत्याह प्राणानेवात्मन्धत्ते यो रुद्रो  
 अग्नौ यो अप्सु य ओषधीषु यो रुद्रो विश्वा भुवनाविवेश तस्मै रुद्राय नमो  
 अस्त्वा हतिभागा वा अन्ये रुद्रा हविर्भागा अन्ये शतरुद्रीयं हुत्वा  
 गावीधुकं चरुमेतेन यजुषा चरमायामिष्टकायां नि दध्याद्भागधेयैनेवैनं  
 शमयति तस्य त्वै शतरुद्रीयं हुतमित्याहुर्यस्यैतदग्नौ क्रियत इति  
 वसवस्त्वा रुद्रैः पुरस्तात्पान्तु पितरस्त्वा यमराजानः पितृभिर्दक्षिणतः  
 पान्त्वा दित्यास्त्वा विश्वैर्देवैः पश्चात्पान्तु द्युतानस्त्वा मारुतो  
 मरुद्भिरुत्तरतः पातु देवास्त्वेन्द्रज्येष्ठा वरुणराजानोऽधस्ताच्चोपरिष्ठाञ्च  
 पान्तु न वा एतेन पूतो न मेध्यो न प्रोक्षितो यदेनमतः प्राचीनम्प्रोक्षति  
 यत्संचितमाज्येन प्रोक्षति तेन पूतस्तेन मेध्यस्तेन प्रोक्षितः ॥६॥

समीची नामासि प्राची दिक्तस्यास्तेऽग्निरधिपतिरसितो रक्षिता  
 यश्चाधिपतिर्यश्च गोप्ता ताभ्यां नमस्तौ नो मृडयतां ते यं द्विष्मो यश्च नो  
 द्वेष्टि तं वां जम्भै दधाम्यो जस्विनी नामासि दक्षिणा दिक्तस्यास्त  
 इन्द्रोऽधिपतिः पृदाकुः प्राची नामासि प्रतीची दिक्तस्यास्ते सोमोऽधिपतिः  
 स्वजोऽवस्थावा नामास्युदीची दिक्तस्यास्ते  
 वरुणोऽधिपतिस्तिरश्चराजि रधिपती नामासि बृहती दिक्तस्यास्ते  
 बृहस्पतिरधिपतिः श्वित्रो वशिनी नामासीयं दिक्तस्यास्ते यमोऽधिपतिः  
 कल्माषग्रीवो रक्षिता यश्चाधिपतिर्यश्च गोप्ता ताभ्यां नमस्तौ नो मृडयतां ते  
 यं द्विष्मो यश्च नो द्वेष्टि तं वां जम्भै दधाम्ये ता वै देवता अग्निं चितं  
 रक्षन्ति ताभ्यो यदाहुतीर्न जुहुयादध्वर्यु च यजमानं च ध्यायेयुर्यदेता

आहुतीर्जुहोति भागधेयेनैवैनाञ्छमयति नार्तिमाच्छत्यध्वर्युर्न यजमानो  
हेतयो नाम स्थ तेषां वः पुरो गृहा अग्निर्व इषवः सलिलो निलिम्पा नाम  
स्थ तेषां वो दक्षिणा गृहाः पितरो व इषवः सर्गरो वज्रिणो नाम स्थ तेषां  
वः पश्चाद्गृहाः स्वप्रौ व इषवो गह्वरोऽवस्थावानो नाम स्थ तेषां व  
उत्तराद्गृहा आपो व इषवः समुद्रोऽधिपतयो नाम स्थ तेषां व उपरि गृहा  
वर्ष व इषवोऽवस्वान्क्रव्या नाम स्थ पार्थिवास्तेषां व इह गृहा अन्नं व  
इषवोऽनिमिषो वातनामं तेभ्यो वो नमस्ते नो मृडयत

ते यं द्विष्मो यश्च नो द्वेष्टि तं वो जम्भे दधामि हुतादो वा अन्ये देवा  
अहुतादोऽन्ये तानग्निचिदेवोभयान्प्रीणाति दध्ना मधुमिश्रेणैता  
आहुतीर्जुहोति भागधेयेनैवैनान्प्रीणात्यथो खल्वाहुरिष्टका वै देवा  
अहुताद् इत्यनुपरिक्रामं जुहोत्यपरिवर्गमेवैनान्प्रीणाती म॑ स्तनमूर्जस्वन्तं  
धयापाम्प्रघ्यातमग्ने सरिरस्य मध्ये ।

उत्सं जुषस्व मधुमन्तमूर्व समुद्रिय॑ सदन्मा विशस्व ॥

यो वा अग्निम्प्रयुज्य न विमुञ्चति यथाश्वो युक्तोऽविमुच्यमानः  
क्षुध्यन्पराभवंत्येवमस्याग्निः परा भवति तम्पराभवंतं यजमानोऽनु परा  
भवति सौऽग्निं चित्वा लूक्तो भवतीम॑ स्तनमूर्जस्वन्तं  
धयापामित्याज्यस्य पूर्णा॑ स्तुचं जुहोत्येष वा अग्नेर्विमोको  
विमुच्यैवास्मा अन्नमपि दधाति तस्मादाहुर्यश्चैवं वेद् यश्च न सुधाय॑ ह  
वै वाजी सुहितो दधातीत्यग्निर्वाव वाजी तमेव तत्प्रीणाति स एनम्प्रीतः  
प्रीणाति वसीयान्भवति ॥१०॥

इन्द्राय राज्ञे सूकरो वरुणाय राज्ञे कृष्णो यमाय राज्ञे ऋश्यं ऋषभाय राज्ञे  
गवयः शार्दूलाय राज्ञे गौरः पुरुषराजाय मर्कटः क्षिप्रश्येनस्य वर्तिका

नीलङ्गोः क्रिमिः सोमस्य राज्ञः कुलुङ्गः सिन्धोः शिञ्जुमारौ हिमवतो  
हस्ती ॥११॥

मयुः प्राजापत्य ऊलो हलीक्ष्णो वृषदशस्ते धातुः सरस्वत्यै शारिः  
श्येता पुरुषवाक्सरस्वते शुकः श्येतः पुरुषवा गारगयोऽजो नकुलः शका  
ते पौष्णा वाचे क्रौञ्चः ॥१२॥

अपां नष्ट्रै जषो नाक्रो मकरः कुलीकयस्तेऽकूपारस्य वाचे पैङ्गराजो  
भगाय कुषीतक आती वाहसो दर्विदा ते वायव्या दिग्भ्यश्चक्रवाकः  
॥१३॥

बलायाजगर आखुः सृजया शयणडकस्ते मैत्रा मृत्यवेऽसितो मन्यवे  
स्वजः कुम्भीनसः पुष्करसादो लौहिताहिस्ते त्वाष्ट्राः प्रतिश्रुत्कायै वाहसः  
॥१४॥

पुरुषमृगश्चन्द्रमसे गोधा कालका दारवाघाटस्ते वनस्पती नामेणयद्वे कृष्णो  
रात्रियै पिकः द्विवङ्का नीलशीर्ष्णी तैऽर्यम्णे धातुः कत्कटः ॥१५॥

सौरी बलाक शर्यो मयूरः श्येनस्ते गन्धर्वाणां वसूनां कपिञ्जलो रुद्राणां  
तित्तिरी रोहित्कुरङ्गणाची गोलत्तिका ता अप्सरसा मरगयाय सृमरः  
॥१६॥

पृषतो वैश्वदेवः पित्वो न्यङ्कुः कशस्तेऽनुमत्या अन्यवापोऽर्धमासानां

मा॒सां क॒श्यपः॑ क्वयिः कु॒टरु॑र्दात्यौह॒स्ते सि॒नीवा॒ल्यै बृ॒हस्प॑तये शि॒त्पु॒टः  
॥१७॥

शका॑ भौ॒मी पा॒न्त्रः कशौ॑ मा॒न्थील॒वस्ते॑ पि॒तृणा॑ मृ॒तूनां॑ जह॒का  
सं॒वत्स॒राय॒ लोपा॑ क॒पोत् उ॒लूकः॑ श॒शस्ते॑ नै॒ऋताः॑  
कृ॒क॒वाकुः॑ सा॒वित्रः॑ ॥१८॥

रू॒रु रौ॒द्रः कृ॒कला॑सः श॒कुनिः॑ पि॒प्पका॑ ते श॒र॒व्यायै॑  
ह॒रि॒णो मा॑रु॒तो ब्र॒ह्म॒णे शा॒र्ग स्त॒रक्षुः॑ कृ॒ष्णः श्वा॑ च॒तुर॒क्षो ग॑र्द॒भस्त  
इ॒तर॒ज॒नाना॑ म॒ग्रये॑ धू॒ङ्गणा॑ ॥१९॥

अ॒ल॒ज अ॒न्तरि॑क्ष उ॒द्रो म॒द्गुः प्ल॒वस्ते॑ऽपा म॒दित्यै॑ ह॒स॒साचि॑ रि॒न्द्रा॒ग्यै  
की॒र्शा गृ॒ध्रः शि॒तिकृ॒क्षी वा॑र्ध्रा॒णस॑स्ते दि॒व्या द्या॑वापृ॒थिव्या॑ श्वा॒वित्  
॥२०॥

सु॒पर्णः॑ पा॒र्जन्यो॑ ह॒सो वृ॒को वृ॒षद॒शस्त॑ ऐ॒न्द्रा  
अ॒पामु॒द्रोऽर्य॑म्णे लौ॒पाशः॑ सि॒हो न॑कु॒लो व्या॒घ्रस्ते॑ म॒हेन्द्रा॑य॒ कामा॑य॒  
प॒र॒स्वान् ॥२१॥

आ॒ग्नेयः॑ कृ॒ष्णा॒ग्रीवः॑ सा॒रस्व॒ती मे॒षी ब॒भ्रुः सौ॒म्यः पौ॒ष्णः श्या॑मः  
शि॒तिपृ॒ष्ठो बा॑र्हस्प॒त्यः शि॒ल्पो वै॑श्वदे॒व ऐ॒न्द्रोऽरु॑णो मा॒रुतः॑ क॒ल्मा॑ष  
ऐ॒न्द्रा॒ग्नः सं॑हि॒तौऽधो॑रामः सा॒वित्रो॑ वा॒रुणः॑ पे॒त्वः ॥२२॥



अश्वस्तूपरो गौमृगस्ते प्राजापत्या आग्नेयौ कृष्णग्रीवौ त्वाष्ट्रौ लौमशसुक्थौ  
शितिपृष्ठौ बार्हस्पत्यौ धात्रे पृषोदरः सौर्यो बलक्षः पेट्वः ॥ २३ ॥

अग्रयेऽनीकवते रोहिताञ्जिरनड्वा नधोरांमौ सावित्रौ पौष्णौ रजतनाभी  
वैश्वदेवौ पिशङ्गौ तूपरौ मारुतः कल्मार्ष आग्नेयः कृष्णोऽजः सारस्वती  
मेधी वारुणः कृष्ण एकशितिपात्पेट्वः ॥ २४ ॥

इति पञ्चमकाराडे पञ्चमः प्रपाठकः ५

अथ पञ्चमकाराडे षष्ठः प्रपाठकः ६

हिरण्यवर्णाः शुचयः पावका यासु जातः कश्यपो यास्विन्द्रः । अग्निं  
गर्भं दधिरे विरूपास्ता न आपः शं स्योना भवन्तु ॥  
यासां राजा वरुणो याति मध्ये सत्यानृते अवपश्यञ्जनानाम् । मधुश्चुतः  
शुचयो याः पावकास्ता न आपः शं स्योना भवन्तु ॥  
यासां देवा दिवि कृण्वन्ति भक्षं या अन्तरिक्षे बहुधा भवन्ति । याः  
पृथिवीम्पर्यसोऽन्दन्ति शुक्रास्ता न आपः शं स्योना भवन्तु ॥  
शिवेन मा चक्षुषा पश्यतापः शिवया तनुवोऽप स्पृशत त्वचम्मे ।  
सर्वां अग्नींरप्सुषदौ हुवे वो मयि वर्चो बलमोजो नि धत्त ॥  
यद्ददः सम्प्रयतीरहावनदता हते । तस्मादा नद्यो नाम स्थ ता वो  
नामानि सिन्धवः ॥  
यत्प्रेषिता वरुणेन ताः शीभं समवल्गत ।  
तदाप्रोदिन्द्रौ वो यतीस्तस्मादापो अनु स्थन ॥  
अपकामं स्यन्दमाना अवीवरत वो हिकम् । इन्द्रौ वः  
शक्तिभिर्देवीस्तस्माद्धारणाम वो हितम् ॥

एको दे॒वो अ॒प्यतिष्ठ॑स्य॒न्दमाना॑ यथाव॒शम् । उ॒दानि॑षु॒र्महीरि॑ति  
तस्मा॑दु॒दकमु॑च्यते ॥

आपो॑ भ॒द्रा घृ॒तमि॑दाप॒ आसुर॑ग्री॒षोमौ॑ बिभ्र॒त्याप॒ इत्ताः । ती॒व्रो रसो॑  
मधु॒पृचा॑मरं॒गम आ॑ मा॒ प्राणे॑न॒ सह॑ वर्चसा॒ गन् ॥  
आदि॑त्प॒श्याम्यु॑त वा॒ शृणो॑म्या॒ मा घोषो॑ गच्छति॒ वाङ्मन॑ आसाम् । मन्यै  
भेजा॒नो अ॒मृत॑स्य॒ तर्हि॑ हिर॒ण्यव॑र्णा॒ अतृ॑पं॒ यदा॑ वः॥  
आपो॑ हि॒ ष्ठा म॑यो॒भुव॑स्ता न॒ ऊर्जे॑ द॒धात॑न । म॒हे र॑णाय॒ चक्ष॑से ॥  
यो वः॑ शि॒वत॑मो॒ रस॑स्तस्य॒ भाज॑यते॒ह नः॑ । उ॒शती॑रि॒व मा॑तरः ॥  
तस्मा॑ अ॒रं ग॑माम॒ वो यस्य॑ क्षया॒य जि॑न्वथ । आपो॑ ज॒नय॑था च नः ॥  
दि॒वि श्र॑यस्वा॒न्तरि॑क्षे यतस्व॒ पृथि॒व्या स॑म्भव॒ ब्रह्म॑वर्च॒सम॑सि  
ब्रह्म॑वर्च॒साय॑ त्वा ॥१॥

अ॒पां ग्र॑हा॒न्गृह्णा॑त्ये॒तद्वा॑व॒ राज॑सू॒यं य॑दे॒ते ग्र॑हाः॒ स॒वोऽग्नि॑र्व॒रुण॑स॒वो  
रा॒ज॒सू॒यम॑ग्नि॒स॒वश्चित्य॑स्ताभ्या॒मेव॑ सू॒यते॑ऽथो॒ उ॒भावे॑व॒ लोका॑व॒भि ज॑यति  
यश्च॑ रा॒ज॒सू॒येने॑जा॒नस्य॑ यश्चा॒ग्नि॒चित् आपो॑ भव॒न्त्यापो॑ वा अ॒ग्नेर्भा॑तृ॒व्या  
यद॒पोऽग्ने॑र॒धस्ता॑दु॒प॒दधा॑ति॒ भ्रातृ॑व्या॒भिभू॑त्यै॒ भव॑त्या॒त्मना॑ परा॒स्य भ्रातृ॑व्यो  
भव॑त्य॒मृतं॑ वा आप॒स्तस्मा॑द॒द्भिर॑व॒तान्त॑म॒भि षिञ्च॑न्ति॒ नार्ति॑मा॒र्च्छति॑  
सर्व॑मा॒रु॒रेति॑ यस्यै॒ता उ॑प॒धी॒यन्ते॑ य उ॑ चै॒ना ए॒वं वेदा॑ न्नं वा आपः॒ प॒शव॑  
आपो॑ऽन्न॒म्प॒शवो॑ऽन्ना॒दः प॑शु॒मान्भव॑ति॒ यस्यै॒ता उ॑प॒दी॒यन्ते॑ य उ॑ चै॒ना ए॒वं  
वेद॑ द्वा॒दश॑ भवन्ति॒ द्वा॒दश॑ मा॒साः सं॑वत्स॒रः सं॑वत्स॒रेणै॑वास्मा॒ अन्न॑मव॒  
रु॒द्धे पा॒त्राणि॑ भवन्ति॒ पात्रे॑ वा अ॒न्नम॑द्यते॒ सयो॑न्ये॒वान्न॑मव॒ रु॒द्ध आ  
द्वा॒दशा॑त्पुरु॒षा॒दन्न॑म॒त्यथो॑ पा॒त्रान्न॑ च्छि॒द्यते॑ यस्यै॒ता उ॑प॒धी॒यन्ते॑ य उ॑ चै॒ना  
ए॒वं वेद॑ कु॒म्भाश्च॑ कु॒म्भीश्च॑ मिथु॒नानि॑ भवन्ति॒ मिथु॑नस्य॒ प्रजा॑त्यै॒ प्र प्र॑जया॒

पशुभिर्मिथुनैर्जायते यस्यैता उपधीयन्ते य उ चैना एवं वेद शुग्वा अग्निः  
 सौध्वर्यु यजमानम्प्रजाः शुचार्पयति यदप उपदधाति शुचमेवास्य  
 शमयति नार्तिमाच्छत्यध्वर्युर्न यजमानः शाम्यन्ति प्रजा यत्रैता  
 उपधीयन्तेऽपां वा एतानि हृदयानि यदेता आपो यदेता अप उपदधाति  
 दिव्याभिरेवैनाः सꣳ सृजति वर्षुकः पर्जन्यो भवति यो वा  
 एतासामायतनं क्लृप्तं वेदायतनवान्भवति कल्पतेऽस्मा अनुसीतमुप  
 दधात्येतद्वा आसामायतनमेषा क्लृप्तं र्य एवं वेदायतनवान्भवति  
 कल्पतेऽस्मै द्वंद्वमन्या उप दधाति चतस्रो मध्ये धृत्या अन्नं वा इष्टका  
 एतत्खलु वै साक्षादन्नं यदेष चरुयदेतं चरुमुपदधाति साक्षादे वास्मा  
 अन्नमव रुद्धे मध्यत उप दधाति मध्यत एवास्मा अन्नं दधाति  
 तस्मान्मध्यतोऽन्नमद्यते बार्हस्पत्यो भवति ब्रह्म वै  
 देवानाम्बृहस्पतिर्ब्रह्मणैवास्मा अन्नमव रुद्धे ब्रह्मवर्चसमसि ब्रह्मवर्चसाय  
 त्वेत्याह तेजस्वी ब्रह्मवर्चसी भवति यस्यैष उपधीयते य उ चैनमेवं वेद  
 ॥ २ ॥

भूतेष्टका उप दधात्यत्रात्र वै मृत्युर्जायते यत्रयत्रैव मृत्युर्जायते तत  
 एवैनमव यजते तस्मादग्निचित्सर्वमायुरेति सर्वे ह्यस्य  
 मृत्यवोऽवेष्टास्तस्मादग्निचिन्नाभिचरित्वै प्रत्यगैनमभिचारः स्तृणुते सूयते  
 वा एष योऽग्निं चिनुते देवसुवामेतानि हवीꣳषि भवत्येतावन्तो वै  
 देवानाꣳ सुवास्त एवास्मै सुवान्प्र यच्छन्ति त एनꣳ सुवन्ते  
 सुवोऽग्निर्वरुणसुवो राजसूर्यम्ब्रह्मसुवश्चित्यो देवस्य त्वा सवितुः प्रसुव  
 इत्याह सवितृप्रसूत एवैनम्ब्रह्मणा देवताभिरभि षिञ्चत्यन्नस्यान्नस्याभि  
 षिञ्चत्यन्नस्यान्नस्यावरुद्ध्यै पुरस्तात्प्रत्यञ्चमभि षिञ्चति पुरस्ताद्धि

प्रतीचीनमन्नमद्यते शीर्षतोऽभि षिञ्चति शीर्षतो ह्यन्नमद्यत आ  
 मुखादन्ववस्त्रावयति मुखत एवास्मा अन्नाद्यं दधात्यग्नेस्त्वा  
 साम्राज्येनाभि षिञ्चामीत्याहैष वा अग्नेः स्वस्तेनैवैनमभि षिञ्चति  
 बृहस्पतेस्त्वा साम्राज्येनाभि षिञ्चामीत्याह ब्रह्म वै  
 देवानाम्बृहस्पतिर्ब्रह्मणैवैनमभि षिञ्चतीन्द्रस्य त्वा साम्राज्येनाभि  
 षिञ्चामीत्याहेन्द्रियमेवास्मिन्नुपरिष्ठादधात्येतद्वै राजसूर्यस्य रूपं य एवं  
 विद्वानग्निं चिनुत उभावेव लोकावभि जयति यश्च राजसूर्येनेजानस्य  
 यश्चाग्निचित इन्द्रस्य सुषुवाणस्य दशधेन्द्रियं वीर्यम्परापतत्तद्देवाः  
 सौत्रामण्या समभरन्सूयते वा एष योऽग्निं चिनुतेऽग्निं चित्वा सौत्रामण्या  
 यजेतेन्द्रियमेव वीर्यं सम्भृत्यात्मन्धत्ते ॥३॥

सजूरब्दोऽयावभिः सजूरुषा अरुणीभिः सजूः सूर्य एतशेन सजोषावश्विना  
 दसौभिः सजूरग्निर्वैश्वानर इडाभिघृतेन स्वाहा संवत्सरो वा अब्दो मासा  
 अयावा उषा अरुणीः सूर्य एतश इमे अश्विना संवत्सरोऽग्निर्वैश्वानरः  
 पशव इडा पशवो घृतं संवत्सरम्पशवोऽनु प्र जायन्ते संवत्सरेणैवास्मै  
 पशून्प्र जनयति दर्भस्तम्बे जुहोति यद्वा अस्या अमृतं यद्वीर्यं  
 तद्दर्भास्तस्मिञ्जुहोति प्रैव जायतेऽन्नादो भवति यस्यैवं जुह्वत्येता वै देवता  
 अग्नेः पुरस्ताद्भाग्नास्ता एव प्रीणात्यथो चक्षुरेवाग्नेः पुरस्तात्प्रति  
 दधात्यनन्धो भवति य एवं वेदा पो वा इदमग्रे सलिलमासीत्स  
 प्रजापतिः पुष्करपर्णे वातौ भूतौऽलेलायत्सः प्रतिष्ठां नाविन्दत स एतदपां  
 कुलायमपश्यत्तस्मिन्नग्निमचिनुत तदियमभवत्ततो वै स  
 प्रत्यतिष्ठ द्याम्पुरस्तादुपादधात्तच्छिरोऽभवत्सा प्राची दिग्वां दक्षिणत  
 उपादधात्स दक्षिणः पक्षौऽभवत्सा दक्षिणा

दिग्याम्पश्चादुपादधात्तत्पुच्छमभवत्सा प्रतीची दिग्यामुत्तरत उपादधात्स  
उत्तरः पक्षौऽभवत्सोदीची दिग्यामुपरिष्ठादुपादधात्तत्पृष्ठमभवत्सोर्ध्वा  
दि गियम्वा अग्निः पञ्चैष्टकस्तस्माद्यदस्यां खनन्त्यभीष्टकां तृन्दन्त्यभि  
शर्कराँ सर्वा वा इयं वयोभ्यो नक्तं दृशे दीप्यते तस्मादिमां वयाँसि  
नक्तं नाध्यासते य एवं विद्वानग्निं चिनुते प्रत्येव तिष्ठत्यभि दिशौ  
जयत्याग्नेयो वै ब्राह्मणस्तस्माद्ब्राह्मणाय सर्वासु दिक्ष्वर्धुकँ स्वामेव  
तद्दिशमन्वेत्यपां वा अग्निः कुलायं तस्मादापोऽग्निँ हारुकाः स्वामेव  
तद्योनिम्प्र विशन्ति ॥४॥

संवत्सरमुख्यम्भृत्वा द्वितीये संवत्सर आग्नेयमष्टाकपालं  
निर्वपेद्वैन्द्रमेकादशकपालं वैश्वदेवं द्वादशकपालम्बार्हस्पत्यं चरुं वैष्णवं  
त्रिकपालं तृतीये संवत्सरेऽभिजिता यजेत यदष्टाकपालो भवत्यष्टाक्षरा  
गायत्र्याग्नेयं गायत्रम्प्रातःसवनं प्रातःसवनमेव तेन दाधार गायत्रीं छन्दो  
यदेकादशकपालो भवत्येकादशाक्षरा त्रिष्टुगैन्द्रं त्रैष्टुभ्रम्माध्यंदिनँ सर्वनं  
माध्यंदिनमेव सर्वनं तेन दाधार त्रिष्टुभ्रं छन्दो यद्द्वादशकपालो भवति  
द्वादशाक्षरा जगती वैश्वदेवं जागतं तृतीयसवनं तृतीयसवनमेव तेन  
दाधार जगतीं छन्दो यद्बार्हस्पत्यश्चरुर्भवति ब्रह्म वै देवानाम्बृहस्पतिर्ब्रह्मैव  
तेन दाधार यद्वैष्णवस्त्रिकपालो भवति यज्ञो वै विष्णुर्यज्ञमेव तेन दाधार  
यत्तृतीये संवत्सरेऽभिजिता यजेतेऽभिजित्यै यत्संवत्सरमुख्यम्बिभर्तीममेव  
तेन लोकँ स्पृणोति यद्द्वितीये संवत्सरेऽग्निं चिनुतेऽन्तरिक्षमेव तेन  
स्पृणोति यत्तृतीये संवत्सरे यजेतेऽमुमेव तेन लोकँ स्पृणोत्ये तं वै परं  
आट्णारः कक्षीवाँ औशिजो वीतहव्यः श्रायसस्त्रसदस्युः पौरुकुत्स्यः  
प्रजाकामा अचिन्वत ततो वै ते सहस्रँ सहस्रम्पुत्रानविन्दन्त प्रथते

प्रजयां पशुभिस्ताम्मात्रामाप्नोति यां तेऽगच्छन्त्य एव विद्वानेतमग्निं चिनुते  
॥५॥

प्रजापतिरग्निमचिनुत् स क्षुरपविर्भूत्वातिष्ठत्तं देवा बिभ्यंतो नोपायन्ते  
छन्दोभिरात्मानं छादयित्वोपायन्तच्छन्दसां छन्दस्त्वं ब्रह्म वै छन्दांसि  
ब्रह्मण एतद्रूपं यत्कृष्णाजिनं कार्ष्णी उपानहावुपं मुञ्चते हन्दोभिरेवात्मानं  
छादयित्वाग्निमुपं चरत्यात्मनोऽहिंसायै देवनिधिर्वा एष नि धीयते  
यदग्निरन्ये वा वै निधिमगुप्तं विन्दन्ति न वा प्रति प्र जानात्युखामा  
क्रामत्यात्मानमेवाधिपां कुरुते गुप्त्या अथो खल्वाहुर्नाक्रम्येति नैर्ऋत्युखा  
यदाक्रमेन्निर्ऋत्या आत्मानमपि दध्यात्तस्मान्नाक्रम्यां पुरुषशीर्षमुपं दधाति  
गुप्त्या अथो यथा ब्रूयादेतन्मै गोपायेति तादृगेव तत्प्रजापतिर्वा  
अथर्वाग्निरेव दध्यङ्ङाथर्वणस्तस्येष्टका अस्थान्येतं ह वाव  
तदृषिरभ्यनूवाचेन्द्रो दधीचो अस्थभिरिति यदिष्टकाभिरग्निं चिनोति  
सात्मानमेवाग्निं चिनुते सात्मानुष्मिल्लोके भवति य एवं वेद शरीरं वा  
एतदग्नेर्यच्चित्यं आत्मा वैश्वानरो यच्चिते वैश्वानरं जुहोति शरीरमेव  
संस्कृत्याभ्यारोहति शरीरं वा एतद्यजमानः संस्कुरुते यदग्निं चिनुते  
यच्चिते वैश्वानरं जुहोति शरीरमेव संस्कृत्यात्मनाभ्यारोहति तस्मात्तस्य  
नावं द्यन्ति जीवन्नेव देवानप्येति वैश्वानर्यर्चा पुरीषमुपं दधातीयं वा  
अग्निर्वैश्वानरस्तस्यैषा चित्तिर्यत्पुरीषमग्निमेव वैश्वानरं चिनुत एषा वा अग्नेः  
प्रिया तनूर्यद्वैश्वानरः प्रियामेवास्यं तनुवमव रुद्धे ॥६॥

अग्नेर्वै दीक्षयां देवा विराजमाप्नुवन्तिस्त्रो रात्रीर्दीक्षितः स्यात्त्रिपदा  
विराड्विराजमाप्नोति षड्रात्रीर्दीक्षितः स्यात्षड्वा ऋतवः संवत्सुरः

संवत्सरो विराड्विराजमाप्रोति दश रात्रीर्दीक्षितः स्याद्दशाक्षरा  
 विराड्विराजमाप्रोति द्वादश रात्रीर्दीक्षितः स्याद्द्वादश मासाः संवत्सरः  
 संवत्सरो विराड्विराजमाप्रोति त्रयोदश रात्रीर्दीक्षितः स्यात्त्रयोदश  
 मासाः संवत्सरः संवत्सरो विराड्विराजमानोति पञ्चदश रात्रीर्दीक्षितः  
 स्यात्पञ्चदश वा अर्धमासस्य रात्रयोऽर्धमासशः संवत्सर आप्यते  
 संवत्सरो विराड्विराजमाप्रोति सप्तदश रात्रीर्दीक्षितः स्याद्दद्वादश मासाः  
 पञ्चतवः स संवत्सरः संवत्सरो विराड्विराजमाप्रोति चतुर्विंशतिं  
 रात्रीर्दीक्षितः स्याच्चतुर्विंशतिरर्धमासाः संवत्सरः संवत्सरो  
 विराड्विराजमाप्रोति त्रिंशत् रात्रीर्दीक्षितः स्यात्त्रिंशदक्षरा  
 विराड्विराजमाप्रोति मासं दीक्षितः स्याद्यो मासः स संवत्सरः संवत्सरो  
 विराड्विराजमाप्रोति चतुरौ मासो दीक्षितः स्याच्चतुरो वा एतम्मासो  
 वसवोऽबिभरुस्ते पृथिवीमाजयन्गायत्रीं छन्दोऽष्टौ  
 रुद्रास्तेऽन्तरिक्षमाजयन्त्रिष्टुभं छन्दो द्वादशादित्यास्ते दिवमाजयञ्जगतीं  
 छन्दस्ततो वै ते व्यावृत्तमगच्छच्छ्रेष्ठ्यं देवानां तस्माद्द्वादश मासो  
 भृत्वाग्निं चिन्वीत् द्वादश मासाः संवत्सरः  
 संवत्सरौऽग्निश्चित्यस्तस्याहोरात्राणीष्टका आप्तेष्टकमेनं चिनुतेऽथौ  
 व्यावृत्तमेव गच्छति श्रेष्ठ्यं समानानाम् ॥७॥

सुवर्गाय वा एष लोकार्यं चीयते यद्गिस्तं  
 यन्नान्वारोहैत्सुवर्गाल्लोकाद्यजमानो हीयेत पृथिवीमाक्रमिषम्प्राणो मा मा  
 हासीदन्तरिक्षमाक्रमिषम्प्राजा मा मा हासीद्विद्वमाक्रमिषं  
 सुवरगन्मेत्याहैष वा अग्नेरन्वारोहस्तेनैवैनमन्वारोहति सुवर्गस्य लोकस्य  
 समष्ट्यै यत्पक्षसम्मिताम्मिनुयात्कनीयांसं

यज्ञक्रतुमुपैयात्पापीयस्यस्यात्मनः प्रजा स्याद्वेदिसम्मिताम्मिनोति  
 ज्यायाँसमेव यज्ञक्रतुमुपैति नास्यात्मनः पापीयसी प्रजा भवति साहस्रं  
 चिन्वीत प्रथमं चिन्वानः सहस्रसम्मितो वा अयं लोक इममेव लोकमभि  
 जयति द्विषाहस्रं चिन्वीत द्वितीयं चिन्वानो द्विषाहस्रं वा  
 अन्तरिक्षमन्तरिक्षमेवाभि जयति त्रिषाहस्रं चिन्वीत तृतीयं चिन्वानः  
 त्रिषाहस्रो वा असौ लोकौऽमुमेव लोकमभि जयति जानुदघ्नं चिन्वीत  
 प्रथमं चिन्वानो गायत्रियैवेमं लोकमभ्यारोहति नाभिदघ्नं चिन्वीत द्वितीयं  
 चिन्वानस्त्रिष्टुभैवान्तरिक्षमभ्यारोहति ग्रीवदघ्नं चिन्वीत तृतीयं चिन्वानो  
 जगत्त्रैवामुं लोकमभ्यारोहति नाग्निं चित्वा रामामुपैयादयोनौ रेतौ  
 धास्यामीति न द्वितीयं चित्वान्यस्य स्त्रियमुपैयान्न तृतीयं चित्वा कां  
 चनोपैयाद्रेतो वा एतन्नि धत्ते यदग्निं चिनुते यदुपैयाद्रेतसा व्यध्येताथो  
 खल्वाहरप्रजस्यं तद्यन्नोपैयादिति यद्रेतःसिचावुपदधाति ते एव  
 यजमानस्य रेतौ बिभृतस्तस्मादुपैयाद्रेतसोऽस्कन्दाय त्रीणि वाव रेताँसि  
 पिता पुत्रः पौत्रो यदद्वे रेतःसिचावुपदध्याद्रेतोऽस्य विच्छिन्द्यात्तिस्त्र उप  
 दधाति रेतसः संतत्या इयं वाव प्रथमा रेतःसिग्वाग्वा इयं  
 तस्मात्पश्यन्तीमाम्पश्यन्ति वाचं वदन्तीमन्तरिक्षं द्वितीया प्राणो वा  
 अन्तरिक्षं तस्मान्नान्तरिक्षम्पश्यन्ति न प्राणमसौ तृतीया चक्षुर्वा असौ  
 तस्मात्पश्यन्त्यमूमपश्यन्ति चक्षु र्यजुषेमां चामूं चोप दधाति मनसा  
 मध्यमामेषां लोकानां क्लृप्त्या अथौ प्राणानां मिष्टो यज्ञो भृगुभिराशीर्दा  
 वसुभि स्तस्य त इष्टस्य वीतस्य द्रविणेह भक्षीये त्याह स्तुतशस्त्रे  
 एवैतेन दुहे पिता मातरिश्वाच्छिद्रा पदा धा अच्छिद्रा उशिजः पदानु तक्षुः  
 सोमो विश्ववित्रेता नैषद्वृहस्पतिरुक्थामदानि शँसिषदित्याहैतद्वा  
 अग्नेरुक्थं तेनैवैनमनु शँसति ॥८॥



सूयते वा एषोऽग्नीनां य उखायाम्भ्रियते यदधः सादयेद्गर्भाः प्रपादुकाः  
 स्युरथो यथा सवात्प्रत्यवरोहति तादृगेव तदासन्दी सादयति गर्भाणां  
 धृत्या अप्रपादायाथौ सवमेवैनं करोति गर्भो वा एष यदुख्यो योनिः  
 शिक्यं यच्छिक्यादुखां निरूहेद्योनेर्गर्भं निर्हग्यात्षडुद्यामँ शिक्यम्भवति  
 षोढाविहितो वै पुरुष आत्मा च शिरश्च चत्वार्यङ्गान्यात्मन्नेवैनम्बिभर्ति  
 प्रजापतिर्वा एष यदग्निस्तस्योखा चोलूखलं च स्तनौ तारस्य प्रजा उप  
 जीवन्ति यदुखां चोलूखलं चोपदधाति ताभ्यामेव  
 यजमानोऽमुष्मिल्लोकैऽग्निं दुहे संवत्सरो वा एष यदग्निस्तस्य  
 त्रेधाविहिता इष्टकाः प्राजापत्या वैष्णवीवैश्वकर्माणीरहोरात्रागयेवास्य  
 प्राजापत्या यदुख्यम्बिभर्ति प्राजापत्या एव तदुप धत्ते यत्समिधं  
 आदधाति वैष्णवा वै वनस्पतयो वैष्णवीरेव तदुप धत्ते यदिष्टकाभिरग्निं  
 चिनोतीयं वै विश्वकर्मा वैश्वकर्माणीरेव तदुप धत्ते तस्मादाहुस्त्रिवृदग्निरिति  
 तं वा एतं यजमान एव चिन्वीत् यदस्यान्यश्चिनुयाद्यत्तं दक्षिणाभिर्न  
 राधयेदग्निमस्य वृञ्जीत् योऽस्याग्निं चिनुयात्तं दक्षिणाभी राधयेदग्निमेव  
 तत्स्पृणोति ॥६॥

प्रजापतिरग्निमचिनुतर्तुभिः संवत्सरं वसन्तेनैवास्य पूर्वार्धमचिनुत ग्रीष्मेण  
 दक्षिणम्पक्षं वर्षाभिः पुच्छँ शरदोत्तरम्पक्षँ हैमन्तेन मध्यं ब्रह्मणा वा  
 अस्य तत्पूर्वार्धमचिनुत क्षत्रेण दक्षिणम्पक्षं पशुभिः पुच्छँ  
 विशोत्तरम्पक्षमाशया मध्यं य एवं विद्वानग्निं चिनुत ऋतुभिरैवैनं  
 चिनुतेऽथौ एतदेव सर्वमव रुद्धे श्रुगवन्त्येनमग्निं चिक्यानमत्पन्नँ रोचत  
 इयं वाव प्रथमा चित्तिरोषधयो वनस्पतयः पुरीषमन्तरिक्षं द्वितीया

वयाँसि पुरीषमसौ तृतीया नक्षत्राणि पुरीषं यज्ञश्चतुर्थी दक्षिणा पुरीषं  
यजमानः पञ्चमी प्रजा पुरीषं यत्रिचितीकं चिन्वीत यज्ञं  
दक्षिणामात्मानम्प्रजामन्तरीयात्तस्मात्पञ्चचितीकश्चेतव्य एतदेव सर्वं  
स्पृणोति यत्तिस्त्रश्चितयः त्रिवृद्धयग्निर्यद्वे द्विपाद्यजमानः प्रतिष्ठित्यै पञ्च  
चितयो भवन्ति पाङ्कः पुरुष आत्मानमेव स्पृणोति पञ्च चितयो भवन्ति  
पञ्चभिः पुरीषैर्भ्यूहति दश सम्पद्यन्ते दशाक्षरो वै पुरुषो यावानेव  
पुरुषस्तं स्पृणोत्यथो दशाक्षरा विराडन्नं विराड्विराज्येवान्नाद्ये प्रति  
तिष्ठति संवत्सरो वै षष्ठी चित्त्रितवः पुरीषं षट्चितयो भवन्ति  
षट्पुरीषाणि द्वादश सम्पद्यन्ते द्वादश मासाः संवत्सरः संवत्सर एव प्रति  
तिष्ठति ॥१०॥

रोहितो धूम्ररोहितः कर्कन्धुरोहितस्ते प्राजापत्या बभ्रुररुणबभ्रुः शुक्बभ्रुस्ते  
रौद्राः श्येतः श्येताक्षः श्येतग्रीवस्ते पितृदेवत्या स्तिस्त्रः कृष्णा वशा  
वारुण्यं स्तिस्त्रः श्वेता वशाः सौर्यो मैत्राबार्हस्पत्या धूम्रललामास्तूपराः  
॥११॥

पृश्निस्तिस्त्रीनपृश्निरूर्ध्वपृश्निस्ते मारुताः फल्गूलोहितोर्णी बलक्षी ताः  
सारस्वत्यः पृषती स्थूलपृषती क्षुद्रपृषती ता वैश्वदेव्यं स्तिस्त्रः श्यामा  
वशाः पौष्ण्यं स्तिस्त्रो रोहिणीर्वशा मैत्रियं ऐन्द्राबार्हस्पत्या  
अरुणललामास्तूपराः ॥१२॥

शितिबाहुरन्यतःशितिबाहुः समन्तशितिबाहुस्त ऐन्द्रवायवाः  
शितिरन्ध्रोऽन्यतःशितिरन्ध्रः समन्तशितिरन्ध्रस्ते मैत्रावरुणाः शुद्धवालः

सर्वशुद्धवालो मणिवालस्त आश्विना स्तिस्रः शिल्पा वशा  
 वैश्वदेव्य स्तिस्रः श्येनीः परमेष्ठिनै सोमापौष्णाः श्यामललामास्तूपराः  
 ॥१३॥

उन्नत ऋषभो वामनस्त ऐन्द्रावरुणाः शितिककुच्छित्पृष्ठः शितिभसत्त  
 ऐन्द्राबार्हस्पत्याः शितिपाच्छित्योष्ठः शितिभ्रुस्त ऐन्द्रावैष्णावा स्तिस्रः  
 सिध्मा वशा वैश्वकर्मण्य स्तिस्रो धात्रे पृषोदरा ऐन्द्रापौष्णाः  
 श्येतललामास्तूपराः ॥१४॥

कर्णास्त्रयो यामाः सौम्यास्त्रयः श्वितिङ्गा अग्रये यविष्ठाय त्रयो  
 नकुला स्तिस्रो रोहिणीरुयव्यस्ता वसूनां तिस्रोऽरुणा दित्यौह्यस्ता  
 रुद्राणां सोमैन्द्रा बभ्रुललामास्तूपराः ॥१५॥

शुगठास्त्रयो वैष्णावा अधीलोककर्णास्त्रयो विष्णाव उरुक्रमाय  
 लप्सुदिनस्त्रयो विष्णाव उरुगायाय पञ्चावीस्तिस्र आदित्यानां  
 त्रिवत्सास्तिस्रोऽङ्गिरसा मैन्द्रावैष्णावा गौरललामास्तूपराः ॥१६॥

इन्द्राय राज्ञे त्रयः शितिपृष्ठा इन्द्रायाधिराजाय त्रयः शितिककुद् इन्द्राय  
 स्वराज्ञे त्रयः शितिभसद स्तिस्रस्तुर्योह्यः साध्यानां तिस्रः पृष्ठौह्यौ  
 विश्वेषां देवानां माग्नेन्द्राः कृष्णललामास्तूपराः ॥१७॥

अदित्यै त्रयो रोहितैता इन्द्रायै त्रयः कृष्णैताः कुह्यै त्रयोऽरुणैता तिस्रो  
 धेनवो राकायै त्रयोऽनुड्वाहः सिनीवालया आग्नावैष्णावा

रोहितललामास्तूपराः ॥१८॥

सौम्यास्त्रयः पिशंगाः सोमाय राज्ञे त्रयः सारङ्गाः  
पार्जन्या नभोरूपास्त्रिस्त्रौऽजा मल्हा इन्द्रायै तिस्रो मेष्य आदित्या  
द्यावापृथिव्या मालङ्गास्तूपराः ॥१९॥

वारुणास्त्रयः कृष्णललामा वरुणाय राज्ञे त्रयो रोहितललामा वरुणाय  
रिशदसे त्रयोऽरुणललामाः शिल्पास्त्रयो वैश्वदेवास्त्रयः पृश्नयः  
सर्वदेवत्या ऐन्द्रासूराः श्येतललामास्तूपराः ॥२०॥

सोमाय

स्वराज्ञेऽनोवाहावनड्वाहा विन्द्राग्निभ्यामोजोदाभ्यामुष्टारा विन्द्राग्निभ्या  
म्बलदाभ्यां सीरवाहाववी द्वे धेनू भौमी दिग्भ्यो वडंबे द्वे धेनू भौमी  
वैराजी पुरुषी द्वे धेनू भौमी वायव आरोहणवाहावनड्वाहौ वारुणी कृष्णे  
वशे अराड्यौ दिव्यावृषभौ परिमरौ ॥२१॥

एकादश प्रातर्गव्याः पशव आ लभ्यन्ते छगुलः कल्माषः  
किकिदीविर्विदीगयस्ते त्वाष्ट्राः सौरीर्नव श्वेता वशा अनूबन्ध्या  
भवन्त्या ग्रेय ऐन्द्राग्र आश्विनस्ते विशालयूप आ लभ्यन्ते ॥२२॥

पिशङ्गास्त्रयो वासन्ताः सारङ्गास्त्रयो ग्रेष्माः पृषन्तस्त्रयो वार्षिकाः  
पृश्नयस्त्रयः शारदाः पृश्निस्त्रयो हैमन्तिका अवलिप्तास्त्रयः  
शैशिराः संवत्सराय निर्वक्षसः ॥२३॥

इति पञ्चमकाराडे षष्ठः प्रपाठकः ६

अथ पञ्चमकारण्डे सप्तमः प्रपाठकः ७

यो वा अयथादेवतमग्निं चिनुत आ देवताभ्यो वृश्चयते पापीयान्भवति यो  
यथादेवतं न देवताभ्यु आ वृश्चयते वसीयान्भवत्याग्नेय्या गायत्रिया  
प्रथमां चितिमभि मृशेत्रिष्टुभा द्वितीयां जगत्या तृतीयामनुष्टुभा  
चतुर्थीम्पङ्क्या पञ्चमीं यथादेवतमेवाग्निं चिनुते न देवताभ्यु आ वृश्चयते  
वसीयान्भवती डायै वा एषा विभक्तिः पशव इडा पशुभिरेनं चिनुते यो  
वै प्रजापतये प्रतिप्रोच्याग्निं चिनोति नार्तिमार्च्छत्यश्वावभितस्तिष्ठेतां कृष्ण  
उत्तरतः श्वेतो दक्षिणस्तावालभ्येष्टका उप दध्यादेतद्वै प्रजापते रूपं  
प्राजापत्योऽश्वः साक्षादेव प्रजापतये प्रतिप्रोच्याग्निं चिनोति  
नार्तिमार्च्छत्ये तद्वा अह्नौ रूपं यच्छ्वेतोऽश्वो रात्रियै कृष्ण एतदह्नौ रूपं  
यदिष्टका रात्रियै पुरीषमिष्टका उपधास्यञ्छ्वेतमश्वमभि  
मृशेत्पुरीषमुपधास्यन्कृष्णमहोरात्राभ्यामेवैनं चिनुते हिरण्यपात्रम्मघ्नोः पूर्णं  
ददाति मध्व्योऽसानीति सौर्या चित्रवत्यावैक्षते चित्रमेव भवति  
मध्यंदिनेऽश्वमव घ्रापयत्यसौ वा आदित्य इन्द्र एष प्रजापतिः  
प्राजापत्योऽश्वस्तमेव साक्षाद्घ्नोति ॥१॥

त्वामग्ने वृषभं चेकितानम्पुनर्युवानं जनयन्नुपागाम् । अस्थूरि णो  
गार्हपत्यानि सन्तु तिग्मेन नो ब्रह्मणा सँ शिशाधि ॥  
पशवो वा एते यदिष्टकाश्चित्यांचित्यामृषभमुप दधाति मिथुनमेवास्य  
तद्यज्ञे करोति प्रजननाय तस्माद्भूथेयूथ ऋषभः ॥  
संवत्सरस्य प्रतिमां यां त्वा रात्र्युपासते । प्रजाँ सुवीरां कृत्वा  
विश्वमायुर्व्यंशनवत् ॥

प्राजापत्यामेतामुप दधातीयं वावैषैकाष्टका यदेवैकाष्टकायामन्नं क्रियते

तदेवैतयाव रुद्ध एषा वै प्रजापतेः कामदुघा तयैव  
यजमानोऽमुष्मिल्लोकैऽग्निं दुहे येन देवा ज्योतिषोर्ध्वा उदायन्येनादित्या  
वसवो येन रुद्राः । येनाङ्गिरसो महिमानमानशुस्तेनैतु यजमानः स्वस्ति  
॥

सुवर्गाय वा एष लोकार्य चीयते यद्गिर्येन देवा ज्योतिषोर्ध्वा  
उदायन्नित्युख्यं समिन्द्र इष्टका एवैता उप धत्ते वानस्पत्याः सुवर्गस्य  
लोकस्य समष्ट्यै शतार्युधाय शतवीर्याय शतोतयेऽभिमातिषाहे । शतं  
यो नः शरदो अजीतानिन्द्रो नेषदति दुरिडतानि विश्वा ॥

ये चत्वारः पथयो देवयाना अन्तरा द्यावापृथिवी वियन्ति । तेषां यो  
अज्यानिमजीतिमावहात्तस्मै नो देवाः परि दत्तेह सर्वे ॥

ग्रीष्मो हेमन्त उत नो वसन्तः शरद्वर्षाः सुवितं नो अस्तु । तेषामृतूनां  
शतशारदानां निवात एषामभये स्याम ॥

इदुवत्सुराय परिवत्सुराय संवत्सुराय कृणुता बृहन्नमः । तेषां वयं  
सुमतौ यज्ञियानां ज्योगजीता अहताः स्याम ॥

भद्रान्नः श्रेयः समनैष्ट देवास्त्वयावसेन समशीमहि त्वा । स नो मयोभूः  
पितो आ विशस्व शं तोकार्य तनुवै स्योनः ॥

अज्यानीरेता उप दधात्येता वै देवता अपराजितास्ता एव प्र विशति नैव  
जीयते ब्रह्मवादिनो वदन्ति यदर्धमासा मासा ऋतवः संवत्सुर ओषधीः  
पचन्त्यथ कस्मादन्याभ्यो देवताभ्य आग्रयणं निरुप्यत इत्येता हि तद्देवता  
उदजयन्यदृतुभ्यो निर्वपेद्देवताभ्यः समदं दध्यादाग्रयणं निरुप्येता

आहुतीर्जुहोत्यर्धमासानेव मासानृतून्संवत्सुरम्प्रीणाति न देवताभ्यः समदं  
दधाति भद्रान्नः श्रेयः समनैष्ट देवा इत्याह हुताद्याय

यजमानस्यापराभावाय ॥२॥

इन्द्रस्य वज्रौऽसि वार्त्रघ्नस्तनूपा नः प्रतिस्पृशः । यो नः पुरस्ताद्दक्षिणतः  
 पश्चादुत्तरतोऽघायुरभिदासत्येतं सोऽश्मानमृच्छतु ॥  
 देवासुराः संयत्ता आसन्तेऽसुरा दिग्भ्य आबाधन्त तान्देवा इष्वा च  
 वज्रेण चापानुदन्त यद्वज्रिणीरुपदधातीष्वा चैव तद्वज्रेण च यजमानो  
 भ्रातृव्यानपं नुदते दिक्षूपं दधाति देवपुरा एवैतास्तनूपानीः  
 पर्यूहतेऽग्राविष्णु सजोषसेमा वर्धन्तु वां गिरः । द्युमैर्वाजैभिरा गतम् ॥  
 ब्रह्मवादिनो वदन्ति यन्न देवतायै जुह्वत्यथ किंदेवत्या  
 वसोधरित्यग्निर्वसुस्तस्यैषा धारा विष्णुर्वसुस्तस्यैषा धाराग्रावैष्णव्यर्चा  
 वसोधारां जुहोति भागधेयैर्नैवैनौ समर्धयत्यथो एतामेवाहुतिमायतनवतीं  
 करोति यत्काम एनां जुहोति तदेवाव रुद्धे रुद्रो वा एष यदग्निस्तस्यैते  
 तनुवौ घोरान्या शिवान्या यच्छतरुद्रीयं जुहोति यैवास्य घोरा तनूस्तां तेन  
 शमयति यद्वसोधारां जुहोति यैवास्य शिवा तनूस्तां तेन प्रीणाति यो वै  
 वसोधारायै प्रतिष्ठां वेद प्रत्येव तिष्ठति यदाज्यमुच्छिष्येत  
 तस्मिन्ब्रह्मौदनम्पचेत्तम्ब्राह्मणाश्चत्वारः प्राशनीयुरेष वा अग्निर्वैश्वानरो  
 यद्ब्राह्मण एषा खलु वा अग्नेः प्रिया तनूर्यद्वैश्वानरः प्रियायामेवैनां  
 तनुवाम्प्रतिष्ठापयति चतस्रो धेनूर्दद्यात्ताभिरेव यजमानोऽमुष्मिल्लोकेऽग्निं  
 दुहे ॥३॥

चित्तिं जुहोमि मनसा घृतेनेत्याहादाभ्या वै नामैषाहुतिर्वैश्वकर्मुणी नैनं  
 चिक्यान्भ्रातृव्यो दभ्नोत्यथो देवता एवाव रुद्धेऽग्ने तमद्येति पङ्क्या  
 जुहोति पङ्क्याहुत्या यज्ञमुखमा रभते सप्त ते अग्ने समिधः सप्त जिह्वा  
 इत्याहु होत्रा एवाव रुद्धेऽग्निर्देवेभ्योऽपाक्रामद्भागधेयमिच्छमानस्तस्मा

एतद्भागधेयम्प्रायच्छन्नेतद्वा अग्नेरग्निहोत्रमेतर्हि खलु वा एष जातो यर्हि  
सर्वश्चितो जातायैवास्मा अन्नमपि दधाति स एनम्प्रीतः प्रीणाति  
वसीयान्भवति ब्रह्मवादिनो वदन्ति यदेष गार्हपत्यश्चीयतेऽथ  
क्वास्याहवनीय इत्यिसावादित्य इति ब्रूयादेतस्मिन्हि सर्वाभ्यो  
देवताभ्यो जुहति य एवं विद्वानग्निं चिनुते साक्षादेव देवता ऋध्नोत्यग्ने  
यशस्विन्यशसेममर्पयेन्द्रावतीमर्पचितीमिहा वह । अयम्पूर्धा परमेष्ठी  
सुवर्चाः समानानामुत्तमश्लोको अस्तु ॥

भद्रम्पश्यन्तु उप सेदुरग्रे तपो दीक्षामृषयः सुवर्चिदः । ततः  
क्षत्रम्बलमोजश्च जातं अदस्मै देवा अग्नि सं नमन्तु ॥  
धाता विधाता परमोत सदृक्प्रजापतिः परमेष्ठी विराजा ।  
स्तोमाश्छन्दांसि निविदो म आहुरेतस्मै राष्ट्रमग्नि सं नमाम ॥  
अभ्यावर्तध्वमुप मेत साकमयं शास्ताधिपतिर्वो अस्तु । अस्य  
विज्ञानमनु स रंभध्वमिमम्पश्चादनु जीवाथ सर्वे ॥ राष्ट्रभृत एता उप  
दधात्येषा वा अग्नेश्चिती राष्ट्रभू तयैवास्मिन्नाष्ट्रं दधाति राष्ट्रमेव भवति  
नास्माद्राष्ट्रम्भ्रंशते ॥४॥

यथा वै पुत्रो जातो म्रियत एव वा एष म्रियते यस्याग्निरुख्य उद्धारयति  
यन्निर्मन्थ्यं कुर्याद्विच्छिन्द्याद्भ्रातृव्यमस्मै जनयेत्स एव पुनः परीध्यः  
स्वादेवैनं योनैर्जनयति नास्मै भ्रातृव्यं जनयति तमो वा एतं गृह्णाति  
यस्याग्निरुख्य उद्धारयति मृत्युस्तमः कृष्णां वासः कृष्णा धेनुर्दक्षिणा  
तमसैव तमो मृत्युमप हते हिरण्यं ददाति  
ज्योतिर्वै हिरण्यं ज्योतिषैव तमोऽप हतेऽथो तेजो वै हिरण्यं तेज  
एवात्मन्धत्ते सुवर्न घर्मः स्वाहा सुवर्नार्कः स्वाहा सुवर्न शुक्रः स्वाहा



सुव॑र्न ज्योतिः॑ स्वाहा सुव॑र्न सूर्यः॑ स्वाहा॑र्को वा एष  
 यद्गिर॑सावा॒दित्योऽश्व॑मे॒धो यदे॒ता आ॑हुतीर्जु॒होत्य॑र्काश्वमे॒धयो॑रिव  
 ज्योती॑ँषि सं द॑धात्येष ह॒ त्वा अ॑र्काश्वमे॒धी यस्यै॑तद्गौ क्रियत॒ आपो॑ वा  
 इ॒दम॑ग्रे॒ सल॑लमा॑सीत्स ए॒ताम्प्र॑जापतिः प्रथ॑मां चि॒तिम॑पश्य॒त्तामु॑पा॒धत्त॑  
 तदि॒यम॑भव॒त्तं वि॒श्वक॑र्माब्रवी॒दुप॑ त्वाया॒नीति॑ नेह लो॒कोऽस्ती॑त्य॒ब्रवी॑त्स  
 ए॒तां द्वि॑तीयां चि॒तिम॑पश्य॒त्तामु॑पा॒धत्त॑ तद॒न्तरि॑क्षमभव॒त्स य॒ज्ञः  
 प्र॒जाप॑तिम्ब्रवी॒दुप॑ त्वाया॒नीति॑ नेह लो॒कोऽस्ती॑त्य॒ब्रवी॑त्स  
 वि॒श्वक॑र्माणमब्रवी॒दुप॑ त्वाया॒नीति॑ केन॒ मोपै॑ष्यसीति दि॒श्याभि॑रित्य॒ब्रवी॑त्तं  
 दि॒श्याभि॑रुपै॒त्ता उ॑पा॒धत्त॑ ता दि॒शोऽभ॑व॒न्त्स प॑रमे॒ष्ठी प्र॒जाप॑तिमब्रवी॒दुप॑  
 त्वाया॒नीति॑ नेह लो॒कोऽस्ती॑त्य॒ब्रवी॑त्स वि॒श्वक॑र्माणं च य॒ज्ञं चा॑ब्रवी॒दुप॑  
 वा॒माया॒नीति॑ नेह लो॒कोऽस्ती॑त्य॒ब्रूता॑ँ स ए॒तां तृ॑तीयां  
 चि॒तिम॑पश्य॒त्तामु॑पा॒धत्त॑ तद॒सार॑भव॒त्स आ॑दित्यः प्र॒जाप॑तिमब्रवी॒दुप॑  
 त्वाया॒नीति॑ नेह लो॒कोऽस्ती॑त्य॒ब्रवी॑त्स वि॒श्वक॑र्माणं च य॒ज्ञं चा॑ब्रवी॒दुप॑  
 वा॒माया॒नीति॑ नेह लो॒कोऽस्ती॑त्य॒ब्रूता॑ँ स प॑रमे॒ष्ठिन॑मब्रवी॒दुप॑ त्वाया॒नीति॑  
 केन॒ मोपै॑ष्यसीति॑ लोक॒म्पृण॑येत्य॒ब्रवी॑त्तं लो॒कम्पृ॑णयोपै॒त्तस्मा॑दया॒तयाम्नी  
 लोक॒म्पृणा॑या॒तयामा॑ ह्य॒सावा॑दित्य॒स्तानृ॑षयोऽब्रुव॒न्नुप॑ व॒ आया॑मेति॒ केन॑  
 न उ॒पैष्य॑थेति॑ भू॒मेत्य॑ब्रुव॒न्तान्द्वा॑भ्यां चि॒तीभ्या॑मुपा॒यन्त्स पञ्च॑चि॒तीकः  
 सम॑पद्यत॒ य ए॒वं वि॒द्वान॑ग्निं चि॒नुते॑ भू॒याने॑व भ॒वत्य॑भीमाँल्लो॒काञ्ज॑यति  
 वि॒दुरे॑न॒ देवा॑ अथौ॒ एता॑सा॒मेव॑ दे॒व ता॑नाँ सायु॒ज्यं ग॑च्छति ॥५॥

वयो॑ वा अ॒ग्निर्य॑द॒ग्निचि॑त्प॒क्षिणो॑ऽशनी॒यात्तमे॑वा॒ग्निम॑द्या॒दार्ति॑मा॒र्च्छेत्स॑वत्स॒रं  
 व॒रं च॑रेत्स॑वत्स॒रँ हि व॒रं ना॑ति॒ पशु॑र्वा एष यद्गि॒र्हिन॑स्ति॒ खलु॑ वै  
 तम्प॒शुर्य॑ ए॒नम्पु॑रस्ता॒त्प्रत्य॑ञ्चमु॒पच॑रति॒ तस्मा॑त्प॒श्चात्प्रा॑डु॒पच॑र्य

आत्मनोऽहिंसायै तेजोऽसि तेजो मे यच्छ पृथिवीं यच्छ पृथिव्यै मा  
पाहि ज्योतिरसि ज्योतिर्मे यच्छान्तरिक्षं यच्छान्तरिक्षान्मा पाहि सुवरसि  
सुवर्मे यच्छ दिवं यच्छ दिवो मा पाही त्याहैताभिर्वा इमे लोका विधृता  
यदेता उपदधात्येषां लोकानां विधृत्यै स्वयमातृगणा उपधाय  
हिरण्येष्टका उप दधातीमे वै लोकाः स्वयमातृगणा ज्योतिर्हिरण्यं  
यत्स्वयमातृगणा उपधाय हिरण्येष्टका  
उपदधातीमानेवैताभिर्लोकाञ्ज्योतिष्मतः कुरुतेऽथो एताभिरेवास्मा इमे  
लोकाः प्र भान्ति यास्तै अग्ने सूर्ये रुचं उद्यतो दिवमातृन्वन्ति रश्मिभिः ।  
ताभिः सर्वाभी रुचे जनाय नस्कृधि ॥

या वो देवाः सूर्ये रुचो गोष्वश्वेषु या रुचः । इन्द्राग्नी ताभिः सर्वाभी रुचं  
नो धत्त बृहस्पते ॥

रुचं नो धेहि ब्राह्मणेषु रुचं राजसु नस्कृधि । रुचं विश्वेषु शूद्रेषु मयि  
धेहि रुचा रुचम् ॥

द्वेधा वा अग्निं चिक्व्यानस्य यश इन्द्रियं गच्छत्यग्निं वा चितमीजानं वा  
यदेता आहुतीर्जुहोत्यात्मन्नेव यश इन्द्रियं धत्त ईश्वरो वा एष  
आर्तिमार्तोयोऽग्निं चिन्वन्नधिक्रामति तत्त्वा यामि ब्रह्मणा वन्दमान इति  
वारुण्यर्चा जुहुयाच्छान्तिरेवैषाग्नेर्गुप्तिरात्मनो हविष्कृतो वा एष योऽग्निं  
चिनुते यथा वै हविः स्कन्दत्येवं वा एष स्कन्दति योऽग्निं चित्वा  
स्त्रियमुपैति मैत्रावरुणयामिन्नया यजेत

मैत्रावरुणतामेवोपैत्यात्मनोऽस्कन्दाय यो वा अग्निमृतुस्थां वेदुर्त्रुतुरस्मै  
कल्पमान एति प्रत्येव तिष्ठति संवत्सरो वा अग्निर्त्रुतुस्थास्तस्य वसन्तः  
शिरौ ग्रीष्मो दक्षिणः पक्षो वर्षाः पुच्छं शरदुत्तरः पक्षो हैमन्तो  
मध्यम्पूर्वपक्षाश्चितयोऽपरपक्षाः पुरीषमहोरात्राणीष्टका एष वा

अग्निर्ऋतुस्था य एवं वेदुर्ऋतुरस्मै कल्पमान एति प्रत्येव तिष्ठति  
प्रजापतिर्वा एतं ज्यैष्ठ्यकामो न्यधत्त ततो वै स ज्यैष्ठ्यमगच्छद्य एव  
विद्वानग्निं चिनुते ज्यैष्ठ्यमेव गच्छति ॥६॥

यदाकूतात्समसुस्रोद्धृदो वा मनसो वा सम्भृतं चक्षुषो वा । तमनु प्रेहि  
सुकृतस्य लोकं यत्रर्षयः प्रथमजा ये पुराणाः ॥  
एतं संधस्थ परि ते ददामि यमावहाच्छेवधिं जातवेदाः । अन्वागन्ता  
यज्ञपतिर्वो अत्र तं स्म जानीत परमे व्योमन् ॥  
जानीतादेनम्परमे व्योमन्देवाः सधस्था विद रूपमस्य ।  
यदागच्छात्पथिभिर्देवयानैरिष्टापूर्ते कृणुतादाविरस्मै ॥  
सम्प्र च्यवध्वमनु सम्प्र याताग्ने पथो देवयानान्कृणुध्वम् ।  
अस्मिन्सधस्थे अध्युत्तरस्मिन्विश्वे देवा यजमानश्च सीदत ॥  
प्रस्तरेण परिधिना स्रुचा वेद्या च बर्हिषा । ऋचेमं यज्ञं नो वह सुवर्देवेषु  
गन्तवे ॥  
यदिष्टम्यत्परादानं यदुत्तं या च दक्षिणा । तदग्निर्वैश्वकर्मुणः सुवर्देवेषु नो  
दधत् ॥  
येना सहस्रं वहसि येनाग्ने सर्ववेदसम् । तेनेमं यज्ञं नो वह सुवर्देवेषु  
गन्तवे ॥  
येनाग्ने दक्षिणा युक्ता यज्ञं वहन्त्यृत्विजः । तेनेमं यज्ञं नो वह सुवर्देवेषु  
गन्तवे ॥  
येनाग्ने सुकृतः पथा मधोर्धारा व्यानशुः । तेनेमं यज्ञं नो वह सुवर्देवेषु  
गन्तवे ॥  
यत्र धारा अनपेता मधोर्घृतस्य च याः । तदग्निर्वैश्वकर्मुणः सुवर्देवेषु नो

दधत् ॥७॥

यास्तै अग्ने समिधो यानि धाम् या जिह्वा जातवेदो यो अर्चिः । ये तै  
अग्ने मेडयो य इन्द्वस्तेभिरात्मानं चिनुहि प्रजानन् ॥  
उत्सन्नयज्ञो वा एष यदग्निः किं वाहैतस्य क्रियते किं वा न यद्वा  
अध्वर्युरग्नेश्चिन्वन्नन्तरेत्यात्मनो वै तदन्तरैति यास्तै अग्ने समिधो यानि  
धामेत्याहैषा वा अग्नेः स्वयंचितिरग्निरेव तदग्निं चिनोति  
नाध्वर्युरात्मनोऽन्तरैति चतस्र आशाः प्र चरन्त्वग्रय इमं नो यज्ञं नयतु  
प्रजानन् । घृतम्पिन्वन्नजरं सुवीरम्ब्रह्म समिद्धवत्याहुतीनाम् ॥  
सुवर्गाय वा एष लोकायोप धीयते यत्कूर्मश्चतस्र आशाः प्र चरन्त्वग्रय  
इत्याह । २। दिश एवैतेन प्र जानाती मं नो यज्ञं नयतु प्रजानन्नित्याह  
सुवर्गस्य लोकस्याभिनीत्यै ब्रह्म समिद्धवत्याहुतीनामित्याह ब्रह्मणा वै  
देवाः सुवर्गं लोकमायन्यद्ब्रह्मणवत्योपदधाति ब्रह्मणैव तद्यजमानः  
सुवर्गं लोकमेति प्रजापतिर्वा एष यदग्निस्तस्य प्रजाः पशवश्छन्दांसि  
रूपं सर्वान्वर्णानिष्टकानां कुर्याद्रूपेणैव प्रजाम्पशूञ्छन्दांस्यव रुद्धेऽथो  
प्रजाभ्य एवैनम्पशुभ्यश्छन्दोभ्योऽवरुद्धय चिनुते ॥८॥

मयि गृह्णाम्यग्ने अग्निं रायस्पोषाय सुप्रजास्त्वाय सुवीर्याय । मयि  
प्रजाम्मयि वर्चो दधाम्यरिष्टाः स्याम तनुवा सुवीराः ॥ यो नो अग्निः  
पितरो हृत्स्वन्तरमर्त्यो मर्त्यां आविवेश । तमात्मन्परि गृहीमहे वयम्मा  
सो अस्मां अवहाय परा गात् ॥

यदध्वर्युरात्मन्नग्निमगृहीत्वाग्निं चिनुयाद्योऽस्य स्वोऽग्निस्तमपि यजमानाय  
चिनुयादग्निं खलु वै पशवोऽनूपं तिष्ठन्तेऽपक्रामुका अस्मात्पशवः

स्युर्मयि गृह्णाम्यग्रे अग्निमित्याहात्मन्नेव स्वमग्निं दाधार नास्मात्पशवोऽप  
 क्रामन्ति ब्रह्मवादिनो वदन्ति यन्मृदापश्चाग्नेरनाद्यमथ कस्मान्मृदा  
 चाब्दिश्चाग्निश्चीयत इति यदब्दिः संयौत्यापो वै सर्वा देवता  
 देवताभिरेवैनं सं सृजति यन्मृदा चिनोतीयं वा अग्निर्वैश्वानरोऽग्निनैव  
 तदग्निं चिनोति ब्रह्मवादिनो वदन्ति यन्मृदा चाब्दिश्चाग्निश्चीयतेथ  
 कस्माद्ग्निरुच्यत इति यच्छन्दोभिश्चिनोत्यग्रयो वै छन्दांसि  
 तस्माद्ग्निरुच्यतेऽथो इयं वा अग्निर्वैश्वानरो यन्मृदा चिनोति  
 तस्माद्ग्निरुच्यते हिरण्येष्टका उप दधाति ज्योतिर्वै हिरण्यं  
 ज्योतिरेवास्मिन्दधात्यथो तेजो वै हिरण्यं तेज एवात्मन्धत्ते यो वा अग्निं  
 सर्वतोमुखं चिनुते सर्वासु प्रजास्वन्नमत्ति सर्वा दिशोऽभि जयति  
 गायत्रीम्पुरस्तादुप दधाति त्रिष्टुभं दक्षिणतो जगतीम्पश्चादनुष्टुभमुत्तरतः  
 पङ्क्तिमध्य एष वा अग्निः सर्वतोमुखस्तं य एवं विद्वांसश्चिनुते सर्वासु  
 प्रजास्वन्नमत्ति सर्वा दिशोऽभि जयत्यथो दिश्यैव दिशम्प्र वयति  
 तस्माद्दिशि दिक्प्रोता ॥६॥

प्रजापतिर्ग्निसृजत सौऽस्मात्सृष्टः प्राङ्प्राद्रवत्तस्मा अश्वम्प्रत्यास्यत्स  
 दक्षिणावर्तत तस्मै वृष्णिम्प्रत्यास्यत्स प्रत्यङ्ङावर्तत तस्मा  
 ऋषभम्प्रत्यास्यत्स उद्ङङावर्तत तस्मै ब्रह्मम्प्रत्यास्यत्स ऊर्ध्वोऽद्रवत्तस्मै  
 पुरुषम्प्रत्यास्यद्यत्पशुशीर्षाण्युपदधाति सर्वत एवैनमवर्धुष्यं चिनुत एता  
 वै प्राणभूतश्चक्षुष्मतीरिष्टका यत्पशुशीर्षाणि यत्पशुशीर्षाण्युपदधाति  
 ताभिरेव यजमानोऽमुष्मिल्लोके प्राणित्यथो ताभिरेवास्मा इमे लोकाः प्र  
 भान्ति मृदाभिलिप्योप दधाति मेध्यत्वाय पशुर्वा एष यद्ग्निरन्नम्पशव एष  
 खलु वा अग्निर्यत्पशुशीर्षाणि यं कामयेत कनीयोऽस्यान्नं स्यादिति

सन्तरां तस्य पशुशीर्षायुपं दध्यात्कनीय एवास्यान्नम्भवति यं कामयैत  
सुमावदस्यान्नं स्यादिति मध्यतस्तस्योपं दध्यात्सुमावदेवास्यान्नम्भवति  
यं कामयैत भूयोऽस्यान्नं स्यादित्यन्तैषु तस्य व्युदूह्योपं दध्यादन्तत  
एवास्मा अन्नमव रुद्धे भूयोऽस्यान्नम्भवति ॥१०॥

स्तेगान्दंष्ट्राभ्यां मृगडूकाञ्जम्भ्यैभि रादकां खादेनो र्जं  
संसूदेना रणयं जाम्बीलेन मृदम्बस्वैभिः शर्कराभिरवका मवकाभिः  
शर्करा मुत्सादेन जिह्वा मवक्रन्देन तालुं सरस्वतीं जिह्वाग्रेण ॥११॥

वाजं हनूभ्या मप आस्येना दित्यां छमश्रुभि रुपयाममधरेणोष्ठेन  
सदुत्तरेणा न्तरिणानूकाशं प्रकाशेन बाह्यं स्तनयितुं निर्बाधेन सूर्याग्नी  
चक्षुभ्यां विद्युतौ कनानकाभ्या मशनिम्मस्तिष्कैण बलम्मज्जभिः ॥१२॥

कूर्माञ्छफै रच्छलाभिः कपिञ्जला न्तसाम् कुष्ठिकाभि र्जवं  
जङ्घाभि रगदं जानुभ्यां वीर्यं कुहाभ्यां भयम्प्रचालाभ्यां  
गुहौपपक्षाभ्या मश्विनावंसाभ्या मदितिं शीष्णां निर्ऋतिं  
निर्जाल्मकेन शीष्णां ॥१३॥

योक्त्रं गृध्राभि र्युगमानतेन चित्तम्मन्याभिः संक्रोशान्प्राणैः प्रकाशेन त्वचं  
पराकाशेनान्तरां मशकान्केशै रिन्द्रं स्वपसा वहैन् बृहस्पतिं  
शकुनिसादेन रथमुष्णिहाभिः ॥१४॥

मित्रावरुणौ श्रोणीभ्या मिन्द्राग्नी शिखराडाभ्या मिन्द्राबृहस्पती

ऊरुभ्या मिन्द्राविष्णू अष्टीवद्धाँ सवितारम्पुच्छेन  
गन्धर्वाञ्छेपैनाप्सरसौ मुष्वाभ्यां पर्वमानम्पायुना  
पवित्रम्पोत्राभ्या माक्रमणँ स्थूराभ्यां प्रतिक्रमणं कुष्ठ अभ्याम् ॥१५॥

इन्द्रस्य क्रोडो दित्यै पाजस्यं दिशां जत्रवो  
जीमूतान्हृदयौपशाभ्या मन्तरिक्षम्पुरितता नभ उदर्येणेन्द्राणीम्लीहा  
वल्मीकान्क्लोम्रा गिरीन्प्लाशिभिः समुद्रमुदरैण वैश्वानरम्भस्मना ॥ १६  
॥

पूष्णो वनिष्ठु रन्धाहेस्थूरगुदा सर्पान्गुदाभि ऋतून्पृष्टीभि दिवम्पृष्टेन  
वसूनाम्प्रथमा कीकसा रुद्राणां द्वितीयादित्यानां तृतीयाङ्गिरसां चतुर्थी  
साध्यानाम्पञ्चमी विश्वेषां देवानाँ षष्ठी ॥१७॥

ओजो ग्रीवाभि निर्ऋतिमस्थभि रिन्द्रँ स्वपसा वहैन रुद्रस्य विचलः  
स्कन्धोऽहोरात्रयोर्द्वितीयोऽर्धमासानां तृतीयो मासां चतुर्थ ऋतूनाम्पञ्चमः  
संवत्सरस्य षष्ठः ॥१८॥

आनन्दं नन्दथुना कामम्प्रत्यासाभ्यां भयँ शितीमभ्यां  
प्रशिषम्प्रशासाभ्याँ सूर्याचन्द्रमसौ वृक्याभ्याँ श्यामशबलौ  
मत्स्राभ्यां व्युष्टिँ रूपेण निर्मुक्तिमरूपेण ॥१९॥

अहर्माँसेन रात्रिम्पीवसापो यूषेण घृतँ रसेन श्यां वसया  
दूषीकाभिर्हृदिनि मश्रुभिः पृष्वां दिवँ रूपेण नक्षत्राणि प्रतिरूपेण

पृथि॒वीं च॒र्मणा॑ छ॒वीं छ॒व्यो॑ पा॒कृता॑य॒ स्वाहा॑ल॒ब्धाय॑ स्वाहा॒ हुता॑य॒  
स्वाहा॑ ॥२०॥

अ॒ग्नेः प॑क्ष॒तिः सर॑स्वत्यै॒ निप॑क्ष॒तिः सोम॑स्य॒ तृतीया॑पां  
च॒तुर्थ्यो॑ ष॒धीना॑म्पञ्च॒मी संव॑त्स॒रस्य॑ ष॒ष्ठी म॒रुता॑ꣳ सप्त॒मी बृ॒हस्प॑तैरष्ट॒मी  
मि॒त्रस्य॑ नव॒मी वरु॑णस्य दश॒मी न्द्र॑स्यैकाद॒शी वि॒श्वेषां॑ दे॒वानां॑ द्वाद॒शी  
द्यावा॑पृथि॒व्योः पा॒र्श्वं य॒मस्य॑ पा॒टूरः ॥२१॥

वा॒योः प॑क्ष॒तिः सर॑स्वतो॒ निप॑क्ष॒तिश्च॒न्द्रम॑सस्तृतीया॒ नक्ष॑त्राणां च॒तुर्थी॑  
स॒वितुः॑ प॑ञ्च॒मी रु॒द्रस्य॑ ष॒ष्ठी स॒र्पाणां॑ꣳ सप्त॒म्य॒र्यम्णो॑ऽष्ट॒मी त्वष्टु॑र्नव॒मी  
धा॒तुर्दश॑मी न्द्रा॒गया॑ ए॒काद॑श्य॒ दित्यै॑ द्वाद॒शी द्यावा॑पृथि॒व्योः पा॒र्श्वं य॒म्यै  
पा॒टूरः ॥२२॥

प॒न्थाम॑नूवृ॒ग्भ्याꣳ संत॑तिꣳ स्नाव॒न्याभ्याꣳ शु॒कान्पि॑त्तेन॒ हरि॑माणं॒ यक्ना॑  
ह॒लीक्ष॑णान्पापवा॒तेन॑ कू॒श्माञ्छ॑कभिः शव॒र्तानू॑र्व॒ध्येन॒ शुनो॑ वि॒शस॑नेन  
स॒र्पाँल्लो॑हितग॒न्धेन॒ वयाꣳसि॑ पक्वग॒न्धेन॑ पि॒पीलि॑काः प्रशा॒देन॑ ॥२३॥

क्र॒मैर॑त्य॒क्रमी॒द्वाजी॑ वि॒श्वैर्दे॒वैर्य॒ज्ञियैः॑ संवि॒दानः॑ ।

स नो॑ नय सुकृ॒तस्य॑ लो॒कं तस्य॑ ते व॒यꣳ स्व॒धया॑ मदेम ॥२४॥

द्यौस्ते॑ पृ॒ष्ठं पृथि॑वी स॒धस्थ॑मा॒त्मान्तरि॑क्षꣳ समु॒द्रो योनिः॑ सूर्य॑स्ते  
चक्षु॑र्वार्तः प्रा॒णश्च॒न्द्रमाः॑ श्रोत्रं॒ मासा॑श्चा॒र्धमा॒साश्च॑ प॒र्वाण्यु॑तवो॒ङ्गानि॑  
संव॑त्स॒रो म॑हि॒मा ॥२५॥



अग्निः पशुरासीत्तेनायजन्त स एतं लोकमजयद्यस्मिन्नग्निः स तै लोकस्तं  
जैष्यस्यथाव जिघ्र वायुः पशुरासीत्तेनायजन्त स एतं  
लोकमजयद्यस्मिन्वायुः स तै लोकस्तस्मात्त्वान्तरैष्यामि यदि  
नावजिघ्रस्यादित्यः पशुरासीत्तेनायजन्त स एतं लोकमजयद्यस्मिन्नादित्यः  
स तै लोकस्तं जैष्यसि यद्यवजिघ्रसि ॥ २६ ॥

इति पञ्चमकारडे सप्तमः प्रपाठकः ७

इति पञ्चमं कारडं सम्पूर्णम् ५

षष्ठं कारडम्

अथ षष्ठकारडे प्रथमः प्रपाठकः १

प्राचीनवँशं करोति देवमनुष्या दिशो व्यभजन्त प्राचीं देवा दक्षिणा  
पितरः प्रतीचीं मनुष्या उदीचीँ रुद्रा यत्प्राचीनवँशं करोति  
देवलोकमेव तद्यजमान उपावर्तते परि श्रयत्यन्तर्हितो हि देवल्लोको  
मनुष्यलोका न्नास्माल्लोकात्स्वेतव्यमिवेत्याहुः को हि तद्वेद  
यद्यमुष्मिँल्लोकेऽस्ति वा न वेति  
दिद्वतीकाशान्करोत्युभयौल्लोकयोरभिजित्यै केशश्मश्रु वपते नखानि नि  
कृन्तते मृता वा एषा त्वर्गमेध्या यत्कैशश्मश्रु मृतामेव  
त्वर्चममेध्यामपहत्य यज्ञियो भूत्वा मेधमुपैत्य ङ्गिरसः सुवर्गं लोकं  
यन्तोऽप्सु दीक्षातपसी प्रावेशयन्नप्सु स्नाति साक्षादेव दीक्षातपसी अवं  
रुन्धे तीर्थे स्नाति तीर्थे हि ते तां प्रावेशयन्तीर्थे स्नाति तीर्थमेव समानानां  
भवत्यपो ऽश्नात्यन्तरत एव मेध्यो भवति वाससा दीक्षयति सौम्यं वै  
क्षौमं देवतया सोममेष देवतामुपैति यो दीक्षते सोमस्य तनूरसि तनुवं मे

पाहीत्याह स्वामेव देवतामुपैत्यथो आशिषमेवैतामा शास्तेऽग्नेस्तूष्पाधानं  
 वायोर्वातपानं पितृणां नीविरोषधीनां प्रघातः आदित्यानां प्राचीनतानो  
 विश्वेषां देवानामोतुर्नक्षत्राणामतीकाशास्तद्वा एतत्सर्वदेवत्यं यद्वासो  
 यद्वाससा दीक्षयति सर्वाभिरेवैनं देवताभिर्दीक्षयति बृहिःप्राणो वै  
 मनुष्यस्तस्याशनं प्राणोऽश्नाति सप्राण एव दीक्षत आशितो भवति  
 यावानेवास्य प्राणस्तेन सह मेधमुपैति घृतं देवानां मस्तु पितृणां निष्पक्वं  
 मनुष्याणां तद्वा एतत्सर्वदेवत्यं यन्नवनीतं यन्नवनीतेनाभ्यङ्गे सर्वा एव  
 देवताः प्रीणाति प्रच्युतो वा एषोऽस्माल्लोकादगतो देवलोकं यो  
 दीक्षितोऽन्तरेव नवनीतं तस्मान्नवनीतेनाभ्यङ्गेऽनुलोमं यजुषा व्यावृत्त्या  
 इन्द्रो वृत्रमहन्तस्य कनीनिका पराऽपतत्तदाञ्जनमभवद्यदाङ्गे चक्षुरेव  
 भ्रातृव्यस्य वृङ्गे दक्षिणं पूर्वमाऽङ्गे सव्यं हि पूर्वं मनुष्या आज्जते न नि  
 धावते नीव हि मनुष्या धावन्ते पञ्च कृत्व आऽङ्गे पञ्चाक्षरा पङ्क्तिः पाङ्क्तौ  
 यज्ञो यज्ञमेवाव रुन्धे परिमितमाऽङ्गेऽपरिमितं हि मनुष्या आज्जते  
 सतूलयाऽऽङ्गेऽपतूलया हि मनुष्या आज्जते व्यावृत्त्यै यदपतूलयाञ्जीत वज्र  
 इव स्यात्सतूलयाङ्गे मित्रत्वायेन्द्रो वृत्रमहन्त्सोऽरुपौऽरुभ्यमियत् तासां  
 यन्मेध्यं यज्ञियं सदैवमासीत्तदपोदक्रामत्ते दर्भा अभवन्त्यर्धं पुञ्जीलैः  
 पवयति या एव मेध्या यज्ञियाः सदैवा आपस्ताभिरेवैनं पवयति द्वाभ्यां  
 पवयत्यहोरात्राभ्यामेवैनं पवयति त्रिभिः पवयति त्रय इमे लोका  
 एभिरेवैनं लोकैः पवयति पञ्चभिः पवयति पञ्चाक्षरा पङ्क्तिः पाङ्क्तौ यज्ञो  
 यज्ञायैवैनं पवयति षड्भिः पवयति षड्वा ऋतवं ऋतुभिरेवैनं पवयति  
 सप्तभिः पवयति सप्त च्छन्दांसि च्छन्दोभिरेवैनं पवयति नवभिः पवयति  
 नव वै पुरुषे प्राणाः सप्राणमेवैनं पवयत्येकविंशत्या पवयति दश  
 हस्त्या अङ्गुलयो दश पद्या आत्मैकविंशो यावानेव पुरुषस्तमपरिवर्गं

पवयति चित्पतिस्त्वा पुनात्वित्याह मनो वै चित्पतिर्मनसैवैनं पवयति  
वाक्पतिस्त्वा पुनात्वित्याह वाचैवैनं पवयति देवस्त्वा सविता  
पुनात्वित्याह सवितृप्रसूत एवैनं पवयति तस्य ते पवित्रपते पवित्रैण यस्मै  
कं पुने तच्छकेयमित्याहाशिषमेवैतामा शास्ते ॥१॥

यावन्तो वै देवा यज्ञायापुनत् त एवाभवन्त्य एवं विद्वान्यज्ञाय पुनीते  
भवत्येव ब्रह्मिः पवयित्वान्तः प्र पादयति मनुष्यलोक एवैनं पवयित्वा  
पूतं देवलोकं प्र रायत्य दीक्षित एकयाहुत्येत्याहः स्रुवेण चतस्रो जुहोति  
दीक्षितत्वाय स्रुचा पञ्चमीं पञ्चाक्षरा पङ्क्तिः पाङ्क्तौ यज्ञो यज्ञमेवाव रुन्द्र  
आकूत्यै प्रयुजेऽग्नये स्वाहेत्याहाकूत्या हि पुरुषो यज्ञमभि प्रयुङ्क्ते यजेयेति  
मेधायै मनसेऽग्नये स्वाहेत्याह मेधया हि मनसा पुरुषो यज्ञमभिगच्छति  
सरस्वत्यै पूष्णेऽग्नये स्वाहेत्याह वाग्वै सरस्वती पृथिवी पूषा वाचैव  
पृथिव्या यज्ञं प्र युङ्क्ते आपो देवीर्बृहतीर्विश्वशम्भुव इत्याह या वै  
वर्ष्यास्ता आपो देवीर्बृहतीर्विश्वशम्भुवो यदेतद्यजुर्न ब्रूयाद्विव्या  
आपोऽशान्ता इमं लोकमा गच्छेयु रापो देवीर्बृहतीर्विश्वशम्भुव  
इत्याहास्मा एवैनां लोकाय शमयति तस्माच्छान्ता इमं लोकमा गच्छन्ति  
द्यावापृथिवी इत्याह द्यावापृथिव्योर्हि यज्ञ उर्वन्तरिक्षमित्याहान्तरिक्षे हि  
यज्ञो बृहस्पतिर्नो हविषा वृधात्वित्याह ब्रह्म वै देवानां  
बृहस्पतिर्ब्रह्मणैवास्मै यज्ञमव रुन्द्रे यद्ब्रूयाद्विधेरिति  
यज्ञस्थाणुमृच्छेद्ब्रूधात्वित्याह यज्ञस्थाणुमेव परि वृणक्ति  
प्रजापतिर्यज्ञमसृजत् सौऽस्मात्सृष्टः पराङ्गैस् प्र यजुरव्लीनात्प्र साम्  
तमृगुदयच्छद्यदृगुदयच्छत्तदौद्गहणस्यौद्गहणत्व मृचा जुहोति यज्ञस्योद्यत्या  
अनुष्टुप्छन्दसामुदयच्छदित्याहुस्तस्मादनुष्टुभा जुहोति यज्ञस्योद्यत्यै द्वादश

वात्सब्रन्धान्युदयच्छन्नित्याहुस्तस्माद्द्वादशभिर्वात्सबन्धविदो दीक्षयन्ति  
सा वा एषर्गनुष्टुग्वागनुष्टुग्यदेतयर्चा दीक्षयति वाचैवैनं सर्वया  
दीक्षयति विश्वे देवस्य नेतुरित्याह सावित्र्यैतेन मर्तो वृणीत  
सख्यमित्याह पितृदेवत्यैतेन विश्वे राय इषुध्यसीत्याह वैश्वदेव्यैतेन द्युम्नं  
वृणीत पुष्यसु इत्याह पौष्यैतेन सा वा एषर्क्सर्वदेवत्या यदेतयर्चा  
दीक्षयति सर्वाभिरेवैनं देवताभिर्दीक्षयति सप्ताक्षरं प्रथमं पदमष्टाक्षराणि  
त्रीणि यानि त्रीणि तान्यष्टावुपयन्ति यानि चत्वारि तान्यष्टौ यदष्टाक्षरा  
तेन गायत्री यदेकादशाक्षरा तेन त्रिष्टुग्यद्द्वादशाक्षरा तेन जगती सा वा  
एषर्क्सर्वाणि च्छन्दांसि यदेतयर्चा दीक्षयति सर्वेभिरेवैनं  
छन्दोभिर्दीक्षयति सप्ताक्षरं प्रथमं पदं सप्तपदा शक्वरी पशवः शक्वरी  
पशूनेवाव रुन्ध एकस्मादक्षरादनाप्तं प्रथमं पदं तस्माद्यद्वाचोऽनाप्तं  
तन्मनुष्या उप जीवन्ति पूर्णया जुहोति पूर्ण इव हि प्रजापतिः  
प्रजापतेराप्त्यै न्यूनया जुहोति न्यूनाद्धि प्रजापतिः प्रजा असृजत प्रजानां  
सृष्ट्यै ॥२॥

ऋक्सामे वै देवेभ्यो यज्ञायातिष्ठमाने कृष्णौ रूपं कृत्वापक्रम्यातिष्ठतां  
तैऽमन्यन्त यं वा इमे उपावत्स्यतः स इदं भविष्यतीति ते उपामन्त्रयन्त ते  
अहोरात्रयोर्महिमानमपनिधाय देवानुपावर्तेतामेष वा ऋचो वर्णो यच्छुक्लं  
कृष्णाजिनस्यैष साम्नो यत्कृष्ण मृक्सामयोः शिल्पे स्थ इत्याहक्सामे  
एवाव रुन्ध एष वा अहो वर्णो यच्छुक्लं कृष्णाजिनस्यैष रात्रिया यत्कृष्णं  
यदेवैनयोस्तत्र न्यक्तं तदेवाव रुन्धे कृष्णाजिनेन दीषयति ब्रह्मणो वा  
एतद्रूपं यत्कृष्णाजिनं ब्रह्मणैवैनं दीक्षयति मां धियं शिक्तमाणस्य  
देवेत्याह यथायजुरेवैत इर्भो वा एष यदीक्षित उल्बं वासः प्रोर्णुते

तस्माद्गर्भाः प्रावृता जायन्ते न पुरा सोमस्य क्रयादपोरर्वीत यत्पुरा  
 सोमस्य क्रयादपोरर्वीत गर्भाः प्रजानां परापातुकाः स्युः क्रीते सोमेऽपौरुति  
 जायत एव तदथो यथा वसीयाँसं प्रत्यपोरुति तादृगेव तदङ्गिरसः  
 सुवर्गं लोकं यन्त ऊर्जं व्यभजन्त ततो यदत्यशिष्यत ते शरा अभवन्नूर्ग्वै  
 शरा यच्छरमयी मेखला भवत्यूर्जमेवाव रुद्धे मध्यतः सं नह्यति मध्यत  
 एवास्मा ऊर्जं दधाति तस्मान्मध्यत ऊर्जा भुञ्जत ऊर्ध्वं वै पुरुषस्य नाभ्यै  
 मेध्यमवाचीनममेध्यं यन्मध्यतः संनह्यति मेध्यं चैवास्यामेध्यं च  
 व्यावर्तयतीन्द्रौ वृत्राय वज्रं प्राहरत्स त्रेधा व्यभवत्स्फ्यस्तृतीयं  
 रथस्तृतीयं यूपस्तृतीयं यैऽन्तःशरा अशीर्यन्त ते शरा अभवन्तच्छराणाँ  
 शरत्वं वज्रो वै शराः क्षुत्खलु वै मनुष्यस्य भ्रातृव्यो यच्छरमयी मेखला  
 भवति वज्रैरैव साक्षात्क्षुधं भ्रातृव्यं मध्यतोऽपं हते त्रिवृद्धवति त्रिवृद्धे  
 प्राणस्त्रिवृतमेव प्राणं मध्यतो यजमाने दधाति पृथ्वी भवति रज्जूनां  
 व्यावृत्त्यै मेखलया यजमानं दीक्षयति योक्त्रेण पत्नीं मिथुनत्वाय यज्ञो  
 दक्षिणामभ्यध्यायत्ताँ समभवत्तदिन्द्रौऽचायत्सौऽमन्यत यो वा इतो  
 जनिष्यते स इदं भविष्यतीति तां प्राविशत्तस्या इन्द्र एवाजायत  
 सौऽमन्यत यो वै मदितोऽपरो जनिष्यते स इदं भविष्यतीति तस्या  
 अनुमृश्य योनिमाच्छिनत्सा सूतवशाभवत्तत्सूतवशायै जन्म ताँ हस्ते  
 न्यवेष्टयत ताम्गेषु न्यदधात्सा कृष्णविषाणाभवदिन्द्रस्य योनिरसि मा  
 मां हिँसीरिति कृष्णविषाणाम्प्र यच्छति सयौनिमेव यज्ञं करोति सयौनिं  
 दक्षिणाँ सयौनिमिन्द्रँ सयोनित्वाय कृष्यै त्वां सुसस्याया इत्याह  
 तस्मादकृष्टपच्या ओषधयः पच्यन्ते सुपिप्पलाभ्यस्त्वौषधीभ्य इत्याह  
 तस्मादोषधयः फलं गृह्णन्ति यद्धस्तेन करडूयेत पामनम्भावुकाः प्रजाः  
 स्युर्यत्स्मयेत नग्मम्भावुकाः कृष्णविषाणयां करडूयेतेऽपिगृह्यं स्मयते

प्रजानां गोपीथाय न पुरा दक्षिणाभ्यो नेतौः कृष्णविषाणामव चृतेद्यत्पुरा  
दक्षिणाभ्यो नेतौः कृष्णविषाणामवचृतेद्योनिः प्रजानाम्परापातुका  
स्यान्नीतासु दक्षिणासु चात्वाले कृष्णविषाणां प्रास्यति योनिर्वै यज्ञस्य  
चात्वालं योनिः कृष्णविषाणा योनावेव योनिं दधाति यज्ञस्य  
सयोनित्वाय ॥३॥

वाग्वै देवेभ्योऽपाक्रामद्यज्ञायातिष्ठमाना सा वनस्पतीन्प्राविशत्सैषा  
वाग्वनस्पतिषु वदति या दुन्दुभौ या तूणवे या वीणायां यदीक्षितदण्डं  
प्रयच्छति वाचमेवाव रुद्ध औदुम्बरो भवत्यूर्वा उदुम्बर ऊर्जमेवाव  
रुद्धे मुखेन सम्मितो भवति मुखत एवास्मा ऊर्जं दधाति तस्मान्मुखत  
ऊर्जा भुञ्जते क्रीते सोमै मैत्रावरुणाय दण्डं प्र यच्छति मैत्रावरुणो हि  
पुरस्तादृत्विग्भ्यो वाचं विभजति तामृत्विजो यजमाने प्रति ष्ठापयन्ति  
स्वाहा यज्ञं मनसेत्याह मनसा हि पुरुषो यज्ञमभिगच्छति स्वाहा  
द्यावापृथिवीभ्यामित्याह द्यावापृथिव्योर्हि यज्ञः  
स्वाहोरोरन्तरिक्षादित्याहान्तरिक्षे हि यज्ञः स्वाहा यज्ञं वातादारभु  
इत्याहायं वाव यः पर्वते स यज्ञस्तमेव साक्षादा रभते मुष्टी करोति वाचं  
यच्छति यज्ञस्य धृत्या अदीक्षिष्टायं ब्राह्मण इति त्रिरुपांश्चाह देवेभ्य  
एवैनं प्राह त्रिरुच्चैरुभयेभ्य एवैनं देवमनुष्येभ्यः प्राह न पुरा नक्षत्रेभ्यो  
वाचं वि सृजेद्यत्पुरा नक्षत्रेभ्यो वाचं विसृजेद्यज्ञं विच्छिन्द्यादुदितेषु  
नक्षत्रेषु व्रतं कृणुतेति वाचं वि सृजति यज्ञव्रतो वै दीक्षितो यज्ञमेवाभि  
वाचं वि सृजति यदि विसृजेद्वैष्णवीमृचमनु ब्रूयाद्यज्ञो वै विष्णुर्यज्ञेनैव  
यज्ञं सं तनोति दैवीं धियं मनामह इत्याह यज्ञमेव तन्मदयति सुपारा  
नो असद्भश् इत्याह व्युष्टिमेवाव रुद्धे ब्रह्मवादिनो वदन्ति होतव्यं

दीक्षितस्य गृहाऽ इ न होतव्याऽमिति हविवै दीक्षितो  
 यजुह्याद्यजमानस्यावदाय जुह्याद्यन्न जुह्याद्यज्ञपरुरन्तरियाद्ये देवा  
 मनोजाता मनोयुज इत्याह प्राणा वै देवा मनोजाता मनोयुजस्तेष्वेव  
 परोऽक्षं जुहोति तन्नेव हुतं नेवाहुतं स्वपन्तं वै दीक्षितं रक्षांसि  
 जिघांसन्त्यग्निः खलु वै रक्षोहाग्ने त्वं सु जागृहि वयं सु  
 मन्दिषीमहीत्याहाग्निमेवाधिपां कृत्वा स्वपिति रक्षसामपंहत्या  
 अव्रत्यमिव वा एष करोति यो दीक्षितः स्वपिति त्वमग्ने व्रतपा  
 असीत्याहाग्निर्वै देवानां व्रतपतिः स एवैनं व्रतमा लम्भयति देव आ  
 मर्त्येष्वेत्याह देवो ह्येष सन्मर्त्येषु त्वं यज्ञेष्वीड्य इत्याहैतं हि  
 यज्ञेष्वीड्यतेऽप वै दीक्षितात्सुषुषुषु इन्द्रियं देवताः क्रामन्ति विश्वे देवा  
 अभि मामाऽववृत्रन्नित्याहेन्द्रियेणैवैनं देवताभिः सं नयति यदेतद्यजुर्न  
 ब्रूयाद्यावत एव पशून्भि दीक्षेत तावन्तोऽस्य पशवः स्यू रास्वेयत्सोमा  
 भूयो भूरेत्याहापरिमितानेव पशून्व रुद्धे चन्द्रमसि मम् भोगाय भूवेत्याह  
 यथादेवतमेवैनाः प्रति गृह्णाति वायवै त्वा वरुणाय त्वेति यदेवमेता  
 नानुदिशेदयथादेवतं दक्षिणा गमयेदा देवताभ्यो वृश्चयेत् यदेवमेता  
 अनुदिशति यथादेवतमेव दक्षिणा गमयति न देवताभ्य आ वृश्चयेत्  
 देवीरापो अपां नपादित्याह यद्वो मेध्यं यज्ञियं सदेवं तद्वो माव  
 क्रमिषमिति वावैतदाहा च्छिन्नं तन्तुं पृथिव्या अनु गेषमित्याह सेतुमेव  
 कृत्वात्येति ॥४॥

देवा वै देवयजनमध्यवसाय दिशो न प्राजानन्तैऽन्योऽन्यमुपाधावन्त्वया  
 प्र जानाम् त्वयेति तेऽदित्यां समधियन्त त्वया प्र जानामेति  
 साऽब्रवीद्वरं वृणौ मत्प्रायणा एव वो यज्ञा मदुदयना असन्निति

तस्मादादित्यः प्रायणीयौ यज्ञानामादित्य उदयनीयः पञ्च देवता यजति  
पञ्च दिशो दिशां प्रजात्या अथो पञ्चाक्षरा पङ्क्तिः पाङ्क्तौ यज्ञो यज्ञमेवाव  
रुन्द्रे पथ्याँ स्वस्तिमयजन्प्राचीमेव तथा दिशं प्राजानन्नग्निना दक्षिणा  
सोमैः प्रतीचीँ सवित्रोदीचीमदित्योर्ध्वा पथ्याँ स्वस्तिं यजति  
प्राचीमेव तथा दिशं प्रजानाति पथ्याँ स्वस्तिमिष्ट्वाग्नीषोमौ यजति  
चक्षुषी वा एते यज्ञस्य यद्ग्रीषोमौ ताभ्यामेवानु पश्यत्यग्नीषोमाविष्ट्वा  
सवितारं यजति सवितृप्रसूत एवानु पश्यति सवितारमिष्ट्वादितिं यजतीयं  
वा अदितिरस्यामेव प्रतिष्ठायानु पश्यत्यदितिमिष्ट्वा मारुतीमृचमन्वाह  
मारुतो वै दैवानां विशो देवविशं खलु वै कल्पमानं मनुष्यविशमनु  
कल्पते यन्मारुतीमृचमन्वाह विशां क्लृप्त्यै ब्रह्मवादिनो वदन्ति  
प्रयाजवदननूयाजं प्रायणीयं कार्यमनूयाजवदप्रयाजमुदयनीयमितीमे वै  
प्रयाजा अमी अनूयाजाः सैव सा यज्ञस्य सन्तति स्तत्तथा न कार्यमात्मा  
वै प्रयाजाः प्रजानूयाजा  
यत्प्रयाजानन्तरियादात्मानमन्तरियाद्यदनूयाजानन्तरियात्प्रजामन्तरियाद्यतः  
खलु वै यज्ञस्य विततस्य न क्रियते तदनु यज्ञः परा भवति यज्ञं  
पराभवन्तं यजमानोऽनु परा भवति प्रयाजवदेवानूयाजवत्प्रायणीयं कार्यं  
प्रयाजवदननूयाजवदुदयनीयं नात्मानमन्तरेति न प्रजां न यज्ञः पराभवति न  
यजमानः प्रायणीयस्य निष्कास उदयनीयमभि निर्वपति सैव सा यज्ञस्य  
सन्तति र्याः प्रायणीयस्य याज्या यत्ता उदयनीयस्य याज्याः  
कुर्यात्पराङ्मुं लोकमा रोहेत्प्रमार्युकः स्याद्याः प्रायणीयस्य  
पुरोऽनुवाक्यास्ता उदयनीयस्य याज्याः करोत्यस्मिन्नेव लोके प्रति तिष्ठति  
॥५॥



कद्रूश्च वै सुपर्णी चात्मरूपयोरस्पर्धेताँ सा कद्रूः  
 सुपर्णीमजयत्साब्रवीत्तृतीयस्यामितो दिवि सोमस्तमा हर तेनात्मानं  
 निष्क्रीणीष्वेती यं वै कद्रूसौ सुपर्णी छन्दाँसि सौपर्ण्याः साब्रवीदस्मै  
 वै पितरौ पुत्रान्बिभृतस्तृतीयस्यामितो दिवि सोमस्तमा हर तेनात्मानं  
 निष्क्रीणीष्वेति मा कद्रूवोचदिति जगत्युदपतच्चतुर्दशाक्षरा सती साप्राप्य  
 न्यवर्तत तस्यै द्वे अक्षरै अमीयेताँ सा पशुभिश्च दीक्षया  
 चागच्छत्तस्माज्जगती छन्दसां पशव्यतमा तस्मात्पशुमन्तं दीक्षोपं नमति  
 त्रिष्टुगुदपतत्रयोदशाक्षरा सती साप्राप्य न्यवर्तत तस्यै द्वे अक्षरै  
 अमीयेताँ सा दक्षिणाभिश्च तपसा चागच्छत्तस्मात्त्रिष्टुभौ लोके  
 माध्यन्दिने सर्वने दक्षिणा नीयन्त एतत्खलु वाव तप इत्याहुर्यः स्वं  
 ददातीति गायत्र्युदपतच्चतुरक्षरा सत्यजया ज्योतिषा तमस्या अजाभ्यरुन्ध  
 तदजाया अजत्वँ सा सोमं चाहरच्चत्वारिं चाक्षराणि साष्टाक्षरा  
 समपद्यत ब्रह्मवादिनो वदन्ति कस्मात्सत्याद्गायत्री कनिष्ठा छन्दसाँ  
 सती यज्ञमुखं परीयायेति यदेवादः सोममाहरत्तस्माद्यज्ञमुखं  
 पर्येत्तस्मात्तेजस्विनीतमा पद्भ्यां द्वे सर्वने समगृह्णान्मुखेनैकं यन्मुखेन  
 समगृह्णात्तदधयत्तस्माद्द्वे सर्वने शुक्रवती प्रातःसवनं च माध्यन्दिनं च  
 तस्मात्तृतीयसवनं ऋजीषमभि षुण्वन्ति धीतमिव हि मन्यन्त आशिरमव  
 नयति सशुक्रत्वायाथो सं भरत्येवैनत्तँ सोममाहियमाणं गन्धर्वो  
 विश्वावसुः पर्यमुष्णात्स तिस्रो रात्रीः परिमुषितोऽवसत्तस्मात्तिस्रो रात्रीः  
 क्रीतः सोमो वसति ते देवा अब्रुवन्स्त्रीकामा वै गन्धर्वाः स्त्रिया  
 निष्क्रीणामेति ते वाचँ स्त्रियमेकहायनीं कृत्वा तया निरक्रीणन्त्सा  
 रोहिद्रूपं कृत्वा गन्धर्वेभ्योऽपक्रम्यातिष्ठत्तद्रोहितो जन्म ते देवा अब्रुवन्नप  
 युष्मदक्रमीन्नास्मानुपावर्तते वि ह्वयामहा इति ब्रह्म गन्धर्वा

अवदन्नगायन्देवाः सा देवान्गायत उपावर्तत तस्माद्गायन्तं स्त्रियः  
कामयन्ते कामुका एनं स्त्रियौ भवन्ति य एवं वेदाथो य एवं विद्वानपि  
जन्येषु भवन्ति तेभ्य एव ददत्युत यद्बहुतयाः भवन्त्ये कहायन्या क्रीणाति  
वाचैवैनं सर्वया क्रीणाति तस्मादेकहायना मनुष्या वाचं  
वदन्त्य कूटयाकर्णयाकाणयाश्लोणयासप्तशफया क्रीणाति सर्वयैवैनं  
क्रीणाति यद्येवतया क्रीणीयाद्दुश्चर्मा यजमानः स्याद्यत्कृष्णयानुस्तरणी  
स्यात्प्रमारुको यजमानः स्याद्यदिद्वरूपया वार्त्रघ्नी स्यात्स वान्यं  
जिनीयात्तं वान्यो जिनीयादरुणया पिङ्गाक्षया क्रीणात्येतद्वै सोमस्य रूपं  
स्वयैवैनं देवतया क्रीणाति ॥६॥

तद्धिरण्यमभवत्तस्माद्दृष्टो हिरण्यपुनन्ति ब्रह्मवादिनो वदन्ति  
कस्मात्सत्यादनस्थिकेन प्रजाः प्रवीयन्तेऽस्थन्वतीर्जायन्त इति यद्धिरण्यं  
घृतेऽवधाय जुहोति तस्मादनस्थिकेन प्रजाः प्रवीयन्तेऽस्थन्वतीर्जायन्त  
एतद्वा अग्नेः प्रियं धाम यद्धृतं तेजो हिरण्यमियं तै शुक्र तनूरिदं वर्च  
इत्याह सतैजसमेवैनं सतनुं करोत्यथो सं भरत्येवैनं  
यदबद्धमवदध्याद्गर्भाः प्रजानां परापातुकाः स्युर्बद्धमव दधाति गर्भाणां  
धृत्यै निष्टर्क्यम्बध्नाति प्रजानां प्रजननाय वाग्वा एषा यत्सौमक्रयणी  
जूरसीत्याह यद्धि मनसा जवते तद्वाचा वदति धृता मनसेत्याह मनसा  
हि वाग्धृता जुष्टा विष्णाव इत्याह यज्ञो वै विष्णुर्यज्ञायैवैनां जुष्टां करोति  
तस्यास्ते सत्यसवसः प्रसव इत्याह सवितृप्रसूतामेव वाचमव रुद्धे  
कारुडैकारुडे वै क्रियमाणे यज्ञं रक्षांसि जिघांसन्त्येष खलु वा  
अरक्षोहतः पन्था योऽग्नेश्च सूर्यस्य च सूर्यस्य चक्षुरारुहमग्नेरक्षः  
कनीनिकामित्याह य एवारक्षोहतः पन्थास्तं समारोहति वाग्वा एषा

यत्सोमक्रयणी चिदसि मनासीत्याह शास्त्येवैनामेतत्तस्माच्छ्रष्टाः प्रजा  
 जायन्ते चिदसीत्याह यद्धि मनसा चेतयते तद्वाचा वदति मनासीत्याह  
 यद्धि मनसाभिगच्छति तत्करोति धीरसीत्याह यद्धि मनसा ध्यायति  
 तद्वाचा वदति दक्षिणासीत्याह दक्षिणा ह्येषा यज्ञियासीत्याह  
 यज्ञियामेवैनां करोति क्षत्रियासीत्याह क्षत्रिया ह्येषा  
 दितिरस्युभयतः शीर्ष्णीत्याह यदेवादित्यः प्रायणीयो यज्ञानामादित्य  
 उदयनीयस्तस्मादेवमाह यदबद्धा स्यादयता स्याद्यत्पदिबद्धानुस्तरणी  
 स्यात्प्रमायुको यजमानः स्यात्यत्कर्णगृहीता वार्त्रघ्नी स्यात्स वान्यं  
 जिनीयात्तं वान्यो जिनीयान्मित्रस्त्वा पदि बध्नात्वित्याह मित्रो वै शिवो  
 देवानां तेनैवैनां पदि बध्नाति पूषाध्वनः पात्वित्याहेयं वै पूषेमामेवास्या  
 अधिपामकः समष्ट्या इन्द्रायाध्यक्षायेत्याहेन्द्रमेवास्या अध्यक्षं करोत्यनु  
 त्वा माता मन्यतामनु पितेत्याहानुमतयैवैनया क्रीणाति सा दैवि  
 देवमच्छेहीत्याह देवी ह्येषा देवः सोम इन्द्राय सोममित्याहेन्द्राय हि सोम  
 आहियते यदेतद्यजुर्न ब्रूयात्पराच्येव सोमक्रयणीयाद्द्रुद्रस्त्वा  
 वर्तयत्वित्याह रुद्रो वै क्रूरो देवानां तमेवास्यै परस्ताद्घात्यावृत्त्यै  
 क्रूरमिव वा एतत्करोति यद्द्रुद्रस्य कीर्तयति मित्रस्य पथेत्याह शान्त्यै  
 वाचा वा एष वि क्रीणीते यः सोमक्रयणया स्वस्ति सोमसखा पुनरेहि  
 सह रथ्येत्याह वाचैव विक्रीय पुनरात्मन्वाचं धत्ते ऽनुपदासुकास्य  
 वाग्भवति य एवं वेद ॥७॥

षट्पदान्यनु निष्क्रामति षडहं वाङ्नाति वदत्युत संवत्सरस्यायने  
 यार्वत्येव वाक्तामव रुद्धे सप्तमे पदे जुहोति सप्तपदा शक्वरी पशवः  
 शक्वरी पशूनेवारु रुद्धे सप्त ग्राम्याः पशवः सप्तारणयाः सप्त

च्छन्दाँस्युभयस्यावरुद्ध्यै वस्व्यसि रुद्रासीत्याह रूपमेवास्या  
 एतन्महिमानं व्याचष्टे बृहस्पतिस्त्वा सुप्ते रणवत्वित्याह ब्रह्म वै देवानां  
 बृहस्पतिर्ब्रह्मणैवास्मै पशूनव रुद्धे रुद्रो वसुभिरा चिकेत्वित्याहावृत्त्यै  
 पृथिव्यास्त्वा मूर्धन्ना जिघर्मि देवयजन इत्याह पृथिव्या ह्येष मूर्धा  
 यदेवयजनमिडायाः पद इत्याहेडायाँ ह्यैतत्पदं यत्सौमक्रयण्यै घृतवति  
 स्वाहेत्याह यदेवास्यै पदाद्धृतमपीडयत् तस्मादेवमाह  
 यदध्वर्युरनग्नावाहति जुहुयादन्धोऽध्वर्युः स्याद्रक्षाँसि यज्ञं  
 हन्युर्हिरण्यमुपास्य जुहोत्यग्निवत्येव जुहोति नान्धोऽध्वर्युर्भवति न यज्ञं  
 रक्षाँसि घ्नन्ति काण्डैकाण्डे वै क्रियमाणे यज्ञं रक्षाँसि जिघाँसन्ति  
 परिलिखितं रक्षः परिलिखिता अरातय इत्याह रक्षसामपहत्या इदमहं  
 रक्षसो ग्रीवा अपि कृन्तामि योऽस्मान्द्वेष्टि यं च वयं द्विष्म इत्याह द्वौ  
 वाव पुरुषौ यं चैव द्वेष्टि यश्चैनं द्वेष्टि तयोरेवानन्तरायं ग्रीवाः कृन्तति  
 पशवो वै सौमक्रयण्यै पदं यावत् मृतं सं वपति पशूनेवाव रुद्धेऽस्मे  
 राय इति सं वपत्यात्मानमेवाध्वर्युः पशुभ्यो नान्तरैति त्वे राय इति  
 यजमानाय प्र यच्छति यजमान एव रयिं दधाति तोते राय इति पत्न्या  
 अर्धो वा एष आत्मनो यत्पत्नी यथा गृहेषु नि धत्ते तादृगेव तत्त्वष्टीमती ते  
 सपेयेत्याह त्वष्टा वै पशूनां मिथुनानाँ रूपकद्रूपमेव पशुषु दधात्यस्मै  
 वै लोकाय गार्हपत्य आ धीयतेऽमुष्मा आहवनीयो यद्गार्हपत्य  
 उपवपैदस्मिल्लोके पशुमान्त्स्याद्यदाहवनीये ऽमुष्मिल्लोके  
 पशुमान्त्स्यादुभयोरुप वपत्युभयोरैवैनं लोकयोः पशुमन्तं करोति ॥८॥

ब्रह्मवादिनो वदन्ति विचित्यः सोमाः न विचित्याः इति सोमो वा  
 ओषधीनाँ राजा तस्मिन्यदापन्नं ग्रसितमेवास्य

तद्यद्विचिनुयाद्यथास्याद्ग्रसितं निष्विदति तादृगेव तद्यन्न  
 विचिनुयाद्यथाक्षत्रापन्नं विधावति तादृगेव तत्क्षोर्धुकोऽध्वर्युः  
 स्यात्क्षोर्धुको यजमानः सोमविक्रयिन्त्सोमं शोधयेत्येव ब्रूयाद्यदीतरं  
 यदीतरमुभयैनेव सोमविक्रयिणमर्पयति तस्मात्सोमविक्रयी क्षोर्धुकोऽरुणो  
 ह स्माहौपवेशिः सोमक्रयण एवाहं तृतीयसवनमव रुन्ध इति पशूनां  
 चर्मन्मिमीते पशूनेवाव रुन्दे पशवो हि तृतीयं सर्वं यं कामयेतापशुः  
 स्यादित्यृक्षतस्तस्य मिमीतर्क्षं वा अपशव्यमपशुरेव भवति यं कामयेत  
 पशुमान्त्स्यादिति लोमतस्तस्य मिमीतैतद्वै पशूनां रूपं रूपेणैवास्मै  
 पशूनाव रुन्दे पशुमानेव भवत्य पामन्तै क्रीणाति सरसमेवैनं  
 क्रीणात्य मात्योऽसीत्याहामैवैनं कुरुते शुक्रस्ते ग्रह इत्याह शुक्रो ह्यस्य  
 ग्रहोऽनसाच्छ याति महिमानमेवास्याच्छ यात्य नसाच्छ याति  
 तस्मादनोवाह्यं समे जीवं यत्र खलु वा एतं शीष्णा हरन्ति  
 तस्माच्छीर्षहार्यं गिरौ जीवं मभि त्यं देव संवितारमित्यतिच्छन्दसुर्चा  
 मिमीतेऽतिच्छन्दा वै सर्वाणि छन्दांसि सर्वेभिरेवैनं छन्दोभिर्मिमीते  
 वर्षं वा एषा छन्दसां यदतिच्छन्दा यदतिच्छन्दसुर्चा मिमीते वर्षमैवैनं  
 समानानां करोत्य कथैकयोत्सर्गं मिमीतेऽयातयाम्नियायातयाम्नियैवैनं  
 मिमीते तस्मान्नानावीर्या अङ्गुलयः सर्वास्वङ्गुष्ठमुप नि गृह्णाति  
 तस्मात्समावद्वीर्योऽन्याभिरङ्गुलिभिस्तस्मात्सर्वा अनु सं चरति यत्सह  
 सर्वाभिर्मिमीत संश्लिष्टा अङ्गुलयो जायेरन्नेकैकयोत्सर्गं मिमीते  
 तस्माद्विभक्ता जायन्ते पञ्च कृत्वो यजुषा मिमीते पञ्चाक्षरा पङ्क्तिः पाङ्क्तौ  
 यज्ञो यज्ञमेवाव रुन्दे पञ्च कृत्वस्तूष्णीं दश सं पद्यन्ते दशाक्षरा विराडन्नं  
 विराड्विराजैवान्नाद्यमव रुन्दे यद्यजुषा मिमीते भूतमेवाव रुन्दे यत्तूष्णीं  
 भविष्य द्यद्वै तावानेव सोमः स्याद्यावन्तं मिमीते यजमानस्यैव स्यान्नापि

सदस्यानां प्रजाभ्यस्त्वेत्युप समूहति सदस्यानेवान्वाभजति वाससोप  
नह्यति सर्वदेवत्यं वै वासुः सर्वाभिरेवैनं देवताभिः समर्धयति पशवो वै  
सोमः प्राणाय त्वेत्युप नह्यति प्राणमेव पशुषु दधाति व्यानाय त्वेत्यनु  
शृन्थति व्यानमेव पशुषु दधाति तस्मात्स्वपन्तं प्राणा न जहति ॥६॥

यत्कलया ते शफेन ते क्रीणानीति पणेतगौअर्घं सोमं कुर्यादगौअर्घं  
यजमानमगौअर्घमध्वर्युं गोस्तु महिमानं नाव त्तिरेद्गवां ते क्रीणानीत्येव  
ब्रूयाद्गौअर्घमेव सोमं करोति गोअर्घं यजमानं गोअर्घमध्वर्युं न  
गोर्महिमानमव त्तिरत्य जया क्रीणाति सतपसमेवैनं क्रीणाति हिरण्येन  
क्रीणाति सशुक्रमेवैनं क्रीणाति धेन्वा क्रीणाति साशिरमेवैनं  
क्रीणात्यृषभेण क्रीणाति सेन्द्रमेवैनं क्रीणात्यनुडुहा क्रीणाति वह्निवा  
अनुड्वान्वहिनैव वह्नि यज्ञस्य क्रीणाति मिथुनाभ्यां क्रीणाति  
मिथुनस्यावरुद्ध्यै वाससा क्रीणाति सर्वदेवत्यं वै वासुः सर्वाभ्य एवैनं  
देवताभ्यः क्रीणाति दश सं पद्यन्ते दशाक्षरा विराडन्नं  
विराड्विराजैवान्नाद्यमव रुद्धे तपसस्तनूरसि प्रजापतेर्वर्ण इत्याह पशुभ्य  
एव तदध्वर्युर्नि हुत आत्मनोऽनावस्काय गच्छति श्रियं प्र पशूनांप्रोति य  
एवं वेद शुक्रं ते शुक्रेण क्रीणामीत्याह यथायजुरेवैत देवा वै येन  
हिरण्येन सोममक्रीणन्तदभीषहा पुनराददत् को हि तेजसा वि क्रेष्यत्  
इति येन हिरण्येन सोमं क्रीणीयात्तदभीषहा पुनरा ददीत् तेज  
एवात्मन्धत्तेऽस्मे ज्योतिः सोमविक्रयिणि तम् इत्याह ज्योतिरेव यजमाने  
दधाति तमसा सोमविक्रयिणामर्पयति यदनुपग्रथ्य हन्यादन्दशूकास्तां  
समां सर्पाः स्युरिदमहं सर्पाणां दन्दशूकानां ग्रीवा उप  
ग्रथ्नामीत्याहादन्दशूकास्तां समां सर्पा भवन्ति तमसा सोमविक्रयिणं

विध्यति स्वान् भ्राजेत्याहैते वा अमुष्मिल्लोके सोममरक्षन्तेभ्योऽधि  
सोममाहरन्त्यदेतेभ्यः सोमक्रयणाननुदिशेदक्रीतोऽस्य सोमः  
स्यान्नास्यैतैऽमुष्मिल्लोके सोमं रक्षेयुर्यदेतेभ्यः सोमक्रयणाननुदिशति  
क्रीतोऽस्य सोमो भवत्येतैऽस्यामुष्मिल्लोके सोमं रक्षन्ति ॥१०॥

वारुणो वै क्रीतः सोम उपनद्धो मित्रो न एहि सुमित्रधा इत्याह शान्त्या  
इन्द्रस्योरुमा विश दक्षिणमित्याह देवा वै यं सोममक्रीणन्तमिन्द्रस्योरौ  
दक्षिण आसादयन्नेष खलु वा एतर्हीन्द्रो यो यजते तस्मादेवमाहो दायुषा  
स्वायुषेत्याह देवता

एवान्वारभ्योत्तिष्ठत्युर्वन्तरिक्षमन्विहीत्याहान्तरिक्षदेवत्योर्ह्येतर्हि  
सोमोऽदित्याः सदोऽस्यदित्याः सद आ सीदेत्याह यथायजुरेवैतद्वि वा  
एनमेतदर्धयति यद्धारुणं सन्तम्मैत्रं करोति वारुण्यर्चा सादयति स्वयैवैनं  
देवतया समर्धयति वाससा पर्यानह्यति सर्वदेवत्यं वै वासः सर्वाभिरेवैनं  
देवताभिः समर्धयत्यथो रक्षसामपहत्यै वनेषु व्यन्तरिक्षं ततानेत्याह वनेषु  
हि व्यन्तरिक्षं ततान् वाजमर्वत्स्वित्याह वाजं ह्यर्वत्सु पयो  
अघ्नियास्वित्याह पयो ह्यघ्नियासु हत्सु क्रतुमित्याह हत्सु हि क्रतुं वरुणो  
विद्वर्गिमित्याह वरुणो हि विद्वर्गिं दिवि सूर्यमित्याह दिवि हि  
सूर्यं सोममद्रावित्याह ग्रावाणो वा अद्र्यस्तेषु वा एष सोमं दधाति यो  
यजते तस्मादेवमाहो दु त्यं जातवैदसमिति सौर्यर्चा  
कृष्णाजिनम्प्रत्यानह्यति रक्षसामपहत्या उस्त्रावेतं धूर्षाहावित्याह  
यथायजुरेवैतत्प्र च्यवस्व भुवस्पत इत्याह भूतानां ह्येष पतिर्विश्वान्यभि  
धामानीत्याह विश्वानि ह्यैरुषोऽभि धामानि प्रच्यवते मा त्वा परिपरी  
विददित्याह यदेवादः सोममाहियमाणं गन्धर्वो विश्वावसुः

पर्यमुष्णात्तस्माद्देवमाहापरिमोषाय यजमानस्य स्वस्त्ययन्यसीत्याह  
यजमानस्यैवैष यज्ञस्यान्वारम्भोऽनवच्छित्त्यै वरुणो वा एष  
यजमानमभ्यैति यत्क्रीतः सोम उपनद्धो नमो मित्रस्य वरुणस्य चक्षस  
इत्याह शान्त्या आ सोमं वहन्त्यग्निना प्रति तिष्ठते तौ सम्भवन्तौ  
यजमानमभि सम्भवतः पुरा खलु वावैष मेधायात्मानमारभ्य चरति यो  
दीक्षितो यदग्नीषोमीयम्पशुमालभत आत्मनिष्क्रयण एवास्य स  
तस्मात्तस्य नाशयं पुरुषनिष्क्रयण इव ह्यथो खल्वाहुरग्नीषोमाभ्यां वा  
इन्द्रो वृत्रमहन्निति यदग्नीषोमीयम्पशुमालभते वार्त्रघ्न एवास्य स  
तस्माद्वाशयं वारुणयर्चा परि चरति स्वयैवैनं देवतया परि चरति ॥११॥

इति षष्ठकारण्डे प्रथमः प्रपाठकः १

अथ षष्ठकारण्डे द्वितीयः प्रपाठकः २

यदुभौ विमुच्यातिथ्यं गृह्णीयाद्यज्ञं वि च्छिन्द्याद्यदुभावविमुच्य  
यथानागतायातिथ्यं क्रियते तादृगेव  
तद्विमुक्तोऽन्योऽनुड्वान्भवत्यविमुक्तोऽन्योऽथातिथ्यं गृह्णाति यज्ञस्य  
संतत्यै पत्न्यन्वारभते पत्नी हि पारीणह्यस्येशे पत्न्यैवानुमतं निर्वपति यद्वै  
पत्नी यज्ञस्य करोति मिथुनं तदथो पत्न्या एवैष  
यज्ञस्यान्वारम्भोऽनवच्छित्त्यै यावद्भिवै राजानुचरैरागच्छति सर्वेभ्यो वै  
तेभ्य आतिथ्यं क्रियते छन्दांसि खलु वै सोमस्य  
राज्ञोऽनुचरागयग्रेरातिथ्यमसि विष्णावे त्वेत्याह गायत्रिया एवैतेन करोति  
सोमस्यातिथ्यमसि विष्णावे त्वेत्याह त्रिष्टुभ एवैतेन  
करोत्यतिथेरातिथ्यमसि विष्णावे त्वेत्याह जगत्या एवैतेन करोत्यग्रये  
त्वा रायस्पोषदाव्ने विष्णावे त्वेत्याहानुष्टुभ एवैतेन करोति श्येनाय त्वा



सोमभृते विष्णवे त्वेत्याह गायत्रिया एवैतेन करोति पञ्च कृत्वौ गृह्णाति  
 पञ्चाक्षरा पङ्क्तिः पाङ्क्तौ यज्ञो यज्ञमेवाव रुद्धे ब्रह्मवादिनो वदन्ति  
 कस्मात्सत्याद्गायत्रिया उभयत आतिथ्यस्य क्रियत इति यदेवादः  
 सोममाहर्त्तस्माद्गायत्रिया उभयत आतिथ्यस्य क्रियते पुरस्ताच्चोपरिष्ठाच्च  
 शिरो वा एतद्यज्ञस्य यदातिथ्यं नवकपालः पुरोडाशो भवति तस्मान्नवधा  
 शिरो विष्यूतं नवकपालः पुरोडाशो भवति ते त्रयस्त्रिकपालास्त्रिवृता  
 स्तोमेन सम्मितास्तेजस्त्रिवृत्तेज एव यज्ञस्य शीर्षन्दधाति नवकपालः  
 पुरोडाशो भवति ते त्रयस्त्रिकपालास्त्रिवृता प्राणेन सम्मितास्त्रवृद्धे  
 प्राणस्त्रिवृतमेव प्राणमभिपूर्वं यज्ञस्य शीर्षन्दधाति प्रजापतेर्वा एतानि  
 पद्माणि यदश्ववाला ऐक्ष्वी तिरश्ची यदाश्ववालः प्रस्तरो भवत्यैक्ष्वी  
 तिरश्ची प्रजापतेरेव तच्चक्षुः सम्भरति देवा वै या आहृतीरजुहवुस्ता असुरा  
 निष्कावमादन्ते देवाः कार्ष्ण्यमपश्यन्कर्मण्यो वै कर्मैनेन कुर्वीतेति ते  
 कार्ष्ण्यमयान्परिधीनकुर्वत तैर्वै ते रक्षाँस्यपाघ्नत यत्कार्ष्ण्यमयाः  
 परिधयो भवन्ति रक्षसामपहत्यै सँ स्पर्शयति रक्षसामनन्ववचाराय न  
 पुरस्तात्परि दधात्यादित्यो ह्यैवोद्यन्पुरस्ताद्रक्षाँस्यपहन्त्यूर्ध्वे समिधावा  
 दधात्युपरिष्ठादेव रक्षाँस्यपहन्ति यजुषान्यां तूष्णीमन्यामिथुनत्वाय द्वे  
 आ दधाति द्विपाद्यजमानः प्रतिष्ठित्यै ब्रह्मवादिनो वदन्त्यग्निश्च वा एतौ  
 सोमश्च कथा सोमायातिथ्यं क्रियते नाग्नय इति यद्ग्रावग्निमथित्वा  
 प्रहरति तेनैवाग्नय आतिथ्यं क्रियतेऽथो खल्वाहुरग्निः सर्वा देवता इति  
 यद्भुविरासाद्याग्निमन्थति हव्यायैवासन्नाय सर्वा देवता जनयति ॥१॥

देवासुराः संयत्ता आसन्ते देवा मिथो विप्रिया आसन्तैरुन्योऽन्यस्मै  
 ज्यैष्ठ्यायातिष्ठमानाः पञ्चधा व्यक्रामन्नग्निर्वसुभिः सोमो रुद्रैरिन्द्रो

मरुद्भिर्वरुण आदित्यैर्बृहस्पतिर्विश्वैर्देवैस्तेऽमन्यन्तासुरेभ्यो वा  
 इदम्भ्रातृव्येभ्यो रध्यामो यन्मिथो विप्रियाः स्मो या न इमाः  
 प्रियास्तनुवस्ताः समवद्यामहे ताभ्यः स निर्ऋच्छाद्यो नः  
 प्रथमोऽन्योऽन्यस्मै द्रुह्यादिति तस्माद्यः सतानूनज्रिणाम्प्रथमो द्रुह्यति स  
 आर्तिमाच्छति यत्तानूनप्त्रं समवद्यति भ्रातृव्याभिभूत्यै भवत्यात्मना  
 परास्य भ्रातृव्यो भवति पञ्च कृत्वोऽव द्यति पञ्चधा हि ते  
 तत्समवाद्यन्ताथो पञ्चाक्षरा पङ्क्तिः पाङ्क्तौ यज्ञो यज्ञमेवाव रुच्छु आपतये  
 त्वा गृह्णामीत्याह प्राणो वा आपतिः प्राणमेव प्रीणाति परिपतय इत्याह  
 मनो वै परिपतिर्मन एव प्रीणाति तनूनप्त्र इत्याह तनुवो हि ते ताः  
 समवाद्यन्त शाक्वरायेत्याह शक्त्यै हि ते ताः समवाद्यन्त  
 शक्मन्नोजिष्टायेत्याहौजिष्टं हि ते तदात्मनः  
 समवाद्यन्ता नाधृष्टमस्यनाधृष्यमित्याहानाधृष्टं ह्येतदनाधृष्यं  
 देवानामोज इत्याह देवानां ह्येतदोजोऽभिशस्तिपा  
 अनभिशस्तेन्यमित्याहाभिशस्तिपा ह्येतदनभिशस्तेन्य मनु मे दीक्षां  
 दीक्षापतिर्मन्यतामित्याह यथायजुरेवैतद्धृतं वै देवा वज्रं कृत्वा  
 सोममघ्नन्तिकमिव खलु वा अस्यैतच्चरन्ति यत्तानूनप्त्रेण  
 प्रचरन्त्यं शुरं शुस्ते देव सोमाप्यायतामित्याह यदेवास्यापुवायते  
 यन्मीयते तदेवास्यैतेनाप्या ययत्या तुभ्यमिन्द्रः प्यायतामा त्वमिन्द्राय  
 प्यायस्वेत्याहोभावेवेन्द्रं च सोमं चाप्याययत्या प्यायय सखीन्त्सुन्या  
 मेधयेत्याहृत्विजो वा अस्य सखायस्तानेवाप्याययति स्वस्ति तै देव सोम  
 सुत्यामशीयेत्याहाशिषमेवैतामा शास्ते प्र वा एतैऽस्माल्लोकाच्चयवन्ते ये  
 सोममाप्याययन्त्यन्तरिक्षदेवत्यो हि सोम आप्यायित एष्टा रायः प्रेषे  
 भगायेत्याह द्यावापृथिवीभ्यामेव नमस्कृत्यास्मिल्लोके प्रति तिष्ठन्ति

देवासुराः संयत्ता आसन्ते देवा बिभ्यंतोऽग्निम्प्राविशन्तस्मादाहुरग्निः सर्वा  
 देवता इति तैऽग्निमेव वरूथं कृत्वासुरानभ्यभवन्नग्निमिव खलु वा एष प्र  
 विशति योऽवान्तरदीक्षामुपैति भ्रातृव्याभिभूत्यै भवत्यात्मना परास्य  
 भ्रातृव्यो भवत्यात्मानमेव दीक्षया पाति प्रजामवान्तरदीक्षया  
 संतराम्मेखलाँ समार्यच्छते प्रजा ह्यात्मनोऽन्तरतरा तप्रव्रतो भवति  
 मदन्तीभिर्मार्जयते निर्ह्यग्निः शीतेन वार्यति समिद्ध्यै या तै अग्ने रुद्रिया  
 तनूरित्याह स्वयैवैनद्देवतया व्रतयति सयोनित्वाय शान्त्यै ॥२॥

तेषामसुराणां तिस्रः पुरं आसन्नयस्मर्यवमार्थं रजताथ हरिणी ता देवा  
 जेतुं नाशक्नुवन्ता उपसदैवाजिगीषन्तस्मादाहुर्यश्चैवं वेद यश्च नोपसदा वै  
 महापुरं जयन्तीति त इषुँ समस्कुर्वताग्निमनीकँ सोमँ शल्यं विष्णुं  
 तेजनं तैऽब्रुवन्क इमामसिष्यतीति रुद्र इत्यब्रुवन्नद्रो वै क्रूरः सौऽस्यत्विति  
 सौऽब्रवीद्वरं वृणा अहमेव पशूनामधिपतिरसानीति तस्माद्दुद्रः  
 पशूनामधिपतिस्ताँ रुद्रोऽवासृजत्स तिस्रः पुरो भित्त्वैभ्यो  
 लोकेभ्योऽसुरान्प्राणदत्त यदुपसदं उपसद्यन्ते भ्रातृव्यपराणुत्त्यै  
 नान्यामाहुतिम्पुरस्ताञ्जुहुयाद्यदन्यामाहुतिम्पुरस्ताञ्जुहुया दन्यन्मुखं  
 कुर्यात्स्रुवेणाघारमा घारयति यज्ञस्य प्रज्ञात्यैपराङ्तिक्रम्यं जुहोति पराच  
 एवैभ्यो लोकेभ्यो यजमानो भ्रातृव्यान्प्र णुदते पुनरत्याक्रम्योपसदं जुहोति  
 प्रणुद्यैवैभ्यो लोकेभ्यो भ्रातृव्याञ्जित्वा भ्रातृव्यलोकमभ्यारोहति देवा वै  
 याः प्रातरुपसदं उपासीदन्नहस्ताभिरसुरान्प्राणदन्त याः सायँ रात्रियै  
 ताभिर्यत्सायम्प्रातरुपसदं उपसद्यन्तैऽहोरात्राभ्यामेव तद्यजमानो  
 भ्रातृव्यान्प्र णुदते याः प्रातर्याज्याः स्युस्ताः सायम्पुरोऽनुवाक्याः  
 कुर्यादयातयामत्वाय तिस्र उपसद उपाति त्रय इमे लोका इमानेव

लोकान्प्रीणाति षट्सम्पद्यन्ते षड्वा ऋतव ऋ तूनेव प्रीणाति द्वादशाहीने  
सोम उपैति द्वादश मासाः संवत्सरः संवत्सरमेव प्रीणाति चतुर्विंशतिः  
सं पद्यन्ते चतुर्विंशतिरर्धमासा अर्धमासानेव  
प्रीणात्या रांग्रामवान्तरदीक्षामुपेयाद्यः कामयेतास्मिन्मै लोकेऽर्धुकं  
स्यादित्येकमग्रेऽथ द्वावथ त्रीनथ चतुर एषा वा  
आरांग्रावान्तरदीक्षास्मिन्नेवास्मै लोकेऽर्धुकम्भवति  
परोवरीयसीमवान्तरदीक्षामुपेयाद्यः कामयेतामुष्मिन्मे लोकेऽर्धुकं  
स्यादिति चतुरोऽग्रेऽथ त्रीनथ द्वावथैकमेषा वै  
परोवरीयस्यवान्तरदीक्षामुष्मिन्नेवास्मै लोकेऽर्धुकम्भवति ॥३॥

सुवर्गं वा एते लोकं यन्ति य उपसदं उपयन्ति तेषां य उन्नयते हीयत एव  
स नोदनेषीति सूत्रीयमिव यो वै स्वार्थेतां यतां श्रान्तो हीयत उत स  
निष्ठयाय सह वसति तस्मात्सकृदुन्नीय नापरमुन्नयेत दधोन्नयेतैतद्वै  
पशूनां रूपं रूपेणैव पशूनव रुद्धे यज्ञो देवेभ्यो निलायत विष्णू रूपं  
कृत्वा स पृथिवीम्प्राविशत्तं देवा हस्तान्त्संरभ्यैच्छन्तमिन्द्र  
उपर्युपर्यत्यक्रामत्सोऽब्रवीत्को मायमुपर्युपर्यत्यक्रमीदित्यहं दुर्गे हन्तेत्यथ  
कस्त्वमित्यहं दुर्गादाहर्तेति सोऽब्रवीद्दुर्गे वै हन्तावोचथा वराहोऽयं  
वाममोषः सप्तानां गिरीणाम्परस्ताद्वित्तं वेद्यमसुराणाम्बिभर्ति तं जहि यदि  
दुर्गे हन्तासीति स दर्भपुञ्जीलमुद्धृत्य सप्त गिरीन्भित्त्वा  
तमहन्त्सोऽब्रवीद्दुर्गाद्वा आहर्तावोचथा एतमा हरेति तमेभ्यो यज्ञ एव  
यज्ञमाहरद्यत्तद्वित्तं वेद्यमसुराणामविन्दन्त तदेकं वेद्यै वेदित्व मसुराणां  
वा इयमग्र आसीद्यावदासीनः परापश्यति तावद्देवानां ते देवा  
अब्रुवन्नस्त्वेव नोऽस्यामपीति कियद्वो दास्याम् इति यावदियं

सलावृकी त्रिः परिक्रामति तावन्नो दत्तेति स इन्द्रः सलावृकी रूपं  
 कृत्वेमां त्रिः सर्वतः पर्यक्रामत्तदिमामविन्दन्त यदिमामविन्दन्त तद्वेद्यै  
 वेदित्वं सा वा इयं सर्वैव वेदिरियति शक्यामीति त्वा अत्रमायं  
 यजन्ते त्रिंशत्पदानि पश्चात्तिरश्ची भवति षट्त्रिंशत्प्राची चतुर्विंशतिः  
 पुरस्तात्तिरश्ची दशदश सम्पद्यन्ते दशाक्षरा विरादन्नं  
 विराद्विराजैवान्नाद्यमव रुद्ध उद्धन्ति यदेवास्या अमेध्यं तदप  
 हन्त्युद्धन्ति तस्मादोषधयः परा भवन्ति बर्हिः स्तृणाति तस्मादोषधयः  
 पुनरा भवन्त्युत्तरम्बर्हिष उत्तरबर्हिः स्तृणाति प्रजा वै बर्हिर्यजमान  
 उत्तरबर्हिर्यजमानमेवायजमानादुत्तरं करोति  
 तस्माद्यजमानोऽयजमानादुत्तरः ॥४॥

यद्वा अनीशानो भारमादत्ते वि वै स लिशते यद्द्वादश साहस्योपसदः  
 स्युस्तिस्त्रोऽहीनस्य यज्ञस्य विलौम क्रियेत तिस्र एव साहस्योपसदो  
 द्वादशाहीनस्य यज्ञस्य सवीर्यत्वायाथो सलौम क्रियते वत्सस्यैकः स्तनौ  
 भागी हि सोऽथैकं स्तनं व्रतमुपैत्यथ द्वावथ त्रीनथ चतुर एतद्वै चुरपवि  
 नाम व्रतं येन प्र जाताभ्रातृव्यानुदते प्रति जनिष्यमाणानथो कनीयसैव  
 भूय उपैति चतुरोऽग्रे स्तनान्व्रतमुपैत्यथ त्रीनथ द्वावथैकमेतद्वै सुजघनं  
 नाम व्रतं तपस्यं सुवर्ग्यमथो प्रैव जायते प्रजयां पशुभि र्यवागू  
 राजन्यस्य व्रतं क्रूरेव वै यवागूः क्रूर इव राजन्यो वज्रस्य रूपं समृद्ध्या  
 आमिक्षा वैश्यस्य पाकयज्ञस्य रूपमुष्ट्यै पयो ब्राह्मणस्य तेजो वै  
 ब्राह्मणस्तेजः पयस्तेजसैव तेजः पर्य आत्मन्धत्तेऽथो पर्यसा वै गर्भा  
 वर्धन्ते गर्भ इव खलु वा एष यद्दीक्षितो यदस्य पयो व्रतम्भवत्यात्मानमेव  
 तद्वर्धयति त्रिव्रतो वै मनुरासीद्विव्रता असुरा एकव्रता देवाः

प्रातर्मध्यंदिने सायं तन्मनोर्व्रतमासीत्पाकयज्ञस्य रूपम्पुष्ट्यै प्रातश्च सायं  
चासुराणां निर्मध्यं क्षुधो रूपं ततस्ते पराभवन्मध्यंदिने मध्यरात्रे देवानां  
ततस्तेऽभवन्सुवर्गं लोकमायन्यदस्य मध्यंदिने मध्यरात्रे व्रतम्भवति  
मध्यतो वा अत्रेन भुञ्जते मध्यत एव तदूर्जं धत्ते भ्रातृव्याभिभूत्यै  
भवत्यात्मना परास्य भ्रातृव्यो भवति गर्भो वा एष यदीक्षितो  
योनिर्दीक्षितविमितं यदीक्षितो दीक्षितविमितात्प्रवसेद्यथा योनेर्गर्भः  
स्कन्दति तादृगेव तन्न प्रवस्तव्यमात्मनो गोपीथायै ष वै व्याघ्रः  
कुलगोपो यदग्निस्तस्माद्यदीक्षितः प्रवसेत्स एनमीश्वरौऽनूत्थाय हन्तोर्न  
प्रवस्तव्यमात्मनो गुप्त्यै दक्षिणतः शय एतद्वै यजमानस्यायतनं स्व  
एवायतने शयेऽग्निमभ्यावृत्य शये देवता एव यज्ञमभ्यावृत्य शये ॥५॥

पुरोहविषि देवयजने याजयेद्यं कामयेतोपैनमुत्तरो यज्ञो नमेदभि सुवर्गं  
लोकं जये दित्येतद्वै पुरोहविर्देवयजनं यस्य होता  
प्रातरनुवाकमनुब्रुवन्नग्निमप आदित्यमभि विपश्यत्युपै नमुत्तरो यज्ञो  
नमत्यभि सुवर्गं लोकं जयत्याप्ते देवयजने याजयेद्भ्रातृव्यवन्तं पन्थां  
वाधिस्पर्शयैत्कर्तं वा यावन्नानसे यातवै न रथायैतद्वा आप्तं  
देवयजनमाप्नोत्येव भ्रातृव्यं नैनम्भ्रातृव्य आप्नोत्ये कौन्नते देवयजने  
याजयेत्पशुकामं मेकौन्नताद्वै देवयजनादङ्गिरसः पशूनसृजन्तान्तरा  
सदोहविधानि उन्नतं स्यादेतद्वा एकौन्नतं देवयजनं पशुमानेव भवति  
त्र्युन्नते देवयजने याजयेत्सुवर्गकामं त्र्युन्नताद्वै देवयजनादङ्गिरसः सुवर्गं  
लोकमा यन्नन्तराहवनीयं च हविर्धानं चोन्नतं स्यादन्तरा हविर्धानं च  
सदश्चान्तरा सदश्च गार्हपत्यं चैतद्वै त्र्युन्नतं देवयजनं सुवर्गमेव लोकमैति  
प्रतिष्ठिते देवयजने याजयेत्प्रतिष्ठाकाममेतद्वै प्रतिष्ठितं देवयजनं

यत्सर्वतः समं प्रत्येव तिष्ठति यत्रान्याग्रन्या ओषधयो व्यतिषक्ताः  
 स्युस्तद्याजयेत्पशुकाम मेतद्वै पशूनां रूपं रूपेणैवास्मै पशूनव रुद्धे  
 पशुमानेव भवति निर्ऋतिगृहीते देवयजने याजयेद्यं कामयैत निर्ऋत्यास्य  
 यज्ञं ग्राहयेयमित्ये तद्वै निर्ऋतिगृहीतं देवयजनं यत्सदृश्यै सत्या ऋत्नं  
 निर्ऋत्यैवास्य यज्ञं ग्राहयति व्यावृत्ते देवयजने याजयेद्द्व्यावृत्कामं यम्पात्रे  
 वा तल्पे वा मीमांसेरन्प्राचीनमाहवनीयात्प्रवणं स्यात्प्रतीचीनं  
 गार्हपत्यादेतद्वै व्यावृत्तं देवयजनं वि पाप्मना भ्रातृव्येणा वर्तते नैनम्पात्रे  
 न तल्पे मीमांसन्ते कार्ये देवयजने याजयेद्भूतिकामं कार्यो वै पुरुषो  
 भवत्येव ॥६॥

तेभ्य उत्तरवेदिः सिंही रूपं कृत्वोभयानन्तरापक्रम्यातिष्ठते देवा  
 अमन्यन्त यतरान्वा इयमुपावत्स्यति त इदम्भविष्यन्तीति तामुपामन्त्रयन्त  
 साब्रवीद्वरं वृणै सर्वात्मया कामान्वयश्नवथ पूर्वा तु माग्नेराहुतिरश्नवता  
 इति तस्मादुत्तरवेदिम्पूर्वामग्नेर्व्याघारयन्ति वारैवृतं ह्यस्यै शर्म्यया परि  
 मिमीते मात्रैवास्यै साथौ युक्तेनैव युक्तमव रुद्धे वित्तार्यनी मेऽसीत्याह  
 वित्ता ह्यैनानावत्तिकार्यनी मे ऽसीत्याह तित्कान्ह्यैनानावदवतान्मा  
 नाथितमित्याह नाथितान्ह्यैनानावदवतान्मा व्यथितमित्याह  
 व्यथितान्ह्यैनानावद्विदेरग्निर्नभो नामाग्ने अङ्गिर इति त्रिहरति य एवैषु  
 लोकेष्वग्रयस्तानेवाव रुद्धे तूष्णीं चतुर्थं हरत्यनिरुक्तमेवाव रुद्धे सि  
 महिषीरसीत्याह सिंहीर्ह्येषा रूपं कृत्वोभयानन्तरापक्रम्यातिष्ठ दुरु  
 प्रथस्वोरु ते यज्ञपतिः प्रथतामित्याह यजमानमेव प्रजया पशुभिः प्रथयति  
 ध्रुवासीति स हन्ति धृत्यै देवेभ्यः शुन्धस्व देवेभ्यः शुम्भस्वेत्यव  
 चोक्षति प्र च किरति शुद्ध्या इन्द्रघोषस्त्वा वसुभिः पुरस्तात्पात्वित्याह

दिग्भ्य एवैनम्प्रोक्षति देवाँश्चेदुत्तरवेदिरुपाववर्तीहैव वि जयामहा  
इत्यसुरा वज्रमुद्यत्य देवानभ्यायन्त तानिन्द्रघोषो वसुभिः पुरस्तादपानुदत  
मनोजवाः पितृभिर्दक्षिणतः प्रचेता रुद्रैः पश्चाद्विश्वकर्मादित्यैरुत्तरतो  
यदेवमुत्तरवेदिम्प्रोक्षति दिग्भ्य एव तद्यजमानो भ्रातृव्यान्प्रणुदत इन्द्रो  
यतीन्त्सालावृकेभ्यः प्रायच्छत्तान्दक्षिणत उत्तरवेद्या  
आदन्यत्प्रोक्षणीनामुच्छिष्येत तदक्षिणत उत्तरवेद्यै नि नयेद्यदेव तत्र क्रूरं  
तत्तेन शमयति यं द्विष्यात्तं ध्यायेच्छुचैवैनमर्पयति ॥७॥

सोत्तरवेदिरब्रवीत्सर्वान्मया कामान्व्यशनवथेति ते देवा  
अकामयन्तासुरान्भ्रातृव्यानभि भवेमेति तैऽजुहवुः सिँहीरसि सपत्नसाही  
स्वाहेति तेऽसुरान्भ्रातृव्यानभ्यभवन्तेऽसुरान्भ्रातृव्यानभिभूयाकामयन्त प्रजां  
विन्देमहीति तैऽजुहवुः सिँहीरसि सुप्रजावनिः स्वाहेति ते  
प्रजामविन्दन्त ते प्रजां वित्त्वाकामयन्त पशून्विन्देमहीति तैऽजुहवुः  
सिँहीरसि रायस्पोषवनिः स्वाहेति ते पशून्विन्दन्त ते  
पशून्वित्त्वाकामयन्त प्रतिष्ठां विन्देमहीति तैऽजुहवुः  
सिँहीरस्यादित्यवनिः स्वाहेति त इमाम्प्रतिष्ठामविन्दन्त त इमाम्प्रतिष्ठां  
वित्त्वाकामयन्त देवता आशिष उपेयामेति तैऽजुहवुः सिँहीरस्या वह  
देवान्देवयते यजमानाय स्वाहेति ते देवता आशिष उपायन्पञ्च कृत्वो  
व्याधारयति पञ्चाक्षरा पङ्क्तिः पाङ्क्तौ यज्ञो यज्ञमेवाव रुद्धेऽद्दणया  
व्याधारयति तस्मादद्दणया पशवोऽङ्गानि प्र हरन्ति प्रतिष्ठित्यै  
भूतेभ्यस्त्वेति स्रुचमुद्गृह्णाति य एव देवा भूतास्तेषां तद्भागधेयं तानेव तेन  
प्रीणाति पौतुद्रवान्परिधीन्परि दधात्येषां लोकानां विधृत्या अग्नेस्त्रयो  
ज्यायाँसो भ्रातर आसन्ते देवेभ्यो हव्यं वहन्तः प्रामीयान्त



सौऽग्निरंबिभेदित्थं वाव स्य आर्तिमारिष्यतीति स निलायत स यां  
 वनस्पतिष्ववसत्ताम्पूतुद्रौ यामोषधीषु तां सुगन्धितेजने याम्पशुषु  
 ताम्पेत्वस्यान्तरा शृङ्गे तं देवताः प्रैषमैच्छन्तमन्वविन्दन्तमब्रुवन्नप न आ  
 वर्तस्व हव्यं नो वहेति सौऽब्रवीद्वरं वृणौ यदेव गृहीतस्याहुतस्य  
 बहिःपरिधि स्कन्दात्तन्मे भ्रातृणाम्भागधेयमसदिति  
 तस्माद्यद्गृहीतस्याहुतस्य बहिःपरिधि स्कन्दति तेषां तद्भागधेयं तानेव तेन  
 प्रीणाति सौऽमन्यतास्थन्वन्तौ मे पूर्वे भ्रातरः प्रामेषतास्थानि शातया इति  
 स यान्यस्थान्यशातयत तत्पूतुद्ब्रभवद्यन्मां समुपमृतं तद्गुलु  
 यदेतान्त्संभारान्त्सम्भरत्यग्निमेव तत्सम्भरत्यग्नेः  
 पुरीषमसीत्याहाग्नेर्ह्येतपुरीषं यत्संभारा अथो खल्वाहुरेते वावैनं ते भ्रातरः  
 परि शेरे यत्पौतुद्रवाः परिधय इति ॥८॥

बद्धमव स्यति वरुणापाशादेवैनै मुञ्चति प्र रौनेक्ति मेध्ये एवैनै करोति  
 सावित्रियर्चा हुत्वा हविर्धानि प्र वर्तयति सवितृप्रसूत एवैनै प्र वर्तयति  
 वरुणो वा एष दुर्वागुभयतौ बद्धो यदक्षः स यदुत्सर्जेद्यजमानस्य  
 गृहानभ्युत्सर्जेत्सुवाग्देव दुर्यां आ वदेत्याह गृहा वै दुर्याः शान्त्यै  
 पत्युपानक्ति पत्नी हि सर्वस्य मित्रं मित्रत्वाय यद्वै पत्नी यज्ञस्य करोति  
 मिथुनं तदथो पत्न्या एवैष यज्ञस्यान्वारम्भोनवच्छित्त्यै वर्त्मना वा  
 अन्वित्यं यज्ञं रक्षांसि जिघांसन्ति वैष्णवीभ्यामृग्भ्यां वर्त्मनोर्जुहोति  
 यज्ञो वै विष्णुर्यज्ञादेव रक्षांस्यप हन्ति यदध्वर्युरेनग्नावाहुतिं  
 जुहुयादन्धौऽध्वर्युः स्याद्रक्षांसि यज्ञं हन्युर्हिरण्यमुपास्यं  
 जुहोत्यग्निवत्येव जुहोति नान्धौऽध्वर्युर्भवति न यज्ञं रक्षांसि घ्नन्ति  
 प्राची प्रेतमध्वरं कल्पयन्ती इत्याह सुवर्गमेवैनै लोकं गमयत्यत्र रमेथां

वर्ष्मन्पृथिव्या इत्याह वर्ष्म ह्येतत्पृथिव्या यदैवयर्जन् शिरो वा  
 एतद्यज्ञस्य यद्धविर्धानं दिवो वा विष्णवुत वा पृथिव्या इत्याशीर्षदयर्चा  
 दक्षिणस्य हविर्धानस्य मेथीं नि हन्ति शीर्षत एव यज्ञस्य यर्जमान  
 आशिषोऽव रुद्धे दृशडो वा औपरस्तृतीयस्य हविर्धानस्य  
 वषट्कारेणाक्षमच्छिन्नद्यत्तृतीयं छुदिर्हविर्धानयोरुदाह्रियते तृतीयस्य  
 हविर्धानस्यावृद्धयै शिरो वा एतद्यज्ञस्य यद्धविर्धानं विष्णो रराटमसि  
 विष्णोः पृष्ठमसीत्याह तस्मादितावद्धा शिरो विष्यूतं विष्णोः स्यूरसि  
 विष्णोर्ध्रुवमसीत्याह वैष्णवः हि देवतया हविर्धानं यम्प्रथमं ग्रन्थिं  
 ग्रन्थीयात्यत्तं न विस्रः सयेदमेहेनाध्वर्युः प्र मीयेत तस्मात्स विस्रस्यः  
 ॥६॥

देवस्य त्वा सवितुः प्रसुव इत्यध्रिमा दत्ते प्रसूत्या  
 अश्विनौर्बाहुभ्यामित्याहाश्विनौ हि देवानामध्वर्यु आस्तां पूष्णो  
 हस्ताभ्यामित्याह यत्यै वज्र इव वा एषा यदभ्रिरभ्रिरसि नारिरसीत्याह  
 शान्त्यै कारडैकारडे वै क्रियमाणे यज्ञः रक्षांसि जिघांसन्ति  
 परिलिखितः रक्षः परिलिखिता अरातय इत्याह रक्षसामपहत्या इदमहः  
 रक्षसो ग्रीवा अपि कृन्तामि योऽस्मान्द्वेष्टि यं च वयं द्विष्म इत्याह द्वौ  
 वाव पुरुषौ यं चैव द्वेष्टि यश्चैनं द्वेष्टि तयोरेवानन्तरायं ग्रीवाः कृन्तति दिवे  
 त्वान्तरिक्षाय त्वा पृथिव्यै त्वेत्याहैभ्य एवैनां लोकेभ्यः प्रोक्षति  
 परस्तादवाचीम्प्रोक्षति तस्मात्परस्तादवाचीम्मनुष्या ऊर्जमुप जीवन्ति  
 क्रूरमिव वा एतत्करोति यत्स्वनत्यपोऽव नयति शान्त्यै यवमतीरव  
 नयत्यूगर्वै यव ऊर्गुदुम्बर ऊर्जैवोर्जः समर्धयति यर्जमानेन  
 सम्मितौदुम्बरी भवति यावानेव यर्जमानस्तावतीमेवास्मिन्नूर्ज दधाति

पितृणां सदनमसीति बर्हिरव स्तृणाति पितृदेवत्यं ह्येतद्यन्निखातं  
 यद्बर्हिरनवस्तीर्य मिनुयात्पितृदेवत्या निखाता स्याद्बर्हिरवस्तीर्य  
 मिनोत्यस्यामेवैनां मिनोत्यथो स्वारुहमेवैनां करोत्यु द्विवं  
 स्तभानान्तरिक्षम्पृणेत्याहैषां लोकानां विधृत्यै द्युतानस्त्वा मारुतो  
 मिनोत्वित्याह द्युतानो ह स्म वै मारुतो देवानामौदुम्बरीम्मिनोति  
 तेनैवैनाम्मिनोति ब्रह्मवनिं त्वा क्षत्रवनिमित्याह यथायजुरेवै तद्धृतेन  
 द्यावापृथिवी आ पृणेत्यामित्यौदुम्बर्या जुहोति द्यावापृथिवी एव  
 रसेनानक्त्या न्तमन्ववस्त्रावयत्यान्तमेव यजमानं तेजसानक्त्यै न्द्रमसीति  
 च्छदिरधि नि दधात्यैन्द्रं हि देवतया सदो विश्वजनस्य च्छायेत्याह  
 विश्वजनस्य ह्येषा च्छाया यत्सदो नवच्छदि तेजस्कामस्य मिनुयात्त्रिवृता  
 स्तोमेन सम्मितं तेजस्त्रिवृत्तेजस्व्यैव  
 भवत्येकादशच्छदीन्द्रियकामस्यैकादशाक्षरा त्रिष्टुगिन्द्रियं  
 त्रिष्टुगिन्द्रियाव्यैव भवति पञ्चदशच्छदि भ्रातृव्यवतः पञ्चदशो वज्रो  
 भ्रातृव्याभिभूत्यै सप्तदशच्छदि प्रजाकामस्य सप्तदशः प्रजापतिः  
 प्रजापतेराप्त्या एकविंशतिच्छदि प्रतिष्ठाकामस्यैकविंशः  
 स्तोमानाम्प्रतिष्ठा प्रतिष्ठित्या उदरं वै सद ऊर्गुदुम्बरो मध्यत  
 औदुम्बरीम्मिनोति मध्यत एव प्रजानामूर्जं दधाति तस्मान्मध्यत ऊर्जा  
 भुञ्जते यजमानलोके वै दक्षिणानि च्छदींषि भ्रातृव्यलोक उत्तराणि  
 दक्षिणान्युत्तराणि करोति यजमानमेवायजमानादुत्तरं करोति  
 तस्माद्यजमानोऽयजमानादुत्तरोऽन्तर्वर्तान्करोति व्यावृत्त्यै तस्मादरण्यम्प्रजा  
 उप जीवन्ति परिं त्वा गिर्वणो गिर इत्याह यथायजुरेवैत दिन्द्रस्य  
 स्यूरसीन्द्रस्य ध्रुवमसीत्याहैन्द्रं हि देवतया सदो यम्प्रथमं ग्रन्थिं  
 ग्रन्थीयाद्यत्तं न विस्त्रंसयेदमेहेनाध्वर्युः प्र मीयेत् तस्मात्स विस्त्रस्यः

॥ १० ॥

शिरो वा एतद्यज्ञस्य यद्धविधानम्प्राणा उपरवा हविधाने खायन्ते  
तस्माच्छीर्षन्प्राणा अधस्तात्खायन्ते तस्मादधस्ताच्छीर्षाः प्राणा रक्षोहणौ  
वलगहनौ वैष्णवान्खनामीत्याह वैष्णवा हि देवतयोपरवा असुरा वै  
निर्यन्तौ देवानाम्प्राणेषु  
वलगान्नखनन्तान्बाहुमात्रेऽन्वविन्दन्तस्माद्बाहुमात्राः खायन्त इदमहं तं  
वलगमुद्वपामि यं नः समानो यमसमानो निखानेत्याह द्वौ वाव पुरुषौ  
यश्चैव समानो यश्चासमानो यमेवास्मै तौ वलगं निखनतस्तमेवोद्वपति सं  
तृणति तस्मात्संतृणणा अन्तरतः प्राणा न सम्भिनति तस्मादसम्भिन्नाः  
प्राणा अपोऽव नयति तस्मादाद्रा अन्तरतः प्राणा यवमतीरव  
नयत्यूगवैयवः प्राणा उपरवाः प्राणेष्वेवोर्ज दधाति बर्हिरव स्तृणाति  
तस्माल्लोमशा अन्तरतः प्राणा आज्यै न व्याघारयति तेजो वा आज्यं  
प्राणा उपरवाः प्राणेष्वेव तेजो दधाति हनू वा एते यज्ञस्य यदधिषवणे न  
सं तृणत्य संतृणणे हि हनू अथो खलु दीर्घसोमे संतृष्टे धृत्यै शिरो वा  
एतद्यज्ञस्य यद्धविधानं प्राणा उपरवा हनू अधिषवणे जिह्वा चर्म ग्रावाणो  
दन्ता मुखमाहवनीयो नासिकोत्तरवेदिरुदरं सदा यदा खलु वै जिह्वया  
दत्स्वधि खादत्यथ मुखं गच्छति यदा मुखं गच्छत्यथोदरं गच्छति  
तस्माद्धविधाने चर्मन्निधि ग्रावभिरभिषुत्याहवनीयै हुत्वा प्रत्यञ्चः परेत्य  
सदसि भक्षयन्ति यो वै विराजो यज्ञमुखे दोहं वेद दुह एवैनामियं वै  
विराट् तस्यै त्वक्चर्मोर्धोऽधिषवणे स्तना उपरवा ग्रावाणो वत्सा ऋत्विजो  
दुहन्ति सोमः पयो य एवं वेद दुह एवैनाम् ॥११॥

इति षष्ठकारण्डे द्वितीयः प्रपाठकः २

अथ षष्ठकारण्डे तृतीयः प्रपाठकः ३

चात्वालाद्धिष्णियानुप वपति योनिर्वै यज्ञस्य चात्वालं यज्ञस्य  
सयोनित्वाय देवा वै यज्ञम्पराजयन्त तमाग्नीध्रात्पुनरपाजयन्नेतद्वै  
यज्ञस्यापराजितं यदाग्नीध्रं यदाग्नीध्राद्धिष्णियान्विहरति यदेव  
यज्ञस्यापराजितं तत एवैनम्पुनस्तनुते पराजित्यैव खलु वा एते यन्ति ये  
बहिष्पवमानं सर्पन्ति बहिष्पवमाने स्तुत आहाग्नीध्रान्वि हर बर्हिः  
स्तृणाहि पुरोडाशां अलं कुर्विति यज्ञमेवापजित्य पुनस्तन्वाना  
यन्त्यङ्गैर्द्वे सर्वने वि हरति शलाकाभिस्तृतीयं सशुक्रत्वायाथो  
सम्भरत्येवैन द्विष्णिया वा अमुष्मिल्लोके सोममरद्गन्तेभ्योऽधि  
सोममाहरन्तमन्वायन्तम्पर्यविशन्त्य एवं वेदं विन्दते परिवेष्टारं ते  
सौमपीथेन व्यार्ध्यन्त ते देवेषु सौमपीथमैच्छन्त तान्देवा अब्रुवन्देद्वे  
नामनी कुरुध्वमथ प्र वाप्स्यथ न वेत्यग्रयो वा अथ  
धिष्णियास्तस्मादिद्वनामा ब्राह्मणोऽर्धुकस्तेषां ये नेदिष्ठम्पर्यविशन्ते  
सौमपीथम्प्राप्तुवन्नाहवनीयं आग्नीधीर्यो होत्रीर्यो मार्जालीयस्तस्मात्तेषु  
जुह्वत्यतिहाय वर्षट्करोति वि ह्येते सौमपीथेनार्ध्यन्त देवा वै याः  
प्राचीराहुतीरजुह्वुर्ये पुरस्तादसुरा आसन्तां स्ताभिः प्राणुदन्त याः  
प्रतीचीर्ये पश्चादसुरा आसन्तां स्ताभिरपानुदन्त प्राचीरन्या आहुतयो  
हूयन्ते प्रत्यडासीनो धिष्णियान्व्याघारयति पश्चाच्चैव पुरस्ताच्च यजमानो  
भ्रातृव्यान्प्र णुदते तस्मात्प्राचीः प्रजाः प्र वीयन्ते प्रतीचीर्जायन्ते प्राणा वा  
एते यद्धिष्णिया यदध्वर्युः प्रत्यङ्धिष्णियानतिसर्पेत्प्राणान्त्सं  
कर्षेत्प्रमार्युकः स्यान्नाभिर्वा एषा यज्ञस्य यद्धोतोर्ध्वः खलु वै नाभ्यै  
प्राणोऽवाडपानो यदध्वर्युः प्रत्यङ्होतारमतिसर्पेदपाने प्राणं  
दध्यात्प्रमार्युकः स्यान्नाध्वर्युरूपं गायेद्वाग्वीर्यो वा

अध्वर्युर्यदध्वर्युरुपगायेदुद्गात्रे वाचꣳ सम्प्र यच्छेदुपदासुकास्य  
वाकस्या द्ब्रह्मवादिनो वदन्ति नासꣳस्थिते सोमेऽध्वर्युः  
प्रत्यङ्गसदोऽतीयादथ कथा दाक्षिणानि होतुमेति यामो हि स तेषां कस्मा  
अहं देवा यामं वायामं वानुं ज्ञास्यन्तीत्युत्तरेणाग्नीध्रम्परीत्य जुहोति  
दाक्षिणानि न प्राणान्त्सं कर्षति न्यन्ये धिष्ण्या उष्यन्ते नान्ये यान्निवपति  
तेन तान्प्रीणाति यान्न निवपति यदनुदिशति तेन तान् ॥१॥

सुवर्गाय वा एतानि लोकाय हूयन्ते यद्वैसर्जनानि द्वाभ्यां गार्हपत्ये  
जुहोति द्विपाद्यजमानः प्रतिष्ठित्या आग्नीध्रे जुहोत्यन्तरिक्ष एवा क्रमत  
आहवनीये जुहोति सुवर्गमेवैनं लोकं गमयति देवान्वै सुवर्गं लोकं यतो  
रक्षाꣳस्यजिघाꣳसन्ते सोमेन राज्ञा रक्षाꣳस्यपहत्याप्तुमात्मानं कृत्वा  
सुवर्गं लोकमायन्नक्षसामनुपलाभायातः सोमो भवत्यथ वैसर्जनानि  
जुहोति रक्षसामपहत्यै त्वꣳ सौम तनूकृद्भ्य इत्याह तनूकृद्भ्येष  
द्वेषोभ्योऽन्यकृतेभ्य इत्याहान्यकृतानि हि रक्षाꣳस्यु रु यन्तासि  
वरुथमित्याहोरु रास्कृधीति वावैतदाह जुषाणो अमुराज्यस्य  
वेत्वित्याहाप्तुमेव यजमानं कृत्वा सुवर्गं लोकं गमयति  
रक्षसामनुपलाभाया सोमं ददत आ ग्राव्या आ वायव्यान्या  
द्रोणकलशमुत्पत्नीमा नयन्त्यन्वनाꣳसि प्र वर्तयन्ति यावदेवास्यास्ति तेन  
सह सुवर्गं लोकमेति नयवत्यर्चाग्नीध्रे जुहोति सुवर्गस्य लोकस्याभिनीत्यै  
ग्राव्या वायव्यानि द्रोणकलशमाग्नीध्र उप वासयति वि ह्येनं तैर्गृह्णते  
यत्सहोपवासयेदपुवायेत सौम्यर्चा प्र पादयति स्वयैवैनं देवतया प्र  
पादयत्यदित्याः सदोऽस्यदित्याः सद आ सीदेत्याह  
यथायजुरेवैत घजमानो वा एतस्य पुरा गोप्ता भवत्येष वो देव सवितः

सोम इत्याह सवितृप्रसूत एवैनं देवताभ्यः सम्प्र यच्छत्ये तत्त्वँ सोम  
 देवो देवानुपागा इत्याह देवो ह्येष सन्देवानुपैतीदमहम्मनुष्यो  
 मनुष्यानित्याह मनुष्योऽ ह्येष सन्मनुष्यानुपैति यदेतद्यजुर्न ब्रूयादप्रजा  
 अपशुर्यजमानः स्यात्सह प्रजया सह रायस्पोषेणेत्याह प्रजयैव पशुभिः  
 सहेमं लोकमुपावर्तते नमो देवेभ्य इत्याह नमस्कारो हि देवानाँ स्वधा  
 पितृभ्य इत्याह स्वधाकारो हि पितृणा मिदमहं निर्वरुणस्य पाशादित्याह  
 वरुणपाशादेव निर्मुच्यतेऽग्रे व्रतपत आत्मनः पूर्वा तनूरादेयेत्याहुः को हि  
 तद्वेदु यद्वसीयान्तस्वे वशे भूते पुनर्वा ददाति न वेति ग्रावाणो वै  
 सोमस्य राज्ञो मलिम्लुसेना य एवं विद्वान्ग्राव्या आग्नीध्र उपवासयति  
 नैनम्मलिम्लुसेना विन्दति ॥२॥

वैष्णव्यर्चा हुत्वा यूपमच्छैति वैष्णवो वै देवतया यूपः स्वयैवैनं  
 देवतयाच्छैत्य त्पन्यानगां नान्यानुपागामित्याहाति ह्यन्यानेति  
 नान्यानुपैत्यर्वाक्त्वा परैरविदम्परोवरैरित्याहार्वाग्ध्येनम्परैर्विन्दति  
 परोवरैस्तं त्वा जुषे वैष्णवं देवयज्याया इत्याह देवयज्यायै ह्यैनं जुषते  
 देवस्त्वा सविता मध्वान्क्त्वित्याह तेजसैवैनमनक्त्योषधे त्रायस्वैनँ  
 स्वधिते मैनँ हिँसीरित्याह वज्रो वै स्वधितिः शान्त्यै स्वधितेवृक्षस्य  
 बिभ्यतः प्रथमेन शकलेन सह तेजः परा पतति यः प्रथमः शकलः  
 परापतेत्तमप्या हरेत्सतेजसमेवैनमाहरती मे वै लोका यूपान्प्रयतो  
 बिभ्यति दिवमग्रेण मा लेखीरन्तरिक्षमध्यै न मा हिँसीरित्याहैभ्य एवैनं  
 लोकेभ्यः शमयति वनस्पते शतवल्शो वि रोहेत्याव्रश्चने जुहोति  
 तस्मादाव्रश्चनाद्वृक्षाणाम्भूयाँसु उत्तिष्ठन्ति सहस्रवल्शा वि वयँ  
 रुहेमेत्याहाशिषमेवैतामा शास्तेऽनक्षसङ्गं वृश्चे घदक्षसङ्गं वृश्चेदधईषं

यजमानस्य प्रमायुकं स्याद्यं कामयेताप्रतिष्ठितः स्यादित्यारोहं तस्मै  
वृश्चेदेष वै वनस्पतीनामप्रतिष्ठितोप्रतिष्ठित एव भवति यं कामयेतापशुः  
स्यादित्यपुर्णं तस्मै शुष्काग्रं वृश्चेदेष वै वनस्पतीनामपशुव्योऽपशुरेव  
भवति यं कामयेत पशुमान्तस्यादिति बहुपुर्णं तस्मै बहुशाखं वृश्चेदेष वै  
वनस्पतीनामपशुव्यः पशुमानेव भवति प्रतिष्ठितं वृश्चेत्प्रतिष्ठाकामस्यैष वै  
वनस्पतीनामप्रतिष्ठितो यः समे भूम्यै स्वाद्योने रूढः प्रत्येव तिष्ठति यः  
प्रत्यङ्ङुपनतस्तं वृश्चेत्स हि मेघमभ्युपनतः पञ्चारत्निं तस्मै वृश्चेद्यं  
कामयेतोपैनुत्तरो यज्ञो नमेदिति पञ्चाक्षरा पङ्क्तिः पाङ्क्तौ यज्ञ उपैनुत्तरो  
यज्ञो नमति षडरत्निम्प्रतिष्ठाकामस्य षड्वा ऋतव ऋतुष्वेव प्रति तिष्ठति  
सप्तारत्निम्पशुकांमस्य सप्तपदा शक्वरी पशवः शक्वरी पशूनेवाव रुन्दे  
नवारत्निं तेजस्कामस्य त्रिवृता स्तोमैनु सम्मितं तेजस्त्रिवित्तैजुस्यैव  
भवत्येकादशारत्निमिन्द्रियकामस्यैकादशाक्षरा त्रिष्टुगिन्द्रियं  
त्रिष्टुगिन्द्रियाव्यैव भवति पञ्चदशारत्निम्भ्रातृव्यवतः पञ्चदशो वज्रो  
भ्रातृव्याभिभूत्यै सप्तदशारत्निम्प्रजाकामस्य सप्तदशः प्रजापतिः  
प्रजापतेराप्त्या एकविंशत्यरत्निम्प्रतिष्ठाकामस्यैकविंशः  
स्तोमानामप्रतिष्ठा प्रतिष्ठित्या अष्टाश्रिर्भवत्यष्टाक्षरा गायत्री तेजो गायत्री  
गायत्री यज्ञमुखं तेजसैव गायत्रिया यज्ञमुखेनु सम्मितः ॥३॥

पृथिव्यै त्वान्तरिक्षाय त्वा दिवे त्वेत्याहैभ्य एवैनं लोकेभ्यः प्रोक्षति  
पराञ्चमप्रोक्षति पराङ्ङिव हि सुवर्गो लोकः क्रूरमिव वा एतत्करोति  
यत्वनत्यपोव नयति शान्त्यै यवमतीरव नयत्यूर्गवै यवो यजमानेनु यूपः  
सम्मितो यावानेव यजमानस्तावतीमेवास्मिन्नूर्जं दधाति पितृणां  
सदनमसीति बर्हिरव स्तृणाति पितृदेवत्यां ह्यैतद्यन्निखातं



यद्बृहिरनवस्तीर्य मिनुयात्पितृदेवत्यो निखातः स्याद्बृहिरवस्तीर्य  
 मिनोत्यस्यामेवैनम्मिनोति यूपशकृलमवास्यति सतैजसमेवैनम्मिनोति  
 देवस्त्वा सविता मध्वान्कित्वत्याह तेजसैवैनमनक्ति  
 सुपिप्पलाभ्यस्त्वौषधीभ्य इति चषालम्प्रति मुञ्चति तस्माच्छीर्षत ओषधयः  
 फलं गृह्णन्त्य नक्ति तेजो वा आज्यं यजमानेनाग्निष्ठाश्रिः सम्मिता  
 यदग्निष्ठामश्रिमनक्ति यजमानमेव तेजसानक्त्यान्तर्मनक्त्यान्तमेव यजमानं  
 तेजसानक्ति सर्वतः परि मृशत्यपरिवर्गमेवास्मिन्तेजो दधात्यु द्विवं  
 स्तभानान्तरिक्षमृशेत्याहैषां लोकानां विधृत्यै वैष्णव्यर्चा कल्पयति  
 वैष्णवो वै देवतया यूपः स्वयैवैनं देवतया कल्पयति द्वाभ्यां कल्पयति  
 द्विपाद्यजमानः प्रतिष्ठित्यै यं कामयेत तेजसैनं देवताभिरिन्द्रियेण  
 व्यर्धयेयमित्यग्निष्ठां तस्याश्रिमाहवनीयादित्यं वेत्थं वाति  
 नावयेत्तेजसैवैनं देवताभिरिन्द्रियेण व्यर्धयति यं कामयेत तेजसैनं  
 देवताभिरिन्द्रियेण समर्धयेयमित्यग्निष्ठां तस्याश्रिमाहवनीयेन  
 सम्मिनुयात्तेजसैवैनं देवताभिरिन्द्रियेण समर्धयति ब्रह्मवनिं त्वा  
 क्षत्रवनिमित्याह यथायजुरेवैतत्परि व्ययत्यूर्ग्वै रशना यजमानेन यूपः  
 सम्मितो यजमानमेवोर्जा समर्धयति नाभिदग्ने परि व्ययति नाभिदग्ने  
 एवास्मा ऊर्जं दधाति तस्मान्नाभिदग्ने ऊर्जा भुञ्जते यं कामयेतोर्जेनं  
 व्यर्धयेयमित्यूर्ध्वा वा तस्यावाचीं वावोहेदूर्जेवैनं व्यर्धयति यदि  
 कामयेत वर्षुकः पर्जन्यः स्यादित्यवाचीमवोहेदृष्टिमेव नि यच्छति यदि  
 कामयेतवर्षुकः स्यादित्यूर्ध्वामुदूहेदृष्टिमेवोद्यच्छति पितृणां  
 निखातम्मनुष्याणामूर्ध्वं निखातादा रशनाया ओषधीनां रशना विश्वेषां  
 देवानामूर्ध्वं रशनाया आ चषालादिन्द्रस्य चषालं साधानामतिरिक्तं  
 स वा एष सर्वदेवत्यो यद्वूपो यद्वूपम्मिनोति सर्वा एव देवताः प्रीणाति

यज्ञेन वै देवाः सुवर्गं लोकमायन्तैऽमन्यन्त मनुष्या नोऽन्वाभविष्यन्तीति  
 ते यूपेन योपयित्वा सुवर्गं लोकमायन्तमृषयो यूपैर्नैवानु प्राजानन्तद्वूपस्य  
 यूपत्वं यद्वूपमिनोति सुवर्गस्य लोकस्य प्रजात्यै पुरस्तान्मिनोति  
 पुरस्ताद्धि यज्ञस्य प्रजायतेऽप्रजातं हि तद्यदतिपन्न आहुरिदं  
 कार्यमासीदिति साध्या वै देवा यज्ञमत्यमन्यन्त तान्यज्ञो  
 नास्पृशत्तान्यद्यज्ञस्यातिरिक्तमासीत्तदस्पृशदतिरिक्तं वा एतद्यज्ञस्य  
 यद्ग्रावग्निमथित्वा प्रहरत्यतिरिक्तमेतद्वूपस्य यदूर्ध्वं चषालात्तेषां  
 तद्भागधेयं तानेव तेन प्रीणाति देवा वै सँस्थिते सोमे प्र स्रुचोहरन्प्र यूपं  
 तैऽमन्यन्त यज्ञवेशसं वा इदं कुर्म इति ते प्रस्तरँ स्रुचां  
 निष्कर्यणमपश्यन्त्स्वरुं यूपस्य सँस्थिते सोमे प्र प्रस्तरँ हरति जुहोति  
 स्वरुमयज्ञवेशसाय ॥४॥

साध्या वै देवा अस्मिल्लोक आसन्नान्यत्किं च न मिषत्तैऽग्निमेवाग्नये  
 मेघायालभन्त न ह्यन्यदालम्भ्यमविन्दन्ततो वा इमाः प्रजाः प्राजायन्त  
 यद्ग्रावग्निमथित्वा प्रहरति प्रजानाम्प्रजननाय रुद्रो वा एष  
 यद्ग्निर्यजमानः पशुर्यत्पशुमालभ्याग्निमन्थेद्द्रुद्राय यजमानमपि  
 दध्यात्प्रमारुकः स्या दथो खल्वाहुरग्निः सर्वा देवता हविरेतद्यत्पशुरिति  
 यत्पशुमालभ्याग्निमन्थति हव्यायैवासन्नाय सर्वा देवता  
 जनयत्यु पाकृत्यैव मन्थ्यस्तन्नेवालब्धं  
 नेवानालब्धं मग्नेर्जनित्रमसीत्याहाग्नेर्ह्येतज्जनित्रं वृषणौ स्थ इत्याह वृषणौ  
 ह्येता वृषण्यस्यायुरसीत्याह मिथुनत्वाय घृतेनाक्ते वृषणं दधाथामित्याह  
 वृषणँ ह्येते दधाते ये अग्निं गायत्रं छन्दोऽनु प्र जायस्वेत्याह  
 छन्दोभिरेवैनम्प्र जनयत्यु ग्रयै मन्थ्यमानायानु ब्रूहीत्याह

सावित्रीमृचमन्वाह सवितृप्रसूत एवैनम्मन्थति जातायानु ब्रूहि  
 प्रहियमाणायानु ब्रूहीत्याह कारडैकारड एवैनं क्रियमाणे समर्धयति  
 गायत्रीः सर्वा अन्वाह गायत्रच्छन्दा वा अग्निः स्वेनैवैनं छन्दसा  
 समर्धयत्यग्निः पुरा भवत्यग्निम्मथित्वा प्र हरति तौ सम्भवन्तौ  
 यजमानमभि सम्भवतो भवतं नः समनसावित्याह शान्त्यै प्रहत्य जुहोति  
 जातायैवास्मा अन्नमपि दधात्याज्येन जुहोत्येतद्वा अग्नेः प्रियं धाम यदाज्यं  
 प्रियेणैवैनं धाम्ना समर्धयत्यथो तेजसा ॥५॥

इषे त्वेति बर्हिषा दत्त इच्छत इव ह्येष यो यजत उपवीरसीत्याहोप  
 ह्यैनानाकरोत्यु पो देवान्देवीर्विशः प्रागुरित्याह दैवीर्ह्येता विशः  
 सतीर्देवानुपयन्ति वहीरुशिज इत्याहर्त्विजो वै वह्य  
 उशिजस्तस्मादेवमाह बृहस्पते धारया वसूनीत्याह ब्रह्म वै  
 देवानाम्बृहस्पतिर्ब्रह्मणैवास्मै पशूनव रुद्धे हव्या तै स्वदन्तामित्याह  
 स्वदयत्येवैनान्देव त्वष्टर्वसु रणवेत्याह त्वष्टा वै पशूनामिथुनानां  
 रूपकद्रूपमेव पशुषु दधाति रेवती रमध्वमित्याह पशवो वै रेवतीः  
 पशूनेवास्मै रमयति देवस्य त्वा सवितुः प्रसव इति रशनामा दत्ते  
 प्रसूत्या अश्विनौर्बाहुभ्यामित्याहाश्विनौ हि देवानामध्वर्यू आस्ताम्पूष्णो  
 हस्ताभ्यामित्याह यत्या ऋतस्य त्वा देवहविः पाशेना रभ इत्याह सत्यं  
 वा ऋतं सत्येनैवैनमृतेना रभतेऽद्गुया परि हरति वध्यं हि  
 प्रत्यञ्जम्प्रतिमुञ्चन्ति व्यावृत्त्यै धर्षा मानुषानिति नि युनक्ति धृत्या  
 अद्भस्त्वौषधीभ्यः प्रोक्षामीत्याहाद्भो ह्येष ओषधीभ्यः सम्भवति  
 यत्पशु रपाम्पेरुसीत्याहैष ह्यपाम्पाता यो मेधायारभ्यतै स्वात्तं  
 चित्सदैवं हव्यमापो देवीः स्वदतैनमित्याह

स्वदयत्येवैनं मुपरिष्ठात्प्रोक्षत्युपरिष्ठादेवैनम्मेध्यं करोति प्राययत्यन्तरत  
एवैनम्मेध्यं करोत्यधस्तादुपोक्षति सर्वत एवैनम्मेध्यं करोति ॥६॥

अग्निना वै होत्रा देवा असुरानभ्यभवन्नग्नये समिध्यमानायानु ब्रूहीत्याह  
भ्रातृव्याभिभूत्यै सप्तदश सामिधेनीरन्वाह सप्तदशः प्रजापतिः  
प्रजापतेराप्तयै सप्तदशान्वाह द्वादश मासाः पञ्चर्तवः स संवत्सरः  
संवत्सरम्प्रजा अनु प्र जायन्ते प्रजानाम्प्रजननाय देवा वै सामिधेनीरनूच्य  
यज्ञं नान्वपश्यन्त्स प्रजापतिस्तूष्णीमाघारमाऽघारयत्ततो वै देवा  
यज्ञमन्वपश्यन्तूष्णीमाघारमाघारयति यज्ञस्यानुख्यात्या असुरेषु वै यज्ञ  
आसीत्तं देवास्तूष्णीं होमेनावृञ्जत यत्तूष्णीमाघारमाघारयति भ्रातृव्यस्यैव  
तद्यज्ञं वृङ्गे परिधीन्त्सम्मार्ष्टिं पुनात्येवैनान्त्रिस्त्रिः सम्मार्ष्टिं त्र्यावृद्धि  
यज्ञोऽथो रक्षसामपहत्यै द्वादश सम्पद्यन्ते द्वादश मासाः संवत्सरः  
संवत्सरमेव प्रीणात्यथौ संवत्सरमेवास्मा उप दधाति सुवर्गस्य लोकस्य  
समष्ट्यै शिरो वा एतद्यज्ञस्य यदाघारोऽग्निः सर्वा देवता  
यदाघारमाघारयति शीर्षत एव यज्ञस्य यजमानः सर्वा देवता अर्च रुद्धे  
शिरो वा एतद्यज्ञस्य यदाघार आत्मा पशुराघारमाघार्य  
पशुं समनक्त्यात्मन्नेव यज्ञस्य शिरः प्रति दधाति सं तै प्राणो वायुना  
गच्छतामित्याह वायुदेवत्यौ वै प्राणो वायावेवास्य प्राणं जुहोति सं  
यजत्रैरङ्गानि सं यज्ञपतिराशिषेत्याह यज्ञपतिमेवास्यशिषं गमयति  
विश्वरूपो वै त्वाष्ट्र उपरिष्ठात्पशुमभ्यवमीत्तस्मादुपरिष्ठात्पशोर्नाव द्यन्ति  
यदुपरिष्ठात्पशुं समनक्ति मेध्यमेवैनं करोत्यृ त्विजौ वृणीते  
छन्दांस्येव वृणीते सप्त वृणीते सप्त ग्राम्याः पशवः सप्तारण्याः सप्त  
छन्दांस्युभयस्यावरुद्ध्या एकादश प्रयाजान्यजति दश वै पशोः प्राणा

आत्मैकादशो यावानेव पशुस्तम्प्र यजति वपामेकः परि शय  
 आत्मैवात्मानम्परि शये वज्रो वै स्वधितिर्वज्रो यूपशकृलो घृतं खलु वै  
 देवा वज्रं कृत्वा सोममघ्नन्धृतेनाक्तौ पशुं त्रायेथामित्याह वज्रैरैवैनं वशं  
 कृत्वालभते ॥७॥

पर्यग्नि करोति सर्वहृतमेवैनं करोत्यस्कन्दायास्कन्नं हि तद्यद्भुतस्य  
 स्कन्दति त्रिः पर्यग्नि करोति त्र्यावृद्धि यज्ञोऽथो रक्षसामपहत्यै  
 ब्रह्मवादिनो वदन्त्यन्वारभ्यः पशूश्नान्वारभ्या इति मृत्यवे वा एष  
 नीयते यत्पशुस्तम्यदन्वारभेत प्रमायुको यजमानः स्यादथो खल्वाहुः  
 सुवर्गाय वा एष लोकार्य नीयते यत्पशुरिति यन्नान्वारभेत  
 सुवर्गाल्लोकाद्यजमानो हीयेत वपाश्रपणीभ्यामन्वारभते तन्नेवान्वारब्धं  
 नेवानन्वारब्धमुप प्रेष्यं होतर्हव्या देवेभ्य इत्याहेषितं हि कर्म क्रियते  
 रेवतीर्यज्ञपतिं प्रियुधा विशतेत्याह यथायजुरेवैत दग्निना पुरस्तादेति  
 रक्षसामपहत्यै पृथिव्याः संपृचः पाहीति बर्हिरुपास्यत्यस्कन्दायास्कन्नं  
 हि तद्यद्बर्हिषि स्कन्दत्यथो बर्हिषदमेवैनं करोति पराडा वर्ततेऽध्वर्युः  
 पशोः संज्ञप्यमानात्पशुभ्य एव तन्नि हुत आत्मनोनावस्काय गच्छति  
 श्रियम्प्र पशूनाप्रोति य एवं वेद पश्चाल्लोका वा एषा प्राच्युदानीयते  
 यत्पत्नी नमस्त आतानेत्याहादित्यस्य वै रश्मयः आतानास्तेभ्य एव  
 नमस्करोत्य नर्वा प्रेहीत्याह भ्रातृव्यो वा अर्वा भ्रातृव्यापनुत्स्यै घृतस्य  
 कुल्यामनु सह प्रजया सह रायस्पोषेणेत्याहाशिषमेवैतामा शास्त आपौ  
 देवीः शुद्धायुव इत्याह यथायजुरेवैतत् ॥८॥

पशोर्वा आलब्धस्य प्राणाञ्छुगृच्छति वाक्त आ प्यायताम्प्राणस्त आ

प्यायतामित्याह प्राणेभ्य एवास्य शुचं शमयति सा प्राणेभ्योऽधि  
 पृथिवी शुक्र विशति शमहो यामिति नि नयत्यहोरात्राभ्यामेव  
 पृथिव्यै शुचं शमयत्यो षधे त्रायस्वैन स्वधिते मैनं हि सीरित्याह  
 वज्रो वै स्वधितिः शान्त्यै पार्श्वत आ च्छयति मध्यतो हि मनुष्या  
 आच्छयन्ति तिरश्चीनमा च्छयत्यनूचीनं हि मनुष्या आच्छयन्ति  
 व्यावृत्त्यै रक्षसाम्भागोऽसीति स्थविमतो बर्हिरक्त्वापास्यत्यस्रैव  
 रक्षांसि निरवदयत इदमहं रक्षोऽधमं तमो नयामि योऽस्मान्द्वेष्टि यं च  
 वयं द्विष्म इत्याह द्वौ वाव पुरुषौ यं चैव द्वेष्टि यश्चैनं द्वेष्टि तावुभावंधमं  
 तमो नयती षे त्वेति वृषामुत्खिदतीच्छत इव ह्येष यो यजते  
 यदुपतृन्धाद्रुद्रोऽस्य पशून्धातुकः स्याद्यन्नोपतृन्धादयता  
 स्या दन्ययोपतृणत्यन्यया न धृत्यै घृतेन द्यावापृथिवी प्रोशर्वाथामित्याह  
 द्यावापृथिवी एव रसेनानक्त्य च्छन्नो रायः सुवीर इत्याह  
 यथायजुरेवैतत्क्रूरमिव वा एतत्करोति  
 यद्वृषामुत्खिदत्युर्वन्तरिक्षमन्विहीत्याह शान्त्यै प्र वा  
 एषोऽस्माल्लोकाच्चयवते यः पशुमृत्यवै नीयमानमन्वारभते वपाश्रपणी  
 पुनरन्वारभतेऽस्मिन्नेव लोके प्रति तिष्ठत्यग्निना पुरस्तादेति  
 रक्षसामपहत्या अथो देवता एव हव्येनान्वेति नान्तममङ्गारमति  
 हरेद्यदन्तममङ्गारमतिहरैद्देवता अति मन्येत वायो वीहिं स्तोकानामित्याह  
 तस्माद्विभक्ताः स्तोका अवं पद्यन्तेऽग्रं वा एतत्पशूनां  
 यद्वृषाग्रमोषधीनाम्बर्हिरग्रैवाग्रं समर्धयत्यथो ओषधीष्वेव पशून्प्रति  
 ष्ठापयति स्वाहाकृतीभ्यः प्रेष्येत्याह यज्ञस्य समिष्ट्यै प्राणापानौ वा एतौ  
 पशूनां यत्पृषदाज्यमात्मा वृषा पृषदाज्यमभिघार्य वृषामभि  
 घारयत्यात्मन्नेव पशूनाम्प्राणापानौ दधाति स्वाहोर्ध्वनभसम्मार्तं

गच्छतमित्याहोर्ध्वनभा ह स्म वै मारुतो देवानां वपाश्रपणी प्र हरति  
तेनैवैने प्र हरति विषूची प्र हरति तस्माद्विष्वञ्चौ प्राणापानौ ॥६॥

पशुमालभ्यं पुरोडाशं निर्वपति समैधमेवैनमा लभते वपया प्रचर्य  
पुरोडाशेन प्र चरत्यूग्वै पुरोडाश ऊर्जमेव पशूनाम्मध्यतो दधात्यथो  
पशोरेव च्छिद्रमपि दधाति पृषदाज्यस्योपहत्य त्रिः पृच्छति शृतं हवीः  
शमितरिति त्रिषत्या हि देवा योऽशृतं शृतमाह स एनसा प्राणापानौ वा  
एतौ पशूनां यत्पृषदाज्यमपशोः खलु वा आलब्धस्य हृदयमात्माभि  
समैति यत्पृषदाज्येन हृदयमभिघारयत्यात्मन्नेव पशूनाम्प्राणापानौ दधाति  
पशुना वै देवाः सुवर्गं लोकमायन्तेऽमन्यन्त मनुष्या नोऽन्वाभविष्यन्तीति  
तस्य शिरश्छित्त्वा मेधम्प्राक्षारयन्त्स प्रक्षौऽभवत्तत्प्रक्षस्यं प्रक्षत्वं  
यत्प्रक्षशाखोत्तरबर्हिर्भवति समैधस्यैव पशोरव द्यति पशुं वै हियमाणं  
रक्षांस्यनु सचन्तेऽन्तरा यूपं चाहवनीयं च हरति रक्षसामपहत्यै पशोर्वा  
आलब्धस्य मनोपं क्रामति मनोतायै हविषोऽवदीयमानस्यानु ब्रूहीत्याह  
मन एवास्याव रुद्ध एकादशावदानान्यव द्यति दश वै पशोः प्राणा  
आत्मैकादशो यावानेव पशुस्तस्याव द्यति हृदयस्याग्रेऽव द्यत्यथ  
जिह्वाया अथ वक्षसो यद्वै हृदयेनाभि गच्छति तज्जिह्वाया वदति यज्जिह्वाया  
वदति तदुरसोऽधि निर्वदत्येतद्वै पशोर्यथापूर्वं यस्यैवमवदायं  
यथाकाममुत्तरेषामवदति यथापूर्वमेवास्यं पशोरवत्तम्भवति मध्यतो  
गुदस्याव द्यति मध्यतो हि प्राण उत्तमस्याव द्यत्युत्तमो हि प्राणो यदीतरं  
यदीतरमुभयमेवाजामि जायमानो वै ब्राह्मणस्त्रिभिर्ऋणवा जायते  
ब्रह्मचर्येण ऋषिभ्यो यज्ञेन देवेभ्यः प्रजया पितृभ्य एष वा अनृणो यः पुत्री  
यज्वा ब्रह्मचारिवासी तदवदानैरेवाव दयते तदवदानानामवदानत्वं

दे॒वासुराः सं॒यत्ता आस॒न्ते दे॒वा अ॒ग्निम॑ब्रुव॒न्त्वया वी॒रेणासुरा॑न॒भि  
भ॒वा॒मेति॑ सोऽब्र॒वीद्वरं॑ वृ॒णै प॒शोरु॑द्धारमुद्ध॒रा इति॑ स ए॒तमु॑द्धारमुद॒हरत्  
दोः पू॒र्वार्ध॑स्य॒ गुद॑म्म॒ध्यतः॑ श्रो॒णिं जघ॑ना॒र्धस्य॑ ततो॑ दे॒वा अ॒भव॑न्परासुरा  
यत्प॒यङ्गाणां॑ समव॒द्यति॑ भ्रातृ॒व्याभि॑भू॒त्यै भव॑त्या॒त्मना॑ परा॒स्य भ्रातृ॑व्यो  
भव॒त्य द॒द्यावा॑ द्यति॒ तस्मा॑द॒द्याया॑ प॒शवोऽङ्गा॑नि॒ प्र ह॑रन्ति॒ प्रति॑ष्ठित्यै  
॥१०॥

मेद॑सा॒ स्तुचौ॑ प्रो॒र्णाति॑ मेदो॑रूपा॒ वै प॒शवो॑ रू॒पमे॒व प॒शुषु॑ दधाति  
यू॒षन्न॑व॒धाय॑ प्रो॒र्णाति॑ रसो॒ वा ए॒ष प॑शूनां॒ यद्दू रस॑मे॒व प॒शुषु॑ दधाति  
पा॒र्श्वेन॑ वसाहोमम्प्र॒ यौति॑ म॒ध्यं वा ए॒तत्प॑शूनां॒ यत्पा॒र्श्वं रस॑ ए॒ष प॑शूनां  
यद्वसा॒ यत्पा॒र्श्वेन॑ वसाहोमम्प्र॒ यौति॑ म॒ध्यत॑ ए॒व प॑शूनां॒ रसं॑ दधाति॒ घ्नन्ति॑  
वा ए॒तत्प॑शुं॒ यत्सं॑ज्ञपयन्त्यैन्द्रः॒ खलु॑ वै दे॒वत॑या प्रा॒ण ऐन्द्रोऽपान॑ ऐन्द्रः  
प्रा॒णो अ॒ङ्गैरङ्गै॑ नि दे॒ध्यदित्या॑ह प्राणापानावे॒व प॒शुषु॑ दधाति॒ देव॑  
त्वष्ट॑र्भूरि॒ ते स॑ रसमे॒त्वित्या॑ह त्वाष्ट्रा॒ हि दे॒वत॑या प॒शवो॑ विषु॒रूपा॑  
यत्सल॑दमा॒णो भव॑थेत्या॒ह विषु॑रूपा॒ ह्यैते॑ सन्तः॒ सल॑दमा॒ण ए॒तर्हि॑ भवन्ति  
दे॒वत्रा॑ यन्त॒मव॑से॒ सखा॑योऽनु॒ त्वा मा॒ता पि॒तरौ॑  
मद॑न्त्वित्या॒हानु॑मतमे॒वैन॑ममा॒त्रा पि॒त्रा सु॒वर्गं॑ लो॒कं ग॑मयत्य॒र्धर्चे॑  
वसा॑होमं जु॒होत्य॒सौ वा अ॒र्धर्च॑ इ॒यम॑र्ध॒च इ॒मे ए॒व रसे॑नानक्ति॒ दिशो॑  
जु॒होति॑ दि॒श ए॒व रसे॑नान॒क्त्यथो॑ दि॒ग्भ्य ए॒वोर्जं॑ रस॒मव॑ रुद्धे  
प्राणा॑पानौ॒ वा ए॒तौ प॑शूनां॒ यत्पृ॑षदा॒ज्यं वा॑नस्प॒त्याः खलु॑ वै दे॒वत॑या  
प॒शवो॑ यत्पृ॑षदा॒ज्यस्यो॑प॒हत्या॑ह वन॒स्पत॑येऽनु॒ ब्रूहि॑ वन॒स्पत॑ये॒ प्रेष्ये॑ति  
प्राणा॑पानावे॒व प॒शुषु॑ दधात्य॒ न्यस्या॑न्यस्य॒ समव॑त्तं॒ समव॑द्यति  
तस्मा॑न्नाना॒रूपाः॑ प॒शवो॑ यू॒ष्णोप॑ सिञ्चति॒ रसो॑ वा ए॒ष प॑शूनां॒ यद्दू रस॑मे॒व



पशुषु दधाती डामुप ह्यते पशवो वा इडा पशूनेवोप ह्यते चतुरुप  
ह्यते चतुष्पादो हि पशवो यं कामयैतापशुः स्यादित्यमेदस्कं तस्मा आ  
दध्यान्मेदोरूपा वै पशवो रूपेणैवैनम्पशुभ्यो निर्भजत्यपशुरेव भवति यं  
कामयैत पशुमान्त्स्यादिति मेदस्वत्तस्मा आ दध्यान्मेदोरूपा वै पशवो  
रूपेणैवास्मै पशूनव रुद्धे पशुमानेव भवति प्रजापतिर्यज्ञमसृजत् स  
आज्यं पुरस्तादसृजत् पशुर्मध्यतः पृषदाज्यमपश्चात्तस्मादाज्येन प्रयाजा  
इज्यन्ते पशुना मध्यतः पृषदाज्येनानूयाजास्तस्मादेतन्मिश्रमिव  
पश्चात्सृष्टं ह्येकादशानूयाजान्यजति दश वै पशोः प्राणा आत्मैकादशो  
यावानेव पशुस्तमनु यजति घन्ति वा एतत्पशुं यत्संज्ञपर्यन्ति प्राणापानौ  
खलु वा एतौ पशूनां यत्पृषदाज्यं यत्पृषदाज्येनानूयाजान्यजति  
प्राणापानावेव पशुषु दधाति ॥११॥

इति षष्ठकारण्डे तृतीयः प्रपाठकः ३

अथ षष्ठकारण्डे चतुर्थः प्रपाठकः ४

यज्ञेन वै प्रजापतिः प्रजा असृजत् ता उपयडिर्भरेवासृजत् यदुपयज  
उपयजति प्रजा एव तद्यजमानः सृजते जघनार्धादव द्यति जघनार्धाद्धि  
प्रजाः प्रजायन्ते स्थविमतोऽव द्यति स्थविमतो हि प्रजाः  
प्रजायन्तेऽसम्भिन्दन्नव द्यति प्राणानामसम्भेदाय न पर्यावर्तयति  
यत्पर्यावर्तयैदुदावर्तः प्रजा ग्राहकः स्यात्समुद्रं गच्छ स्वाहेत्याह रेते एव  
तद्दधात्यन्तरिक्षं गच्छ स्वाहेत्याहान्तरिक्षेणैवास्मै प्रजाः प्र  
जनयत्यन्तरिक्षं ह्यनु प्रजाः प्रजायन्ते देव संवितारं गच्छ स्वाहेत्याह  
सवितृप्रसूत एवास्मै प्रजाः प्र जनयत्यहोरात्रे गच्छ  
स्वाहेत्याहाहोरात्राभ्यामेवास्मै प्रजाः प्र जनयत्यहोरात्रे ह्यनु प्रजाः

प्रजायन्ते मित्रावरुणौ गच्छ स्वाहेत्याह प्रजास्वेव प्रजातासु प्राणापानौ  
दधाति सोमं गच्छ स्वाहेत्याह सौम्या हि देवतया प्रजा यज्ञं गच्छ  
स्वाहेत्याह प्रजा एव यज्ञियाः करोति च्छन्दांसि गच्छ स्वाहेत्याह  
पशवो वै छन्दांसि पशूनेवारं रुद्धे द्यावापृथिवी गच्छ स्वाहेत्याह  
प्रजा एव प्रजाता द्यावापृथिवीभ्यामुभयतः परि गृह्णाति नभो दिव्यं गच्छ  
स्वाहेत्याह प्रजाभ्य एव प्रजाताभ्यो वृष्टिं नि यच्छत्यग्निं वैश्वानरं गच्छ  
स्वाहेत्याह प्रजा एव प्रजाता अस्याम्प्रति ष्ठापयति प्राणानां वा एषोऽव  
द्यति योऽवद्यति गुदस्य मनो मे हार्दि यच्छेत्याह प्राणानेव यथास्थानमुप  
ह्वयते पशोर्वा आलब्धस्य हृदयं शुगृच्छति सा हृदयशूलमभि समेति  
यत्पृथिव्यां हृदयशूलमुद्वासयेत्पृथिवीं शुचार्पयेद्यदप्स्वपः  
शुचार्पयेच्छुष्कस्य चार्द्रस्य च संधावुद्वासयत्युभयस्य शान्त्यै यं द्विष्यात्तं  
ध्यायेच्छुचैवैनमर्पयति ॥१॥

देवा वै यज्ञमाग्नीध्रे व्यभजन्त ततो यदत्यशिष्यत तदब्रुवन्वसंतु नु न  
इदमिति तद्वसतीवरीणां वसतीवरित्वं तस्मिन्प्रातर्न समशक्नुवन्तदप्सु  
प्रावेशयन्ता वसतीवरीरभवन्वसतीवरीर्गृह्णाति यज्ञो वै  
वसतीवरीर्यज्ञमेवारभ्य गृहीत्वोप वसति यस्यागृहीता अभि  
निम्रोचेदनारब्धोऽस्य यज्ञः स्याद्यज्ञं वि च्छिन्द्या ज्ज्योतिष्या वा  
गृहीयाद्धिरण्यं वावधाय सशुक्राणामेव गृह्णाति यो वा ब्राह्मणो  
बहुयाजी तस्य कुम्भ्यानां गृहीयात्स हि गृहीतवसतीवरीको  
वसतीवरीर्गृह्णाति पशवो वै वसतीवरीः पशूनेवारभ्य गृहीत्वोप वसति  
यदन्वीपं तिष्ठन्गृहीयान्निर्मागुका अस्मात्पशवः स्युः प्रतीपं तिष्ठन्गृह्णाति  
प्रतिरुध्यैवास्मै पशून्गृह्णातीन्द्रो वृत्रमहन्त्सोऽपोऽभ्यम्रियत तासां

यन्मेध्यं यज्ञियं सदैवमासीत्तदत्यमुच्यत ता वहन्तीरभवन्वहन्तीनां  
 गृह्णाति या एव मेध्या यज्ञियाः सदैवा आपस्तासामेव गृह्णाति नान्तमा  
 वहन्तीरतीयाद्यदन्तमा वहन्तीरतीयाद्यज्ञमति मन्येत न स्थावराणां  
 गृह्णीयाद्वरुणगृहीता वै स्थावरा यत्स्थावराणां गृह्णीयाद्वरुणेनास्य यज्ञं  
 ग्राहयेद्यद्वै दिवा भवत्यपो रात्रिः प्र विशति तस्मात्तन्मा आपो दिवा  
 ददृश्रे यन्नक्तम्भवत्यपोऽहः प्र विशति तस्माच्चन्द्रा आपो नक्तं ददृश्रे  
 छायायै चातपतश्च संधौ गृह्णात्यहोरात्रयोरेवास्मै वर्णं गृह्णाति  
 हविष्मतीरिमा आप इत्याह हविष्कृतानामेव गृह्णाति हविष्मां अस्तु  
 सूर्य इत्याह सशुक्राणामेव गृह्णात्यनुष्टुभा गृह्णाति वाग्वा  
 अनुष्टुग्वाचैवैनाः सर्वया गृह्णाति चतुष्पदयर्चा गृह्णाति त्रिः सादयति सप्त  
 सम्पद्यन्ते सप्तपदा शक्वरी पशवः शक्वरी पशूनेवाव रुद्धेऽस्मै वै  
 लोकाय गार्हपत्य आ धीयतेऽमुष्मा आहवनीयो यद्गार्हपत्य  
 उपसादयेदस्मिं ल्लोके पशुमान्तस्याद्यदाहवनीयेऽमुष्मिं ल्लोके  
 पशुमान्तस्यादुभयोरुप सादयत्युभयोरेवैनं लोकयोः पशुमन्तं करोति  
 सर्वतः परि हरति रक्षसामपहत्या इन्द्राग्नियोर्भागधेयीः स्थेत्याह  
 यथायजुरेवैत दाग्नीध्र उप वासयत्येतद्वै यज्ञस्यापराजितं यदाग्नीध्रं यदेव  
 यज्ञस्यापराजितं तदेवैना उप वासयति यतः खलु वै यज्ञस्य विततस्य न  
 क्रियते तदनु यज्ञं रक्षांस्यव चरन्ति यद्वहन्तीनां गृह्णाति क्रियमाणमेव  
 तद्यज्ञस्य शये रक्षसामनन्ववचाराय न ह्येता ईलयन्त्या तृतीयसवनात्परि  
 शेरे यज्ञस्य संतत्यै ॥२॥

ब्रह्मवादिनो वदन्ति स त्वा अध्वर्युः स्याद्यः सोममुपावहरन्त्सर्वाभ्यो  
 देवताभ्य उपावहरेदिति हृदे त्वेत्याह मनुष्येभ्य एवैतेन करोति मनसे

त्वेत्याह पितृभ्य एवैतेन करोति दिवे त्वा सूर्याय त्वेत्याह देवेभ्य एवैतेन  
करोत्येतावतीर्वै देवतास्ताभ्य एवैनँ सर्वाभ्य उपावहरति पुरा वाचः  
प्रवदितोः प्रातरनुवाकमुपाकरोति यावत्येव वाक्तामव  
रुन्द्रेऽपोऽग्रेऽभिव्याहरति यज्ञो वा आपो यज्ञमेवाभि वाचं वि सृजति  
सर्वाणि च्छन्दाँस्यन्वाह पशवो वै छन्दाँसि पशूनेवाव रुन्द्रे  
गायत्रिया तेजस्कामस्य परि दध्यात्त्रिष्टुभैन्द्रियकामस्य जगत्या  
पशुकामस्यानुष्टुभा प्रतिष्ठाकामस्य पङ्क्या यज्ञकामस्य विराजान्नकामस्य  
शृणोत्वग्निः समिधा हवं म इत्याह सवितृप्रसूत एव देवताभ्यो  
निवेद्यापोऽच्छैत्य प इष्य होतरित्याहेषितँ हि कर्म क्रियते मैत्रावरुणस्य  
चमसाध्वर्यवा द्रवेत्याह मित्रावरुणौ वा अपां नेतारौ ताभ्यामेवैना  
अच्छैति देवीरापो अपां नपादित्याहाहुत्यैवैना निष्क्रीय गृह्णात्यथो  
हविष्कृतानामेवाभिघृतानां गृह्णाति कार्ष्णिरीसीत्याह शर्मलमेवासामप  
प्लावयति समुद्रस्य वोक्षित्या उन्नय इत्याह तस्माद्दद्यमानाः पीयमाना  
आपो न क्षीयन्ते योनिर्वै यज्ञस्य चात्वालं यज्ञो वसतीवरीर्होतृचमसं च  
मैत्रावरुणचमसं च सँस्पश्य वसतीवरीर्व्यानयति यज्ञस्य  
स्योनित्वायाथो स्वादेवैना योनेः प्र जनयत्य ध्वर्योऽवैरपाः  
इत्याहोतेमनन्नमुरुतेमाः पश्येति वावैतदाह यद्यग्निष्टोमो जुहोति यद्युक्थ्यः  
परिधौ नि माँष्टि यद्यतिरात्रो यजुर्वदन्प्र पद्यते यज्ञक्रतूनां व्यावृत्त्यै ॥३॥

देवस्य त्वा सवितुः प्रसव इति ग्रावाणमा दत्ते प्रसूत्या  
अश्विनौर्बाहुभ्यामित्याहाश्विनौ हि देवानामध्वर्यु आस्तां पूष्णो  
हस्ताभ्यामित्याह यत्यै पशवो वै सोमो व्यान उपाँशुसर्वनो  
यदुपाँशुसर्वनमभि मिमीते व्यानमेव पशुषु दधातीन्द्राय त्वेन्द्राय

त्वेति मिमीतु इन्द्राय हि सोमं आह्वियते पञ्च कृत्वो यजुषा मिमीते  
 पञ्चाक्षरा पङ्क्तिः पाङ्क्तौ यज्ञो यज्ञमेवाव रुद्धे पञ्च कृत्वस्तूष्णीं दश  
 सम्पद्यन्ते दशाक्षरा विराडन्नं विराड्विराड्विराजैवान्नाद्यमव रुद्धे श्वात्राः स्थ  
 वृत्रतुर इत्याहैष वा अपाँ सोमपीथो य एवं वेद नाप्स्वार्तिमाच्छति यत्तै  
 सोम दिवि ज्योतिरित्याहैभ्य एवैनं लोकेभ्यः सम्भरति सोमो वै राजा  
 दिशोऽभ्यध्यायत्स दिशोऽनु प्राविशत्प्रागपागुदगधरागित्याह दिग्भ्य  
 एवैनँ सम्भरत्यथो दिश एवास्मा अवं रुद्धेऽम्ब नि ष्वरेत्याह कामुका  
 एनँ स्त्रियौ भवन्ति य एवं वेद यत्तै सोमादाभ्यं नाम जागृवीत्याहैष वै  
 सोमस्य सोमपीथो य एवं वेद न सौम्यामार्तिमाच्छति घ्नन्ति वा एतत्सोमं  
 यदभिषुण्वन्त्यँ शूनपं गृह्णाति त्रायत एवैनं प्राणा वा अँशवः पशवः  
 सोमोऽँ शून्युनरपि सृजति प्राणानेव पशुषु दधाति द्वौद्वावपि सृजति  
 तस्माद्द्वौद्वाँ प्राणाः ॥४॥

प्राणो वा एष यदुपाँ शुर्यदुपाँ श्वग्रा ग्रा गृह्यन्तै प्राणमेवानु प्र  
 यन्त्यँ रुणो हँ स्माहौपवेशिः प्रातःसवन एवाहं यज्ञँ सँ स्थापयामि  
 तेन ततः सँ स्थितेन चरामीत्यष्टौ कृतोऽग्रेऽभि षुणोत्यष्टाक्षरा गायत्री  
 गायत्रमप्रातःसवनं प्रातःसवनमेव तेनाप्रोत्येकादश कृत्वौ  
 द्वितीयमेकादशाक्षरा त्रिष्टुप्त्रैष्टुभ्रमाध्यंदिनँ सवनं माध्यंदिनमेव सवनं  
 तेनाप्रोति द्वादश कृत्वस्तृतीयं द्वादशाक्षरा जगती जागतं तृतीयसवनं  
 तृतीयसवनमेव तेनाप्रोत्येताँ हँ वाव स यज्ञस्य  
 सँ स्थितिमुवाचास्कन्दायास्कन्नँ हि तद्यज्ञस्य सँ स्थितस्य  
 स्कन्दत्यथो खल्वाहर्गायत्री वाव प्रातःसवने नातिवाद इत्यनतिवादुक  
 एनम्भ्रातृव्यो भवति य एवं वेद तस्माद्दष्टावष्टौ कृत्वोऽभिषुत्यं

ब्रह्मवादिनो वदन्ति पवित्रवन्तोऽन्ये ग्रहा गृह्यन्ते किम्पवित्र उपाँशुरिति  
वाक्पवित्र इति ब्रूयाद्वाचस्पतये पवस्व वाजिनित्याह वाचैवैनम्पवयति  
वृष्णो अँशुभ्यामित्याह वृष्णो ह्यैतावँशू यौ सोमस्य गभस्तिपूत  
इत्याह गभस्तिना ह्यैनम्पवयति देवो देवानाम्पवित्रमसीत्याह देवो ह्येषः  
सन्देवानाम्पवित्रं येषाम्भागोऽसि तेभ्यस्त्वेत्याह येषाँ ह्येष भागस्तेभ्य  
एनं गृह्णाति स्वांकृतोऽसीत्याह प्राणमेव स्वमकृत मधुमतीर्न  
इषस्कृधीत्याह सर्वमेवास्मा इदँ स्वदयति विश्वेभ्यस्त्वेन्द्रियेभ्यो  
दिव्येभ्यः पार्थिवेभ्य इत्याहोभयेष्वेव देवमनुष्येषु प्राणान्दधाति  
मनस्त्वाष्टित्याह मन एवाश्नुत उर्वन्तरिद्धमन्विहीत्याहान्तरिद्धदेवत्यो हि  
प्राणः स्वाहा त्वा सुभवः सूर्यायेत्याह प्राणा वै स्वभवसो देवास्तेष्वेव  
परोऽन्नं जुहोति देवेभ्यस्त्वा मरीचिपेभ्य इत्याहादित्यस्य वै रश्मयो देवा  
मरीचिपास्तेषां तद्भागधेयं तानेव तेन प्रीणाति यदि कामयेत वर्षुकः  
पर्जन्यः स्यादिति नीचा हस्तैन नि मृज्याद्वृष्टिमेव नि यच्छति यदि  
कामयेतावर्षुकः स्यादित्युत्तानेन नि मृज्याद्वृष्टिमेवोद्यच्छति यद्यभिचरेदमुं  
जह्यथ त्वा होष्यामीति ब्रूयादाहुतिमेवैनम्प्रेप्सन्हन्ति यदि दूरे स्यादा  
तमितोस्तिष्ठेत्प्राणमेवास्यानुगत्य हन्ति यद्यभिचरेदमुष्य त्वा प्राणे  
सादयामीति सादयेदसन्नो वै प्राणः प्राणमेवास्य सादयति षड्भिरँशुभिः  
पवयति षड्वा ऋतव ऋतुभिरेवैनम्पवयति त्रिः पवयति त्रय इमे लोका  
एभिरेवैनं लोकैः पवयति ब्रह्मवादिनो वदन्ति कस्मात्सत्यात्रयः पशूनाँ  
हस्तादाना इति यत्रिरुपाँशुँ हस्तैन विगृह्णाति तस्मात्त्रयः पशूनाँ  
हस्तादानाः पुरुषो हस्ती मर्कटः ॥५॥

देवा वै यद्यज्ञेऽकुर्वत तदसुरा अकुर्वत ते देवा उपाँशौ यज्ञँ

स्रंस्थाप्यमपश्यन्तमुपांशौ समस्थापयन्तेऽसुरा वज्रमुद्यत्य  
 देवानभ्यायन्त ते देवा बिभ्यत इन्द्रमुपाधावन्तानिन्द्रोऽन्तर्यामिणान्तरधत्त  
 तदन्तर्यामस्यान्तर्यामत्वं यदन्तर्यामो गृह्यते भ्रातृव्यानेव  
 तद्यजमानोऽन्तर्धत्तेऽन्तस्तै दधामि द्यावापृथिवी  
 अन्तर्धत्तर्द्धमित्याहैभिरेव लोकैर्यजमानो भ्रातृव्यानन्तर्धत्ते ते देवा  
 अमन्यन्तेन्द्रो वा इदमभूद्यद्वयं स्म इति तैऽब्रुवन्मघवन्ननु न आ भजेति  
 सजोषा देवैरवरैः परैश्चेत्यब्रवीद्ये चैव देवाः परे य चावरै  
 तानुभयानन्वाभजत्सजोषा देवैरवरैः परैश्चेत्याह ये चैव देवाः परे ये  
 चावरै तानुभयानन्वाभजत्यन्तर्यामे मघवन्मादयस्वेत्याह यज्ञादेव  
 यजमानं नान्तरैत्युपयामगृहीतोऽसीत्याहापानस्य धृत्यै यदुभार्वपवित्रौ  
 गृह्येयाताम्प्राणमपानोऽनु नृच्छेत्प्रमायुकः स्यात्पवित्रवानन्तर्यामो गृह्यते  
 प्राणापानयोर्विधृत्यै प्राणापानौ वा एतौ यदुपांश्वन्तर्यामौ व्यान  
 उपांशुसर्वनो यं कामयेत प्रमायुकः स्यादित्यसंस्पृष्टौ तस्य  
 सादयेद्व्यानेनैवास्य प्राणापानौ विच्छिनत्ति ताजक्प्रमीयते यं कामयेत  
 सर्वमार्युरियादिति संस्पृष्टौ तस्य सादयेद्व्यानेनैवास्य प्राणापानौ सं  
 तनोति सर्वमार्युरिति ॥६॥

वाग्वा एषा यदैन्द्रवायवो यदैन्द्रवायवाग्रा ग्रहा गृह्यन्ते वार्चमेवानु प्र  
 यन्ति वायुं देवा अब्रुवन्त्सोमं राजानं हनामेति सौऽब्रवीद्वरं वृणौ  
 मदग्रा एव वो ग्रहा गृह्यान्ता इति तस्मादैन्द्रवायवाग्रा ग्रहा गृह्यन्ते  
 तमघ्नन्त्सोऽपूयत्तं देवा नोपाधृष्णवन्ते वायुमब्रुवन्निमं नः स्वदयेति  
 सौऽब्रवीद्वरं वृणौ मद्देवत्यान्येव वः पात्राण्युच्यन्ता इति  
 तस्मान्नानादेवत्यानि सन्ति वायव्यान्युच्यन्ते तमैभ्यो

वायुरेवास्वदयत्तस्माद्यत्पूर्यति तत्प्रवाते वि षजन्ति वायुर्हि तस्य  
पवयिता स्वदयिता तस्य विग्रहं नाविन्दन्सादितिरब्रवीद्वरं वृणा अथ  
मया वि गृह्णीध्वम्मदेवत्या एव वः सोमाः सन्ना  
असन्नियुपयामगृहीतोऽसीत्याहादितिदेवत्यास्तेन यानि हि दारुमयाणि  
पात्रायस्यैतानि योनेः सम्भूतानि यानि मृन्मयानि साक्षात्तान्यस्यै  
तस्मादेवमाह वाग्वै पराच्यव्याकृतावदत्ते देवा इन्द्रमब्रुवन्निमां नो वाचं  
व्याकुर्विति सौऽब्रवीद्वरं वृणौ मह्यं चैवैष वायवै च सह गृह्याता इति  
तस्मादैन्द्रवायवः सह गृह्यते तामिन्द्रो मध्यतोऽवक्रम्य व्याकरोत्तस्मादियं  
व्याकृता वागुद्यते तस्मात्सकृदिन्द्राय मध्यतो गृह्यते द्विर्वायवे द्वौ हि स  
वराववृणीत ॥७॥

मित्रं देवा अब्रुवन्त्सोमं राजानं हनामेति सौऽब्रवीन्नाहं सर्वस्य वा  
अहम्मित्रमस्मीति तमब्रुवन्हनामैवेति सौऽब्रवीद्वरं वृणौ पर्यसैव मे सोमं  
श्रीणन्निति तस्मान्मैत्रावरुणम्पर्यसा श्रीणन्ति तस्मात्पशवोऽपाक्रामन्मित्रः  
सन्क्रूरमकरिति क्रूरमिव खलु वा एषः करोति यः सोमैः यजते  
तस्मात्पशवोऽप क्रामन्ति यन्मैत्रावरुणम्पर्यसा श्रीणाति पशुभिरिव  
तन्मित्रं संमर्धयति पशुभिर्यजमानं पुरा खलु वावैवमित्रोऽवेदप मत्क्रूरं  
चक्रुषः पशवः क्रमिष्यन्तीति तस्मादेवमवृणीत वरुणं देवा  
अब्रुवन्त्वयांशुभुवा सोमं राजानं हनामेति सौऽब्रवीद्वरं वृणौ मह्यं  
चैवैष मित्राय च सह गृह्याता इति तस्मान्मैत्रावरुणः सह गृह्यते  
तस्माद्राज्ञा राजानमंशुभुवा घन्ति वैश्यैः वैश्यं शूद्रेण शुद्रं न वा इदं  
दिवा न नक्तमासीदव्यावृत्तं ते देवा मित्रावरुणावब्रुवन्निदं नो वि  
वासयतमिति तारवब्रूतां वरं वृणावहा एक एवावत्पूर्वो ग्रहो गृह्याता इति



तस्मादैन्द्रवायवः पूर्वो मैत्रावरुणाद्गृह्यते प्राणापानौ ह्येतौ  
यदुपाँश्चन्तर्यामौ मित्रोऽहरजनयद्वरुणो रात्रिं ततो वा इदं  
व्यौच्छद्यन्मैत्रावरुणो गृह्यते व्युष्ट्यै ॥८॥

यज्ञस्य शिरोऽच्छद्यत ते देवा अश्विनावब्रुवन्भिषजौ वै स्थ इदं यज्ञस्य  
शिरः प्रति धत्तमिति तावब्रूतां वरं वृणावहै ग्रह एव नावत्रापि  
गृह्यतामिति ताभ्यामेतमाश्विनमगृह्णन्ततो वै तौ यज्ञस्य शिरः प्रत्यघतां  
यदाश्विनो गृह्यते यज्ञस्य निष्कृत्यै तौ देवा अब्रुवन्नपूतौ वा इमौ  
मनुष्यचरौ भिषजाविति तस्माद्ब्राह्मणेन भेषजं न कार्यमपूतो  
ह्यैरुषोऽमेध्यो यो भिषक्तौ बहिष्पवमानेन पवयित्वा  
ताभ्यामेतमाश्विनमगृह्णन्तस्माद्बहिष्पवमाने स्तुत आश्विनो गृह्यते तस्मादेवं  
विदुषा बहिष्पवमान उप्सद्यः पवित्रं वै बहिष्पवमान आत्मानमेव  
पवयते तयोस्त्रेधा भेषज्यं वि न्यदधुरग्नौ तृतीयमप्सु तृतीयं ब्राह्मणे  
तृतीयं तस्मादुदपात्रमुपनिधाय ब्राह्मणं दक्षिणतो निषाद्य भेषजं  
कुर्याद्यावदेव भेषजं तेन करोति समर्धुकमस्य कृतम्भवति ब्रह्मवादिनो  
वदन्ति कस्मात्सत्यादेकपात्रा द्विदेवत्यां गृह्यन्ते द्विपात्रा ह्यन्त इति  
यदेकपात्रा गृह्यन्ते तस्मादेकोऽन्तरतः प्राणो द्विपात्रा ह्यन्ते तस्माद्द्वौद्वौ  
बहिष्ठात्प्राणाः प्राणा वा एते यदिद्विदेवत्याः पशव इडा यदिडाम्पूर्वा  
द्विदेवत्येभ्य उपहयेत पशुभिः प्राणानन्तर्दधीत प्रमायुकः  
स्याद्द्विदेवत्यांभक्षयित्वेडामुप ह्यते प्राणानेवात्मन्धित्वा पशूनुप ह्यते  
वाग्वा ऐन्द्रवायवश्चक्षुर्मैत्रावरुणः श्रोत्रमाश्विनः पुरस्तादैन्द्रवायवम्भक्षयति  
तस्मात्पुरस्ताद्वाचा वदति पुरस्तान्मैत्रावरुणं तस्मात्पुरस्ताच्चक्षुषा पश्यति  
सर्वतः परिहारमाश्विनं तस्मात्सर्वतः श्रोत्रेण शृणोति प्राणा वा एते

यद्द्विदेवत्या अरिक्तानि पात्राणि सादयति तस्मादरिक्ता अन्तरतः प्राणा  
यतः खलु वै यज्ञस्य विततस्य न क्रियते तदनु यज्ञं रक्षां स्वव चरन्ति  
यदरिक्तानि पात्राणि सादयति क्रियमाणमेव तद्यज्ञस्य शये  
रक्षसामनन्ववचाराय दक्षिणस्य हविर्धानस्योत्तरस्यां वर्तन्त्यां सादयति  
वाच्यैव वाचं दधात्या तृतीयसवनात्परि शोरे यज्ञस्य संतत्यै ॥६॥

बृहस्पतिर्देवानाम्पुरोहित आसीच्छरडामर्कावसुराणां ब्रह्मरवन्तो देवा  
आसुन्ब्रह्मरवन्तोऽसुरास्तैरुन्योऽन्यं नाशक्नुवन्नभिर्भवितुं ते देवाः  
शरडामर्कावुपामन्त्रयन्त तावब्रूतां वरं वृणावहै ग्रहावेव नावत्रापि  
गृह्येतामिति ताभ्यामेतौ शुक्रामन्थिनावगृह्णन्तौ देवा अभवन्परासुरा  
यस्यैवं विदुषः शुक्रामन्थिनौ गृह्येते भवत्यात्मना परास्य भ्रातृव्यो भवति  
तौ देवा अपनुद्यात्मन इन्द्रायाजुहवुरपनुतौ शरडामर्कौ सहामुनेति ब्रूयाद्यं  
द्विष्याद्यमेव द्वेष्टि तेनैतौ सहाप नुदते स प्रथमः  
संकृतिर्विश्वकर्मेत्येवैनावात्मन इन्द्रायाजुहवुरिन्द्रो ह्यैतानि रूपाणि  
करिक्रदचर दसौ वा आदित्यः शुक्रश्चन्द्रमा मन्थ्यपिगृह्य प्राञ्चौ  
निष्क्रामतस्तस्मात्प्राञ्चौ यन्तौ न पश्यन्ति प्रत्यञ्चावावृत्य जुहुतस्मात्प्रत्यञ्चौ  
यन्तौ पश्यन्ति चक्षुषी वा एते यज्ञस्य यच्छुक्रामन्थिनौ  
नासिकोत्तरवेदिर्भितः परिक्रम्य जुहुतस्तस्माद्भितो नासिकां चक्षुषी  
तस्मान्नासिकया चक्षुषी विधृते सर्वतः परि क्रामतो रक्षसामपहत्यै देवा  
वै याः प्राचीराहुतीरजुहवुर्ये पुरस्तादसुरा आसन्तांस्ताभिः प्राणुदन्त याः  
प्रतीचीर्ये पश्चादसुरा आसन्तांस्ताभिरपानुदन्त प्राचीरन्या आहुतयो  
हूयन्ते प्रत्यञ्चौ शुक्रामन्थिनौ पश्चाच्चैव पुरस्ताच्च यजमानो भ्रातृव्यान्प्र  
णुदते तस्मात्पराचीः प्रजाः प्र वीयन्ते प्रतीचीर्जायन्ते शुक्रामन्थिनौ वा

अनु प्रजाः प्र जायन्तेऽत्रीश्चाद्याश्च सुवीराः प्रजाः प्रजनयन्परीहि शुक्रः  
 शुक्रशौचिषा सुप्रजाः प्रजाः प्रजनयन्परीहि मन्थी मन्थिशौचिषेत्याहैता  
 वै सुवीरा या अत्रीरेताः सुप्रजा या आद्या य एवं वेदाल्यस्य प्रजा  
 जायते नाद्या प्रजापतेरक्षयत्तत्परापत्तद्विकङ्कतम्प्राविशत्तद्विकङ्कते  
 नारमत तद्यवम्प्राविशत्तद्यवैऽरमत तद्यवस्य यवत्वं  
 यद्विकङ्कतम्मन्थिपात्रम्भवति सक्तुभिः श्रीणाति प्रजापतेरेव तच्चक्षुः  
 सम्भरति ब्रह्मवादिनो वदन्ति कस्मात्सत्यान्मन्थिपात्रं सदो नाशनुत  
 इत्यार्तपात्रं हीति ब्रूयाद्यदश्नुवीतान्धोऽध्वर्युः  
 स्यादार्तिमाच्छेत्तस्मान्नाशनुते ॥१०॥

देवा वै यद्यज्ञेऽकुर्वत तदसुरा अकुर्वत ते देवा  
 आग्रयणाग्रान्ग्रहानपश्यन्तानगृह्णत ततो वै तेऽग्रम्पर्यायन्यस्यैवं विदुष  
 आग्रयणाग्रा ग्रहा गृह्यन्तेऽग्रमेव समानानाम्पर्येति रुग्णवत्यर्चा  
 भ्रातृव्यवतो गृह्णीयाद्भ्रातृव्यस्यैव रुक्त्वाग्रं समानानाम्पर्येति ये देवा  
 दिव्येकादश स्थेत्याहैतावतीर्वै देवतास्ताभ्य एवैनं सर्वाभ्यो गृह्णात्येष  
 ते योनिर्विश्वेभ्यस्त्वा देवेभ्य इत्याह वैश्वदेवो ह्येष देवतया वाग्वै  
 देवेभ्योऽपाक्रामद्यज्ञायातिष्ठमाना ते देवा वाच्यपक्रान्तायां तूष्णीं  
 ग्रहानगृह्णत सामन्यत वागन्तर्यन्ति वै मेति  
 साग्रयणम्प्रत्यागच्छत्तदाग्रयणस्याग्रयणत्वं तस्मादाग्रयणे वाग्वि सृज्यते  
 यत्तूष्णीम्पूर्वे ग्रहा गृह्यन्ते यथा त्सारीयति म आख इयति नाप  
 रात्स्यामीत्युपावसृजत्येवमेव तदध्वर्युराग्रयणं गृहीत्वा यज्ञमारभ्य वाचं  
 वि सृजते त्रिर्हि करोत्युद्गातृनेव तद्वृणीते प्रजापतिर्वा एष यदाग्रयणो  
 यदाग्रयणं गृहीत्वा हिं करोति प्रजापतिरेव तत्प्रजा अभि जिघ्रति

तस्माद्द्वत्सं जातं गौरभि जिघ्रत्यात्मा वा एष यज्ञस्य यदाग्रयणः  
सर्वनेसवनेऽभि गृह्णात्यात्मन्नेव यज्ञं सं तनोत्युपरिष्ठादा नयति रेत एव  
तद्दधात्यधस्तादुप गृह्णाति प्र जनयत्येव तद्ब्रह्मवादिनो वदन्ति  
कस्मात्सत्यादायत्री कनिष्ठा च्छन्दसां सती सर्वाणि सर्वनानि  
वहतीत्येष वै गायत्रियै वत्सो यदाग्रयणस्तमेव तदभिनिवतुं सर्वाणि  
सर्वनानि वहति तस्माद्द्वत्समुपाकृतं गौरभि नि वर्तते ॥११॥

इति षष्ठकारण्डे चतुर्थः प्रपाठकः ४

अथ षष्ठकारण्डे पञ्चमः प्रपाठकः ५

इन्द्रो वृत्राय वज्रमुदयच्छत्स वृत्रो वज्रादुद्यतादबिभेत्सोऽब्रवीन्मा मे प्र  
हारस्ति वा इदम्मयि वीर्यं तत्ते प्र दास्यामीति तस्मा उक्थ्यम्प्रायच्छत्समै  
द्वितीयमुदयच्छत्सोऽब्रवीन्मा मे प्र हारस्ति वा इदं मयि वीर्यं तत्ते प्र  
दास्यामीति तस्मा उक्थ्यमेव प्रायच्छत्समै तृतीयमुदयच्छत्सं  
विष्णुरन्वतिष्ठत जहीति सोऽब्रवीन्मा मे प्र हारस्ति वा इदम्मयि वीर्यं तत्ते  
प्र दास्यामीति तस्मा उक्थ्यमेव प्रायच्छत्सं निर्मायम्भूतमहन्यज्ञो हि तस्य  
मायासीद्यदुक्थ्यो गृह्यते इन्द्रियमेव तद्वीर्यं यजमानो भ्रातृव्यस्य वृङ्क्ते  
इन्द्राय त्वा बृहद्वते वर्यस्वत इत्याहेन्द्राय हि स तम्प्रायच्छत्समै त्वा  
विष्णावे त्वेत्याह यदेव विष्णुरन्वतिष्ठत जहीति तस्माद्विष्णुमन्वाभजति  
त्रिर्निर्गृह्णाति त्रिर्हि स तं तस्मै प्रायच्छदे ष ते योनिः पुनर्हविरसीत्याह  
पुनःपुनर्ह्यस्मान्निर्गृह्णाति चक्षुर्वा एतद्यज्ञस्य यदुक्थ्यस्तस्मादुक्थ्यं हुतं  
सोमा अन्वारयन्ति तस्मादात्मा चक्षुरन्वैति तस्मादेकं यन्तम्ब्रह्मवोऽनु यन्ति  
तस्मादेको बहूनाम्भद्रो भवति तस्मादेको ब्रह्मीर्जाया विन्दते यदि  
कामयेताध्वर्युरात्मानं यज्ञयज्ञसेनार्पयेयमित्यन्तराहवनीयं च हविर्धानं च

तिष्ठन्नव नयेदात्मानमेव यज्ञयशसेनार्पयति यदि कामयैत यजमानं  
यज्ञयशसेनार्पयेयमित्यन्तरा सदोहविधानि तिष्ठन्नव नयेद्यजमानमेव  
यज्ञयशसेनार्पयति यदि कामयैत सदस्यान्यज्ञयशसेनार्पयेयमिति सद  
आलभ्याव नयेत्सदस्यानेव यज्ञयशसेनार्पयति ॥१॥

आयुर्वा एतद्यज्ञस्य यद्ध्रुव उत्तमो ग्रहाणां गृह्यते तस्मादायुः  
प्राणानामुत्तमं मूर्धानं दिवो अरतिम्पृथिव्या इत्याह मूर्धानमेवैनं  
समानानां करोति वैश्वानरमृताय जातमग्निमित्याह वैश्वानरं हि  
देवतयायुं रुभयतोवैश्वानरो गृह्यते तस्मादुभयतः प्राणा  
अधस्ताच्चोपरिष्ठाञ्चा धिनोऽन्ये ग्रहा गृह्यन्तेऽर्धी  
ध्रुवस्तस्माद्ध्र्यवाङ्प्राणोऽन्येषाम्प्राणाना मुपोऽन्ये ग्रहाः साद्यन्तेऽनुपोसे  
ध्रुवस्तस्मादस्थान्याः प्रजाः प्रतितिष्ठन्ति मांसेनान्या असुरा वा उत्तरतः  
पृथिवीमपर्याचिकीर्षन्तां देवा ध्रुवेणादृहन्तद्ध्रुवस्य ध्रुवत्वं यद्ध्रुव  
उत्तरतः साद्यते धृत्या आयुर्वा एतद्यज्ञस्य यद्ध्रुव आत्मा होता  
यद्ध्रौतृचमसे ध्रुवमवनयत्यात्मन्नेव यज्ञस्यार्युर्दधाति पुरस्ता  
दुक्थस्यावनीय इत्याहुः पुरस्ताद्ध्यायुषो भुङ्क्ते मध्यतोऽवनीय  
इत्याहुर्मध्यमेन ह्यायुषो भुङ्क्ते उत्तरार्धेऽवनीय इत्याहुरुत्तमेन ह्यायुषो भुङ्क्ते  
वैश्वदेव्यामृचि शस्यमानायामव नयति वैश्वदेव्यो वै प्रजाः  
प्रजास्वेवार्युर्दधाति ॥२॥

यज्ञेन वै देवाः सुवर्गं लोकमायन्तेऽमन्यन्त मनुष्या नोऽन्वाभविष्यन्तीति  
ते संवत्सरेण योपयित्वा सुवर्गं लोकमायन्तमृषय ऋतुग्रहैरेवानु  
प्राजानन्यदृतुग्रहा गृह्यन्ते सुवर्गस्य लोकस्य प्रजात्यै द्वादश गृह्यन्ते द्वादश

मासाः संवत्सरः संवत्सरस्य प्रज्ञात्यै सह प्रथमौ गृह्येते सहोत्तमौ  
तस्माद्द्वौद्वावृत् उभयतोमुखमृतुपात्रम्भवति को हि तद्वेद यत  
ऋतूनाम्मुखं मृतुना प्रेष्येति षट्कृत्वा आह षड्वा ऋतव ऋतूनेव  
प्रीणात्यृतुभिरिति चतुश्चतुष्पद एव पशून्प्रीणाति द्विः पुनर्ऋतूनाह द्विपदं  
एव प्रीणात्यृतुना प्रेष्येति षट्कृत्वा आहर्तुभिरिति चतुस्तस्माच्चतुष्पादः  
पशव ऋतूनुप जीवन्ति द्विः पुनर्ऋतूनाह तस्मादिद्विपादश्चतुष्पदः पशूनुप  
जीवन्त्यृतुना प्रेष्येति षट्कृत्वा आहर्तुभिरिति चतुर्द्विः  
पुनर्ऋतूनाहाक्रमणमेव तत्सेतुं यजमानः कुरुते सुवर्गस्य लोकस्य समष्ट्यै  
नान्योऽन्यमनु प्र पद्येत् यदन्योऽन्यमनु प्र पद्येत्तुर्ऋतुमनु प्र पद्येत्तवो  
मोहुकाः स्युः प्रसिद्धमेवाध्वर्युर्दक्षिणेन प्र पद्यते प्रसिद्धम्प्रतिप्रस्थातोत्तरेण  
तस्मादादित्यः षण्मासो दक्षिणेनैति षडुत्तरेण पयामगृहीतोऽसि  
सुँसर्पोऽस्यँहस्पत्याय त्वेत्याहास्ति त्रयोदशो मास इत्याहुस्तमेव  
तत्प्रीणाति ॥३॥

सुवर्गाय वा एते लोकार्यं गृह्यन्ते यदृतुग्रहा ज्योतिरिन्द्राग्नी  
यदैन्द्राग्रमृतुपात्रेण गृह्णाति ज्योतिरिवास्मा उपरिष्ठाद्दधाति सुवर्गस्य  
लोकस्यानुख्यात्या ओजोभृतौ वा एतौ देवानां यदिन्द्राग्नी यदैन्द्राग्रो  
गृह्यत ओज एवाव रुद्धे वैश्वदेवँ शुक्रपात्रेण गृह्णाति वैश्वदेव्यो वै प्रजा  
असावादित्यः शुक्रो यद्वैश्वदेवँ शुक्रपात्रेण गृह्णाति तस्मादसावादित्यः  
सर्वाः प्रजाः प्रत्यङ्ङुदैति तस्मात्सर्व एव मन्यते माम्प्रत्युदगादिति  
वैश्वदेवँ शुक्रपात्रेण गृह्णाति वैश्वदेव्यो वै प्रजास्तेजः शुक्रो यद्वैश्वदेवँ  
शुक्रपात्रेण गृह्णाति प्रजास्वेव तेजो दधाति ॥४॥

इन्द्रो मरुद्भिः साविद्येन माध्यंदिने सर्वने वृत्रमहन्त्यन्माध्यंदिने सर्वने  
मरुत्वतीयां गृह्यन्ते वार्त्रघ्ना एव ते यजमानस्य गृह्यन्ते तस्य वृत्रं जघ्रुष  
ऋतवोऽमुह्यन्त्स ऋतुपात्रेण मरुत्वतीयानगृह्णात्ततो वै स  
ऋतून्प्राजानाद्यदृत्तुपात्रेण मरुत्वतीयां गृह्यन्त ऋतूनाम्प्रज्ञात्यै वज्रं वा एतं  
यजमानो भ्रातृव्याय प्र हरति यन्मरुत्वतीया उदेव प्रथमेन यच्छति प्र  
हरति द्वितीयैः स्तृणुते तृतीयेना युधं वा एतद्यजमानः सँस्कुरुते  
यन्मरुत्वतीया धनुरेव प्रथमो ज्या द्वितीय इषुस्तृतीयः प्रत्येव प्रथमेन धत्ते  
वि सृजति द्वितीयैः विध्यति तृतीयेनेन्द्रो वृत्रँ हृत्वा  
पराम्परावतमगच्छदपाराधमिति मन्यमानः स हरितोऽभवत्स  
एतान्मरुत्वतीयानात्मस्पर्शानपश्यत्तानगृहीत प्राणमेव  
प्रथमेनास्पृणुतापानं द्वितीयैनात्मानं तृतीयेनात्मस्पर्शं वा एते  
यजमानस्य गृह्यन्ते यन्मरुत्वतीयाः प्राणमेव प्रथमेन स्पृणुतेऽपानं  
द्वितीयैनात्मानं तृतीयेनेन्द्रो वृत्रमहन्तं देवा अब्रुवन्महान्वा अयमभूद्यो  
वृत्रमवधीदिति तन्महेन्द्रस्य महेन्द्रत्वँ स एतम्महेन्द्रमुद्धारमुदहरत वृत्रँ  
हृत्वान्यासु देवतास्वधि यन्महेन्द्रो गृह्यत उद्धारमेव तं यजमान  
उद्धारतेऽन्यासु प्रजास्वधि शुक्रपात्रेण गृह्णाति यजमानदेवत्यो वै  
महेन्द्रस्तेजः शुक्रो यन्महेन्द्रँ शुक्रपात्रेण गृह्णाति यजमान एव तेजो  
दधाति ॥५॥

अदितिः पुत्रकामा साध्येभ्यो देवेभ्यो ब्रह्मौदनमपचत्तस्या  
उच्छेषणमददुस्तत्प्राश्नात्सा रेतोऽधत्त तस्यै चत्वार आदित्या अजायन्त  
सा द्वितीयमपचत्सामन्यतोच्छेषणान्म इमैऽज्ञत यदग्रै प्राशिष्यामीतो मे  
वसीयाँसो जनिष्यन्त इति साग्रे प्राश्नात्सा रेतोऽधत्त तस्यै

व्यृद्धमाण्डमजायत सादित्येभ्य एव तृतीयमपचद्भोगाय म इदं  
 श्रान्तमस्त्विति तैऽब्रुवन्वरं वृणामहे योऽतो जायाता अस्माकं स  
 एकौऽसद्योऽस्य प्रजायामृध्याता अस्माकम्भोगाय भवादिति ततो  
 विवस्वानादित्योऽजायत तस्य वा इयम्प्रजा यन्मनुष्यास्तास्वेक एवद्धो  
 यो यजते स देवानाम्भोगाय भवति देवा वै यज्ञाद्ब्रुमन्तरायन्त्स  
 आदित्यानन्वाक्रमत ते द्विदेवत्यान्प्रापद्यन्त तान्न प्रति प्रायच्छन्तस्मादपि  
 वध्यम्प्रपन्नं न प्रति प्र यच्छन्ति तस्माद्द्विदेवत्येभ्य आदित्यो निर्गृह्यते  
 यदुच्छेषणादजायन्त तस्मादुच्छेषणाद्गृह्यते तिसृभिर्ऋग्भिर्गृह्णाति माता  
 पिता पुत्रस्तदेव तन्मिथुनमुल्बं गर्भो जरायु तदेव तन्मिथुनं पशवो वा एते  
 यदादित्य ऊर्गर्धि दध्ना मध्यतः श्रीणात्यूर्जमेव पशूनाममध्यतो दधाति  
 शृतातङ्ग्येन मेध्यत्वाय तस्मादात्मा पक्वं दुहे पशवो वा एते यदादित्यः  
 परिश्रित्यं गृह्णाति प्रतिरुध्यैवास्मै पशून्गृह्णाति पशवो वा एते यदादित्य  
 एष रुद्रो यदग्निः परिश्रित्यं गृह्णाति रुद्रादेव पशून्तर्दधात्येष वै  
 विवस्वानादित्यो यदुपांशुसर्वनः स एतमेव सोमपीथम्परि शय आ  
 तृतीयसर्वनाद्विवस्व आदित्येष तै सोमपीथ इत्याह  
 विवस्वन्तमेवादित्यं सोमपीथेन समर्धयति या दिव्या वृष्टिस्तया त्वा  
 श्रीणामीति वृष्टिकामस्य श्रीणीयादृष्टिमेवाव रुद्धे यदि ताजक्प्र  
 स्कन्देद्वर्षुकः पर्जन्यः स्याद्यदि चिरमवर्षुको न सादयत्यसन्नाद्धि प्रजाः  
 प्रजायन्ते नानु वर्षट्करोति यदनुवषट्कुर्याद्ब्रुमन्प्रजा अन्ववसृजेन्न  
 हुत्वान्वीक्षेत यदन्वीक्षेत चक्षुरस्य प्रमारुक् स्यात्तस्मान्नान्वीक्ष्यः ॥६॥

अन्तर्यामपात्रेण सावित्रमाग्रयणाद्गृह्णाति प्रजापतिर्वा एष यदाग्रयणः  
 प्रजानाम्प्रजननाय न सादयत्यसन्नाद्धि प्रजाः प्रजायन्ते नानु वर्षट्करोति



यदनुवषट्कुर्याद्बुद्रम्प्रजा अन्ववसृजे द्वेष वै गायत्रो देवानां यत्सवितैष  
 गायत्रियै लोके गृह्यते यदाग्रयणो यदन्तर्यामपात्रेण  
 सावित्रमाग्रयणाद्गृह्णाति स्वादेवैनं योनेर्निर्गृह्णाति विश्वे देवास्तृतीयं  
 सर्वनं नोदयच्छन्ते सवितारम्प्रातःसवनभागं सन्तं तृतीयसवनमभि  
 पर्यणयन्ततो वै ते तृतीयं सर्वनमुदयच्छन्त्यतृतीयसवने सावित्रो गृह्यते  
 तृतीयस्य सर्वनस्योद्यत्यै सवितृपात्रेण वैश्वदेवं कलशाद्गृह्णाति वैश्वदेव्यो  
 वै प्रजा वैश्वदेवः कलशः सविता प्रसवानामीशे यत्सवितृपात्रेण वैश्वदेवं  
 कलशाद्गृह्णाति सवितृप्रसूत एवास्मै प्रजाः प्र जनयति सोमे सोममभि  
 गृह्णाति रेत एव तद्दधाति सुशर्मासि सुप्रतिष्ठान इत्याह सोमे हि  
 सोममभिगृह्णाति प्रतिष्ठित्या एतस्मिन्वा अपि ग्रहे मनुष्येभ्यो देवेभ्यः  
 पितृभ्यः क्रियते सुशर्मासि सुप्रतिष्ठान इत्याह मनुष्येभ्य एवैतेन करोति  
 बृहदित्याह देवेभ्य एवैतेन करोति नम इत्याह पितृभ्य एवैतेन  
 करोत्येतावतीर्वै देवतास्ताभ्य एवैनं सर्वाभ्यो गृह्णात्येष ते  
 योनिर्विश्वेभ्यस्त्वा देवेभ्य इत्याह वैश्वदेवो ह्येषः ॥७॥

प्राणो वा एष यदुपांशुयदुपांशुपात्रेण प्रथमश्चोत्तमश्च ग्रहौ गृह्येते  
 प्राणमेवानुं प्रयन्ति प्राणमनूद्यन्ति प्रजापतिर्वा एष यदाग्रयणः प्राण  
 उपांशुः पत्नीः प्रजाः प्र जनयन्ति यदुपांशुपात्रेण  
 पात्नीव्रतमाग्रयणाद्गृह्णाति प्रजानाम्प्रजननाय तस्मात्प्राणम्प्रजा अनु प्र  
 जायन्ते देवा वा इतइतः पत्नीः सुवर्गं लोकमजिगांसन्ते सुवर्गं लोकं न  
 प्राजानन्त एतम्पात्नीव्रतमपश्यन्तमगृह्णत ततो वै ते सुवर्गं  
 लोकम्प्राजानन्त्यत्पात्नीव्रतो गृह्यते सुवर्गस्य लोकस्य प्रजात्यै स सोमो  
 नातिष्ठत स्त्रीभ्यो गृह्यमाणस्तं घृतं वज्रं कृत्वाघ्नन्तं

निरिन्द्रियम्भूतमगृह्णन्तस्मात्स्त्रियो निरिन्द्रिया अदायादीरपि पापात्पुंस  
 उपस्तितरं वदन्ति यद्धृतेन पात्नीवृतं श्रीणाति वज्रैशैवैनं वशै कृत्वा  
 गृह्णात्युपयामगृहीतोऽसीत्याहेयं वा उपयामस्तस्मादिमाम्प्रजा अनु प्र  
 जायन्ते बृहस्पतिसुतस्य त इत्याह ब्रह्म वै देवानाम्बृहस्पतिर्ब्रह्मणैवास्मै  
 प्रजाः प्र जनयतीन्द्रो इत्याह रेतो वा इन्द्रो रेत एव तदधातीन्द्रियाव  
 इत्याह प्रजा वा इन्द्रियं प्रजा एवास्मै प्र जनयत्यग्रा इत्याहाग्निर्वै  
 रेतोधाः पत्नीव इत्याह मिथुनत्वार्यं सजूर्देवेन त्वष्टा सोमम्पिबेत्याह  
 त्वष्टा वै पशूनामिमिथुनानां रूपकद्रूपमेव पशुषु दधाति देवा वै  
 त्वष्टारमजिघांसन्त्स पत्नीः प्रापद्यत्तं न प्रति प्रायच्छन्तस्मादपि  
 वध्यम्प्रपन्नं न प्रति प्र यच्छन्ति तस्मात्पात्नीवृते त्वष्टेऽपि गृह्यते न  
 सादयत्यसन्नाद्धि प्रजाः प्रजायन्ते नानु वर्षट्करोति  
 यदनुवषट्कुर्याद्बुद्रम्प्रजा  
 अन्ववसृजेद्यन्नानुवषट्कुर्यादशान्तमग्नीत्सोमम्भक्षयेदुपांश्चनु वर्षट्करोति  
 न रुद्रम्प्रजा अन्ववसृजति शान्तमग्नीत्सोमम्भक्षयत्यग्निनेष्टुंरुपस्थमा  
 साद नेष्टुः पत्नीमुदानयेत्याहाग्निदेव नेष्टुरि रेतो दधाति नेष्टु  
 पत्निया मुद्गात्रा सं ख्यापयति प्रजापतिर्वा एष यदुद्गाता  
 प्रजानाम्प्रजननायाप उप प्र वर्तयति रेत एव तत्सिञ्चत्यूरुणोप प्र  
 वर्तयत्यूरुणा हि रेतः सिच्यते नम्रंक्रियोरुमुप प्र वर्तयति यदा हि नम्र  
 ऊर्भवंत्यथ मिथुनी भवतोऽथ रेतः सिच्यतेऽथ प्रजाः प्र जायन्ते ॥८॥

इन्द्रो वृत्रमहन्तस्य शीर्षकपालमुदौब्जत्स द्रौणकलशोऽभवत्तस्मात्सोमः  
 समस्रवत्स हारियोजनोऽभवत्तं व्यचिकित्सज्जुहवानी इ मा हौषामिति  
 सोऽमन्यत् यद्धोष्याम्यामं हौष्यामि यन्न होष्यामि यज्ञवेशसं

करिष्यामीति तमधियतु होतुं सौऽग्निरंब्रवीन्न मय्यामं हौष्यसीति तं  
 धानाभिरश्रीणात्तं शृतम्भूतमजुहोद्यद्धानाभिर्हारियोजनं श्रीणाति  
 शृतत्वायं शृतमेवैनम्भूतं जुहोति ब्रह्मीभिः  
 श्रीणात्येतावतीरेवास्यामुष्मिल्लोके कामदुघा भवन्त्यथो खल्वाहुरेता वा  
 इन्द्रस्य पृश्नयः कामदुघा यद्धारियोजनीरिति तस्माद्ब्रह्मीभिः  
 श्रीणीया दृक्सामे वा इन्द्रस्य हरीं सोमपानौ तयोः परिधयं आधानं  
 यदप्रहृत्य परिधीञ्जुह्यादन्तराधानाभ्यां घासम्प्र यच्छेत्प्रहृत्य  
 परिधीञ्जुहोति निराधानाभ्यामेव घासम्प्र यच्छत्यु त्रेता जुहोति  
 यातयामेव ह्येतर्ह्यध्वर्युः स्वगाकृतो यदध्वर्युर्जुह्याद्यथा  
 विमुक्तम्पुनर्युनक्ति तादृगेव तच्छीर्षन्नधि निधाय जुहोति शीर्षतो हि स  
 समभवं द्विक्रम्य जुहोति विक्रम्य हीन्द्रो वृत्रमहन्त्समृद्धयै पशवो वै  
 हारियोजनीर्यत्संभिन्यादल्पा एनम्पशवो भुञ्जन्त उप तिष्ठेरन्ध्र  
 संभिन्याद्ब्रहवं एनम्पशवोऽभुञ्जन्त उप तिष्ठेरन्मनसा सम्बाधत उभयं  
 करोति ब्रहवं एवैनम्पशवो भुञ्जन्त उप तिष्ठन्त उत्रेत्युपहवमिच्छन्ते य  
 एव तत्र सोमपीथस्तमेवारं रुन्धत उत्तरवेद्यां नि वपति पशवो वा  
 उत्तरवेदिः पशवो हारियोजनीः पशुष्वेव पशून्प्रतिं ष्ठापयन्ति ॥६॥

ग्रहान्वा अनु प्रजाः पशवः प्र जायन्त उपांश्चन्तर्यामावजावयः  
 शुक्रामन्थिनौ पुरुषा ऋतुग्रहानेकशफा आदित्यग्रहं गावं आदित्यग्रहो  
 भूर्यिष्ठाभिर्ऋग्भिर्गृह्यते तस्माद्गावः पशूनाम्भूर्यिष्ठा यत्रिरुपांशू हस्तैन  
 विगृह्णाति तस्माद्द्वौ त्रीन्जा जनयत्यथारयो भूर्यसीः पिता वा एष  
 यदाग्रयणः पुत्रः कलशो यदाग्रयण उपदस्यैत्कलशाद्ब्रह्मीयाद्यथा पिता  
 पुत्रं क्षित उपधावति तादृगेव तद्यत्कलशा उपदस्यैदाग्रयणाद्ब्रह्मीयाद्यथा

पुत्रः पितरं क्षित उ॑प॒धाव॑ति ता॒दृगे॑व त दा॒त्मा वा ए॒ष य॒ज्ञस्य॑ यदा॒ग्रय॑णो  
यद्ग्रहो॑ वा क॒लशो॑ वो॒पद॑स्यैदा॒ग्रय॑णाद्गृ॒ह्णीया॑दा॒त्मन॑ ए॒वाधि॑ य॒ज्ञं  
निष्करो॑त्य वि॒ज्ञातो॑ वा ए॒ष गृ॑ह्यते यदा॒ग्रय॑णः स्था॒ल्या गृ॑ह्णाति वा॒यव्ये॑न  
जुहोति॑ तस्माद्ग॒र्भेणा॑वि॒ज्ञातेन॑ ब्रह्म॒हाव॑भृथम॒व॑ यन्ति॒ परा॑  
स्था॒लीर॑स्यन्त्यु॒द्वाय॑व्यानि हरन्ति॒ तस्मा॑त्स्त्रियं  
जा॒ताम्परा॑स्यन्त्यु॒त्पुमाँ॑स॒ हरन्ति॑ यत्पुरो॒रुच॑माह॒ यथा॑ वस्य॑स आ॒हरति॑  
ता॒दृगे॑व तद्ग्रहं॑ गृ॒ह्णाति॑ यथा॒ वस्य॑स आ॒हत्य॑ प्राहं॒ ता॒दृगे॑व तद्यत्सा॒दयति॑  
यथा॒ वस्य॑स उ॒पनि॑धाया॒पक्राम॑ति ता॒दृगे॑व तद्यद्वै य॒ज्ञस्य॑ साम्ना॒ यजु॑षा  
क्रियते॑ शिथि॒लं तद्य॑दृ॒चा तद्दृ॑ढं पु॒रस्ता॑दु॒पयामा॑ यजु॑षा गृह्यन्त  
उ॒परि॑ष्ठादु॒पयामा॑ ऋ॒चा य॒ज्ञस्य॑ धृत्यै ॥१०॥

प्रान्यानि॒ पात्रा॑णि यु॒ज्यन्ते॒ नान्यानि॑ यानि॒ परा॒चीना॑नि प्रयु॒ज्यन्ते॒ऽमुमे॑व  
तैर्लो॒कम॑भि ज॒यति॑ परा॒डिव॑ ह्यसौ लो॒को यानि॑ पुनः प्रयु॒ज्यन्त॑ इ॒ममे॑व  
तैर्लो॒कम॑भि ज॒यति॑ पुनःपुनरि॒व ह्ययं॑ लो॒कः प्रा॒न्यानि॑ पात्रा॑णि यु॒ज्यन्ते॒  
ना॒न्यानि॑ यानि॒ परा॒चीना॑नि प्रयु॒ज्यन्ते॒ तान्य॑न्वोष॒धयः॑ परा॑ भवन्ति॒ यानि॑  
पुनः प्रयु॒ज्यन्ते॒ तान्य॑न्वोष॒धयः॑ पुन॒रा भ॑वन्ति॒ प्रा॒न्यानि॑ पात्रा॑णि यु॒ज्यन्ते॒  
ना॒न्यानि॑ यानि॒ परा॒चीना॑नि प्रयु॒ज्यन्ते॒ तान्य॑न्वा॒र॒शयाः॑ प॒शवो॑ऽर॒शय॑मप  
यन्ति॒ यानि॑ पुनः प्रयु॒ज्यन्ते॒ तान्य॑नु॒ ग्राम्याः॑ प॒शवो॑ ग्राम॒मुपा॑व॒यन्ति॑ यो वै  
ग्रहा॑णां नि॒दानं॑ वेदं नि॒दानं॑वा॒न्भव॑त्याज्य॒मित्यु॑क्थं तद्वै ग्रहा॑णां नि॒दानं॑  
यदु॒पाँशु॑ शँसति॒ तदु॒पाँश्वन्त॑र्या॒मयो॑र्यदु॒च्चैस्तदि॑तरि॒षां ग्रहा॑णामे॒तद्वै  
ग्रहा॑णां नि॒दानं॑ य ए॒वं वेदं॑ नि॒दानं॑वा॒न्भवति॑ यो वै ग्रहा॑णाम्मिथु॒नं वेद॑ प्र  
प्र॒जया॑ प॒शुभि॑र्मिथु॒नैर्जा॑यते स्था॒लीभि॑र॒न्ये ग्रहा॑ गृह्यन्तै॒ वाय॑व्यैर॒न्य ए॒तद्वै  
ग्रहा॑णाम्मिथु॒नं य ए॒वं वेद॑ प्र प्र॒जया॑ प॒शुभि॑र्मिथु॒नैर्जा॑यत॒ इन्द्र॑स्त्वष्टुः

सोममभीषहापिबत्स विष्वङ्ख्यार्चत्स आत्मन्नारमणं नाविन्दत्स  
 एताननुसवनम्पुरोडाशानपश्यत्तान्निर्वपत्तैर्वै स आत्मन्नारमणमकुरुत्  
 तस्मादनुसवनम्पुरोडाशा निरुप्यन्ते  
 तस्मादनुसवनम्पुरोडाशानाम्प्राशनीयादात्मन्नेवारमणं कुरुते नैनं  
 सोमोऽति पवते ब्रह्मवादिनो वदन्ति नर्चा न यजुषा पङ्क्तिराप्यतेऽथ किं  
 यज्ञस्य पाङ्कत्वमिति धानाः करम्भः परिव्रापः पुरोडाशः पयस्यां तेन  
 पङ्क्तिराप्यते तद्यज्ञस्य पाङ्कत्वम् ॥११॥

इति षष्ठकारण्डे पञ्चमः प्रपाठकः ५

अथ षष्ठकारण्डे षष्ठः प्रपाठकः ६

सुवर्गाय वा एतानि लोकाय हूयन्ते यद्दक्षिणानि द्वाभ्यां गार्हपत्ये  
 जुहोति द्विपाद्यजमानः प्रतिष्ठित्या आग्नीध्रे जुहोत्यन्तरिक्ष एवा क्रमते  
 सदोऽभ्यैति सुवर्गमेवैनं लोकं गमयति सौरीभ्यामृग्भ्यां गार्हपत्ये  
 जुहोत्यमुमेवैनं लोकं समारोहयति नयवत्यर्चाग्नीध्रे जुहोति सुवर्गस्य  
 लोकस्याभिनीत्यै दिवं गच्छ सुवः पृतेति हिरण्यं हुत्वोद्गृह्णाति  
 सुवर्गमेवैनं लोकं गमयति रूपेण वो रूपमभ्यैमीत्याह रूपेण ह्यासां  
 रूपमभ्यैति यद्विरणयेन तुथो वो विश्ववेदा वि भजत्वित्याह तुथो हं स्म  
 वै विश्ववेदा देवानां दक्षिणा वि भजति तेनैवैना वि भजत्ये तत्तै अग्ने  
 राध ऐति सोमच्युतमित्याह सोमच्युतं ह्यस्य राध ऐति तन्मित्रस्य पथा  
 नयेत्याह शान्त्या ऋतस्य पथा प्रेतं चन्द्रदक्षिणा इत्याह सत्यं वा ऋतं  
 सत्येनैवैना ऋतेन वि भजति यज्ञस्य पथा सुविता नयन्तीरित्याह यज्ञस्य  
 ह्यैताः पथा यन्ति यद्दक्षिणा ब्राह्मणमद्य राध्यासमृषिमार्षेयमित्याहैष वै  
 ब्राह्मण ऋषिरार्षेयो यः शुश्रुवान्तस्मादेवमाह वि सुवः पश्य

व्यन्तरिन्नमित्याह सुवर्गमेवैनं लोकं गमयति यतस्व सदस्यैरित्याह  
मित्रत्वाया स्मद्दात्रा देवत्रा गच्छत मधुमतीः प्र दातारमा विशतेत्याह  
व्यमिह प्रदातारः स्मोऽस्मानमुत्र मधुमतीरा विशतेति वावैतदाह हिरण्यं  
ददाति ज्योतिर्वै हिरण्यं ज्योतिरेव पुरस्ताद्धत्ते सुवर्गस्य  
लकस्यानुख्यात्या अग्नीधे ददात्यग्निमुखानेवर्तून्प्रीणाति ब्रह्मणे ददाति  
प्रसूत्यै होत्रे ददात्यात्मा वा एष यज्ञस्य यद्धोतात्मानमेव यज्ञस्य  
दक्षिणाभिः समर्धयति ॥१॥

समिष्टयजूँषि जुहोति यज्ञस्य समिष्ट्यै यद्वै यज्ञस्य क्रूरं यद्विलिष्टं  
यदत्येति यन्नात्येति यदतिकरोति यन्नापि करोति तदेव तैः प्रीणाति नव  
जुहोति नव वै पुरुषे प्राणाः पुरुषेण यज्ञः सम्मितो यावानेव  
यज्ञस्तम्प्रीणाति षड्गमियाणि जुहोति षड्वा ऋतव ऋतूनेव प्रीणाति  
त्रीणि यजूँषि त्रय इमे लोका इमानेव लोकान्प्रीणाति यज्ञं यज्ञं गच्छ  
यज्ञपतिं गच्छेत्याह यज्ञपतिमेवैनं गमयति स्वाम्योनिं गच्छेत्याह  
स्वामेवैनं योनिं गमयत्ये ष तै यज्ञो यज्ञपते सहसूक्तवाकः सुवीर इत्याह  
यजमाम एव वीर्यं दधाति वासिष्ठो ह सात्यहव्यो देवभागम्प्रच्छ  
यत्सृञ्जयान्बहयाजिनोऽर्यीयजो यज्ञे यज्ञम्प्रत्यतिष्ठिपाः यज्ञपताः रविति स  
होवाच यज्ञपताविति सत्याद्वै सृञ्जयाः परा बभूवुरिति होवाच यज्ञे वाव  
यज्ञः प्रतिष्ठाप्य आसीद्यजमानस्यापराभावायेति देवा गातुविदो गातुं  
वित्त्वा गातुमितेत्याह यज्ञ एव यज्ञम्प्रति ष्ठापयति यजमानस्यापराभावाय  
॥२॥

अवभृथयजूँषि जुहोति यदेवावाचीनमेकहायनादेनः करोति तदेव तैरव

यजतेऽपौऽवभृथमवैत्यप्सु वै वरुणः साक्षादेव वरुणमव यजते वर्त्मना  
 वा अन्वित्य यज्ञं रक्षांसि जिघांसन्ति साम्ना प्रस्तोतान्ववैति साम्  
 वै रक्षोहा रक्षसामपहत्यै त्रिर्निधनमुपैति त्रय इमे लोका एभ्य एव  
 लोकेभ्यो रक्षांस्यप हन्ति पुरुषःपुरुषो निधनमुपैति पुरुषःपुरुषो हि  
 रक्षस्वी रक्षसामपहत्या उरुं हि राजा वरुणश्चकारेत्याह प्रतिष्ठित्यै शतं  
 ते राजन्भिषजः सहस्रमित्याह भेषजमेवास्मै करोत्यभिष्ठितो वरुणस्य  
 पाश इत्याह वरुणपाशमेवाभि तिष्ठति बर्हिर्भि  
 जुहोत्याहुतीनाम्प्रतिष्ठित्या अथो अग्नित्येव जुहोत्य पबर्हिषः  
 प्रयाजान्यजति प्रजा वै बर्हिः प्रजा एव वरुणपाशान्मुञ्चत्या ज्यभागौ  
 यजति यज्ञस्यैव चक्षुषी नान्तरैति वरुणं यजति  
 वरुणपाशादेवैनमुञ्चत्य ग्रीवरुणौ यजति साक्षादेवैनं  
 वरुणपाशान्मुञ्चत्य पबर्हिषावनूयाजौ यजति प्रजा वै बर्हिः प्रजा एव  
 वरुणपाशान्मुञ्चति चतुरः प्रयाजान्यजति द्वावनूयाजौ षट्सम्पद्यन्ते षड्वा  
 ऋतव ऋतुष्वेव प्रति तिष्ठत्य वभृथ निचङ्कुणेत्याह यथोदितमेव  
 वरुणमव यजते समुद्रे ते हृदयमप्स्वन्तरित्याह समुद्रे ह्यन्तर्वरुणः सं त्वा  
 विशन्त्वोषधीरुताप इत्याहाद्भिरेवैनमोषधीभिः सम्यञ्च दधाति देवीराप  
 एष वो गर्भ इत्याह यथायजुरेवैतत्पशवो वै सोमो  
 यद्भिन्दूनाम्भक्षयेत्पशुमान्त्स्याद्वरुणस्त्वेनं गृह्णीयाद्यन्न भक्षयेदपशुः स्यान्नैनं  
 वरुणो गृह्णीयादुपस्पृश्यमेव पशुमान्भवति नैनं वरुणो गृह्णाति प्रतियुतो  
 वरुणस्य पाश इत्याह वरुणपाशादेव निर्मुच्यतेऽप्रतीक्षमा यन्ति  
 वरुणस्यान्तर्हित्या एधोऽस्येधिषीमहीत्याह समिधैवाग्निं नमस्यन्त  
 उपायन्ति तेजोऽसि तेजो मयि धेहीत्याह तेज एवात्मन्धत्ते ॥३॥

स्प्येन वेदिमुद्धन्ति रथाक्षेण वि मिमीते यूपम्मिनोति त्रिवृतमेव वज्रं  
 सम्भृत्य भ्रातृव्याय प्र हरति स्तृत्यै यदन्तर्वेदि मिनुयादैवलोकमभि  
 जयेद्यद्विर्वेदि मनुष्यलोकं वैद्यन्तस्य संधौ  
 मिनोत्युभयौलोकयोरभिजित्या उपरसम्मितामिनुयात्पितृलोककामस्य  
 रशनसम्मितामनुष्यलोककामस्य चषालसम्मितामिन्द्रियकामस्य  
 सर्वान्त्समान्प्रतिष्ठाकामस्य ये त्रयो मध्यमास्तान्त्समान्पशुकामस्यै तान्वा  
 अनु पशव उप तिष्ठन्ते पशुमानेव भवति  
 व्यतिषजेदितरान्प्रजयैवैनम्पशुभिर्व्यतिषजति यं कामयैत प्रमायुकः  
 स्यादिति गर्तमितं तस्य मिनुयादुत्तरार्धं वर्षिष्ठमथ हसीयांसमेषा वै  
 गर्तमिद्यस्यैवम्मिनोति ताजकप्र मीयते दक्षिणार्धं  
 वर्षिष्ठमिनुयात्सुवर्गकामस्याथ हसीयांसमाक्रमणमेव तत्सेतुं  
 यजमानः कुरुते सुवर्गस्य लोकस्य समष्ट्यै यदेकस्मिन्पुत्रे द्वे रशने  
 परिव्ययति तस्मादेको द्वे जाये विन्दते यत्रैकां रशनां द्वयोर्यूपयोः  
 परिव्ययति तस्मान्नैका द्वौ पती विन्दते यं कामयैत रुयस्य जायेतेत्युपान्ते  
 तस्य व्यतिषजेत्सुयैवास्य जायते यं कामयैत पुमानस्य जायेतेत्यान्तं  
 तस्य प्र वैष्टयेत्पुमानेवास्य जायतेऽसुरा वै देवान्दक्षिणत उपानयन्तान्देवा  
 उपशयेनैवापानुदन्त तदुपशयस्योपशयत्वं यदक्षिणत उपशय उपशये  
 भ्रातृव्यापनुत्यै सर्वे वा अन्ये यूपाः पशुमन्तोऽथोपशय एवापशुस्तस्य  
 यजमानः पशुर्यन्न निर्दिशेदार्तिमाच्छेद्यजमानोऽसौ तै पशुरिति निर्दिशेद्यं  
 द्विष्याद्यमेव द्वेष्टि तमस्मै पशुं निर्दिशति यदि न द्विष्यादाखुस्तै पशुरिति  
 ब्रूयान्न ग्राम्यान्पशून्हिनस्ति नारण्यान्प्रजापतिः प्रजा असृजत सौऽन्नाद्यैः  
 व्यार्ध्यत स एतामैकादशनीमपश्यत्तया वै सौऽन्नाद्यमवारुद्ध यदश यूपा  
 भवन्ति दशाक्षरा विराडन्नं विराड्विराजैवान्नाद्यमव रुद्धे य एकादशः



स्तनं एवास्यै स दुह एवैनां तेन वज्रो वा एषा सम्मीयते यदेकादशिनी  
सेश्वरा पुरस्तात्प्रत्यञ्चं यज्ञं सम्मर्दितोर्यत्पात्नीवतम्मिनोति यज्ञस्य  
प्रत्युत्तब्ध्यै सयत्वाय ॥४॥

प्रजापतिः प्रजा असृजत् स रिरिचानोऽमन्यत् स  
एतामेकादशिनीमपश्यत्तया वै स आयुरिन्द्रियं वीर्यमात्मन्धत्त प्रजा इव  
खलु वा एष सृजते यो यजते स एतर्हि रिरिचान इव यदेषैकादशिनी  
भवत्यायुरेव तयैन्द्रियं वीर्यं यजमान आत्मन्धत्ते प्रैवाग्नेयेन वापयति  
मिथुनं सारस्वत्या करोति रेतः सौम्येन दधाति प्र जनयति पौष्णेन  
बार्हस्पत्यो भवति ब्रह्म वै देवानाम्बृहस्पतिर्ब्रह्मणैवास्मै प्रजाः प्र जनयति  
वैश्वदेवो भवति वैश्वदेव्यो वै प्रजाः प्रजा एवास्मै प्र  
जनयतीन्द्रियमेवैन्द्रेणाव रुद्धे विशम्मारुतेनौजो बलमैन्द्राग्नेन प्रसवाय  
सावित्रो निर्वरुणत्वाय वारुणो मध्यत ऐन्द्रमा लभते मध्यत एवेन्द्रियं  
यजमाने दधाति पुरस्तादैन्द्रस्य वैश्वदेवमा लभते वैश्वदेवं वा अन्नमन्नमेव  
पुरस्ताद्धत्ते तस्मात्पुरस्तादन्नमद्यत ऐन्द्रमालभ्य मारुतमा लभते विड्वे  
मरुतो विशमेवास्मा अनु बध्नाति यदि कामयेत् योऽवगतः सोऽप रुध्यतां  
योऽपरुद्धः सोऽव गच्छत्वित्यैन्द्रस्य लोके वारुणमा लभेत वारुणस्य  
लोक ऐन्द्रं य एवावगतः सोऽप रुध्यते योऽपरुद्धः सोऽव गच्छति यदि  
कामयेत् प्रजा मुह्येयुरिति पशून्व्यतिषजेत्प्रजा एव मोहयति  
यदभिवाहतोऽपां वारुणमालभेत प्रजा वरुणो गृहीयादक्षिणत उदञ्चमा  
लभतेऽपवाहतोऽपाम्प्रजानामवरुणग्राहाय ॥५॥

इन्द्रः पत्न्या मनुमयाजयत्ताम्पर्यग्निकृतामुदसृजत्तया

मनु॒राध्नो॑द्यत्पर्य॒ग्नि॒कृत॒म्पात्नी॒व॒तमु॑त्सृ॒जति॒ यामे॒व मनु॑र्ऋ॒द्धिमाध्नो॑त्तामे॒व  
यज॑मान ऋ॒ध्नोति॒ य॒ज्ञस्य॒ वा अ॒प्रति॑ष्ठिताद्य॒ज्ञः परा॑ भवति य॒ज्ञम्परा॑भवन्तं  
यज॑मानोऽनु॒ परा॑ भवति॒ यदा॒ज्येन॒ पात्नी॒व॒तं सं॑स्थापयति॒ य॒ज्ञस्य॒  
प्रति॑ष्ठित्यै य॒ज्ञम्प्रति॑तिष्ठन्तं यज॑मानोऽनु॒ प्रति॑ तिष्ठती॒ ष्टं व॒पया॒ भव॒त्यनि॑ष्टं  
व॒शया॑थ पात्नी॒व॒तेन॒ प्र च॑रति॒ ती॒र्थ ए॒व प्र च॑रत्यथो॒ एत॒र्ह्येवा॒स्य  
याम॑ स्त्वा॒ष्ट्रो भ॑वति॒ त्वष्ट्रा॒ वै रे॒तसः॑ सि॒क्तस्य॑ रू॒पाणि॒ वि क॑रोति॒ तमे॒व  
वृषा॑ण॒म्पत्नी॒ष्वपि॑ सृ॒जति॒ सोऽस्मै॑ रू॒पाणि॒ वि क॑रोति ॥६॥

घ्नन्ति॒ वा ए॒तत्सो॑मं॒ यद॑भिषु॒णवन्ति॒ यत्सौ॑म्यो भवति॒ यथा॑ मृ॒ताया॑नु॒स्तर॑णीं  
घ्नन्ति॒ तादृ॑गे॒व त॒द्यदु॑त्तरा॒र्धे वा॒ मध्ये॑ वा जुहु॒याद्दे॒वता॑भ्यः॒ सम॑दं  
दध्या॑दक्षिणा॒र्धे जु॑होत्येषा॒ वै पि॑तृणां॒ दिक्स्वा॑यामे॒व दि॒शि पि॑तृ॒न्निर॑वदयत  
उद्गा॑तृभ्यो॒ हर॑न्ति॒ साम॑दे॒वत्यो॑ वै सौ॒म्यो यदे॒व सा॒म्रश्छ॑म्बट्कुर्वन्ति  
तस्यै॒व स शान्ति॑ रवे॒क्षन्ते॒ पवि॑त्रं॒ वै सौ॒म्य आ॒त्मान॑मे॒व प॑वयन्ते॒ य  
आ॒त्मानं॑ न प॑रि॒पश्ये॑दि॒तासुः॑ स्याद॒भिद॑दिं कृ॒त्वावे॑क्षेत्  
तस्मि॒न्द्वा॒त्मान॑म्प॒रिप॑श्यत्यथो॒ आ॒त्मान॑मे॒व प॑वयते॒ यो ग॒तम॑नाः  
स्यात्सो॑ऽवे॒क्षेत् यन्मे॒ मनः॑ परा॑गतं॒ यद्वा॑ मे॒ अप॑रागतम् । राज्ञा॒ सोमै॑न  
तद्ब्र॑यम॒स्मासु॑ धारयाम॒सीति॑ मन॒ ए॒वात्म॑न्दा॒धार न॑ ग॒तम॑ना भ॒वत्य॒पु वै  
तृती॑यस॒वने॒ य॒ज्ञः क्रा॑मती॒जाना॑दनी॒जान॑म॒भ्याग्ना॑वैष्ण॒व्यर्चा॑ घृ॒तस्य॑  
यज॑त्य॒ग्निः सर्वा॑ दे॒वता॒ विष्णु॑र्य॒ज्ञो दे॒वता॑श्चै॒व य॒ज्ञं च॑ दा॒धारो॒ पा॑शु  
यज॑ति मिथु॒नत्वा॑य॒ ब्रह्म॑वा॒दिनो॑ वदन्ति॒ मि॒त्रो य॒ज्ञस्य॒ स्विष्टं॑ युवते॒ वरु॑णो  
दुरि॑ष्टं॒ क्व तर्हि॑ य॒ज्ञः क्व॑ यज॑मानो भव॒तीति॑ यन्मै॒त्रावरु॑णीं व॒शामा॑लभते  
मि॒त्रेणै॒व य॒ज्ञस्य॒ स्विष्टं॑ शमयति॒ वरु॑णेन॒ दुरि॑ष्टं॒ नार्ति॑मा॒र्च्छति॑ यज॑मानो  
यथा॒ वै लाङ्ग॑ले॒नोर्व॑रा॒म्प्रभि॑न्दन्त्ये॒वमृ॑क्सामे॒ य॒ज्ञम्प्र॑ भि॒न्तो यन्मै॒त्रावरु॑णीं

वृशामालभते यज्ञायैव प्रभिन्नाय मृत्यमन्ववास्यति शान्त्यै यातयामानि  
वा एतस्य च्छन्दांसि य ईजानश्छन्दसामेष रसो यद्वशा यन्मैत्रावरुणीं  
वृशामालभते छन्दांस्येव पुनरा प्रीणात्ययातयामत्वायाथो छन्दःस्वेव  
रसं दधाति ॥७॥

देवा वा इन्द्रियं वीर्यं व्यभजन्त ततो यदत्यशिष्यत तदतिग्राह्या  
अभवन्तदतिग्राह्याणामतिग्राह्यत्वं यदतिग्राह्या गृह्यन्ते इन्द्रियमेव तद्वीर्यं  
यजमान आत्मन्धत्ते तेज आग्नेयेनेन्द्रियमैन्द्रेण ब्रह्मवर्चसं  
सौर्येणोपस्तम्भनं वा एतद्यज्ञस्य यदतिग्राह्याश्चक्रे पृष्ठानि यत्पृष्ठे न  
गृहीयात्प्राञ्चं यज्ञम्पृष्ठानि सँ शृणीयु र्यदुक्थ्ये गृहीयात्प्रत्यञ्चं  
यज्ञमतिग्राह्याः सँ शृणीयु विश्वजिति सर्वपृष्ठे ग्रहीत्व्या यज्ञस्य  
सवीर्यत्वाय प्रजापतिदेवेभ्यो यज्ञान्व्यादिशत्स प्रियास्तनूरप न्यधत्  
तदतिग्राह्या अभवन्वितनुस्तस्य यज्ञ इत्याहुर्यस्यातिग्राह्या न गृह्यन्त  
इत्यप्यग्निष्टोमे ग्रहीत्व्या यज्ञस्य सतनुत्वाय देवता वै सर्वाः  
सदृशीरासन्ता न व्यावृतमगच्छन्ते देवा एत  
एतान्ग्रहानपश्यन्तानगृह्यताग्नेयमग्निरैन्द्रमिन्द्रः सौर्यँ सूर्यस्ततो वै  
तैऽन्याभिर्देवताभिव्यावृतमगच्छन्त्यस्यैवं विदुष एते ग्रहा गृह्यन्ते  
व्यावृतमेव पाप्मना भ्रातृव्येण गच्छती मे लोका ज्योतिष्मन्तः  
सुमावद्वीर्याः कार्या इत्याहुराग्नेयेनास्मिल्लोके ज्योतिर्धत्त ऐन्द्रेणान्तरिक्ष  
इन्द्रवायू हि सयुजौ सौर्येणामुष्मिल्लोके ज्योतिर्धत्ते ज्योतिष्मन्तोऽस्मा  
इमे लोका भवन्ति सुमावद्वीयनिनान्कुरुत एतान्वै  
ग्रहान्बम्बाविश्वर्वयसाववित्तां ताभ्यामिमे लोकाः पराञ्चश्चार्वाञ्चश्च  
प्राभुर्यस्यैवं विदुष एते ग्रहा गृह्यन्ते प्रास्मा इमे लोकाः पराञ्चश्चार्वाञ्चश्च

भान्ति ॥८॥

देवा वै यद्यज्ञेऽकुर्वत तदसुरा अकुर्वत ते देवा अदाभ्ये छन्दाँसि  
सर्वानानि समस्थापयन्ततो देवा अभवन्परासुरा यस्यैवं विदुषोऽदाभ्यो  
गृह्यते भवत्यात्मना परास्य भ्रातृव्यो भवति यद्वै देवा  
असुरानदाभ्येनादभ्नुवन्तददाभ्यस्यादाभ्यत्वं य एवं वेद दभ्नोत्येव  
भ्रातृव्यं नैनम्भ्रातृव्यो दभ्नोत्येषा वै प्रजापतेरतिमोक्षिणी नाम तनूर्यददाभ्य  
उपनद्धस्य गृह्णात्यतिमुक्त्या अतिपाप्मानम्भ्रातृव्यमुच्यते य एवं वेद  
घ्नन्ति वा एतत्सोमं यदभिषुतवन्ति सोमै हन्यमाने यज्ञो हन्यते यज्ञे  
यजमानो ब्रह्मवादिनो वदन्ति किं तद्यज्ञे यजमानः कुरुते येन  
जीवन्त्सुवर्गं लोकमेतीति जीवग्रहो वा एष यददाभ्योऽनभिषुतस्य  
गृह्णाति जीवन्तमेवैनं सुवर्गं लोकं गमयति वि वा एतद्यज्ञं छिन्दन्ति  
यददाभ्ये सँस्थापयन्त्यँशूनपि सृजति यज्ञस्य संतत्यै ॥९॥

देवा वै प्रबाहुग्रहानगृह्णत स एतम्प्रजापतिरँशुमपश्यत्तमगृह्णीत तेन वै  
स आर्ध्रोद्यस्यैवं विदुषोऽँशुर्गृह्यत ऋध्नोत्येव सकृदभिषुतस्य गृह्णाति  
सकृद्धि स तेनार्ध्रो मनसा गृह्णाति मन इव हि प्रजापतिः प्रजापतेराप्त्या  
औदुम्बरेण गृह्णात्यूर्वा उदुम्बर ऊर्जमेवाव रुद्धे चतुःस्रक्ति भवति  
दिद्वेइव प्रति तिष्ठति यो वा अँशोरायतनं वेदायतनवान्भवति  
वामदेव्यमिति साम तद्वा अस्यायतनम्मनसा गायमानो  
गृह्णात्यायतनवानेव भवति यदध्वर्युरँशुं गृह्णन्नार्धयेदुभाभ्यां  
नर्ध्वेताध्वर्यवे च यजमानाय च यदध्वर्येदुभाभ्यामृध्येतानवानं गृह्णाति  
सैवास्यर्द्धि हिरण्यमभि व्यनित्यमृतं वै हिरण्यमायुः प्राण

आयुषैवामृतमभि धिनोति शतमानम्भवति शतायुः पुरुषः शतेन्द्रिय  
आयुष्येवेन्द्रिये प्रति तिष्ठति ॥१०॥

प्रजापतिर्देवेभ्यो यज्ञान्वयादिशत्स रिरिचानोऽमन्यत् स यज्ञानां  
षोडशधेन्द्रियं वीर्यमात्मानमभि समक्खिदत्तत्षोडश्यभवन्न वै षोडशी  
नाम यज्ञोऽस्ति यद्वाव षोडशं स्तोत्रं षोडशं शस्त्रं तेन षोडशी  
तत्षोडशिनः षोडशित्वं यत्षोडशी गृह्यते इन्द्रियमेव तद्वीर्यं यजमान  
आत्मन्धत्ते देवेभ्यो वै सुवर्गो लोको न प्राभवत्त एतं  
षोडशिनमपश्यन्तमगृह्यत् ततो वै तेभ्यः सुवर्गो लोकः प्राभवद्यत्षोडशी  
गृह्यते सुवर्गस्य लोकस्याभिजित्या इन्द्रो वै देवानामानुजावर आसीत्स  
प्रजापतिमुपाधावत्तस्मा एतं षोडशिनम्प्रायच्छत्तमगृह्णीत् ततो वै सोऽग्रं  
देवतानाम्पर्यैद्यस्यैवं विदुषः षोडशी गृह्यतेऽग्रमेव समानानाम्पर्येति  
प्रातःसवने गृह्णाति वज्रो वै षोडशी वज्रः प्रातःसवनं स्वादेवैनं योनेर्नि  
गृह्णाति सवनेसवनेऽभि गृह्णाति सवनात्सवनादेवैनम्प्र जनयति  
तृतीयसवने पशुकामस्य गृह्णीयाद्वज्रो वै षोडशी पशवस्तृतीयसवनं  
वज्रैरैवास्मै तृतीयसवनात्पशूनव रुद्धे नोक्थ्यै गृह्णीयात्प्रजा वै पशव  
उक्थानि यदुक्थ्यै गृह्णीयात्प्रजाम्पशूनस्य निर्दहे दतिरात्रे पशुकामस्य  
गृह्णीयाद्वज्रो वै षोडशी वज्रैरैवास्मै पशूनवरुध्य  
रात्रियोपरिष्ठाच्छमयत्यर्ष्यग्निष्टोमे राजन्यस्य गृह्णीयाद्व्यावृत्कामो हि  
राजन्यो यजते साह एवास्मै वज्रं गृह्णाति स एनं वज्रो भूत्या इच्छे निर्वा  
दहत्येकविंशं स्तोत्रम्भवति प्रतिष्ठित्यै हरिवच्छस्यत् इन्द्रस्य प्रियं  
धामोपाप्नोति कनीयांसि वै देवेषु च्छन्दांस्यासञ्जयायांस्यसुरेषु ते  
देवाः कनीयसा च्छन्दसा ज्यायश्छन्दोऽभि व्यशंसन्ततो वै तेऽसुराणां

लोकमवृञ्जत यत्कनीयसा च्छन्दसा ज्यायश्छन्दोऽभि विशंसति  
भ्रातृव्यस्यैव तल्लोकं वृङ्क्ते षडक्षराण्यति रेचयन्ति षड्वा ऋतव ऋतूनेव  
प्रीणाति चत्वारि पूर्वाण्यव कल्पयन्ति चतुष्पद एव पशूनव रुद्धे द्वे  
उत्तरे द्विपद एवाव रुद्धे ऽनुष्टुभमभि सम्पादयन्ति वाग्वा  
अनुष्टुभस्मात्प्राणानां वागुत्तमा समयविषिते सूर्ये षोडशिनः  
स्तोत्रमुपाकरोत्येतस्मिन्वै लोक इन्द्रो वृत्रमहन्त्साक्षादेव वज्रभ्रातृव्याय प्र  
हरत्य रुणपिशङ्गोऽश्वो दक्षिणैतद्वै वज्रस्य रूपं समृद्धयै ॥११॥

इति षष्ठकारण्डे षष्ठः प्रपाठकः ६

इति षष्ठं कारण्डं सम्पूर्णम् ६

अथ सप्तमं कारण्डम्

अथ सप्तमकारण्डे प्रथमः प्रपाठकः १

प्रजननं ज्योतिरग्निर्देवतानां ज्योतिर्विराट्छन्दसां ज्योतिर्विराड्वाचोऽग्नौ  
सं तिष्ठते विराजमभि सम्पद्यते तस्मात्तज्ज्योतिरुच्यते द्वौ स्तोमौ  
प्रातःसवनं वहतो यथा प्राणश्चापानश्च द्वौ माध्यंदिनं सवनं यथा चक्षुश्च  
श्रोत्रं च द्वौ तृतीयसवनं यथा वाक्च प्रतिष्ठा च पुरुषसम्मितो वा एष  
यज्ञोऽस्थूरि र्यं कामं कामयते तमेतेनाभ्यश्नुते सर्वं  
ह्यस्थुरिणाभ्यश्नुतेऽग्निष्टोमेन वै प्रजापतिः प्रजा असृजत ता अग्निष्टोमेनैव  
पर्यगृह्णात्तासाम्परिगृहीतानामश्वतरोऽत्यप्रवत तस्यानुहाय रेत् आदत्त  
तद्गर्दभे न्यमार्दतस्माद्गर्दभो द्विरेता अथो आहुर्वडबायां न्यमार्दिति  
तस्माद्दडबा द्विरेता अथो आहुरोषधीषु न्यमार्दिति तस्मादोषधयोऽनभ्यक्ता  
रेभन्त्यथो आहुः प्रजासु न्यमार्दिति तस्माद्यमौ जायेते तस्मादश्वतरो न प्र  
जायत आत्तरेता हि तस्माद्बृह्मिष्यनवक्लृप्तः सर्ववेदसे वा सहस्रे

वावक्लृप्तोऽति ह्यप्रवत् य एवं विद्वानग्निष्टोमेन यजते प्राजाताः प्रजा  
 जनयति परि प्रजाता गृह्णाति तस्मादाहुर्ज्येष्ठयज्ञ इति प्रजापतिर्वाव ज्येष्ठः  
 स ह्येतेनाग्रेऽयजत प्रजापतिरकामयत् प्र जायेयेति स मुखतस्त्रिवृतं  
 निर्मिमीत् तमग्निर्देवतान्वसृज्यत गायत्री छन्दो रथंतरं सामं ब्राह्मणो  
 मनुष्याणामजः पशूनां तस्मात्ते मुख्या मुखतो ह्यसृज्यन्तो रसो  
 ब्राह्म्याम्पञ्चदशं निर्मिमीत् तमिन्द्रो देवतान्वसृज्यत त्रिष्टुप्छन्दो  
 बृहत्सामं राजन्यो मनुष्याणामविः पशूनां तस्मात्ते वीर्यावन्तो  
 वीर्याद्ध्यसृज्यन्त मध्यतः सप्तदशं निर्मिमीत् तं विश्वे देवा देवता  
 अन्वसृज्यन्त जगती छन्दो वैरूपं सामं वैश्यो मनुष्याणां गावः पशूनां  
 तस्मात्त आद्या अन्नधानाद्ध्यसृज्यन्त तस्माद्भूयांसोऽन्येभ्यो भूरिष्टा हि  
 देवता अन्वसृज्यन्त पत्त एकविंशं निर्मिमीत् तमनुष्टुप्छन्दोऽन्वसृज्यत  
 वैराजं सामं शूद्रो मनुष्याणामश्वः पशूनां तस्मात्तौ भूतसंक्रामिणावश्वश्च  
 शूद्रश्च तस्माच्छूद्रो यज्ञेऽनक्लृप्तो न हि देवता अन्वसृज्यत  
 तस्मात्पादावुप जीवतः पत्तो ह्यसृज्येतां प्राणा वै त्रिवृदर्धमासाः पञ्चदशः  
 प्रजापतिः सप्तदशस्त्रय इमे लोका असावादित्य एकविंश एतस्मिन्वा  
 एते श्रिता एतस्मिन्प्रतिष्ठिता य एवंवेदैतस्मिन्नेव श्रयत एतस्मिन्प्रति  
 तिष्ठति ॥१॥

प्रातःसवने वै गायत्रेण छन्दसा त्रिवृते स्तोमाय ज्योतिर्दधदेति त्रिवृता  
 ब्रह्मवर्चसेन पञ्चदशाय ज्योतिर्दधदेति पञ्चदशेनौजसा वीर्येण सप्तदशाय  
 ज्योतिर्दधदेति सप्तदशेन प्राजापत्येन प्रजननेनैकविंशाय ज्योतिर्दधदेति  
 स्तोम एव तत्स्तोमाय ज्योतिर्दधदेत्यथो स्तोम एव स्तोममभि प्र रणयति  
 यावन्तो वै स्तोमास्तावन्तः कामास्तावन्तो लोकास्तावन्ति

ज्योतींष्ये तावत एव स्तोमानेतावतः कामानेतावतो लोकानेतावन्ति  
ज्योतींष्यव रुद्धे ॥२॥

ब्रह्मवादिनो वदन्ति स त्वै यजेत योऽग्निष्टोमेन यजमानोऽथ सर्वस्तोमेन  
यजेतेति यस्य त्रिवृतमन्तर्यन्ति प्राणांस्तस्यान्तर्यन्ति प्राणेषु मेऽप्यसदिति  
खलु वै यज्ञेन यजमानो यजते यस्य पञ्चदशमन्तर्यन्ति वीर्यं तस्यान्तर्यन्ति  
वीर्यं मेऽप्यसदिति खलु वै यज्ञेन यजमानो यजते यस्य सप्तदशमन्तर्यन्ति  
प्रजां तस्यान्तर्यन्ति प्रजायाम्मेऽप्यसदिति खलु वै यज्ञेन यजमानो यजते  
यस्यैकविंशमन्तर्यन्ति प्रतिष्ठां तस्यान्तर्यन्ति प्रतिष्ठायाम्मेऽप्यसदिति  
खलु वै यज्ञेन यजमानो यजते यस्य त्रिणवमन्तर्यन्त्यृतूँश्च तस्य  
नक्षत्रियां च विराजमन्तर्यन्त्यृतुषु मेऽप्यसन्नक्षत्रियायां च विराजीति ।  
खलु वै यज्ञेन यजमानो यजते यस्य त्रयस्त्रिंशमन्तर्यन्ति  
देवतास्तस्यान्तर्यन्ति देवतासु मेऽप्यसदिति खलु वै यज्ञेन यजमानो  
यजते यो वै स्तोमानामवमर्परमतां गच्छन्तं वेदं परमतामेव गच्छति  
त्रिवृद्वै स्तोमानामवमस्त्रिवृत्परमो य एवं वेदं परमतामेव गच्छति ॥३॥

अङ्गिरसो वै सत्रमासत ते सुवर्गं लोकमायन्तेषां हविष्मांश्च  
हविष्कृच्चाहीयेतां तावकामयेतां सुवर्गं लोकमियावेति तावेतं  
द्विरात्रमपश्यतां तमाहरतां तेनायजेतां ततो वै तौऽसुवर्गं लोकमैतां य एवं  
विद्वान्द्विरात्रेण यजते सुवर्गमेव लोकमैति  
तावैताम्पूर्वेणाहागच्छतामुत्तरिणाभिप्लवः पूर्वमहर्भवति गतिरुत्तरं  
ज्योतिष्टोमोऽग्निष्टोमः पूर्वमहर्भवति तेजस्तेनाव रुद्धे सर्वस्तोमोऽतिरात्र  
उत्तरं सर्वस्याप्त्यै सर्वस्यावरुद्ध्यै गायत्रम्पूर्वेहन्त्सामं भवति तेजो वै



गायत्री गायत्री ब्रह्मवर्चसं तेज एव ब्रह्मवर्चसमात्मन्धत्ते त्रैष्टुभमुत्तरं ओजो  
 वै वीर्यं त्रिष्टुगोज एव वीर्यमात्मन्धत्ते रथंतरम्पूर्वेऽहन्त्साम भवतीयं वै  
 रथंतरमस्यामेव प्रति तिष्ठति बृहदुत्तरेऽसौ वै बृहदमुष्यामेव प्रति तिष्ठति  
 तदाहुः क्व जगती चानुष्टुप्चेति वैखानसम्पूर्वेऽहन्त्साम भवति तेन जगत्यै  
 नैति षोडशुत्तरे तेनानुष्टुभोऽथाहुर्यत्समानेऽर्धमासे स्यातामन्यतरस्याहो  
 वीर्यमनु पद्येतेत्यमावास्यायाम्पूर्वमहर्भवत्युत्तरस्मिन्नुत्तरं  
 नानैवार्धमासयोर्भवतो नानावीर्ये भवतो हविष्मन्निधनम्पूर्वमहर्भवति  
 हविष्कृन्निधनमुत्तरं प्रतिष्ठित्यै ॥४॥

आपो वा इदमग्रै सलिलमासीत्तस्मिन्प्रजापतिर्वायुर्भूत्वाचरत्स  
 इमामपश्यत्तां वराहो भूत्वाहरत्तां विश्वकर्मा भूत्वा व्यमार्त्साप्रथत् सा  
 पृथिव्यभवत्तत्पृथिव्यै पृथिवित्वं तस्यामश्राम्यत्प्रजापतिः स देवानसृजत्  
 वसून्नुद्रानादित्यान्ते देवाः प्रजापतिमब्रुवन्प्र जायामहा इति  
 सौऽब्रवीद्यथाहं युष्माँस्तपसासृद्ध्येवं तपसि प्रजननमिच्छध्वमिति  
 तेभ्योऽग्निमायतनम्प्रायच्छदेतेनायतनेन श्राम्यतेति तैऽग्निनायतनेनाश्राम्यन्ते  
 संवत्सर एकां गामसृजन्त तां वसुभ्यो रुद्रेभ्य आदित्येभ्यः प्रायच्छन्नेताँ  
 रक्षध्वमिति तां वसवो रुद्रा आदित्या अरक्षन्त सा वसुभ्यो रुद्रेभ्य  
 आदित्येभ्यः प्राजायत् त्रीणि च शतानि त्रयस्त्रिँशत् चार्थु सैव  
 सहस्रतम्यभवत्ते देवाः प्रजापतिमब्रुवन्त्सहस्रैण नो याजयेति  
 सौऽग्निष्टोमेन वसूनयाजयत्त इमं लोकमजयन्तच्चाददुः स उक्थ्यैन  
 रुद्रानयाजयन्तैऽन्तरिक्षमजयन्तच्चाददुः सौऽतिरात्रेणादित्यानयाजयत्तैऽमुं  
 लोकमजयन्तच्चाददुः स्तदन्तरिक्षं व्यवैर्यत् तस्माद्दुद्रा घातुका अनायतना  
 हि तस्मादाहुः शिथिलं वै मध्यममहस्त्रिरात्रस्य वि हि तद्वैर्यतेति

त्रैष्टुभम्मध्यमस्याह्व आज्यम्भवति संयानानि सूक्तानि शंसति  
 षोडशिनं शंसत्यहो धृत्या अशिथिलम्भावाय तस्मात्त्रिरात्रस्याग्निष्टोम  
 एव प्रथममहः स्यादथोक्थ्योऽथातिरात्र एषां लोकानां विधृत्यै त्रीणित्रीणि  
 शतान्यनूचीनाहमव्यवच्छिन्नानि ददात्येषां लोकानामनु संतत्यै दशतं न  
 विच्छिन्द्याद्विराजं नेद्विच्छिनदानीत्यथ या सहस्रतम्यासीत्तस्यामिन्द्रश्च  
 विष्णुश्च व्यायच्छेतां स इन्द्रोऽमन्यतानया वा इदं विष्णुः सहस्रं वर्धयत  
 इति तस्यामकल्पेतां द्विभागु इन्द्रस्तृतीये विष्णुस्तद्वा एषाभ्यनूच्यत उभा  
 जिग्यथुरिति तां वा एतामच्छावाक एव शंसत्यथ या सहस्रतमी सा  
 होत्रे देयेति होतारं वा अभ्यतिरिच्यते यदतिरिच्यते  
 होतानामस्यापयिताथाहुरुन्नेत्रे देयेत्यतिरिक्ता वा एषा सहस्रस्यातिरिक्त  
 उन्नेतर्त्विजा मथाहुः सर्वेभ्यः सदस्येभ्यो देयेत्यथाहुरुदाकृत्या सा वशं  
 चरेदित्यथाहर्ब्रह्मणै चाग्नीधे च देयेति द्विभागम्ब्रह्मणे तृतीयमग्नीधे ऐन्द्रो  
 वै ब्रह्मा वैष्णवोऽग्नीधथैव तावकल्पेतामित्यथाहुर्या कल्याणी बहुरूपा  
 सा देयेत्यथाहुर्या द्विरूपोभयतएनी सा देयेति सहस्रस्य परिगृहीत्यै  
 तद्वा एतत्सहस्रस्यार्यनं सहस्रं स्तोत्रीयाः सहस्रं दक्षिणाः  
 सहस्रसम्मितः सुवर्गो लोकः सुवर्गस्य लोकस्याभिजित्यै ॥५॥

सोमो वै सहस्रमविन्दुत्तमिन्द्रोऽन्वविन्दुत्तौ यमो न्यागच्छतावब्रवीदस्तु  
 मेऽत्रापीत्यस्तु ही३ इत्यब्रूतां स यम एकस्यां वीर्यम्पर्यपश्यदियं वा  
 अस्य सहस्रस्य वीर्यम्बिभर्तीति तावब्रवीदियम्ममास्त्वेतद्युवयोरिति  
 तावब्रूतां सर्वे वा एतदेतस्यां वीर्यं परि पश्यामोऽश्मा हरामहा इति  
 तस्यामश्माहरन्त तामप्सु प्रावेशयन्त्सोमायोदेहीति सा रोहिणी  
 पिङ्गलैकहायनी रूपं कृत्वा त्रयस्त्रिंशता च त्रिभिश्च शतैः

स॒होदै॒त्तस्मा॒द्रोहि॑ण्या पिङ्ग॒लयैक॑हाय॒न्या सोमं॑ क्रीणीयाद्य ए॒वं  
वि॒द्वान्नो॑हि॒ण्या पिङ्ग॒लयैक॑हाय॒न्या सोमं॑ क्रीणाति त्रयस्त्रिंश॒ता चै॒वास्य॑  
त्रि॒भिश्च॑ श॒तैः सोमः॑ क्री॒तो भ॑वति सुक्री॒तेन॑ यजते॒ ताम॒प्सु  
प्रावै॑शय॒न्निन्द्रा॑योदेहीति॒ सा रोहि॑णी लक्ष्म॒णा प॑ष्ठौही॒ वार्त्र॑घ्नी रू॒पं कृ॒त्वा  
त्रयस्त्रिंश॒ता च॑ त्रि॒भिश्च॑ श॒तैः स॒होदै॒त्तस्मा॒द्रोहि॑णीं लक्ष्म॒णाम्प॑ष्ठौहीं  
वार्त्र॑घ्नीं दद्याद्य ए॒वं वि॒द्वान्नो॑हि॒णीं लक्ष्म॒णाम्प॑ष्ठौहीं वार्त्र॑घ्नीं ददाति  
त्रयस्त्रिंश॒तश्चै॒वास्य॑ त्रीणि॑ च श॒तानि॑ सा द॒त्ता भ॑वति॒ ताम॒प्सु  
प्रावै॑शय॒न्यमा॑योदेहीति॒ सा जर॑ती मूर्खा तज्जघ॒न्या रू॒पं कृ॒त्वा  
त्रयस्त्रिंश॒ता च॑ त्रि॒भिश्च॑ श॒तैः स॒होदै॒त्तस्मा॒ञ्जर॑ती॒म्मूर्खां  
तज्जघ॒न्याम॑नुस्तर॒णीं कु॑र्वीत॒ य ए॒वं वि॒द्वान्नो॑हि॒णीं तज्जघ॒न्याम॑नुस्तर॒णीं  
कुरु॑ते त्रयस्त्रिंश॒तश्चै॒वास्य॑ त्रीणि॑ च श॒तानि॑ सामु॒ष्मिल्लो॒के भ॑वति  
वागे॒व स॑हस्र॒तमी॑ तस्मा॒द्दरो॑ दे॒यः सा हि॑ वरः स॒हस्र॑मस्य॒ सा द॒त्ता  
भ॑वति॒ तस्मा॒द्दरो॑ न प्र॒तिगृ॑ह्यः सा हि॑ वरः स॒हस्र॑मस्य॒ प्रति॑गृहीत॒म्भव॑तीयं  
वर॒ इति॑ ब्रूया॒दथान्या॑म्ब्रूया॒दिय॑म्ममेति॒ तथा॑स्य॒  
तत्स॒हस्र॑म॒प्रति॑गृहीत॒म्भव॑त्यु॒भय॑तए॒नी स्या॑त्तदा॒हर॑न्यतए॒नी  
स्या॑त्स॒हस्र॑म॒पुर॑स्तादे॒तमि॑ति॒ यैव॑ वरः कल्या॒णी रू॒पस॑मृद्धा सा स्या॒त्सा  
हि॑ वरः स॒मृद्ध॑चै॒ तामु॑त्तरे॒णाग्नी॑ध्र॒मपर्या॑णीया॒हव॑नी॒यस्या॑न्तै॒ द्रोण॑क॒लश॑मव  
घ्राप॒ये दा॑ जिघ्र क॒लश॑म्मह्युरु॒धारा॑ प॒र्यस्व॑त्या॒ त्वा वि॑श॒न्त्वि॒न्द॑वः  
समु॒द्रमि॑व सि॒न्धवः॑ सा मा॑ स॒हस्र॑ आ भ॑ज प्र॒जया॑ प॒शुभिः॑ स॒ह पु॑न॒र्मा  
वि॑शता॒द्रयि॑रिति॒ प्र॒जयै॑वैन॒म्पशु॑भी र॒य्या स॑म॒र्धय॑ति  
प्र॒जावा॑न्यशु॒मान्र॑यि॒मान्भ॑वति॒ य ए॒वं वेद॑ तया॑ स॒हाग्नी॑ध्र॒मप्रे॑त्य  
पु॒रस्ता॑त्प्र॒तीच्यां॑ तिष्ठ॒न्त्यां जु॑हया॒ दुभा॑ जि॒ग्यथु॑र्न परा॑ जयेथे॒ न परा॑  
जि॒ग्ये क॑तरश्च॒नैनो॑रिन्द्रश्च॒ विष्णो॑ यद॒पस्पृ॑धेथां त्रे॒धा स॒हस्रं॑ वि

तदैरयेथा॒मिति॑ त्रेधाविभ॒क्तं वै त्रिरा॒त्रे स॒हस्रं॑ साह॒स्त्रीमे॒वैनां॑ करोति  
स॒हस्र॑स्यै॒वैना॒म्मात्रां॑ करोति रू॒पाणि॑ जुहोति रू॒पैरे॒वैना॑ सम॒र्धयति॑ तस्या  
उपो॒त्थाय॑ कर्ण॒मा ज॒पे दिडे॑ रन्तेऽदि॒ते सर॑स्वति प्रिये प्रेय॑सि महि  
विश्रु॒त्येतानि॑ ते अघ्निये॒ नामानि॑ सु॒कृत॑म्मा दे॒वेषु॑ ब्रूतादिति॑ दे॒वेभ्य॑  
ए॒वैन॒मा वे॑दय॒त्यन्वे॑नं दे॒वा बु॑ध्यन्ते ॥६॥

स॒हस्र॑त॒म्या वै यज॑मानः सु॒वर्गं लो॒कमे॑ति सैनं॑ सु॒वर्गं लो॒कं ग॑मयति  
सा मा॑ सु॒वर्गं लो॒कं ग॑मयेत्याह सु॒वर्गमे॒वैनं॑ लो॒कं ग॑मयति सा मा॑  
ज्योति॑ष्मन्तं लो॒कं ग॑मयेत्याह ज्योति॑ष्मन्तमे॒वैनं॑ लो॒कं ग॑मयति सा मा॑  
सर्वा॑न्पु॒रयाँल्लो॒काना॑मयेत्याह सर्वा॑ने॒वैन॒म्पु॒रयाँल्लो॒काना॑मयति सा मा॑  
प्रति॑ष्ठां ग॑मय प्र॒जया॑ प॒शुभिः॑ स॒ह पु॒नर्मा॑ वि॒शता॑द्रुयिरिति॑  
प्र॒जयै॒वैन॑म्प॒शुभी॑ र॒य्याम्प्रति॑ ष्ठापयति प्र॒जावा॑न्प॒शुमा॑त्रयि॒मान्भवति॑ य ए॒वं  
वेद॑ ताम॒ग्नीधै॑ वा ब्र॒ह्मणै॑ वा होत्रे॑ वोद्गात्रे वा॒ध्वर्य॑वे वा दद्यात्स॒हस्र॑मस्य  
सा द॒त्ता भ॑वति स॒हस्र॑मस्य प्रति॑गृहीत॒म्भवति॑ यस्तामवि॒द्वान्प्रति॑गृह्णाति  
ताम्प्रति॑ गृह्णीया॒देका॑सि न स॒हस्र॑मेकां त्वा भू॒ताम्प्रति॑ गृह्णामि न  
स॒हस्र॑मेका मा भू॒ता वि॑श मा स॒हस्र॑मित्ये॒ कामे॒वैना॑म्भू॒ताम्प्रति॑ गृह्णाति  
न स॒हस्रं॑ य ए॒वं वेद॑ स्यो॒नासि॑ सु॒षदा॑ सु॒शेवा॑ स्यो॒ना मा वि॑श सु॒षदा॑  
मा वि॑श सु॒शेवा॑ मा वि॒शेत्या॑ह स्यो॒नैवैनं॑ सु॒षदा॑ सु॒शेवा॑ भू॒त्वावि॑शति  
नैनं॑ हिनस्ति ब्र॒ह्मवा॒दिनो॑ वदन्ति स॒हस्रं॑ स॒हस्र॑त॒म्यन्वे॒ती३  
स॒हस्र॑त॒मीं स॒हस्रा॑३मिति॑ यत्प्राची॑मुत्सृजेत्स॒हस्रं॑  
स॒हस्र॑त॒म्यन्वि॒यात्तत्स॒हस्र॑मप्र॒ज्ञात्रं॑ सु॒वर्गं लो॒कं न प्र  
जा॑नीयात्प्रतीची॑मुत्सृजति तां स॒हस्र॑मनु॒ पर्या॑वर्तते सा प्र॒जान॑ती सु॒वर्गं  
लो॒कमे॑ति यज॑मानम्भ्युत्सृजति क्षिप्रे स॒हस्र॑म्प्र जा॒यत॑ उत्त॒मा नी॒यते॑

प्रथमा देवान्गच्छति ॥७॥

अत्रिरददादौर्वाय प्रजाम्पुत्रकामाय स रिरिचानोऽमन्यत् निर्वीर्यः शिथिलो  
यातयामा स एतं चतूरात्रमपश्यत्तमाहरत्तेनायजत् ततो वै तस्य चत्वारौ  
वीरा आजायन्त सुहोता सूद्राता स्वध्वर्युः सुसंभेयो य एवं  
विद्वाँश्चतूरात्रेण यजत आस्य चत्वारौ वीरा जायन्ते सुहोता सूद्राता  
स्वध्वर्युः सुसंभेयो ये चतुर्विंशः पवमाना ब्रह्मवर्चसं तद्य उद्यन्तः  
स्तोमाः श्रीः सात्रिँश्चद्धादैवं यजमानं चत्वारि वीर्याणि नोपानमन्तेज  
इन्द्रियम्ब्रह्मवर्चसमन्नाद्यँ स

एताँश्चतुरश्वतुष्टोमान्त्सोमानपश्यत्तानाहरत्तैरयजत् तेज एव  
प्रथमेनावारुद्धेन्द्रियं द्वितीयैर्न ब्रह्मवर्चसं तृतीयैर्नान्नाद्यं चतुर्थेन य एवं  
विद्वाँश्चतुरश्वतुष्टोमान्त्सोमानाहरति तैर्यजते तेज एव प्रथमेनाव रुद्ध  
इन्द्रियं द्वितीयैर्न ब्रह्मवर्चसं तृतीयैर्नान्नाद्यं चतुर्थेन  
यामेवात्रिर्द्धिमाध्नोत्तामेव यजमाना ऋध्नोति ॥८॥

जमदग्निः पुष्टिकामश्चतूरात्रेणायजत् स एतान्पोषाँ अपुष्यत्तस्मात्पलितौ  
जामदग्नियौ न सं जानाते एतानेव पोषान्पुष्यति य एवं विद्वाँश्चतूरात्रेण  
यजते पुरोडाशिन्य उप्सदो भवन्ति पशवो वै पुरोडाशः पशूनेवाव  
रुद्धेऽन्नं वै पुरोडाशोऽन्नमेवाव रुद्धेऽन्नादः पशुमान्भवति य एवं  
विद्वाँश्चतूरात्रेण यजते ॥९॥

संवत्सरो वा इदमेक आसीत्सोऽकामयत्तून्त्सृजेयेति स  
एतम्पञ्चरात्रमपश्यत्तमाहरत्तेनायजत् ततो वै स ऋतूनसृजत् य एवं

विद्वान्पञ्चरात्रेण यजते प्रैव जायते त ऋतवः सृष्टा न व्यावर्तन्त त  
 एतम्पञ्चरात्रमपश्यन्तमाहरन्तेनायजन्त ततो वै ते व्यावर्तन्त य एवं  
 विद्वान्पञ्चरात्रेण यजते वि पाप्मना भ्रातृव्येणावर्तते सार्वसेनिः  
 शौचेयोऽकामयत पशुमान्त्स्यामिति स एतम्पञ्चरात्रमाहरत्तेनायजत् ततो वै  
 स सहस्रम्पशूनाप्रोद्य एवं विद्वान्पञ्चरात्रेण यजते प्र सहस्रम्पशूनाप्रोति  
 बब्रुः प्रावाहणिरकामयत वाचः प्रवदिता स्यामिति स  
 एतम्पञ्चरात्रमाहरत्तेनायजत् ततो वै स वाचः प्रवदिताभवद्य एवं  
 विद्वान्पञ्चरात्रेण यजते प्रवदितैव वाचो भवत्यथो एनं  
 वाचस्पतिरित्याहु रनाप्तश्चतूरात्रोऽतिरिक्तः षड्रात्रोऽथ वा एष सम्प्रति यज्ञो  
 यत्पञ्चरात्रो य एवं विद्वान्पञ्चरात्रेण यजते सम्प्रत्यैव यज्ञेन यजते पञ्चरात्रो  
 भवति पञ्च वा ऋतवः संवत्सर ऋतुष्वेव संम्वत्सरे प्रति तिष्ठत्यथो  
 पञ्चाक्षरा पङ्क्तिः पाङ्क्तौ यज्ञो यज्ञमेवाव रुद्धे त्रिवृदग्निष्टोमो भवति तेज  
 एवाव रुद्धे पञ्चदशो भवतीन्द्रियमेवाव रुद्धे सप्तदशो  
 भवत्यन्नाद्यस्यावरुद्ध्या अथो प्रैव तेन जायते पञ्चविंशोऽग्निष्टोमो भवति  
 प्रजापतेराप्त्यै महाव्रतवान्नाद्यस्यावरुद्ध्यै विश्वजित्सर्वपृष्ठोऽतिरात्रो  
 भवति सर्वस्याभिजित्यै ॥१०॥

देवस्य त्वा सवितुः प्रसुवैऽश्विनौर्बाहुभ्याम्पूष्णो हस्ताभ्यामा दंद  
 इमामगृभ्णन्नशनामृतस्य पूर्वं आयुषि विदथेषु कव्या । तया देवाः  
 सुतमा बभूवुर्ऋतस्य सामन्त्सरमारपन्ती ॥ अभिधा असि भुवनमसि  
 यन्तासि धर्तासि सौऽग्निं वैश्वानरं सप्रथसं गच्छ स्वाहाकृतः पृथिव्यां  
 यन्ता राडयन्तासि यमनो धर्तासि धरुणः कृष्यै त्वा क्षेमाय त्वा र्य्यै त्वा  
 पोषाय त्वा पृथिव्यै त्वान्तरिक्षाय त्वा दिवे त्वा सते त्वासते

त्वाद्भ्यस्त्वौषधीभ्यस्त्वा विश्वेभ्यस्त्वा भूतेभ्यः ॥११॥

विभूर्मात्रा प्रभूः पित्राश्चोऽसि हयोऽस्यत्योऽसि नरोऽस्यर्वासि सप्तिरसि  
वाज्यसि वृषासि नृमणा असि ययुर्नामास्यादित्यानाम्पत्वान्विह्य ग्रये  
स्वाहा स्वाहेन्द्राग्निभ्याँ स्वाहा प्रजापतये स्वाहा विश्वेभ्यो देवेभ्यः  
स्वाहा सर्वाभ्यो देवेताभ्य इह धृतिः स्वाहे ह विधृतिः स्वाहे ह रन्तिः  
स्वाहे ह रमतिः स्वाहा भूरसि भुवे त्वा भव्याय त्वा भविष्यते त्वा  
विश्वेभ्यस्त्वा भूतेभ्यो देवा आशापाला एतं देवेभ्योऽश्वमेधाय प्रोक्षितं  
गोपायत ॥१२॥

आर्यनाय स्वाहा प्रायणाय स्वाहो द्वावाय स्वाहो द्द्रुताय स्वाहा  
शूकराय स्वाहा शूकृताय स्वाहा पलायिताय स्वाहापलायिताय  
स्वाहावल्गते स्वाहा परावल्गते स्वाहायते स्वाहा प्रयते स्वाहा सर्वस्मै  
स्वाहा ॥१३॥

अग्रये स्वाहा सोमाय स्वाहा वायवे स्वाहापाम्मोदाय स्वाहा सवित्रे  
स्वाहा सरस्वत्यै स्वाहेन्द्राय स्वाहा बृहस्पतये स्वाहा मित्राय स्वाहा  
वरुणाय स्वाहा सर्वस्मै स्वाहा ॥१४॥

पृथिव्यै स्वाहान्तरिक्षाय स्वाहा दिवे स्वाहा सूर्याय स्वाहा चन्द्रमसे  
स्वाहा नक्षत्रेभ्यः स्वाहा प्राच्यै दिशे स्वाहा दक्षिणायै दिशे स्वाहा  
प्रतीच्यै दिशे स्वाहो दीच्यै दिशे स्वाहो ध्वार्यै दिशे स्वाहा दिग्भ्यः  
स्वाहावान्तरदिशाभ्यः स्वाहा समाभ्यः स्वाहा शरद्भ्यः स्वाहाहोरात्रेभ्यः

स्वाहार्धमासेभ्यः स्वाहा मासेभ्यः स्वाहर्तुभ्यः स्वाहा संवत्सुराय  
स्वाहा सर्वस्मै स्वाहा ॥१५॥

अग्रये स्वाहा सोमाय स्वाहा सवित्रे स्वाहा सरस्वत्यै स्वाहा पूष्णे  
स्वाहा बृहस्पतये स्वाहापाम्मोदाय स्वाहा वायवे स्वाहा मित्राय स्वाहा  
वरुणाय स्वाहा सर्वस्मै स्वाहा ॥१६॥

पृथिव्यै स्वाहान्तरिक्षाय स्वाहा दिवे स्वाहाग्रये स्वाहा सोमाय स्वाहा  
सूर्याय स्वाहा चन्द्रमसे स्वाहाह्वे स्वाहा रात्रियै स्वाहर्जवे स्वाहा साधवे  
स्वाहा सुक्षित्यै स्वाहा क्षुधे स्वाहाशितिमे स्वाहा रोगाय स्वाहा हिमाय  
स्वाहा शीताय स्वाहातपाय स्वाहारण्याय स्वाहा सुवर्गाय स्वाहा  
लोकाय स्वाहा सर्वस्मै स्वाहा ॥१७॥

भुवो देवानां कर्मणापसृतस्य पृथ्यासि वसुभिर्देवेभिर्देवतया गायत्रेण त्वा  
छन्दसा युनज्मि वसन्तेन त्वर्तुना हविषा दीक्षयामि रुद्रेभिर्देवेभिर्देवतया  
त्रैष्टुभेन त्वा छन्दसा युनज्मि ग्रीष्मेण त्वर्तुना हविषा  
दीक्षयाम्या दित्येभिर्देवेभिर्देवतया जागतेन त्वा छन्दसा युनज्मि  
वृषाभित्वर्तुना हविषा दीक्षयामि विश्वेभिर्देवेभिर्देवतयानुष्टुभेन त्वा  
छन्दसा युनज्मि शरदा त्वर्तुना हविषा दीक्षयाम्यङ्गिरोभिर्देवेभिर्देवतया  
पाङ्केन त्वा छन्दसा युनज्मि हेमन्तशिशिराभ्यां त्वर्तुना हविषा  
दीक्षयाम्याहं दीक्षामरुहमृतस्य पत्नीं गायत्रेण छन्दसा ब्रह्मणा चर्तं  
सत्यैऽधाँ सत्यमृतैऽधाम् ॥

महीमू षु सुत्रामाणमिह धृतिः स्वाहे ह विधृतिः स्वाहे ह रन्तिः



स्वाहे ह रमतिः स्वाहा ॥१८॥

ईकाराय स्वाहे कृताय स्वाहा क्रन्दते स्वाहावक्रन्दते स्वाहा प्रोथते  
 स्वाहा प्रोथते स्वाहा गन्धाय स्वाहा घ्राताय स्वाहा प्राणाय स्वाहा  
 व्यानाय स्वाहापानाय स्वाहा संदीयमानाय स्वाहा संदिताय स्वाहा  
 विचृत्यमानाय स्वाहा विचृत्ताय स्वाहा पलायिष्यमाणाय स्वाहा  
 पलायिताय स्वाहो परस्यते स्वाहो परताय स्वाहा निवेद्यते स्वाहा  
 निविशमानाय स्वाहा निविष्टाय स्वाहा निषत्स्यते स्वाहा निषीदते  
 स्वाहा निषण्णाय स्वाहासिष्यते स्वाहासीनाय स्वाहासिताय स्वाहा  
 निपत्स्यते स्वाहा निपद्यमानाय स्वाहा निपन्नाय स्वाहा शयिष्यते स्वाहा  
 शयानाय स्वाहा शयिताय स्वाहा सम्मीलिष्यते स्वाहा सम्मीलते  
 स्वाहा सम्मीलिताय स्वाहा स्वप्स्यते स्वाहा स्वपते स्वाहा सुप्ताय  
 स्वाहा प्रभोत्स्यते स्वाहा प्रबुध्यमानाय स्वाहा प्रबुद्धाय स्वाहा  
 जागरिष्यते स्वाहा जाग्रते स्वाहा जागरिताय स्वाहा शुश्रूषमाणाय  
 स्वाहा शृण्वते स्वाहा श्रुताय स्वाहा वीक्षिष्यते स्वाहावीक्षमाणाय  
 स्वाहा वीक्षिताय स्वाहा सहास्यते स्वाहा संजिहानाय  
 स्वाहो जिहानाय स्वाहा विवत्स्यते स्वाहा विवर्तमानाय स्वाहा  
 विवृत्ताय स्वाहो त्थास्यते स्वाहो तिष्ठते स्वाहो त्थिताय स्वाहा  
 विधविष्यते स्वाहा विधून्वानाय स्वाहा विधूताय स्वाहो त्क्रस्यते  
 स्वाहो त्क्रामते स्वाहो त्क्रान्ताय स्वाहा चंक्रमिष्यते स्वाहा  
 चंक्रम्यमाणाय स्वाहा चंक्रमिताय स्वाहा कण्डूयिष्यते स्वाहा  
 कण्डूयमानाय स्वाहा कण्डूयिताय स्वाहा निकषिष्यते स्वाहा  
 निकर्षमाणाय स्वाहा निकर्षिताय स्वाहा यदत्ति तस्मै स्वाहा यत्पिबति

तस्मै स्वाहा यन्मेहति तस्मै स्वाहा यच्छकृत्करोति तस्मै स्वाहा रेतसे  
स्वाहा प्रजाभ्यः स्वाहा प्रजननाय स्वाहा सर्वस्मै स्वाहा ॥१६॥

अग्रये स्वाहा वायवे स्वाहा सूर्याय स्वाहा तमस्यृतस्यर्तमसि सत्यमसि  
सत्यस्य सत्यमयु तस्य पन्था असि देवानां छायामृतस्य नाम तत्सत्यं  
यत्त्वम्प्रजापतिरस्य धि यदस्मिन्वाजिनीव शुभः स्पर्धन्ते दिवः सूर्येण  
विशोऽपो वृणानः पवते कव्यन्पशुं न गोपा इर्यः परिज्मा ॥२०॥

इति सप्तमकारण्डे प्रथमः प्रपाठकः १

अथ सप्तमकारण्डे द्वितीयः प्रपाठकः २

साध्या वै देवाः सुवर्गकामा एतँ षड्रात्रमपश्यन्तमाहर्न्तेनायजन्त ततो  
वै ते सुवर्ग लोकमायन्त्य एवं विद्वाँसः षड्रात्रमासते सुवर्गमेव लोकं  
यन्ति देवसुत्रं वै षड्रात्रः प्रत्यक्षँ ह्यैतानि पृष्ठानि य एवं विद्वाँसः  
षड्रात्रमासते साक्षादेव देवता अभ्यारोहन्ति षड्रात्रो भवति षड्वा ऋतवः  
षाट्पृष्ठानि पृष्ठैरेवतूनन्वारोहन्त्युतुभिः संवत्सरं ते संवत्सर एव प्रति  
तिष्ठन्ति बृहद्रथंतराभ्यां यन्तीयं वाव रथंतरमसौ बृहदाभ्यामेव यन्त्यथो  
अनयोरेव प्रति तिष्ठन्त्येते वै यज्ञस्याञ्जसायनी स्नुती ताभ्यामेव सुवर्ग  
लोकं यन्ति त्रिवृदग्निष्टोमो भवति तेज एवाव रुन्धते पञ्चदशो  
भवतीन्द्रयमेवाव रुन्धते सप्तदशो भवत्यन्नाद्यस्यावरुद्ध्या अथो प्रैव तेन  
जायन्त एकविँशो भवति प्रतिष्ठित्या अथो रुचमेवात्मन्दधते त्रिणवो  
भवति विजित्यै त्रयस्त्रिँशो भवति प्रतिष्ठित्यै सदोहविर्धानिन एतेन  
षड्रात्रेण यजेरन्नाश्वत्थी हविर्धानं चाग्नीध्रं च भवतस्तद्धि सुवर्ग्यं  
चक्रीवती भवतः सुवर्गस्य लोकस्य समष्ट्या उलूखलबुध्नो यूपो भवति

प्रतिष्ठित्यै प्राञ्चौ यान्ति प्राडिव हि सुवर्गो लोकः सरस्वत्या यान्त्येष वै  
 देवयानः पन्थास्तमेवान्वारौहन्त्या क्रोशन्तो  
 यान्त्यवर्तिमेवान्यस्मिन्प्रतिषज्य प्रतिष्ठां गच्छन्ति यदा दशं शतं  
 कुर्वन्त्यथैकमुत्थानं॑ शतायुः पुरुषः शतेन्द्रिय आयुष्येवेन्द्रिये प्रति  
 तिष्ठन्ति यदा शतं॑ सहस्रं कुर्वन्त्यथैकमुत्थानं॑ सहस्रसम्मितो वा  
 असौ लोकोऽमुमेव लोकमभि जयन्ति यदैषाम्प्रमीयेत यदा वा  
 जीयेरन्नथैकमुत्थानं तद्धि तीर्थम् ॥१॥

कुसुरुबिन्दु औद्दालकिरकामयत पशुमान्तस्यामिति स एतं॑  
 सप्तरात्रमाहरत्तेनायजत् तेन वै स यावन्तो ग्राम्याः पशवस्तानवारुद्धु य  
 एवं विद्वान्तसप्तरात्रेण यजते यावन्त एव ग्राम्याः पशवस्तानेवारुद्धे  
 सप्तरात्रो भवति सप्त ग्राम्याः पशवः सप्तारण्याः सप्त  
 च्छन्दां॑स्युभयस्यावरुद्धयै त्रिवृदग्निष्टोमो भवति तेज एवारु र्नुद्धे  
 पञ्चदशो भवतीन्द्रियमेवारु र्नुद्धे सप्तदशो भवत्यन्नाद्यस्यावरुद्धया अथो  
 प्रैव तेन जायत एकविंशो भवति प्रतिष्ठित्या अथो रुचमेवात्मन्धत्ते  
 त्रिणवो भवति विजित्यै पञ्चविंशोऽग्निष्टोमो भवति प्रजापतेराप्त्यै  
 महाव्रतवानन्नाद्यस्यावरुद्धयै विश्वजित्सर्वपृष्ठोऽतिरात्रो भवति  
 सर्वस्याभिजित्यै यत्प्रत्यक्षम्पूर्वेष्वहःसु पृष्ठान्युपेयुः प्रत्यक्षं विश्वजिति  
 यथा दुग्धामुपसीदत्येवमुत्तममहः स्यान्नैकरात्रश्चन स्याद्बृहद्रथन्तरे  
 पूर्वेष्वहःसूप यन्तीयं वाव रथन्तरमसौ बृहदाभ्यामेव न यन्त्यथो  
 अनयोरेव प्रति तिष्ठन्ति यत्प्रत्यक्षं विश्वजिति पृष्ठान्युपयन्ति यथा प्रतां  
 दुहे तादृगेव तत् ॥२॥

बृहस्पतिरकामयत ब्रह्मवर्चसी स्यामिति स  
एतमष्टरात्रमपश्यत्तमाहरत्तेनायजत् ततो वै स ब्रह्मवर्चस्यभवद्य एव  
विद्वानष्टरात्रेण यजते ब्रह्मवर्चस्यैव भवत्यष्टरात्रो भवत्यष्टाक्षरा गायत्री  
गायत्री ब्रह्मवर्चसं गायत्रियैव ब्रह्मवर्चसमव रुद्धेऽष्टरात्रो भवति चतस्रो  
वै दिशश्चतस्रोऽवान्तरदिशा दिग्भ्य एव ब्रह्मवर्चसमव रुद्धे  
त्रिवृदग्निष्टोमो भवति तेज एवाव रुद्धे पञ्चदशो भवतीन्द्रियमेवाव रुद्धे  
सप्तदशो भवत्यन्नाद्यस्यावरुद्ध्या अथो प्रैव तेन जायत एकविंशो  
भवति प्रतिष्ठित्या अथो रुचमेवात्मन्धत्ते त्रिणवो भवति विजित्यै  
त्रयस्त्रिंशो भवति प्रतिष्ठित्यै पञ्चविंशोऽग्निष्टोमो भवति प्रजापतेराप्त्यै  
महाव्रतवान्नाद्यस्यावरुद्ध्यै विश्वजित्सर्वपृष्ठोऽतिरात्रो भवति  
सर्वस्याभिजित्यै ॥३॥

प्रजापतिः प्रजा असृजत् ताः सृष्टाः क्षुधं न्यायन्त्स एतं  
नवरात्रमपश्यत्तमाहरत्तेनायजत् ततो वै प्रजाभ्योऽकल्पत् यर्हि प्रजाः क्षुधं  
निगच्छेयुस्तर्हि नवरात्रेण यजेतेमे हि वा एतासां लोका अक्लृप्ता अथैताः  
क्षुधं नि गच्छन्तीमानेवाभ्यो लोकान्कल्पयति तान्कल्पमानान्प्रजाभ्योऽनु  
कल्पते कल्पन्तेऽस्मा इमे लोका ऊर्जम्प्रजासु दधाति त्रिरात्रेणैवेमं लोकं  
कल्पयति त्रिरात्रेणान्तरिक्षं त्रिरात्रेणामुं लोकं यथा गुणे  
गुणमन्वस्यत्येवमेव तल्लोके लोकमन्वस्यति धृत्या अशिथिलम्भावाय  
ज्योतिर्गौरायुरिति ज्ञाता स्तोमा भवन्तीयं वाव ज्योतिरन्तरिक्षं  
गौरसावायुरेष्वैव लोकेषु प्रति तिष्ठन्ति ज्ञात्रं प्रजानां गच्छति नवरात्रो  
भवत्यभिपूर्वमेवास्मिन्तेजो दधाति यो ज्योगामयावी स्यात्स नवरात्रेण  
यजेत प्राणा हि वा एतस्याधृता अथैतस्य ज्योगामयति

प्राणानेवास्मिन्दाधारोत यदीतासुर्भवति जीवत्येव ॥४॥

प्रजापतिरकामयत् प्र जायेयेति स एतं दशहोतारमपश्यत्तमजुहोत्तेन  
दशरात्रमसृजत् तेन दशरात्रेण प्राजायत दशरात्राय दीक्षिष्यमाणो  
दशहोतारं जुहुयाद्दशहोत्रैव दशरात्रं सृजते तेन दशरात्रेण प्र जायते  
वैराजो वा एष यज्ञो यद्दशरात्रो य एवं विद्वान्दशरात्रेण यजते विराजमेव  
गच्छति प्राजापत्यो वा एष यज्ञो यद्दशरात्रो य एवं विद्वान्दशरात्रेण यजते  
प्रेव जायत इन्द्रो वै सदृइदेवताभिरासीत्स न व्यावृत्तमगच्छत्स  
प्रजापतिमुपाधावृत्तस्मा एतं दशरात्रम्प्रायच्छत्तमाहरत्तेनायजत् ततो वै  
सौऽन्याभिर्देवताभिव्यावृत्तमगच्छच्च एवं विद्वान्दशरात्रेण यजते  
व्यावृत्तमेव पाप्मना भ्रातृव्येण गच्छति त्रिकुक्कुद्वा एष यज्ञो यद्दशरात्रः  
कुकुत्पञ्चदशः कुकुदैकविंशः कुकुत्रयस्त्रिंशो य एवं विद्वान्दशरात्रेण  
यजते त्रिकुकुदेव समानानाम्भवति यजमानः पञ्चदशो यजमान  
एकविंशो यजमानस्त्रयस्त्रिंशः पुर इतरा अभिचर्यमाणो दशरात्रेण  
यजेत देवपुरा एव पर्यहते तस्य न कुतश्चनोपाव्याधो भवति  
नैनमभिचरन्तस्तृणुते देवासुराः संयत्ता आसन्ते देवा एताः देवपुरा  
अपश्यन् यद्दशरात्रस्ताः पर्यहन्त तेषां न कुतश्चनोपाव्याधोऽभवत्ततो देवा  
अभवन्परासुरा यो भ्रातृव्यवान्त्स्यात्स दशरात्रेण यजेत देवपुरा एव  
पर्यहते तस्य न कुतश्चनोपाव्याधो भवति भवत्यात्मना परास्य भ्रातृव्यो  
भवति स्तोम स्तोमस्योपस्तिर्भवति भ्रातृव्यमेवोपस्तिं कुरुते जामि वा  
एतत्कुर्वन्ति यज्ञचार्यांसं स्तोममुपेत्य कनीयांसमुपयन्ति  
यद्गिष्टोमसामान्यवस्ताञ्च परस्ताञ्च भवन्त्यजामित्वाय  
त्रिवृद्गिष्टोमोऽग्निष्टुदाग्नेयीषु भवति तेज एवाव रुद्धे पञ्चदश उक्थ्य

ऐन्द्रीष्विन्द्रियमेवाव रुद्धे त्रिवृदग्निष्टोमो वैश्वदेवीषु पुष्टिमेवाव रुद्धे  
सप्तदशौऽग्निष्टोमः प्राजापत्यासु तीव्रसोमोऽन्नाद्यस्यावरुद्ध्या अथो प्रैव  
तेन जायत एकविंश उक्थ्यः सौरीषु प्रतिष्ठित्या अथो रुचमेवात्मन्धत्ते  
सप्तदशौऽग्निष्टोमः प्राजापत्यासूपहव्य उपहवमेव गच्छति  
त्रिणवारवग्निष्टोमावभित ऐन्द्रीषु विजित्यै त्रयस्त्रिंश उक्थ्यो वैश्वदेवीषु  
प्रतिष्ठित्यै विश्वजित्सर्वपृष्ठोऽतिरात्रो भवति सर्वस्याभिजित्यै ॥५॥

ऋतवो वै प्रजाकामाः प्रजां नाविन्दन्त तेऽकामयन्त प्रजां सृजेमहि  
प्रजामव रुन्धीमहि प्रजां विन्देमहि प्रजावन्तः स्यामेति त  
एतमैकादशरात्रमपश्यन्तमाहरन्तेनायजन्त ततो वै ते प्रजामसृजन्त  
प्रजामवारुन्धत प्रजामविन्दन्त प्रजावन्तोऽभवन्त  
ऋतवोऽभवन्तदार्तवानामार्तवत्वमृतूनां वा एते पुत्रास्तस्मादार्तवा उच्यन्ते  
य एवं विद्वांस एकादशरात्रमासते प्रजामेव सृजन्ते प्रजामव रुन्धते  
प्रजां विन्दन्ते प्रजावन्तो भवन्ति ज्योतिरतिरात्रो भवति ज्योतिरेव  
पुरस्ताद्दधते सुवर्गस्य लोकस्यानुख्यात्यै पृष्ठयः षडहो भवति षड्वा  
ऋतवः षट्पृष्ठानि पृष्ठैरेवतूनन्वारौहन्त्यृतुभिः संवत्सरं ते संवत्सर एव  
प्रति तिष्ठन्ति चतुर्विंशो भवति चतुर्विंशत्यक्षरा गायत्री  
गायत्रम्ब्रह्मवर्चसं गायत्रियामेव ब्रह्मवर्चसे प्रति तिष्ठन्ति चतुश्चत्वारिंशो  
भवति चतुश्चत्वारिंशदक्षरा त्रिष्टुगिन्द्रियं त्रिष्टुत्रिष्टुभ्येवेन्द्रिये प्रति  
तिष्ठन्त्यष्टाचत्वारिंशो भवत्यष्टाचत्वारिंशदक्षरा जगती जागताः  
पशवो जगत्यामेव पशुषु प्रति तिष्ठन्त्येकादशरात्रो भवति पञ्च वा  
ऋतव आर्तवाः पञ्चतुष्वेवार्तवेषु संवत्सरे प्रतिष्ठाय प्रजामव  
रुन्धतेऽतिरात्रावभितो भवतः प्रजायै परिगृहीत्यै ॥६॥

ऐन्द्रवायवाग्रान्गृहीयाद्यः कामयैत यथापूर्वम्प्रजाः कल्पेरन्निति यज्ञस्य वै  
क्लृप्तिमनु प्रजाः कल्पन्ते यज्ञस्याक्लृप्तिमनु न कल्पन्ते यथापूर्वमेव प्रजाः  
कल्पयति न ज्यायाँसं कनीयानति

क्रामत्यैन्द्रवायवाग्रान्गृहीयादामयाविनः प्राणेन वा एष व्यृध्यते  
यस्यामयति प्राण ऐन्द्रवायवः प्राणेनैवैनँ समर्धयति

मैत्रावरुणाग्रान्गृहीरन्वेषां दीक्षितानाम्प्रमीयैत प्राणापानाभ्यां वा एते  
व्यृध्यन्ते येषां दीक्षितानाम्प्रमीयते प्राणापानौ मित्रावरुणौ प्राणापानावेव  
मुखतः परि हरन्त आश्विनाग्रान्गृहीतानुजावरोश्विनौ वै देवानामानुजावरौ  
पश्चेवाग्रम्पयैतामश्विनावेतस्य देवता य आनुजावरस्तावेवैनमग्रम्परि  
णयतः शुक्राग्रान्गृहीत गतश्रीः प्रतिष्ठाकामोऽसौ वा आदित्यः शुक्र  
एषोऽन्तोऽन्तम्मनुष्यः श्रियै गत्वा नि वर्ततेऽन्तादेवान्तमा रभते न ततः  
पापीयान्भवति मन्थ्यग्रान्गृहीताभिचरन्नार्तपात्रं वा एतद्यन्मन्थिपात्रं  
मृत्युनैवैनं ग्राहयति ताजगार्तिमाच्छत्या ग्रयणाग्रान्गृहीत यस्य पिता  
पितामहः पुण्यः स्यादथ तन्न प्राप्नुयाद्वाचा वा एष इन्द्रियेण व्यृध्यते यस्य  
पिता पितामहः पुण्यो भवत्यथ तन्न प्राप्नोत्युर इवैतद्यज्ञस्य वागिव  
यदाग्रयणो वाचैवैनमिन्द्रियेण समर्धयति न ततः

पापीयान्भवत्युक्थ्याग्रान्गृहीताभिचर्यमाणः सर्वेषां वा  
एतत्पात्राणामिन्द्रियं यदुक्थ्यपात्रँ सर्वैशैवैनमिन्द्रियेणाति प्र युङ्क्ते  
सरस्वत्यभि नौ नेषि वस्य इति पुरोरुचं कुर्याद्वाग्वै सरस्वती  
वाचैवैनमति प्र युङ्क्ते मा त्वत्क्षेत्राण्यरणानि गन्मेत्याह मृत्योर्वै  
क्षेत्राण्यरणानि तेनैव मृत्योः क्षेत्राणि न गच्छति

पूर्णान्ग्रहान्गृहीयादामयाविनः प्राणान्वा एतस्य शुगृच्छति यस्यामयति

प्राणा ग्रहाः प्राणानेवास्य शुचो मुञ्चत्युत यदीतासुर्भवति जीवत्येव  
पूर्णान्ग्रहान्गृहीयाद्यर्हि पर्जन्यो न वर्षेत्प्राणान्वा एतर्हिप्रजानाँ शुगृच्छति  
यर्हि पर्जन्यो न वर्षति प्राणा ग्रहाः प्राणानेव प्रजानाँ शुचो मुञ्चति  
ताजकप्र वर्षति ॥७॥

गायत्रो वा ऐन्द्रवायवो गायत्रम्प्रायणीयमहस्तस्मात्प्रायणीयेऽहन्नैन्द्रवायवो  
गृह्यते स्व एवैनमायतने गृह्णाति त्रैष्टुभो वै शुक्रस्त्रैष्टुभं  
द्वितीयमहस्तस्माद्द्वितीयेऽहञ्छुक्रो गृह्यते स्व एवैनमायतने गृह्णाति  
जागतो वा आग्रयणो जागतं तृतीयमहस्तस्मात्तृतीयेऽहन्नाग्रयणो गृह्यते  
स्व एवैनमायतने गृह्णात्ये तद्वै यज्ञमापद्यच्छन्दाँ स्याप्रोति यदाग्रयणः श्वो  
गृह्यते यत्रैव यज्ञमदृशन्तत एवैनम्पुनः प्र युङ्क्ते जगन्मुखो वै  
द्वितीयस्त्रिरात्रो जागत आग्रयणो यच्चतुर्थेऽहन्नाग्रयणो गृह्यते स्व  
एवैनमायतने गृह्णात्यथो स्वमेव च्छन्दोऽनु पर्यावर्तन्ते राथंतरो वा  
ऐन्द्रवायवो राथंतरम्पञ्चममहस्तस्मात्पञ्चमेऽहन्नैन्द्रवायवो गृह्यते स्व  
एवैनमायतने गृह्णाति बार्हतो वै शुक्रो बार्हतँ  
षष्ठमहस्तस्मात्षष्ठेऽहञ्छुक्रो गृह्यते स्व एवैनमायतने गृह्णात्ये तद्वै द्वितीयं  
यज्ञमापद्यच्छन्दाँ स्याप्रोति यच्छुक्रः श्वो गृह्यते यत्रैव यज्ञमदृशन्तत  
एवैनम्पुनः प्र युङ्क्ते त्रिष्टुङ्मुखो वै तृतीयस्त्रिरात्रस्त्रैष्टुभः शुक्रो  
यत्सप्तमेऽहञ्छुक्रो गृह्यते स्व एवैनमायतने गृह्णात्यथो स्वमेव च्छन्दोऽनु  
पर्यावर्तन्ते वाग्वा आग्रयणो वागष्टममहस्तस्मादष्टमेऽहन्नाग्रयणो गृह्यते  
स्व एवैनमायतने गृह्णाति प्राणो वा ऐन्द्रवायवः प्राणो  
नवममहस्तस्मान्नवमेऽहन्नैन्द्रवायवो गृह्यते स्व एवैनमायतने गृह्णात्ये तद्वै  
तृतीयं यज्ञमापद्यच्छन्दाँ स्याप्रोति यदैन्द्रवायवः श्वो गृह्यते यत्रैव



यज्ञमदृशन्तत एवैनम्पुनः प्र युङ्क्तेऽथो स्वमेव च्छन्दोऽनुं पर्यावर्तन्ते पथो  
वा एतेऽध्यपथेन यन्ति येऽन्येनैन्द्रवायवात्प्रतिपद्यन्तेऽन्तः खलु वा एष  
यज्ञस्य यदशममहर्दशमेऽहन्नैन्द्रवायवो गृह्यते यज्ञस्यैवान्तं  
गत्वापथात्पन्थामपि यन्त्यथो यथा वहीयसा प्रतिसारं वहन्ति तादृगेव  
त च्छन्दाँस्यन्योऽन्यस्य लोकमभ्यध्यायन्तान्येतेनैव देवा  
व्यवाहय नैन्द्रवायवस्य वा एतदायतनं यच्चतुर्थमहस्तस्मिन्नाग्रयणो  
गृह्यते तस्मादाग्रयणस्यायतने नवमेऽहन्नैन्द्रवायवो गृह्यते शुक्रस्य वा  
एतदायतनं यत्पञ्चममहस्तस्मिन्नैन्द्रवायवो गृह्यते तस्मादैन्द्रवायवस्यायतने  
सप्तमेऽहञ्छुक्रो गृह्यत आग्रयणस्य वा एतदायतनं यत्षष्ठमहस्तस्मिञ्छुक्रो  
गृह्यते तस्माच्छुक्रस्यायतनेऽष्टमेऽहन्नाग्रयणो गृह्यते छन्दाँस्येव तद्वि  
वाहयति प्र वस्यसो विवाहमाप्नोति य एवं वेदार्थो देवताभ्य एव यज्ञे  
संविदं दधाति तस्मादिदमन्योऽन्यस्मै दधाति ॥८॥

प्रजापतिरकामयत् प्र जायेयेति स एतं द्वादशरात्रमपश्यत्तमाहरत्तेनायजत्  
ततो वै स प्राजायत् यः कामयेत् प्र जायेयेति स द्वादशरात्रेण यजेत् प्रैव  
जायते ब्रह्मवादिनो वदन्त्यग्निष्टोमप्रायणा यज्ञा अथ कस्मादतिरात्रः पूर्वः  
प्र युज्यत् इति चक्षुषी वा एते यज्ञस्य यदतिरात्रौ कनीनिके अग्निष्टोमौ  
यदग्निष्टोमं पूर्वम्प्रयुञ्जीरन्बहिर्धा कनीनिके दध्युस्तस्मादतिरात्रः पूर्वः प्र  
युज्यते चक्षुषी एव यज्ञे धित्वा मध्यतः कनीनिके प्रति दधति यो वै  
गायत्रीं ज्योतिःपक्षां वेद ज्योतिषा भासा सुवर्गं लोकमेति यावग्निष्टोमौ  
तौ पक्षौ येऽन्तरेऽष्टावुक्थ्याः स आत्मैषा वै गायत्री ज्योतिःपक्षा य एवं  
वेद ज्योतिषा भासा सुवर्गं लोकमेति प्रजापतिर्वा एष द्वादशधा विहितो  
यद्द्वादशरात्रो यावतिरात्रौ तौ पक्षौ येऽन्तरेऽष्टावुक्थ्याः स आत्मा

प्रजापतिर्वावैष सन्त्सद्ध वै सत्त्रेण स्पृणोति प्राणा वै सत्प्राणानेव  
स्पृणोति सर्वासं वा एते प्रजानाम्प्राणैरासते ये सत्त्रमासते तस्मात्पृच्छन्ति  
किमेते सत्त्रिण इति प्रियः प्रजानामुत्थितो भवति य एवं वेद ॥६॥

न वा एषोऽन्यतो वैश्वानरः सुवर्गाय लोकाय प्राभदूर्ध्वो ह वा एष आतत  
आसीत्ते देवा एतं वैश्वानरम्पर्यौहन्त्सुवर्गस्य लोकस्य प्र भूत्या ऋतवो वा  
एतेन प्रजापतिमयाजयन्तेष्वार्धोदधि तदृधोति ह वा ऋत्विक्षु य एवं  
विद्वान्द्वादशाहेन यजेते तैऽस्मिन्नेचछन्त स रसमहं वसन्ताय  
प्रायचच्छद्यं ग्रीष्मायौषधीर्वर्षाभ्यो व्रीहीञ्छरदै माषतिलौ  
हैमन्तशिशिराभ्यां तेनेन्द्रमप्रजापतिरयाजयत्ततो वा इन्द्र  
इन्द्रोऽभवत्तस्मादाहुरानुजावरस्य यज्ञ इति स ह्येतेनाग्रेऽयजतै ष ह वै  
कुणपमत्ति यः सत्त्रे प्रतिगृह्णाति पुरुषकुणपमश्वकुणपं गौर्वा अन्नं येन  
पात्रेणान्मिभ्रति यत्तन्न निर्णेनिजति ततोऽधि मलं जायत एक एव  
यजेतैको हि प्रजापतिराधोद्वादश रात्रीर्दीक्षितः स्याद्द्वादश मासाः  
संवत्सरः संवत्सरः प्रजापतिः प्रजापतिर्वावैष एष ह त्वै जायते  
यस्तपसोऽधि जायते चतुर्धा वा एतास्तिस्त्रस्तिस्त्रो रात्रयो  
यद्द्वादशोऽपसदो याः प्रथमा यज्ञं ताभिः सम्भरति या द्वितीया यज्ञं  
ताभिरा रभते यास्तृतीयाः पात्राणि ताभिर्निर्णेनित्ते याश्चतुर्थीरपि  
ताभिरात्मानमन्तरतः शुन्धते यो वा अस्य पशुमत्ति माँसँ सोऽत्ति यः  
पुरोडाशम्पिष्कँ स यः परिव्रापम्पुरीषँ स य आज्यम्प्राप्नोँ स  
यःसोमँ स्वेदँ सोऽपि ह वा अस्य शीर्षरया निष्पदः प्रति गृह्णाति यो  
द्वादशाहे प्रतिगृह्णाति तस्माद्द्वादशाहेन न याज्यम्प्राप्नो व्यावृत्तै

॥ १० ॥

एकस्मै स्वाहा द्वाभ्याँ स्वाहा त्रिभ्यः स्वाहा चतुर्भ्यः स्वाहा पञ्चभ्यः  
 स्वाहा षड्भ्यः स्वाहा सप्तभ्यः स्वाहाष्टाभ्यः स्वाहा नवभ्यः स्वाहा  
 दशभ्यः स्वाहै कादशभ्यः स्वाहा द्वादशभ्यः स्वाहा त्रयोदशभ्यः स्वाहा  
 चतुर्दशभ्यः स्वाहा पञ्चदशभ्यः स्वाहा षोडशभ्यः स्वाहा सप्तदशभ्यः  
 स्वाहाष्टादशभ्यः स्वाहै कान्न विँशत्यै स्वाहा नवविँशत्यै  
 स्वाहै कान्न चत्वारिँशते स्वाहा नवचत्वारिँशते स्वाहै कान्न षष्ट्यै  
 स्वाहा नवषष्ट्यै स्वाहै कान्नाशीत्यै स्वाहा नवाशीत्यै स्वाहै कान्न  
 शताय स्वाहा शताय स्वाहा द्वाभ्याँ शताभ्याँ स्वाहा सर्वस्मै स्वाहा  
 ॥११॥

एकस्मै स्वाहा त्रिभ्यः स्वाहा पञ्चभ्यः स्वाहा सप्तभ्यः स्वाहा नवभ्यः  
 स्वाहै कादशभ्यः स्वाहा त्रयोदशभ्यः स्वाहा पञ्चदशभ्यः स्वाहा  
 सप्तदशभ्यः स्वाहै कान्न विँशत्यै स्वाहा नवविँशत्यै स्वाहै कान्न  
 चत्वारिँशते स्वाहा नवचत्वारिँशते स्वाहै कान्न षष्ट्यै स्वाहा  
 नवषष्ट्यै स्वाहै कान्नाशीत्यै स्वाहा नवाशीत्यै स्वाहै कान्न शताय  
 स्वाहा शताय स्वाहा सर्वस्मै स्वाहा ॥१२॥

द्वाभ्याँ स्वाहा चतुर्भ्यः स्वाहा षड्भ्यः स्वाहाष्टाभ्यः स्वाहा दशभ्यः  
 स्वाहा द्वादशभ्यः स्वाहा चतुर्दशभ्यः स्वाहा षोडशभ्यः  
 स्वाहाष्टादशभ्यः स्वाहा विँशत्यै स्वाहाष्टानवत्यै स्वाहा शताय  
 स्वाहा सर्वस्मै स्वाहा ॥१३॥

त्रिभ्यः स्वाहा पञ्चभ्यः स्वाहा सप्तभ्यः स्वाहा नवभ्यः स्वाहैकादशभ्यः  
स्वाहा त्रयोदशभ्यः स्वाहा पञ्चदशभ्यः स्वाहा सप्तदशभ्यः स्वाहैकान्न  
विंशत्यै स्वाहा नवविंशत्यै स्वाहैकान्न चत्वारिंशते स्वाहा  
नवचत्वारिंशते स्वाहैकान्न षष्ट्यै स्वाहा नवषष्ट्यै स्वाहैकान्नाशीत्यै  
स्वाहा नवाशीत्यै स्वाहैकान्न शताय स्वाहा शताय स्वाहा सर्वस्मै  
स्वाहा ॥१४॥

चतुर्भ्यः स्वाहाष्टाभ्यः स्वाहा द्वादशभ्यः स्वाहा षोडशभ्यः स्वाहा  
विंशत्यै स्वाहा षण्णवत्यै स्वाहा शताय स्वाहा सर्वस्मै स्वाहा  
॥१५॥

पञ्चभ्यः स्वाहा दशभ्यः स्वाहा पञ्चदशभ्यः स्वाहा विंशत्यै स्वाहा  
पञ्चनवत्यै स्वाहा शताय स्वाहा सर्वस्मै स्वाहा ॥१६॥

दशभ्यः स्वाहा विंशत्यै स्वाहा त्रिंशते स्वाहा चत्वारिंशते स्वाहा  
पञ्चाशते स्वाहा षष्ट्यै स्वाहा सप्तत्यै स्वाहाशीत्यै स्वाहा नवत्यै स्वाहा  
शताय स्वाहा सर्वस्मै स्वाहा ॥१७॥

विंशत्यै स्वाहा चत्वारिंशते स्वाहा षष्ट्यै स्वाहाशीत्यै स्वाहा  
शताय स्वाहा सर्वस्मै स्वाहा ॥१८॥

पञ्चाशते स्वाहा शताय स्वाहा द्वाभ्यां शताभ्यां स्वाहा त्रिभ्यः  
शतेभ्यः स्वाहा चतुर्भ्यः शतेभ्यः स्वाहा

पञ्चभ्यः श्तेभ्यः स्वाहा षड्भ्यः श्तेभ्यः स्वाहा सप्तभ्यः श्तेभ्यः  
स्वाहाष्टाभ्यः श्तेभ्यः स्वाहा नवभ्यः श्तेभ्यः स्वाहा सहस्राय स्वाहा  
सर्वस्मै स्वाहा ॥१६॥

शताय स्वाहा सहस्राय स्वाहायुताय स्वाहा नियुताय स्वाहा प्रयुताय  
स्वाहार्बुदाय स्वाहा न्यर्बुदाय स्वाहा समुद्राय स्वाहा मध्याय  
स्वाहान्ताय स्वाहा परार्धाय स्वाहो षसे स्वाहा व्युष्ट्यै स्वाहो देष्यते  
स्वाहो द्यते स्वाहो दिताय स्वाहा सुवर्गाय स्वाहा लोकाय स्वाहा  
सर्वस्मै स्वाहा ॥२०॥

इति सप्तमकारण्डे द्वितीयः प्रपाठकः २

अथ सप्तमकारण्डे तृतीयः प्रपाठकः ३

प्रजवं वा एतेन यन्ति यद्दशममहः पापावहीयं वा एतेन भवन्ति  
यद्दशममहुर्यो वै प्रजवं यतामपथेन प्रतिपद्यते य स्थाणुं हन्ति यो भेषं  
न्येति स हीयते स यो वै दशमेऽहन्नविवाक्य उपहन्यते स हीयते तस्मै य  
उपहताय व्याह तमेवान्वारभ्य समश्नुतेऽथ यो व्याह सः हीयते  
तस्माद्दशमेऽहन्नविवाक्य उपहताय न व्युच्य मथो खल्वाहुर्यज्ञस्य वै  
समृद्धेन देवाः सुवर्गं लोकमायन्यज्ञस्य व्युद्धेनासुरान्पराभावयन्निति  
यत्खलु वै यज्ञस्य समृद्धं तद्यजमानस्य यद्व्युद्धं तद्भ्रातृव्यस्य स यो वै  
दशमेऽहन्नविवाक्य उपहन्यते स एवाति रेचयति ते ये बाह्या दृशीकवः  
स्युस्ते वि बूर्यु यदि तत्र न विन्देयुरन्तः सदसाद्व्युच्यं यदि तत्र न  
विन्देयुर्गृहपतितना व्युच्यं तद्व्युच्यमेवाथ वा एतत्सर्पराज्ञिया ऋग्भिः  
स्तुवन्तीयं वै सर्पतो राज्ञी यद्वा अस्यां किं चार्चन्ति यदानृचुस्तेनेयं

सर्पराज्ञी ते यदेव किं च वाचानृचुर्यदतोऽध्यर्चितारः  
तदुभयमाप्त्वावरुध्योत्तिष्ठामेति ताभिर्मनसा स्तुवते न वा इमामश्वरथो  
नाश्वतरारथः सद्यः पर्याप्तुमर्हति मनो वा इमाँ सद्यः पर्याप्तुमर्हति मनः  
परिभवितु मथ ब्रह्म वदन्ति परिमिता वा ऋचः परिमितानि सामानि  
परिमितानि यजूँष्यथैतस्यैवान्तो नास्ति यद्ब्रह्म तत्प्रतिगृणत आ चक्षीत  
स प्रतिगुरः ॥१॥

ब्रह्मवादिनो वदन्ति किं द्वादशाहस्य प्रथमेनाहृत्विजां यजमानो वृङ्क्ते इति  
तेज इन्द्रियमिति किं द्वितीयेनेति प्राणान्नाद्यमिति किं तृतीयेनेति  
त्रीनिमाँल्लोकानिति किं चतुर्थेनेति चतुष्पदः पशूनिति किम्पञ्चमेनेति  
पञ्चाक्षराम्पङ्क्तिमिति किँ षष्ठेनेति षडृतनिति किँ सप्तमेनेति सप्तपदाँ  
शक्वरीमिति किमष्टमेनेत्यष्टाक्षरां गायत्रीमिति किं नवमेनेति त्रिवृतँ  
स्तोममिति किं दशमेनेति दशाक्षरां विराजमिति  
किमेकादशेनेत्येकादशाक्षरां त्रिष्टुभमिति किं द्वादशेनेति द्वादशाक्षरां  
जगतीमित्येतावद्वा अस्ति यावदेतद्यावदेवास्ति तदेषां वृङ्क्ते ॥२॥

एष वा आप्तो द्वादशाहो यत्रयोदशरात्रः समानँ  
ह्येतदहुर्यत्प्रायणीयश्चोदयनीयश्च त्र्यतिरात्रो भवति त्रय इमे लोका एषां  
लोकानामाप्यै प्राणो वै प्रथमोऽतिरात्रो व्यानो द्वितीयोऽपानस्तृतीयः  
प्राणापानोदानेष्वेवान्नाद्ये प्रति तिष्ठन्ति सर्वमार्युर्यन्ति य एवं  
विद्वाँसस्त्रयोदशरात्रमासते तदाहुर्वाग्वा एषा वितता यद्द्वादशाहस्तां  
वि च्छिन्द्युर्यन्मध्येऽतिरात्रं कुर्युरुपदासुका  
गृहपतेर्वाक्स्यादुपरिष्ठाच्छन्दोमानाम्महाव्रतं कुर्वन्ति संततामेव वाचमव

रुन्धतेऽनुपदासुका गृहपतेर्वाग्भवति पशवो वै छन्दोमा अन्नम्महावृतं  
यदुपरिष्ठाच्छन्दोमानाम्महावृतं कुर्वन्ति पशुषु चैवान्नाद्यै च प्रति तिष्ठन्ति  
॥३॥

आदित्या अकामयन्तोभयोल्लोकयोर्ऋधुयामेति त एतं  
चतुर्दशरात्रमपश्यन्तमाहरन्तेनायजन्त ततो वै त  
उभयोल्लोकयोराधुवन्नस्मिँश्चामुष्मिँश्च य एवं विद्वाँँश्चतुर्दशरात्रमासत  
उभयोरिव ल्लोकयोर्ऋधुवन्त्यस्मिँश्चामुष्मिँश्च चतुर्दशरात्रो भवति सप्त  
ग्राम्या ओषधयः सप्तारण्या उभयीषामवरुद्ध्यै यत्पराचीनानि पृष्ठानि  
भवन्त्यमुमेव तैल्लोकमभि जयन्ति यत्प्रीचीनानि पृष्ठानि भवन्तीममेव  
तैल्लोकमभि जयन्ति त्रयस्त्रिँँशौ मध्यत स्तोमौ भवतः साम्राज्यमेव  
गच्छन्त्यधिराजौ भवतोऽधिराजा एव समानानाम्भवन्त्य तिरात्रावभितौ  
भवतः परिगृहीत्यै ॥४॥

प्रजापतिः सुवर्गं ल्लोकमैत्तं देवा अन्वायन्तानादित्याश्च पशवश्चान्वायन्ते  
देवा अब्रुवन्यान्पशूनुपाजीविष्म त इमेऽन्वाग्मन्निति तेभ्य एतं  
चतुर्दशरात्रमप्रत्यौहन्त आदित्याः पृष्ठैः सुवर्गं  
ल्लोकमारौहन्त्यहाभ्यामस्मिल्लोके पशून्प्रत्यौहन्यृष्ठैरादित्या  
अमुष्मिल्लोक आर्ध्वन्त्यहाभ्यामस्मिल्लोके पशवो य एवं  
विद्वाँँसश्चतुर्दशरात्रमासत उभयोरिव ल्लोकयोर्ऋधुवन्त्यस्मिँश्चामुष्मिँश्च  
पृष्ठैरेवामुष्मिल्लोक ऋधुवन्ति त्र्यहाभ्यामस्मिल्लोके ज्योतिर्गौरायुरिति  
त्र्यहो भवतीयं वाव ज्योतिरन्तरिक्षं गौरसावायुरिमानेव  
ल्लोकान्भ्यारौहन्ति यदन्यतः पृष्ठानि स्युर्विविधँँ स्यान्मध्ये पृष्ठानि

भवन्ति सविवधृत्वायौजो वै वीर्यम्पृष्ठान्योज एव वीर्यममध्यतो दधते  
 बृहद्रथंतराभ्यां यन्तीयं वाव रथंतरमसौ बृहदाभ्यामेव यन्त्यथो अनयोरेव  
 प्रति तिष्ठन्त्येते वै यज्ञस्याञ्जसायनी स्नुती ताभ्यामेव सुवर्गं लोकं यन्ति  
 पराञ्चो वा एते सुवर्गं लोकमभ्यारोहन्ति ये पराचीनानि पृष्ठान्युपयन्ति  
 प्रत्यङ्ग्रहो भवति प्रत्यवरूढ्या अथो प्रतिष्ठित्या  
 उभयौर्लोकयोर्ऋद्ध्वोत्तिष्ठन्ति चतुर्दशैतास्तासां या दश दशाक्षरा  
 विराडन्नं विराड्विराजैवान्नाद्यमव रुन्धते याश्चतस्रश्चतस्रो दिशो दिद्वैव  
 प्रति तिष्ठन्त्य तिरात्रावभितो भवतः परिगृहीत्यै ॥५॥

इन्द्रो वै सदृङ्देवताभिरासीत्स न व्यावृत्तमगच्छत्स  
 प्रजापतिमुपाधावत्तस्मा एतम्पञ्चदशरात्रम्प्रायच्छत्तमाहरत्तेनायजत् ततो वै  
 सौऽन्याभिर्देवताभिव्यावृत्तमगच्छद्य एवं विद्वाँसः पञ्चदशरात्रमासते  
 व्यावृत्तमेव पाप्मना भ्रातृव्येण गच्छन्ति ज्योतिर्गौरायुरिति ग्रहो भवतीयं  
 वाव ज्योतिरन्तरिक्षं गौरसावायुरेष्वैव लोकेषु प्रति तिष्ठन्त्य सत्त्रं वा  
 एतद्यदच्छन्दोमं यच्छन्दोमा भवन्ति तेन सत्त्रं देवता एव पृष्ठैरव रुन्धते  
 पशूञ्छन्दोमैरोजो वै वीर्यं पृष्ठानि पशवश्छन्दोमा ओजस्येव वीर्ये पशुषु  
 प्रति तिष्ठन्ति पञ्चदशरात्रो भवति पञ्चदशो वज्रो वज्रमेव भ्रातृव्येभ्यः प्र  
 हरन्त्य तिरात्रावभितो भवत इन्द्रियस्य परिगृहीत्यै ॥६॥

इन्द्रो वै शिथिल इवाप्रतिष्ठित आसीत्सोऽसुरेभ्योऽबिभेत्स  
 प्रजापतिमुपाधावत्तस्मा एतम्पञ्चदशरात्रं वज्रम्प्रायच्छत्तेनासुरान्पराभाव्य  
 विजित्य श्रियमगच्छदग्निष्टुतां पाप्मानं निरदहत पञ्चदशरात्रेणौजो  
 बलमिन्द्रियं वीर्यमात्मन्नधत्त य एवं विद्वाँसः पञ्चदशरात्रमासते



भ्रातृव्यानेव पराभाव्यं विजित्य श्रियं गच्छन्त्यग्निष्टुतां पाप्मानं निर्दहन्ते  
 पञ्चदशरात्रेणौजो बलमिन्द्रियं वीर्यमात्मन्दधत एता एव पशव्याः पञ्चदश  
 वा अर्धमासस्य रात्रयोऽर्धमासशः संवत्सर आप्यते संवत्सरम्पशवोऽनु प्र  
 जायन्ते तस्मात्पशव्या एता एव सुवर्ग्याः पञ्चदश वा अर्धमासस्य  
 रात्रयोऽर्धमासशः संवत्सर आप्यते संवत्सरः सुवर्गो  
 लोकस्तस्मात्सुवर्ग्या ज्योतिर्गौरायुरिति त्र्यहो भवतीयं वाव  
 ज्योतिरन्तरिक्षं गौरसावायुरिमानेव लोकानभ्यारौहन्ति यदन्यतः पृष्ठानि  
 स्युर्विविधं स्यान्मध्ये पृष्ठानि भवन्ति सविवधत्वायौजो वै  
 वीर्यम्पृष्ठान्योज एव वीर्यमध्यतो दधते बृहद्रथंतराभ्यां यन्तीयं वाव  
 रथंतरमसौ बृहदाभ्यामेव यन्त्यथो अनयोरिव प्रति तिष्ठन्ते वै  
 यज्ञस्याञ्जसायनी स्रुती ताभ्यामेव सुवर्गं लोकं यन्ति पराञ्चो वा एते  
 सुवर्गं लोकमभ्यारौहन्ति ये पराचीनानि पृष्ठान्युपयन्ति प्रत्यङ्त्र्यहो  
 भवति प्रत्यवरूढ्या अथो प्रतिष्ठिया उभयोर्लोकयोर्ऋद्ध्वोत्तिष्ठन्ति  
 पञ्चदशैतास्तासां या दश दशाक्षरा विराडन्नं विराड्विराजैवान्नाद्यमव  
 रुन्धते याः पञ्च पञ्च दिशो दिद्वैव प्रति तिष्ठन्त्य तिरात्रावभितो भवत  
 इन्द्रियस्य वीर्यस्य प्रजायै पशूनाम्परिगृहीत्यै ॥७॥

प्रजापतिरकामयतान्नादः स्यामिति स एतं  
 सप्तदशरात्रमपश्यत्तमाहरत्तेनायजत् ततो वै सोऽन्नादोऽभवद्य एव  
 विद्वांसः सप्तदशरात्रमासतेऽन्नादा एव भवन्ति पञ्चाहो भवति पञ्च वा  
 ऋतवः संवत्सर ऋतुष्वेव संवत्सरे प्रति तिष्ठन्त्यथो पञ्चाक्षरा पङ्क्तिः पाङ्क्तौ  
 यज्ञो यज्ञमेवाव रुन्धतेऽसत्रं वा एतद्यदच्छन्दोमं यच्छन्दोमा भवन्ति तेन  
 सत्रं देवता एव पृष्ठैरव रुन्धते पशूञ्छन्दोमैरोजो वै वीर्यं पृष्ठानि

पशवश्छन्दोमा ओजस्येव वीर्येपशुषु प्रति तिष्ठन्ति सप्तदशरात्रो भवति  
सप्तदशः प्रजापतिः प्रजापतेराप्त्या अतिरात्रावभितौ भवतोऽन्नाद्यस्य  
परिगृहीत्यै ॥८॥

सा विराड्विक्रम्यातिष्ठद्ब्रह्मणा देवेष्वन्नेनासुरेषु ते देवा  
अकामयन्तोभयं सं वृञ्जीमहि ब्रह्म चान्नं चेति त एता विंशतिं  
रात्रीरपश्यन्ततो वै त उभयं समवृञ्जत ब्रह्म चान्नं च  
ब्रह्मवर्चसिनोऽन्नादा अभवन्त्य एव विद्वांस एता आसत उभयमेव सं  
वृञ्जते ब्रह्म चान्नं च ब्रह्मवर्चसिनोऽन्नादा भवन्ति द्वे वा एते विराजौ  
तयोरेव नाना प्रति तिष्ठन्ति विंशो वै पुरुषो दश हस्त्या अङ्गुलयो  
दश पद्या यावानेव पुरुषस्तमाप्त्वोत्तिष्ठन्ति ज्योतिर्गौरायुरिति त्र्यहा  
भवन्तीयं वाव ज्योतिरन्तरिक्षं गौरसावायुरिमानेव  
लोकानभ्यारौहन्त्यभिपूर्वं त्र्यहा भवन्त्यभिपूर्वमेव सुवर्गं  
लोकमभ्यारौहन्ति यदन्यतः पृष्ठानि स्युर्विविधं स्यान्मध्ये पृष्ठानि  
भवन्ति सविवधत्वायौजो वै वीर्यम्पृष्ठान्योज एव वीर्यमध्यतो दधते  
बृहद्रथंतराभ्यां यन्तीयं वाव रथंतरमसौ बृहदाभ्यामेव यन्त्यथो अनयोरेव  
प्रति तिष्ठन्त्येते वै यज्ञस्याञ्जसायनी स्तुती ताभ्यामेव सुवर्गं लोकं यन्ति  
पराञ्चो वा एते सुवर्गं लोकमभ्यारौहन्ति ये पराचीनानि पृष्ठान्युपयन्ति  
प्रत्यङ्त्र्यहो भवति प्रत्यवरूढ्या अथो प्रतिष्ठिया  
उभयौलोकयोर्ऋद्ध्वोत्तिष्ठन्त्य तिरात्रावभितौ भवतो  
ब्रह्मवर्चसस्यान्नाद्यस्य परिगृहीत्यै ॥९॥

असावादित्योऽस्मिँल्लोक आसीत्तं देवाः पृष्ठैः परिगृह्य सुवर्गं

लोकमगमयन्परैर्वस्तात्पर्यगृह्णन्दिवाकीर्त्येन सुवर्गे लोके  
 प्रत्यस्थापयन्परैः पुरस्तात्पर्यगृह्णन्पृष्ठैरुपावारोहन्त्स वा  
 असावादित्योऽमुष्मिल्लोके परैरुभयतः परिगृहीतो यत्पृष्ठानि भवन्ति  
 सुवर्गमेव तैर्लोकं यजमाना यन्ति परैर्वस्तात्परि गृह्णन्ति दिवाकीर्त्येन  
 सुवर्गे लोके प्रति तिष्ठन्ति परैः पुरस्तात्परि गृह्णन्ति पृष्ठैरुपावारोहन्ति यत्परै  
 पुरस्तान्न स्युः पराञ्चः सुवर्गाल्लोकान्निष्पद्येऽन्यद्वस्तान्न स्युः प्रजा  
 निर्दहेयुरभितौ दिवाकीर्त्यम्परःसामानो भवन्ति सुवर्ग एवैनान्लोक  
 उभयतः परि गृह्णन्ति यजमाना वै दिवाकीर्त्यं संवत्सरः  
 परःसामानोऽभितौ दिवाकीर्त्यम्परःसामानो भवन्ति संवत्सर एवोभयतः  
 प्रति तिष्ठन्ति पृष्ठं वै दिवाकीर्त्यम्पार्श्वे परःसामानोऽभितौ  
 दिवाकीर्त्यम्परःसामानो भवन्ति तस्माद्भितःपृष्ठम्पार्श्वे भूयिष्ठा ग्रहा गृह्यन्ते  
 भूयिष्ठं शस्यते यज्ञस्यैव तन्मध्यतो ग्रन्थिं ग्रन्थन्त्यविस्रसाय सप्त  
 गृह्यन्ते सप्त वै शीर्षरयाः प्राणाः प्राणानेव यजमानेषु दधति  
 यत्पराचीनानि पृष्ठानि भवन्त्यमुमेव तैर्लोकमभ्यारोहन्ति यद्विमं लोकं न  
 प्रत्यवरोहेयुरुद्वा माद्यैर्युयजमानाः प्र वा मीयेऽन्यत्प्राचीनानि पृष्ठानि  
 भवन्तीममेव तैर्लोकमप्रत्यवरोहन्त्यथो अस्मिन्नेव लोके प्रति  
 तिष्ठन्त्यनुन्मादायेन्द्रो वा अप्रतिष्ठित आसीत्स प्रजापतिमुपाधावत्तस्मा  
 एतमेकविंशतिरात्रम्प्रायच्छत्तमाहरत्तेनायजत् ततो वै स प्रत्यतिष्ठद्ये  
 बहुयाजिनोऽप्रतिष्ठिताः स्युस्त एकविंशतिरात्रमासीरद्वादश मासाः  
 पञ्चर्तवस्त्रय इमे लोका असावादित्य एकविंश एतावन्तो वै  
 देवलोकास्तेष्वेव यथापूर्वम्प्रति तिष्ठन्त्यसावादित्यो न व्यरोचत् स  
 प्रजापतिमुपाधावत्तस्मा एतमेकविंशतिरात्रम्प्रायच्छत्तमाहरत्तेनायजत्  
 ततो वै सौऽरोचत् य एवं विद्वांस एकविंशतिरात्रमासते रोचन्त

एवैकविंशतिरात्रो भवति रुग्वा एकविंशो रुचमेव गच्छन्त्यथो  
प्रतिष्ठामेव प्रतिष्ठा ह्यैकविंशोऽतिरात्रावभितौ भवतो ब्रह्मवर्चसस्य  
परिगृहीत्यै ॥१०॥

अर्वाङ् यज्ञः सं क्रामत्वमुष्मादधि माम्भि । ऋषीणां यः पुरोहितः ॥  
निर्देवं निर्वीरं कृत्वा विष्कन्धं तस्मिन्हीयतां योऽस्मान्द्वेष्टि । शरीरं  
यज्ञशमलं कुसीदं तस्मिन्त्सीदतु योऽस्मान्द्वेष्टि ॥ यज्ञं यज्ञस्य यत्तेजस्तेन  
सं क्राम् माम्भि । ब्राह्मणानृत्विजौ देवान्यज्ञस्य तपसा ते सवाहमा हुवे  
॥ इष्टेन पक्वमुप ते हुवे सवाहम् । सं ते वृञ्जे सुकृतं सम्प्रजाम्पशून्  
॥

प्रैषान्त्सामिधेनीराघारावाज्यभागावाश्रुतमृत्याश्रुतमा शृणामि ते ।  
प्रयाजानूयाजान्तस्विष्टकृतमिडामाशिष आ वृञ्जे सुवः ॥ अग्निनेन्द्रेण  
सोमेन सरस्वत्या विष्णुना देवताभिः । याज्यानुवाक्याभ्यामुप ते हुवे  
सवाहं यज्ञमा ददे ते वर्षटकृतम् ॥ स्तुतं शस्त्रमप्रतिगरं  
ग्रहमिडामाशिष आ वृञ्जे सुवः । पत्नीसंयाजानुप ते हुवे सवाहं  
समिष्टयजुरा ददे तव ॥ पशून्सुतम्पुरोडाशान्तसर्वनान्योत यज्ञम् ।  
देवान्त्सेन्द्रानुप ते हुवे सवाहमग्निमुखान्तसोमवतो ये च विश्वे ॥११॥

भूतम्भव्यम्भविष्यद्वषट्स्वाहा नम ऋक्साम यजुर्वषट्स्वाहा नमो  
गायत्री त्रिष्टुब्जगती वषट्स्वाहा नमः पृथिव्यन्तरिक्षं द्यौर्वषट्स्वाहा  
नमो मिर्वायुः सूर्यो वषट्स्वाहा नमः प्राणो व्यानोऽपानो वषट्स्वाहा  
नमोऽन्नं कृषिर्वृष्टिर्वषट्स्वाहा नमः पिता पुत्रः पौत्रो वषट्स्वाहा नमो  
भूर्भुवः सुवर्वषट्स्वाहा नमः ॥१२॥

आ मे गृहा भवन्त्वा प्रजा म आ मा यज्ञो विशतु वीर्यावान् । आपो  
 देवीर्यज्ञिया मा विशन्तु सहस्रस्य मा भूमा मा प्र हासीत् ॥  
 आ मे ग्रहो भवत्वा पुरोरुक्स्तुतशस्त्रे मा विशताँ समीची । आदित्या  
 रुद्रा वसवो मे सदस्याः सहस्रस्य मा भूमा मा प्र हासीत् ॥  
 आ माग्निष्टोमो विशतूक्थ्यश्चातिरात्रो मा विशत्वापिशर्वरः ।  
 तिरोअह्निया मा सुहता आ विशन्तु सहस्रस्य मा भूमा मा प्र हासीत्  
 ॥१३॥

अग्निना तपोऽन्वभवद्वाचा ब्रह्म मणिना रूपाणीन्द्रेण देवान्वातेन  
 प्राणा न्तसूर्येण द्यां चन्द्रमसा नक्षत्राणि यमेन पितृन्राज्ञा मनुष्यान्फलेन  
 नादेया नजगरेण सर्पान्व्याघ्रेणारयान्पशूञ्छयेनेन पतत्रिणो  
 वृष्णाश्वा नृषभेण गा बस्तेनाजा वृष्णिनावी व्रीहिणान्नानि  
 यवेनौषधी न्यग्रोधेन वनस्पती नुदुम्बरेणोर्ज गायत्रिया छन्दाँसि  
 त्रिवृता स्तोमान्ब्राह्मणेन वाचम् ॥१४॥

स्वाहाधिमाधीताय स्वाहा स्वाहाधीतं मनसे स्वाहा स्वाहा मनः  
 प्रजापतये स्वाहा काय स्वाहा कस्मै स्वाहा कतमस्मै स्वाहादित्यै  
 स्वाहादित्यै मह्यै स्वाहादित्यै सुमृडीकायै स्वाहा सरस्वत्यै स्वाहा  
 सरस्वत्यै बृहत्यै स्वाहा सरस्वत्यै पावकायै स्वाहा पूष्णे स्वाहा पूष्णे  
 प्रपथ्याय स्वाहा पूष्णे नरंधिषाय स्वाहा त्वष्ट्रे स्वाहा त्वष्ट्रे तुरीपाय  
 स्वाहा त्वष्ट्रे पुरुरूपाय स्वाहा विष्णावे स्वाहा विष्णावे निखुर्यपाय  
 स्वाहा विष्णावे निभूयपाय स्वाहा सर्वस्मै स्वाहा ॥१५॥

दुद्भ्यः स्वाहा हनूभ्याँ स्वाहो ष्ठाभ्याँ स्वाहा मुखाय स्वाहा  
नासिकाभ्याँ स्वाहाक्षीभ्याँ स्वाहा कर्णाभ्याँ स्वाहा पार  
इक्ष्वोऽवार्येभ्यः पद्मभ्यः स्वाहावार इक्ष्वः पार्येभ्यः पद्मभ्यः स्वाहा  
शीर्ष्णे स्वाहा भ्रूभ्याँ स्वाहा ललाटाय स्वाहा मूर्ध्ने स्वाहा मस्तिष्काय  
स्वाहा केशेभ्यः स्वाहा वहाय स्वाहा ग्रीवाभ्यः स्वाहा स्कन्धेभ्यः  
स्वाहा कीकसाभ्यः स्वाहा पृष्ठीभ्यः स्वाहा पाजस्याय स्वाहा  
पार्श्वभ्याँ स्वाहा अँसाभ्याँ स्वाहा दोषभ्याँ स्वाहा बाहुभ्याँ  
स्वाहा जङ्घाभ्याँ स्वाहा श्रोणीभ्याँ स्वाहो रुभ्याँ स्वाहाष्ठीवद्ध्याँ  
स्वाहा जङ्घाभ्याँ स्वाहा भ्रसदे स्वाहा शिखण्डेभ्यः स्वाहा  
वालधानाय स्वाहाण्डाभ्याँ स्वाहा शेषाय स्वाहा रेतसे स्वाहा  
प्रजाभ्यः स्वाहा प्रजननाय स्वाहा पद्भ्यः स्वाहा शफेभ्यः स्वाहा लोमभ्यः  
स्वाहा त्वचे स्वाहा लोहिताय स्वाहा माँसाय स्वाहा स्नावभ्यः  
स्वाहास्थभ्यः स्वाहा मज्जभ्यः स्वाहाङ्गेभ्यः स्वाहात्मने स्वाहा सर्वस्मै  
स्वाहा ॥१६॥

अञ्जयेताय स्वाहाञ्जिसक्थाय स्वाहा शितिपदे स्वाहा शितिककुदे  
स्वाहा शितिरन्ध्राय स्वाहा शितिपृष्ठाय स्वाहा शित्यँसाय स्वाहा  
पुष्पकर्णाय स्वाहा शित्योष्ठाय स्वाहा शितिभ्रवे स्वाहा शितिभसदे  
स्वाहा श्वेतानूकाशाय स्वाहाञ्जये स्वाहा ललामाय स्वाहासितज्ञवे  
स्वाहा कृष्णैताय स्वाहा रोहितैताय स्वाहारुणैताय स्वाहे दृशाय स्वाहा  
कीदृशाय स्वाहा तादृशाय स्वाहा सदृशाय स्वाहा विसदृशाय स्वाहा  
सुसदृशाय स्वाहा रूपाय स्वाहा सर्वस्मै स्वाहा ॥१७॥

कृष्णाय स्वाहा श्वेताय स्वाहा पिशङ्गाय स्वाहा सारङ्गाय स्वाहारुणाय  
स्वाहा गौराय स्वाहा बभ्रवे स्वाहा नकुलाय स्वाहा रोहिताय स्वाहा  
शोणाय स्वाहा श्यावाय स्वाहा श्यामाय स्वाहा पाकलाय स्वाहा  
सुरूपाय स्वाहानुरूपाय स्वाहाविरूपाय स्वाहा सरूपाय स्वाहा  
प्रतिरूपाय स्वाहा शबलाय स्वाहा कमलाय स्वाहा पृश्नये स्वाहा  
पृश्निसक्थाय स्वाहा सर्वस्मै स्वाहा ॥१८॥

ओषधीभ्यः स्वाहा मूलैभ्यः स्वाहा तूलैभ्यः स्वाहा कारडैभ्यः स्वाहा  
वल्शैभ्यः स्वाहा पुष्पैभ्यः स्वाहा फलैभ्यः स्वाहा गृहीतेभ्यः  
स्वाहागृहीतेभ्यः स्वाहावपत्रेभ्यः स्वाहा शयानेभ्यः स्वाहा सर्वस्मै  
स्वाहा ॥१९॥

वनस्पतिभ्यः स्वाहा मूलैभ्यः स्वाहा तूलैभ्यः स्वाहा स्कन्धोभ्यः स्वाहा  
शाखाभ्यः स्वाहा पर्णेभ्यः स्वाहा पुष्पैभ्यः स्वाहा फलैभ्यः स्वाहा  
गृहीतेभ्यः स्वाहागृहीतेभ्यः स्वाहावपत्रेभ्यः स्वाहा शयानेभ्यः स्वाहा  
शिष्टाय स्वाहातिशिष्टाय स्वाहा परिशिष्टाय स्वाहा सँशिष्टाय  
स्वाहो च्छिष्टाय स्वाहा रिक्ताय स्वाहारिक्ताय स्वाहा प्ररिक्ताय स्वाहा  
सँरिक्ताय स्वाहो द्रिक्ताय स्वाहा सर्वस्मै स्वाहा ॥२०॥

इति सप्तमकारण्डे तृतीयः प्रपाठकः ३

अथ सप्तमकारण्डे चतुर्थः प्रपाठकः ४

बृहस्पतिरकामयत् श्रन्मै देवा दधीरन्गच्छैयम्पुरोधामिति स एतं

चतुर्विंशतिरात्रमपश्यत्तमाहरत्तेनायजत् ततो वै तस्मै श्रद्धेवा  
 अर्द्धतागच्छत्पुरोधं य एवं विद्वांसश्चतुर्विंशतिरात्रमासते श्रद्धेभ्यो  
 मनुष्या दधते गच्छन्ति पुरोधं ज्योतिर्गौरायुरिति त्र्यहा भवन्तीयं वाव  
 ज्योतिरन्तरिक्षं गौरसावायुरिमानेव लोकानभ्यारौहन्त्यभिपूर्वं त्र्यहा  
 भवन्त्यभिपूर्वमेव सुवर्गं लोकमभ्यारौहन्त्य सत्रं वा एतद्यदच्छन्दोमं  
 यच्छन्दोमा भवन्ति तेन सत्रं देवता एव पृष्ठैरव रुन्धते पशूञ्छन्दोमैरोजो  
 वै वीर्यं पृष्ठानि पशवश्छन्दोमा ओजस्येव वीर्यं पशुषु प्रति तिष्ठन्ति  
 बृहद्रथंतराभ्यां यन्तीयं वाव रथंतरमसौ बृहदाभ्यामेव यन्त्यथो अनयोरेव  
 प्रति तिष्ठन्त्येते वै यज्ञस्याञ्जसायनी स्मृती ताभ्यामेव सुवर्गं लोकं यन्ति  
 चतुर्विंशतिरात्रो भवति चतुर्विंशतिरर्धमासाः संवत्सरः संवत्सरः  
 सुवर्गो लोकः संवत्सर एव सुवर्गे लोके प्रति तिष्ठन्त्यथो  
 चतुर्विंशत्यक्षरा गायत्री गायत्री ब्रह्मवर्चसं गायत्रियैव ब्रह्मवर्चसमव  
 रुन्धतेऽतिरात्रावभितो भवतो ब्रह्मवर्चसस्य परिगृहीत्यै ॥१॥

यथा वै मनुष्या एवं देवा अग्रं  
 आसन्तेऽकामयन्तावर्तिम्पाप्मानंमृत्युमपहत्य दैवीं स्रंसदं गच्छेमेति  
 त एतं चतुर्विंशतिरात्रमपश्यन्तमाहरन्तेनायजन्त ततो वै  
 तेऽवर्तिम्पाप्मानंमृत्युमपहत्य दैवीं स्रंसदमगच्छन्त्य एवं  
 विद्वांसश्चतुर्विंशतिरात्रमासतेऽवर्तिमेव पाप्मानमपहत्य श्रियं गच्छन्ति  
 श्रीर्हि मनुष्यस्य दैवी स्रंसज्ज्योतिरतिरात्रो भवति सुवर्गस्य  
 लोकस्यानुख्यात्यै पृष्ठयः षडहो भवति षड्वा ऋतवः संवत्सरस्तम्मासा  
 अर्धमासा ऋतवः प्रविश्य दैवीं स्रंसदमगच्छन्त्य एवं  
 विद्वांसश्चतुर्विंशतिरात्रमासते संवत्सरमेव प्रविश्य वस्यसीं स्रंसदं



गच्छन्ति त्रयस्त्रयस्त्रिंशा अवस्ताद्भवन्ति त्रयस्त्रयस्त्रिंशाः  
 परस्तात्त्रयस्त्रिंशैरेवोभवयतोऽवर्तिम्प्राप्मानमपहृत्य दैवीं  
 ससदमध्यतो गच्छन्ति पृष्ठानि हि दैवीं ससज्जामि वा  
 एतत्कुर्वन्ति यत्रयस्त्रयस्त्रिंशा अन्वञ्चो मध्येऽनिरुक्तो भवति  
 तेनाजाम्यूर्ध्वानि पृष्ठानि भवन्त्यूर्ध्वाश्छन्दोमा उभाभ्यां रूपाभ्यां  
 सुवर्गं लोकं यन्त्य सत्रं वा एतद्यदच्छन्दोमं यच्छन्दोमा भवन्ति तेन  
 सत्रं देवता एव पृष्ठैरव रुन्धते पशूञ्छन्दोमैरोजो वै वीर्यम्पृष्ठानि  
 पशवश्छन्दोमा ओजस्येव वीर्ये पशुषु प्रति तिष्ठन्ति त्रयस्त्रयस्त्रिंशा  
 अवस्ताद्भवन्ति त्रयस्त्रयस्त्रिंशाः परस्तान्मध्ये पृष्ठान्युरो वै त्रयस्त्रिंशा  
 आत्मा पृष्ठान्यात्मन एव तद्यजमानाः शर्म नह्यन्तेऽनात्यै बृहद्रथंतराभ्यां  
 यन्तीयं वाव रथंतरमसौ बृहदाभ्यामेव यन्त्यथो अनयोरेव प्रति तिष्ठन्त्येते  
 वै यज्ञस्याञ्जसायनी स्नुती ताभ्यामेव सुवर्गं लोकं यन्ति पराञ्चो वा एते  
 सुवर्गं लोकमभ्यारौहन्ति ये पराचीनानि पृष्ठान्युपयन्ति प्रत्यङ्षडहो  
 भवति प्रत्यवरूढ्या अथो प्रतिष्ठित्या उभयौलोकयोर्ऋद्भ्वोत्तिष्ठन्ति  
 त्रिवृतोऽधि त्रिवृतमुप यन्ति स्तोमानां सम्पत्त्यै प्रभवाय ज्योतिरग्निष्टोमो  
 भवत्ययं वाव स क्षयोऽस्मादेव तेन क्षयान्न यन्ति चतुर्विंशतिरात्रो  
 भवति चतुर्विंशतिरर्धमासाः संवत्सरः संवत्सरः सुवर्गो लोकः  
 संवत्सर एव सुवर्गे लोके प्रति तिष्ठन्त्यथो चतुर्विंशत्यक्षरा गायत्री  
 गायत्री ब्रह्मवर्चसं गायत्रियैव ब्रह्मवर्चसमव रुन्धते ऽतिरात्रावभितो  
 भवतो ब्रह्मवर्चसस्य परिगृहीत्यै ॥२॥

ऋक्षा वा इयमलोमकासीत्साकामयतौषधीभिर्वनस्पतिभिः प्र जायेयेति  
 सैतास्त्रिंशत् रात्रीरपश्यत्ततो वा इयमोषधीभिर्वनस्पतिभिः प्राजायत

ये प्रजाकामाः पशुकामाः स्युस्त एता आसीरन्ध्रैव जायन्ते प्रजया  
 पशुभि रियं वा अक्षुध्यत्सैतां  
 विराजमपश्यत्तामात्मन्धित्वान्नाद्यमवारुन्ध्रौषधीर्वनस्पतीन्प्रजाम्पशून्तेनाव  
 र्धत सा जेमानम्महिमानमगच्छद्य एवं विद्वाँस एता आसते  
 विराजमेवात्मन्धित्वान्नाद्यमव रुन्धते वर्धन्ते प्रजया  
 पशुभिर्जेमानम्महिमानं गच्छन्ति ज्योतिरतिरात्रो भवति सुवर्गस्य  
 लोकस्यानुख्यात्यै पृष्ठयः षडहो भवति षड्वा ऋतवः षट्पृष्ठानि  
 पृष्ठैरेवतूनन्वारौहन्त्यृतुभिः संवत्सरं ते संवत्सर एव प्रति तिष्ठन्ति  
 त्रयस्त्रिंशत्त्रयस्त्रिंशमुप यन्ति यज्ञस्य संतत्या अथौ प्रजापतिर्वै  
 त्रयस्त्रिंशः प्रजापतिमेवारभन्ते प्रतिष्ठित्यै त्रिणवो भवति विजित्या  
 एकविंशो भवति प्रतिष्ठित्या अथो रुचमेवात्मन्दधते त्रिवृदग्निष्टुद्भवति  
 पाप्मानमेव तेन निर्दहन्तेऽथो तेजो वै त्रिवृत्तेज एवात्मन्दधते पञ्चदश  
 इन्द्रस्तोमो भवतीन्द्रयमेवारु रुन्धते सप्तदशो भवत्यन्नाद्यस्यावरुद्ध्या  
 अथो प्रैव तेन जायन्त एकविंशो भवति प्रतिष्ठित्या अथो  
 रुचमेवात्मन्दधते चतुर्विंशो भवति चतुर्विंशतिरर्धमासाः संवत्सरः  
 संवत्सरः सुवर्गो लोकः संवत्सर एव सुवर्गे लोके प्रति तिष्ठन्त्यथौ एष  
 वै विषूवान्विषूवन्तौ भवन्ति य एवं विद्वाँस एता आसते  
 चतुर्विंशात्पृष्ठान्युप यन्ति संवत्सर एव प्रतिष्ठाय देवता अभ्यारौहन्ति  
 त्रयस्त्रिंशत्त्रयस्त्रिंशमुप यन्ति त्रयस्त्रिंशद्वै देवता देवतास्वेव प्रति  
 तिष्ठन्ति त्रिणवो भवतीमे वै लोकास्त्रिणव एष्वैव लोकेषु प्रति तिष्ठन्ति  
 द्वावैकविंशौ भवतः प्रतिष्ठित्या अथो रुचमेवात्मन्दधते ब्रह्मः  
 षोडशिनो भवन्ति तस्माद्ब्रह्मः प्रजासु वृषाणो यदेते स्तोमा व्यतिषक्ता  
 भवन्ति तस्मादियमोषधीभिर्वनस्पतिभिर्यतिषक्ता व्यतिषज्यन्ते प्रजया

पशुभिर्य एव विद्वाँस एता आसतेऽक्लृप्ता वा एते सुवर्गं लोकं  
यन्त्युच्चावचान्हि स्तोमानुपयन्ति यदेत ऊर्ध्वाः क्लृप्ताः स्तोमा भवन्ति  
क्लृप्ता एव सुवर्गं लोकं यन्त्युभयोरिभ्यो लोकयोः कल्पते  
त्रिँशदेतास्त्रिँशदक्षरा विराडन्नं विराड्विराजैवान्नाद्यमव  
रुन्धतेऽतिरात्रावभितौ भवतोऽन्नाद्यस्य परिगृहीत्यै ॥३॥

प्रजापतिः सुवर्गं लोकमैत्तं देवा येनयेन च्छन्दसानु प्रायुञ्जत तेन नाप्नुवन्त  
एता द्वात्रिँशतुँ रात्रीरपश्यन्द्वात्रिँशदक्षरानुष्टुगानुष्टुभः प्रजापतिः  
स्वेनैव च्छन्दसा प्रजापतिमाप्त्वाभ्यारुह्य सुवर्गं लोकमायन्य एव  
विद्वाँस एता आसते द्वात्रिँशदेता द्वात्रिँशदक्षरानुष्टुगानुष्टुभः  
प्रजापतिः स्वेनैव च्छन्दसा प्रजापतिमाप्त्वा श्रियं गच्छन्ति श्रीर्हि  
मनुष्यस्य सुवर्गो लोको द्वात्रिँशदेता  
द्वात्रिँशदक्षरानुष्टुगवागनुष्टुप्सवामेव वाचमाप्नुवन्ति सर्वे वाचो वदितारो  
भवन्ति सर्वे हि श्रियं गच्छन्ति ज्योतिर्गौरायुरिति त्र्यहा भवन्तीयं वाव  
ज्योतिरन्तरिक्षं गौरसावायुरिमानेव लोकानभ्यारौहन्त्यभिपूर्वं त्र्यहा  
भवन्त्यभिपूर्वमेव सुवर्गं लोकमभ्यारौहन्ति बृहद्रथंतराभ्यां यन्तीयं वाव  
रथंतरमसौ बृहदाभ्यामेव यन्त्यथो अनयोरिव प्रति तिष्ठन्त्येते वै  
यज्ञस्याञ्जसायनी स्रुती ताभ्यामेव सुवर्गं लोकं यन्ति पराञ्चो वा एते  
सुवर्गं लोकमभ्यारौहन्ति ये पराचरुयहानुपयन्ति प्रत्यङ्त्र्यहो भवति  
प्रत्यवरूढ्या अथो प्रतिष्ठित्या उभयौलोकयोर्ऋद्ध्वोत्तिष्ठन्ति  
द्वात्रिँशदेतास्तासां यास्त्रिँशत्त्रिँशदक्षरा विराडन्नं  
विराड्विराजैवान्नाद्यमव रुन्धते ये द्वे अहोरात्रे एव ते उभाभ्याँ  
रूपाभ्याँ सुवर्गं लोकं यन्त्यतिरात्रावभितौ भवतुः परिगृहीत्यै ॥४॥

द्वे वाव दैवसुत्रे द्वादशाहश्चैव त्रयस्त्रिंशद्दहश्च य एवं  
विद्वांसस्त्रयस्त्रिंशद्दहमासते साक्षादेव देवता अभ्यारौहन्ति यथा  
खलु वै श्रेयानभ्यारूढः कामयते तथा करोति यद्यवविध्यति  
पापीयान्भवति यदि नावविध्यति सदृश्य एवं  
विद्वांसस्त्रयस्त्रिंशद्दहमासते वि पाप्मना भ्रातृव्येणावर्तन्तेऽहर्भाजो वा  
एता देवा अग्र आहर्न्नहरेकोऽभजताहरेकस्ताभिवै ते प्रबाहुगार्धुवन्य एवं  
विद्वांसस्त्रयस्त्रिंशद्दहमासते सर्व एव प्रबाहुगृध्रुवन्ति सर्वे  
ग्रामणीयम्प्राप्नुवन्ति पञ्चाहा भवन्ति पञ्च वा ऋतवः संवत्सर ऋतुष्वेव  
संवत्सरे प्रति तिष्ठन्त्यथो पञ्चाक्षरा पङ्क्तिः पाङ्क्तौ यज्ञो यज्ञमेवाव रुन्धते  
त्रीण्याश्चिनानि भवन्ति त्रय इमे लोका एष्वेव लोकेषु प्रति तिष्ठन्त्यथो  
त्रीणि वै यज्ञस्येन्द्रियाणि तान्येवाव रुन्धते  
विश्वजिद्धवत्यन्नाद्यस्यावरुद्ध्यै सर्वपृष्ठो भवति सर्वस्याभिजित्यै वाग्वै  
द्वादशाहो यत्पुरस्ताद्द्वादशाहमुपैयुरनाप्तां वाचमुपैयुरुपदासुकैषां  
वाकस्यादुपरिष्ठाद्द्वादशाहमुप यन्त्याप्तमेव वाचमुप यन्ति  
तस्मादुपरिष्ठाद्वाचा वदामोऽवान्तरं वै दशरात्रेण प्रजापतिः प्रजा असृजत्  
यद्दशरात्रो भवति प्रजा एव तद्यजमानाः सृजन्त एतां ह वा उदङ्कः  
शौल्बायनः सुत्रस्यर्द्धिमुवाच यद्दशरात्रो यद्दशरात्रो भवति सुत्रस्यरर्द्ध्या  
अथो यदेव पूर्वेष्वहःसु विलोम क्रियते तस्यैवैषा शान्तिं द्व्यनीका वा  
एता रात्रयो यजमाना विश्वजित्सहातिरात्रेण पूर्वाः षोडश  
सहातिरात्रेणोत्तराः षोडश य एवं विद्वांसस्त्रयस्त्रिंशद्दहमासत एषां  
द्व्यनीका प्रजा जायतेऽतिरात्रावभितौ भवतः परिगृहीत्यै ॥५॥

आदित्या अकामयन्त सुवर्गं लोकमियामेति ते सुवर्गं लोकं न प्राजानुन्न  
सुवर्गं लोकमायन्त एतं षट्त्रिंशद्वात्रमपश्यन्तमाहरन्तेनायजन्त ततो  
वै ते सुवर्गं लोकम्प्राजानन्सुवर्गं लोकमायन्त एव विद्वांसः  
षट्त्रिंशद्वात्रमासते सुवर्गमेव लोकम्प्राजानन्ति सुवर्गं लोकं यन्ति  
ज्योतिरतिरात्रो भवति ज्योतिरेव पुरस्ताद्दधते सुवर्गस्य लोकस्यानुख्यात्यै  
षडहा भवन्ति षड्वा ऋतव ऋतुष्वेव प्रति तिष्ठन्ति चत्वारो भवन्ति  
चतस्रो दिशो दिक्ष्वेव प्रति तिष्ठन्त्यसत्रं वा एतद्यदच्छन्दोमं  
यच्छन्दोमा भवन्ति तेन सत्रं देवता एव पृष्ठैरव रुन्धते पशूञ्छन्दोमैरोजो  
वै वीर्यम्पृष्ठानि पशवश्छन्दोमा ओजस्येव वीर्ये पशुषु प्रति तिष्ठन्ति  
षट्त्रिंशद्वात्रो भवति षट्त्रिंशदक्षरा बृहती बार्हताः पशवो बृहत्यैव  
पशूनव रुन्धते बृहती छन्दसां स्वाराज्यमाशनुताशनुवते स्वाराज्यं य एव  
विद्वांसः षट्त्रिंशद्वात्रमासते सुवर्गमेव लोकं यन्त्यतिरात्रावभितो  
भवतः सुवर्गस्य लोकस्य परिगृहीत्यै ॥६॥

वसिष्ठो हतपुत्रोऽकामयत विन्देयं प्रजामभि सौदासान्भवेयमिति स  
एतमैकस्मान्नपञ्चाशमपश्यन्तमाहरन्तेनायजत् ततो वै सोऽविन्दत प्रजामभि  
सौदासान्भवद्य एव विद्वांसः एकस्मान्नपञ्चाशमासते विन्दन्तै प्रजामभि  
भ्रातृव्यान्भवन्ति त्रयस्त्रिवृतोऽग्निष्टोमा भवन्ति वज्रस्यैव मुखं स  
श्यन्ति दश पञ्चदशा भवन्ति पञ्चदशो वज्रो वज्रमेव भ्रातृव्येभ्यः प्रहरन्ति  
षोडशिमदशममहर्भवति वज्र एव वीर्यं दधति द्वादश सप्तदशा  
भवन्त्यन्नाद्यस्यावरुद्ध्या अथो प्रैव तैर्जायन्ते पृष्ठयः षडहो भवति षड्वा  
ऋतवः षट्पृष्ठानि पृष्ठैरेवतूनन्वारोहन्त्यृतुभिः संवत्सरं ते संवत्सर एव  
प्रति तिष्ठन्ति द्वादशैकविंशा भवन्ति प्रतिष्ठित्या अथो रुचमेवात्मन्दधते

बृहवः षोडशिनो भवन्ति विजित्यै षडाश्विनानि भवन्ति षड्वा ऋतव  
 ऋतुष्वेव प्रति तिष्ठन्त्यू नातिरिक्ता वा एता रात्रय ऊनास्तद्यदेकस्यै न  
 पञ्चाशदतिरिक्तास्तद्यद्भूयसीरष्टार्चत्वारिंशत ऊनाच्च खलु वा  
 अतिरिक्ताच्च प्रजापतिः प्राजायत ये प्रजाकामाः पशुकामाः स्युस्त एता  
 आसीरन्त्रैव जायन्ते प्रजया पशुभिर्वैराजो वा एष यज्ञो  
 यदेकस्मान्नपञ्चाशो य एवं विद्वांसं एकस्मान्नपञ्चाशमासते विराजमेव  
 गच्छन्त्यन्नादा भवन्त्यतिरात्रावभितो भवतोऽन्नाद्यस्य परिगृहीत्यै ॥७॥

संवत्सराय दीक्षिष्यमाणा एकाष्टकायां दीक्षेत्रेषा वै संवत्सरस्य पत्नी  
 यदेकाष्टकैतस्यां वा एष एतां रात्रिं वसति साक्षादेव संवत्सरमारभ्य  
 दीक्षन्त आर्तं वा एते संवत्सरस्याभि दीक्षन्ते य एकाष्टकायां  
 दीक्षन्तेऽन्तनामानावृतू भवतो व्यस्तं वा एते संवत्सरस्याभि दीक्षन्ते य  
 एकाष्टकायां दीक्षन्तेऽन्तनामानावृतू भवतः फल्गुनीपूर्णमासे दीक्षेन्मुखं  
 वा एतत्संवत्सरस्य यत्फल्गुनीपूर्णमासो मुखत एव संवत्सरमारभ्य  
 दीक्षन्ते तस्यैकैव निर्या यत्साम्मध्ये विषुवान्तसम्पद्यते चित्रापूर्णमासे  
 दीक्षेन्मुखं वा एतत्संवत्सरस्य यच्चित्रापूर्णमासो मुखत एव  
 संवत्सरमारभ्य दीक्षन्ते तस्य न का च न निर्या भवति चतुरहे  
 पुरस्तात्पौर्णमास्यै दीक्षेन्तेषामेकाष्टकायां क्रयः सम्पद्यते तेनैकाष्टकां न  
 छम्बट्कुर्वन्ति तेषां पूर्वपक्षे सुत्या सम्पद्यते पूर्वपक्षमासा अभि  
 सम्पद्यन्ते ते पूर्वपक्ष उत्तिष्ठन्ति तानुत्तिष्ठत ओषधयो  
 वनस्पतयोऽनुत्तिष्ठन्ति तान्कल्याणी कीर्तिरनूत्तिष्ठत्यरात्सुरिमे यजमाना  
 इति तदनु सर्वे राधुवन्ति ॥८॥

सुवर्गं वा एते लोकं यन्ति ये सत्रमुपयन्त्यभीन्धत एव दीक्षाभिरात्मानं  
श्रपयन्त उपसद्भिर्द्वाभ्यां लोमाव द्यन्ति द्वाभ्यां त्वचं  
द्वाभ्यामसृद्द्वाभ्याम्मांसं द्वाभ्यामस्थि द्वाभ्याम्मज्जानमात्मदक्षिणं वै  
सत्रमात्मानमेव दक्षिणां नीत्वा सुवर्गं लोकं यन्ति शिखामनु प्र वपन्त  
ऋद्ध्या अथो रधीयांसः सुवर्गं लोकमयामेति ॥६॥

ब्रह्मवादिनो वदन्त्यतिरात्रः परमो यज्ञक्रतूनां कस्मात्तम्प्रथममुप  
यन्तीत्येतद्वा अग्निष्टोमम्प्रथममुप यन्त्यथोक्थ्यमथ  
षोडशिनमथातिरात्रमनुपूर्वमेवैतद्यज्ञक्रतूनुपेत्य तानालभ्य परिगृह्य  
सोममेवैतत्पिबन्त आसते ज्योतिष्टोमम्प्रथममुप यन्ति ज्योतिष्टोमो वै  
स्तोमानाम्मुखं मुखत एव स्तोमान्प्र युञ्जते ते सस्तुता विराजमभि  
सम्पद्यन्ते द्वे चर्चावति रिच्येते एकया गौरतिरिक्त एकयारुनः सुवर्गो वै  
लोको ज्योतिरुर्गिराड्सुवर्गमेव तेन लोकं यन्ति रथंतरं दिवा भवति  
रथंतरं नक्तमित्याहुर्ब्रह्मवादिनः केन तदजामीति सौभ्रं तृतीयसवने  
ब्रह्मसामम्बृहत्तन्मध्यतो दधति विधृत्यै तेनाजामि ॥१०॥

ज्योतिष्टोमम्प्रथममुप यन्त्यस्मिन्नेव तेन लोके प्रति तिष्ठन्ति गोष्टोमं  
द्वितीयमुप यन्त्यन्तरिक्ष एव तेन प्रति तिष्ठन्त्यायुष्टोमं तृतीयमुप  
यन्त्यमुष्मिन्नेव तेन लोके प्रति तिष्ठन्तीयं वाव ज्योतिरन्तरिक्षं  
गौरसावायुयदेतान्स्तोमानुपयन्त्येष्वेव तल्लोकेषु सत्रिणः प्रतितिष्ठन्तो  
यन्ति ते सस्तुता विराजमभि सम्पद्यन्ते द्वे चर्चावति रिच्येते एकया  
गौरतिरिक्त एकयारुनः सुवर्गो वै लोको ज्योतिरुर्गिराड्सुवर्गमेवाव  
रुन्धते ते न क्षुधार्तिमार्च्छन्त्यक्षौधुका भवन्ति क्षुत्सम्बाधा इव हि

सुत्रिणोऽग्निष्टोमावभितः प्रधी तावुक्थ्या मध्ये नभ्यं तत्तदेतत्परियद्देवचक्रं  
यदेतेन षडहेन यन्ति देवचक्रमेव सुमारोहन्त्यरिष्ट्यै ते स्वस्ति समश्नुवते  
षडहेन यन्ति षड्वा ऋतव ऋतुष्वेव प्रति तिष्ठन्त्युभयतो ज्योतिषा  
यन्त्युभयत एव सुवर्गे लोके प्रतितिष्ठन्तो यन्ति द्वौ षडहौ भवतस्तानि  
द्वादशाहानि सम्पद्यन्ते द्वादशो वै पुरुषो द्वे सुक्थ्यौ द्वौ ब्राह्म आत्मा च  
शिरश्च चत्वार्यङ्गानि स्तनौ द्वादशौ तत्पुरुषमनु पर्यावर्तन्ते त्रयः षडहा  
भवन्ति तान्यष्टादशाहानि सम्पद्यन्ते नवान्यानि नवान्यानि नव वै पुरुषे  
प्राणास्तप्राणाननु पर्यावर्तन्ते चत्वारः षडहा भवन्ति तानि  
चतुर्विंशतिरहानि सं पद्यन्ते चतुर्विंशतिरर्धमासाः  
संवत्सरस्तसंवत्सरमनु पर्यावर्तन्तेऽप्रतिष्ठितः संवत्सर इति खलु वा  
आहुर्वर्षीयान्प्रतिष्ठाया इत्येतावद्वै संवत्सरस्य ब्राह्मणं यावन्मासो  
मासिमास्येव प्रतितिष्ठन्तो यन्ति ॥११॥

मेषस्त्वा पचतैरवतु लोहितग्रीवश्छागैः शल्मलिर्वृद्ध्या पर्णो ब्रह्मणा  
प्लक्षो मेधेन न्यग्रोधश्चमसै रुदुम्बर ऊर्जा गायत्री  
छन्दोभि स्त्रिवृत्स्तोमैरवन्तीः स्थावन्तीस्त्वावन्तु प्रियं त्वा प्रियाणां  
वर्षिष्ठमाप्यानां निधीनां त्वा निधिपतिं हवामहे वसो मम ॥१२॥

कूप्याभ्यः स्वाहा कूल्याभ्यः स्वाहा विक्र्याभ्यः स्वाहावट्याभ्यः  
स्वाहा खन्याभ्यः स्वाहा हद्याभ्यः स्वाहा सूद्याभ्यः स्वाहा सरस्याभ्यः  
स्वाहा वैशन्तीभ्यः स्वाहा पल्वल्याभ्यः स्वाहा वर्ष्याभ्यः  
स्वाहावर्ष्याभ्यः स्वाहा हादुनीभ्यः स्वाहा पृष्वाभ्यः स्वाहा  
स्यन्दमानाभ्यः स्वाहा स्थावराभ्यः स्वाहा नादेयीभ्यः स्वाहा



सैन्धुवीभ्यः स्वाहा समुद्रियाभ्यः स्वाहा सर्वाभ्यः स्वाहा ॥१३॥

अद्भ्यः स्वाहा वहन्तीभ्यः स्वाहा परिवहन्तीभ्यः स्वाहा समन्तं वहन्तीभ्यः  
स्वाहा शीघ्रं वहन्तीभ्यः स्वाहा  
शीभं वहन्तीभ्यः स्वाहो ग्रं वहन्तीभ्यः स्वाहा भीमं वहन्तीभ्यः  
स्वाहाभ्योभ्यः स्वाहा नभ्योभ्यः स्वाहा  
मह्योभ्यः स्वाहा सर्वस्मै स्वाहा ॥१४॥

यो अर्वन्तं जिघांसति तमभ्यमीति वरुणः । पुरो मर्तः परः श्वा ॥  
अहं च त्वं च वृत्रहन्त्सम्बभूव सनिभ्य आ । अरातीवा चिदद्रिवोऽनु नौ  
शूर मंसतै भद्रा इन्द्रस्य रातयः ॥  
अभि क्रत्वेन्द्र भूरधु जमन्न ते विव्यङ्गहिमानुंसि रजांसि । स्वेना हि  
वृत्रंस शर्वसा जघन्थु न शत्रुरन्तं विविदद्युधा ते ॥१५॥

नमो राज्ञे नमो वरुणाय नमोऽश्वाय नमः प्रजापतये  
नमोऽधिपतयेऽधिपतिरस्यधिपतिम्मा कुर्वधिपतिरहम्प्रजानाभूयासं मां  
धैहि मयि धेह्यु पाकृताय स्वाहालब्धाय स्वाहा हुताय स्वाहा ॥१६॥

मयोभूर्वातौ अभि वातूस्त्रा ऊर्जस्वतीरोषधीरा रिशन्ताम् ।  
पीवस्वतीर्जीवधन्याः पिबन्त्ववसायं पृद्धते रुद्र मृड ॥  
याः सरूपा विरूपा एकरूपा यासामग्निरिष्ट्या नामानि वेद । या  
अङ्गिरसस्तपसेह चक्रुस्ताभ्यः पर्जन्य महि शर्म यच्छ ॥ या देवेषु  
तनुवमैरयन्त यासांसोमो विश्वा रूपाणि वेद । ता अस्मभ्यम्पयसा

पिन्वमानाः प्रजावतीरिन्द्र गोष्ठे रिरीहि ॥  
 प्रजापतिर्मह्यमेता रराणो विश्वैर्देवैः पितृभिः संविदानः । शिवाः सृतीरुप  
 नो गोष्ठमाकस्तासां वयम्प्रजया सँ संदेम ॥  
 इह धृतिः स्वाहे ह विधृतिः स्वाहे ह रन्तिः स्वाहे ह रमतिः स्वाहा  
 महीमू षु सुत्रामाणम् ॥१७॥

किँँ स्विदासीत्पूर्वचित्तिः किँँ स्विदासीद्बृहद्वयः । किँँ  
 स्विदासीत्पिशङ्गिला किँँ स्विदासीत्पिलिप्पिला ॥  
 द्यौरासीत्पूर्वचित्तिरश्व आसीद्बृहद्वयः ।  
 रात्रिरासीत्पिशङ्गिलाविरासीत्पिलिप्पिला ॥  
 कः स्विदेकाकी चरति क उँँ स्विजायते पुनः । किँँ स्विद्धिमस्य  
 भेषजं किँँ स्विदावपनम्महत् ॥  
 सूर्य एकाकी चरति चन्द्रमा जायते पुनः । अग्निर्हिमस्य  
 भेषजम्भूमिरावपनम्महत् ॥  
 पृच्छामि त्वा परमन्तम्पृथिव्याः पृच्छामि त्वा भुवनस्य नाभिम् ।  
 पृच्छामि त्वा वृष्णो अश्वस्य रेतः पृच्छामि वाचः परमं व्योम ॥  
 वेदिमाहुः परमन्तम्पृथिव्या यज्ञमाहुर्भुवनस्य नाभिम् । सोममाहुर्वृष्णो  
 अश्वस्य रेतो ब्रह्मैव वाचः परमं व्योम ॥१८॥

अम्ब्रे अम्ब्राल्यम्बिके न मा नयति कश्चन । स सस्त्यश्वकः ॥  
 सुभगे काम्पीलवासिनि सुवर्गे लोके सम्प्रोणर्वाथाम् ।  
 आहर्मजानि गर्भधमा त्वर्मजासि गर्भधम् ।  
 तौ सह चतुरः पदः सम्प्र सारयावहै ।

वृषा वाँ रेतोधा रेतौ दधातू त्सक्थ्यौर्गृदं धैह्यञ्जिमुदञ्जिम्मन्वज । य  
स्त्रीणां जीवभोजनो य आसां बिलधावनः । प्रियः स्त्रीणामपीच्यः । य  
आसां कृष्णे लक्ष्मणि सर्दिगृदिम्परावधीत् ॥

अम्ब्रे अम्ब्राल्यम्बिके न मा यभति कश्चन । ससस्त्यश्चकः ॥

ऊर्ध्वमैनामुच्छ्रयताद्वेणुभारं गिराविं व । अथास्या मध्यमेधताँ शीते  
वाते पुनन्निव ॥

अम्ब्रे अम्ब्राल्यम्बिके न मा यभति कश्चन । ससस्त्यश्चकः ॥ यद्धरिणी  
यवमत्ति न पुष्टम्पुशु मन्यते । शूद्रा यदर्यजारा न पोषाय धनायति ॥

अम्ब्रे अम्ब्राल्यम्बिके न मा यभति कश्चन । ससस्त्यश्चकः ॥

इयं यका शकुन्तिकाहलमिति सर्पति । आहतं गभे पसो नि जल्गुलीति  
धारिका ॥

अम्ब्रे अम्ब्राल्यम्बिके न मा यभति कश्चन । ससस्त्यश्चकः ॥

माता च ते पिता च तेऽग्रं वृक्षस्य रोहतः । प्र सुलामीति ते पिता गभे  
मुष्टिमंतँसयत् ॥

दधिक्राव्णौ अकारिषं जिष्णोरश्वस्य वाजिनः ।

सुरभि नो मुखा कर्त्त्र ण आयुँषि तारिषत् ॥

आपो हि ष्ठा मयोभुवस्ता न ऊर्जे दधातन । महे रणाय चक्षसे ॥

यो वः शिवतमो रसस्तस्य भाजयतेह नः । उशतीरिव मातरः ॥

तस्मा अरं गमाम वो यस्य क्षयाय जिन्वथ । आपो जनयथा च नः

॥१६॥

भू भुवःसुवर्वसवस्त्वाऽञ्जन्तु गायत्रेण च्छन्दसा रुद्रास्त्वाऽञ्जन्तु त्रैष्टुभेन  
च्छन्दसादित्यास्त्वाऽञ्जन्तु जागतेन च्छन्दसा यद्वातौ अपो अगमदिन्द्रस्य

तनुवम्प्रियाम् । एतं स्तौतरेतेन पथा पुनरश्चमा वर्तयासि नः ॥  
 लाजीञ्छाचीञ्चन्यशौ ममाञ्चम् ।  
 यव्यायै गव्याया एतदैवा अन्नमत्तैतदन्नमद्धि प्रजापते ॥  
 युञ्जन्ति ब्रध्मरुषं चरन्तम्परि तस्थुषः । रोचन्ते रोचना दिवि ॥  
 युञ्जन्त्यस्य काम्या हरी विपक्षसा रथे । शोणा धृष्णू नृवाहसा ॥  
 केतुं कृणवन्नकेतवे पेशौ मर्या अपेशसै । समुषद्विरजायथाः ॥२०॥

प्राणाय स्वाहा व्यानाय स्वाहापानाय स्वाहा स्रावभ्यः स्वाहा  
 संतानेभ्यः स्वाहा परिसंतानेभ्यः स्वाहा पर्वभ्यः स्वाहा संधानेभ्यः  
 स्वाहा शरीरेभ्यः स्वाहा यज्ञाय स्वाहा दक्षिणाभ्यः स्वाहा सुवर्गाय  
 स्वाहा लोकाय स्वाहा सर्वस्मै स्वाहा ॥२१॥

सिताय स्वाहासिताय स्वाहाभिहिताय स्वाहानभिहिताय स्वाहा युक्ताय  
 स्वाहायुक्ताय स्वाहा सुयुक्ताय स्वाहो द्युक्ताय स्वाहा विमुक्ताय स्वाहा  
 प्रमुक्ताय स्वाहा वञ्चते स्वाहा परिवञ्चते स्वाहा संवञ्चते स्वाहानुवञ्चते  
 स्वाहो द्वञ्चते स्वाहा यते स्वाहा धावते स्वाहा तिष्ठते स्वाहा सर्वस्मै  
 स्वाहा ॥२२॥

इति सप्तमकारण्डे चतुर्थः प्रपाठकः ४

अथ सप्तमकारण्डे पञ्चमः प्रपाठकः ५

गावो वा एतत्सुत्रमासताशृङ्गाः सृतीः शृङ्गाणि नो जायन्ता इति कामेन  
 तासां दश मासा निषण्णा आसन्नथ शृङ्गान्यजायन्त ता  
 उदतिष्ठन्नरात्स्मेत्यथ यासां नाजायन्त ताः

संवत्सरमाप्त्वोदतिष्ठन्नरात्स्मेति यासां चाजायन्त यासां च न ता  
 उभयीरुदतिष्ठन्नरात्स्मेति गोसूत्रं वै संवत्सरो य एवं विद्वाँसः  
 संवत्सरमुपयन्त्यध्रुवन्त्येव तस्मात्तूपरा वार्षिकौ मासौ पत्वा चरति  
 सूत्राभिजित् ह्यस्यै तस्मात्संवत्सरसदो यत्किं च गृहे क्रियते  
 तदाप्तमवर्द्धमभिजितं क्रियते समुद्रं वा एते प्र प्लवन्ते ये  
 संवत्सरमुपयन्ति यो वै समुद्रस्य पारं न पश्यति न वै स तत् उदति  
 संवत्सरो वै समुद्रस्तस्यैतत्पारं यदतिरात्रौ य एवं विद्वाँसः  
 संवत्सरमुपयन्त्यनार्ता एवोदृचं गच्छन्ती यं वै पूर्वोऽतिरात्रौऽसावुत्तरो  
 मनः पूर्वो वागुत्तरः प्राणः पूर्वोऽपान उत्तरः प्ररोधनम्पूर्व उदयनमुत्तरो  
 ज्योतिष्टोमो वैश्वानरोऽतिरात्रो भवति ज्योतिरेव पुरस्ताद्दधते सुवर्गस्य  
 लोकस्यानुख्यात्यै चतुर्विंशः प्रायणीयो भवति चतुर्विंशतिरर्धमासाः  
 संवत्सरः प्रयन्त एव संवत्सरे प्रति तिष्ठन्ति तस्य त्रीणि च शतानि षष्टिश्च  
 स्तोत्रीयास्तावतीः संवत्सरस्य रात्रय उभे एव संवत्सरस्य रूपे आप्रुवन्ति  
 ते सँस्थित्या अरिष्ट्या उत्तरैरहोभिश्चरन्ति षड्हा भवन्ति षड्वा ऋतवः  
 संवत्सर ऋतुष्वेव संवत्सरे प्रति तिष्ठन्ति गौश्वार्युश्च मध्यतः स्तोमौ भवतः  
 संवत्सरस्यैव तन्मिथुनममध्यतो दधति प्रजननाय ज्योतिरभितो भवति  
 विमोचनमेव तच्छन्दाँस्येव तद्विमोकं यन्त्यथो उभयतौज्योतिषैव  
 षड्हेन सुवर्गं लोकं यन्ति ब्रह्मवादिनो वदन्त्यासते केन यन्तीति  
 देवयानेन पथेति ब्रूयाच्छन्दाँसि वै देवयानः पन्थां गायत्री त्रिष्टुब्जगती  
 ज्योतिर्वै गायत्री गौस्त्रिष्टुगायुर्जगती यदेते स्तोमा भवन्ति देवयानेनैव  
 तत्पथा यन्ति समानँ सामं भवति देवल्लोको वै सामं देवल्लोकादेव न  
 यन्त्यन्याअन्या ऋचौ भवन्ति मनुष्यलोको वा ऋचौ  
 मनुष्यलोकादेवान्यमन्यं देवल्लोकमभ्यारोहन्तो यन्त्य भिवृत्तो

ब्रह्मसामर्भवति सुवर्गस्य लोकस्याभिवृत्या अभिजिद्भवति सुवर्गस्य  
लोकस्याभिजित्यै विश्वजिद्भवति विश्वस्य जित्यै मासिमासि पृष्ठान्युप  
यन्ति मासिमास्यतिग्राह्या गृह्यन्ते मासिमास्येव वीर्यं दधति  
मासाम्प्रतिष्ठित्या उपरिष्ठान्मासाम्पृष्ठान्युप यन्ति तस्मादुपरिष्ठादोषधयः  
फलं गृह्णन्ति ॥१॥

गावो वा एतत्सत्रमासताशृङ्गाः सतीः शृङ्गाणि सिषासन्तीस्तासां दश  
मासा निषरणा आसन्नथ शृङ्गारयजायन्त ता अब्रुवन्नरात्मोत्तिष्ठामाव तं  
काममरुत्समहि येन कामेन न्यषदामेति तासामु त्वा अब्रुवन्नर्धा वा  
यावतीर्वासामहा एवेमौ द्वादशौ मासौ संवत्सरं सम्पाद्योत्तिष्ठामेति  
तासां द्वादशे मासि शृङ्गाणि प्रावर्तन्त श्रद्धया वाश्रद्धया वा ता इमा  
यास्तूपरा उभय्यो वाव ता आर्ध्वन्याश्च  
शृङ्गारयसन्वन्याश्चोर्जमवारुन्धत धीति दशसु मासूत्तिष्ठन्नृधोति द्वादशसु  
य एवं वेद पदेन खलु वा एते यन्ति विन्दति खलु वै पदेन यन्तद्वा  
एतदृद्धमयनं तस्मादेतद्भोसनि ॥२॥

प्रथमे मासि पृष्ठान्युप यन्ति मध्यम उप यन्त्युत्तम उप यन्ति तदाहुर्या वै  
त्रिरेकस्याहं उपसीदन्ति द्रुहं वै सापराभ्यां दोहाभ्यां दुहेऽथ कुतः सा  
धौक्ष्यते यां द्वादश कृत्वं उपसीदन्तीति संवत्सरं सम्पाद्योत्तमे मासि  
सकृत्पृष्ठान्युपैयुस्तद्यजमाना यज्ञम्पशूनवं रुन्धते समुद्रं वा  
एतैऽनवारमपारम्प प्लवन्ते ये संवत्सरमुपयन्ति यद्बृहद्रथंतरे अन्वर्जैर्युर्थथा  
मध्ये समुद्रस्य प्लवमन्वर्जैर्युस्तादृक्तदनुत्सर्गम्बृहद्रथंतराभ्यामित्वा  
प्रतिष्ठां गच्छन्ति सर्वेभ्यो वै कामेभ्यः संधिर्दुहे तद्यजमानाः

सर्वान्कामानव रुन्धते ॥३॥

समान्य ऋचौ भवन्ति मनुष्यलोको वा ऋचौ मनुष्यलोकादेव न  
यन्त्यन्यदन्यत्सामं भवति देवलोको वै सामं  
देवलोकादेवान्यमन्यमनुष्यलोकम्प्रत्यवरोहन्तो यन्ति जगतीमग्र उप  
यन्ति जगतीं वै छन्दांसि प्रत्यवरोहन्त्या ग्रयणं ग्रहा बृहत्पृष्ठानि  
त्रयस्त्रिंशं स्तोमास्तस्माज्जयायांसं कनीयान्प्रत्यवरोहति वैश्वकर्मणो  
गृह्यते विश्वान्येव तेन कर्माणि यजमाना अव रुन्धत आदित्यो गृह्यत इयं  
वा अदिति रस्यामेव प्रति तिष्ठन्त्यन्योऽन्यो गृह्यते मिथुनत्वाय प्रजात्या  
अवान्तरं वै दशरात्रेण प्रजापतिः प्रजा असृजत यद्दशरात्रो भवति प्रजा  
एव तद्यजमानाः सृजन्त एतां ह वा उदङ्कः शौल्बायनः  
सुत्रस्यद्धिमुवाच यद्दशरात्रो यद्दशरात्रो भवति सुत्रस्यद्ध्या अथो यदेव  
पूर्वेष्वहःसु विलोम क्रियते तस्यैवैषा शान्तिः ॥४॥

यदि सोमौ ससुतौ स्याताम्महति रात्रियै प्रातरनुवाकमुपाकुर्यात्पूर्वो  
वाचम्पूर्वो देवताः पूर्वश्छन्दांसि वृद्धे वृषणवतीम्प्रतिपदं  
कुर्यात्प्रातःसवनादेवैषामिन्द्रं वृद्धेऽथो खल्वाहुः सवनमुखेसवनमुखे  
कार्येति सवनमुखात्सवनमुखादेवैषामिन्द्रं वृद्धे संवेशायौपवेशाय  
गायत्रियास्त्रिष्टुभो जगत्या अनुष्टुभः पङ्क्या अभिभूत्यै स्वाहा छन्दांसि  
वै संवेश उपवेशश्छन्दोभिरेवैषां छन्दांसि वृद्धे सजनीयं शस्यं  
विहव्यं शस्यमगस्त्यस्य कयाशुभीयं शस्यमेतावद्वा अस्ति  
यावदेतद्यावदेवास्ति तदैषां वृद्धे यदि प्रातःसवने कलशो दीर्येत  
वैष्णवीषु शिपिविष्टवतीषु स्तुवीरन्यद्वै यज्ञस्यातिरिच्यते विष्णुं

तच्छिपिविष्टमभ्यति रिच्यते तद्विष्णुः शिपिविष्टोऽतिरिक्त एवातिरिक्तं  
दधात्यथो अतिरिक्तेनैवातिरिक्तमाप्त्वाव रुन्धते यदि मध्यंदिने दीर्येत  
वषट्कारनिधनं सामं कुर्युर्वषट्कारो वै यज्ञस्य प्रतिष्ठा  
प्रतिष्ठामेवैनद्रमयन्ति यदि तृतीयसवन एतदेव ॥५॥

षडहैर्मासान्त्सम्पाद्याहरुत्सृजन्ति षडहैर्हि  
मासान्त्सम्पश्यन्त्यर्धमासैर्मासान्त्सम्पाद्याहरुत्सृजनत्यर्धमासैर्हि  
मासान्त्सम्पश्यन्त्यमावायया मासान्त्सम्पाद्याहरुत्सृजन्त्यमावास्यया हि  
मासान्त्सम्पश्यन्ति पौर्णमास्या मासान्त्सम्पाद्याहरुत्सृजन्ति पौर्णमास्या  
हि मासान्त्सम्पश्यन्ति यो वै पूर्ण आसिञ्चति परा स सिञ्चति यः  
पूर्णादुदचति प्राणमस्मिन्त्स दधाति यत्पौर्णमास्या  
मासान्त्सम्पाद्याहरुत्सृजन्ति संवत्सुरायैव तत्प्राणं दधति तदनु सत्त्रिणः  
प्राणन्ति यदहर्नोत्सृजेयुर्यथा दृतिरुपेनद्धो विपतत्येव संवत्सुरो वि  
पतेदार्तिमार्च्छेयुर्यत्पौर्णमास्या मासान्त्सम्पाद्याहरुत्सृजन्ति संवत्सुरायैव  
तदुदानं दधति तदनु सत्त्रिण उदनन्ति नार्तिमार्च्छन्ति पूर्णमासे वै  
देवानां सुतो यत्पौर्णमास्या मासान्त्सम्पाद्याहरुत्सृजन्ति देवानामेव  
तद्यज्ञेन यज्ञम्प्रत्यवरोहन्ति वि वा एतद्यज्ञं छिन्दन्ति यत्षडहसंततं  
सन्तमथाहरुत्सृजन्ति प्राजापत्यम्पशुमालभन्ते प्रजापतिः सर्वा देवता  
देवताभिरेव यज्ञं सं तन्वन्ति यन्ति वा एते सर्वनाद्येऽहरुत्सृजन्ति तुरीयं  
खलु वा एतत्सर्वं यत्सान्नाय्यं यत्सान्नाय्यम्भवति तेनैव सर्वान्न यन्ति  
समुपहृत्य भक्षयन्त्येतत्सौमपीथा ह्यैतर्हि यथायतनं वा एतेषां  
सवनभाजौ देवता गच्छन्ति येऽहरुत्सृजन्त्यनुसवनम्पुरोडाशान्निर्वपन्ति  
यथायतनादेव सवनभाजौ देवता अर्वा रुन्धतेऽष्टाकपालान्प्रातःसवन



एकादशकपालान्माध्यंदिने सर्वने द्वादशकपालाँस्तृतीयसवने  
छन्दाँस्येवाप्त्वाव रुन्धते वैश्वदेवं चरुं तृतीयसवने निर्वपन्ति वैश्वदेवं वै  
तृतीयसवनं तेनैव तृतीयसवनान्न यन्ति ॥६॥

उत्सृज्यांश्च नोत्सृज्याश्मिति मीमाँसन्ते  
ब्रह्मवादिनस्तद्वाहुरुत्सृज्यमेवेत्येवावास्य यां च पौर्णमास्यां  
चोत्सृज्यमित्याहुरेते हि यज्ञं वहत इति ते त्वाव नोत्सृज्ये इत्याहुर्ये  
अवान्तरं यज्ञभेजाते इति या प्रथमा व्यष्टका तस्यामुत्सृज्यमित्याहुरेष वै  
मासो विश्वर इति नादिष्टमुत्सृजेयु यदादिष्टमुत्सृजेयुर्यादृशे पुनः  
पर्याप्लावे मध्ये षडहस्य सम्पद्येत षडहैर्मासान्त्सम्पाद्य  
यत्सप्तममहस्तस्मिन्नुत्सृज्येयु स्तद्ग्रये वसुमते पुरोडाशमष्टाकपालं  
निर्वपेयुरेन्द्रं दधीन्द्राय मरुत्वते पुरोडाशमेकादशकपालं वैश्वदेवं  
द्वादशकपालं मग्नेर्वै वसुमतः प्रातःसवनं यद्ग्रये वसुमते  
पुरोडाशमष्टाकपालं निर्वपन्ति देवतामेव तद्भागिनीं कुर्वन्ति  
सर्वनमष्टाभिरुप यन्ति यद्वैन्द्रं दधि भवतीन्द्रमेव तद्भागधेयान्न  
च्यावयन्तीन्द्रस्य वै मरुत्वतो माध्यंदिनँ सर्वनं यदिन्द्राय मरुत्वते  
पुरोडाशमेकादशकपालं निर्वपन्ति देवतामेव तद्भागिनीं कुर्वन्ति  
सर्वनमेकादशभिरुप यन्ति विश्वेषां वै देवानामृभुमतां तृतीयसवनं  
यद्वैश्वदेवं द्वादशकपालं निर्वपन्ति देवता एव तद्भागिनीः कुर्वन्ति सर्वनं  
द्वादशभिरुप यन्ति प्राजापत्यम्पशुमा लभन्ते यज्ञो वै  
प्रजापतिर्यज्ञस्याननुसर्गाया भिवर्त इतः षण्मासो ब्रह्मसामभवेति ब्रह्म  
वा अभिवर्तो ब्रह्मणैव तत्सुवर्गं लोकमभिवर्तयन्तो यन्ति प्रतिकूलमिव  
हीतः सुवर्गो लोक इन्द्रं क्रतुं न आ भर पिता पुत्रेभ्यो यथा । शिक्ता नो

अस्मिन्पुरुहूत यामनि जीवा ज्योतिरशीमही त्यमुत आयताः षण्मासो  
ब्रह्मसामम्भवत्ययं वै लोको ज्योतिः प्रजा ज्योतिरिममेव  
तल्लोकम्पश्यन्तोऽभिवदन्त आ यन्ति ॥७॥

देवानां वा अन्तं जग्मुषामिन्द्रियं वीर्यमपाक्रामत्तत्क्रोशेनावारुन्धत  
तत्क्रोशस्य क्रोशत्वं यत्क्रोशेन चात्वालस्यान्तै स्तुवन्ति यज्ञस्यैवान्तं  
गत्वेन्द्रियं वीर्यमव रुन्धते सत्त्रस्यद्धर्चाहवनीयस्यान्तै  
स्तुवन्त्यग्निमेवोपद्रष्टारं कृत्वर्द्धिमुप यन्ति प्रजापतेर्हृदयेन हविर्धानेऽन्तः  
स्तुवन्ति प्रेमाणमेवास्य गच्छन्ति श्लोकेन पुरस्तात्सदसः  
स्तुवन्त्यनुश्लोकेन पश्चाद्यज्ञस्यैवान्तं गत्वा श्लोकभाजौ भवन्ति  
नवभिरध्वर्युरुद्रायति नव वै पुरुषे प्राणाः प्राणानेव यजमानेषु दधाति  
सर्वा ऐन्द्रियौ भवन्ति प्राणेष्वेवेन्द्रियं दधत्य प्रतिहताभिरुद्रायति  
तस्मात्पुरुषः सर्वाण्यन्यानि शीर्ष्णोऽङ्गानि प्रत्यचति शिर एव न  
पञ्चदशः रथंतरम्भवतीन्द्रियमेवाव रुन्धते सप्तदशं बृहदन्नाद्यस्यावरुद्ध्या  
अथो प्रैव तेन जायन्त एकविंशम्भ्रं द्विपदासु प्रतिष्ठित्यै पत्रय उप  
गायन्ति मिथुनत्वाय प्रजात्यै प्रजापतिः प्रजा असृजत  
सोऽकामयतासामहः राज्यम्परीयामिति तासां राजनेनैव  
राज्यम्पर्यैत्तद्राजनस्य राजन्त्वं यद्राजनम्भवति प्रजानामेव तद्यजमाना  
राज्यम्परि यन्ति पञ्चविंशम्भवति प्रजापतेराप्त्यै पञ्चभिस्तिष्ठन्तः स्तुवन्ति  
देवलोकमेवाभि जयन्ति पञ्चभिरासीना मनुष्यलोकमेवाभि जयन्ति दश  
सम्पद्यन्ते दशाक्षरा विराडन्नं विराड्विराजैवान्नाद्यमव रुन्धते पञ्चधा  
विनिषद्य स्तुवन्ति पञ्च दिशो दिद्वैव प्रति तिष्ठन्त्ये कैकयास्तुतया  
समारयन्ति दिग्भ्य एवान्नाद्यः सम्भरन्ति ताभिरुद्रातोद्रायति दिग्भ्य

एवान्नाद्यं सम्भृत्य तेज आत्मन्दधते तस्मादेकः प्राणः  
 सर्वाण्यङ्गान्यवृत्यथो यथा सुपर्ण उत्पतिष्यज्छिरं उत्तमं कुरुत एवमेव  
 तद्यजमानाः प्रजानामुत्तमा भवन्त्या सन्दीमुद्गाता रोहति साम्राज्यमेव  
 गच्छन्ति प्लेङ्कं होता नाकस्यैव पृष्ठं रोहन्ति कूर्चावध्वर्युर्ब्रध्नस्यैव  
 विष्टपं गच्छन्त्येतावन्तो वै देवल्लोकास्तेष्वेव यथापूर्वम्प्रति तिष्ठन्त्यथो  
 आक्रमणमेव तत्सेतुं यजमानाः कुर्वते सुवर्गस्य लोकस्य समष्टयै ॥८॥

अर्क्येण वै सहस्रशः प्रजापतिः प्रजा असृजत् ताभ्य इलान्देनेरां  
 लूतामवारुद्ध यदर्क्यम्भवति प्रजा एव तद्यजमानाः सृजन्त इलान्दं  
 भवति प्रजाभ्य एव सृष्टाभ्य इरां लूतामव रुन्धते तस्माद्यां समां  
 सत्रं समृद्धं क्षोधुकास्तां समाम्प्रजा इषं ह्यासामूर्जमाददते यां  
 समां व्यृद्धमक्षोधुकास्तां समाम्प्रजा न ह्यासामिषमूर्जमाददत उत्क्रोदं  
 कुर्वते यथा बन्धान्मुचाना उत्क्रोदं कुर्वत एवमेव तद्यजमाना  
 देवबन्धान्मुचाना उत्क्रोदं कुर्वत इषमूर्जमात्मन्दधाना वाणः  
 शततन्तुर्भवति शतायुः पुरुषः शतेन्द्रिय आयुष्येवेन्द्रिये प्रति तिष्ठन्त्या जिं  
 धावन्त्यनभिजितस्याभिजित्यै दुन्दुभीन्सुमाघ्नन्ति परमा वा एषा वाग्या  
 दुन्दुभौ परमामेव वाचमव रुन्धते भूमिदुन्दुभिमा घ्नन्ति यैवेमां वाक्प्रविष्टा  
 तामेवाव रुन्धतेऽथो इमामेव जयन्ति सर्वा वाचौ वदन्ति सर्वासां  
 वाचामवरुद्ध्या आर्द्रं चर्मन्वार्यच्छेते इन्द्रियस्यावरुद्ध्या आन्यः क्रोशति  
 प्रान्यः शंसति य आक्रोशति पुनात्येवैनान्तस यः प्रशंसति  
 पूतेष्वेवान्नाद्यं दधात्यृषिकृतं च वा एते देवकृतं च पूर्वैर्मासैरव रुन्धते  
 यद्भूतेच्छदां सामानि भवन्त्युभयस्यावरुद्धयै यन्ति वा एते मिथुनाद्ये  
 संवत्सरमुपयन्त्यन्तर्वेदि मिथुनौ सम्भवतस्तेनैव मिथुनान्न यन्ति ॥९॥

चर्माव भिन्दन्ति प्राप्मानमेवैषामव भिन्दन्ति माप रात्सीर्माति  
व्यात्सीरित्याह सम्प्रत्यैवैषाम्प्राप्मानमव भिन्दन्त्यु दकुम्भानधिनिधाय  
दास्यौ मार्जालीयम्परि नृत्यन्ति पदो निघ्नतीरिदम्मधुं गायन्त्यो मधु वै  
देवानाम्परममन्नाद्यं परममेवान्नाद्यमव रुन्धते पदो नि घ्नन्ति महीयामेवैषु  
दधति ॥१०॥

पृथिव्यै स्वाहान्तरिक्षाय स्वाहा दिवे स्वाहा सम्प्लोष्यते स्वाहा  
सम्प्लवमानाय स्वाहा सम्प्लुताय स्वाहा मेधायिष्यते स्वाहा मेघायते  
स्वाहा मेघिताय स्वाहा मेघाय स्वाहा नीहाराय स्वाहा निहाकायै  
स्वाहा प्रासुचाय स्वाहा प्रचलाकायै स्वाहा विद्योतिष्यते स्वाहा  
विद्योतमानाय स्वाहा संविद्योतमानाय स्वाहा स्तनयिष्यते स्वाहा  
स्तनयते स्वाहो ग्रं स्तनयते स्वाहा वर्षिष्यते स्वाहा वर्षते  
स्वाहाभिवर्षते स्वाहा परिवर्षते स्वाहा संवर्षते स्वाहानुवर्षते स्वाहा  
शीकायिष्यते स्वाहा शीकायते स्वाहा शीक्रिताय स्वाहा प्रोषिष्यते  
स्वाहा प्रुष्णते स्वाहा परिपुष्णते स्वाहो द्ग्रहीष्यते स्वाहो दृहते  
स्वाहो दृहीताय स्वाहा विप्लोष्यते स्वाहा विप्लवमानाय स्वाहा  
विप्लुताय स्वाहातप्स्यते स्वाहातपते स्वाहो ग्रमातपते स्वाहा गर्भ्यः  
स्वाहा यजुर्भ्यः स्वाहा साम्भ्यः स्वाहाङ्गिरोभ्यः स्वाहा वेदैभ्यः स्वाहा  
गार्थाभ्यः स्वाहा नाराशंसीभ्यः स्वाहा रैभीभ्यः स्वाहा सर्वस्मै स्वाहा  
॥११॥

दत्वते स्वाहादन्तकाय स्वाहा प्राणिने स्वाहाप्राणाय स्वाहा मुखवते

स्वाहा॑मुखाय॒ स्वाहा॑ नासिक॑वते॒ स्वाहा॑नासिकाय॒ स्वाहा॑क्षर॑वते  
 स्वाहा॑नसिकाय॒ स्वाहा॑कर्णि॑ने॒ स्वाहा॑कर्ण॑काय॒ स्वाहा॑ शीर्ष॑वते  
 स्वाहा॑शीर्ष॑काय॒ स्वाहा॑ प॒द्वते॒ स्वाहा॑पा॒दकाय॒ स्वाहा॑ प्रा॒णते  
 स्वाहा॑ प्रा॒णते॒ स्वाहा॑ व॒दते॒ स्वाहा॑व॒दते॒ स्वाहा॑ प॒श्यते॒ स्वाहा॑प॒श्यते  
 स्वाहा॑ शृ॒णव॒ते॒ स्वाहा॑शृ॒णव॒ते॒ स्वाहा॑ म॒न॒स्वि॒ने॒ स्वाहा॑म॒न॒से॒ स्वाहा॑  
 रे॒त॒स्वि॒ने॒ स्वाहा॑रि॒त॒स्काय॒ स्वाहा॑ प्र॒जाभ्यः॒ स्वाहा॑ प्र॒ज॒न॒नाय॒ स्वाहा॑  
 लो॒म॒व॒ते॒ स्वाहा॑लो॒म॒काय॒ स्वाहा॑ त्व॒चे॒ स्वाहा॑त्व॒क्काय॒ स्वाहा॑ च॒र्म॒णव॒ते  
 स्वाहा॑च॒र्म॒काय॒ स्वाहा॑ लो॒हि॒त॒व॒ते॒ स्वाहा॑लो॒हि॒ताय॒ स्वाहा॑ मा॒स॒न्व॒ते  
 स्वाहा॑मा॒स॒काय॒ स्वाहा॑ स्ना॒व॒भ्यः॒ स्वाहा॑स्ना॒व॒काय॒ स्वाहा॑स्थ॒न्व॒ते  
 स्वाहा॑न॒स्थि॒काय॒ स्वाहा॑ म॒ञ्ज॒न्व॒ते॒ स्वाहा॑म॒ञ्ज॒काय॒ स्वाहा॑ङ्गि॒ने  
 स्वाहा॑न॒ङ्गाय॒ स्वाहा॑त्म॒ने॒ स्वाहा॑ना॒त्म॒ने॒ स्वाहा॑ सर्वा॒स्मै॒ स्वाहा॑ ॥१२॥

क॒स्त्वा॑ यु॒नक्ति॑ स॒ त्वा॑ यु॒नक्तु॑ वि॒ष्णु॑स्त्वा यु॒नक्त्व॑स्य॒ य॒ज्ञ॒स्य॒द्ध॒र्यै॑ म॒ह्य॑  
 सं॒न॒त्या॒ अ॒मु॒ष्मै॑ का॒मा॒यायु॑षे॒ त्वा॑ प्रा॒णाय॑ त्वा॒पा॒नाय॑ त्वा॒ व्या॒नाय॑ त्वा॒  
 व्यु॑ष्ट॒चै॒ त्वा॒ र॒य्यै॒ त्वा॒ रा॒ध॒से॒ त्वा॒ घो॒षाय॑ त्वा॒ पो॒षाय॑ त्वा॒रा॒द्धो॒षाय॑ त्वा॒  
 प्र॒च्यु॑त्यै॒ त्वा॑ ॥१३॥

अ॒ग्र॒यै॑ गा॒य॒त्राय॑ त्रि॒वृ॒ते॒ रा॒थं॒तरा॑य॒ वा॒स॒न्ता॒या॒ष्टा॒क॒पाल॑ इ॒न्द्राय॑ त्रै॒ष्टु॒भाय॑  
 प॒ञ्च॒द॒शाय॑ बा॒र्ह॒ताय॑ ग्रै॒ष्मा॒यै॒का॒द॒श॒क॒पालो॑ वि॒श्वे॑भ्यो॒ दे॒वे॒भ्यो॑ जा॒ग॒ते॒भ्यः  
 स॒प्त॒द॒शे॒भ्यो॑ वै॒रू॒पे॒भ्यो॑ वा॒र्षि॒के॒भ्यो॑ द्वा॒द॒श॒क॒पालो॑  
 मि॒त्रा॒वरु॑णा॒भ्या॒मा॒नु॑ष्टु॒भा॒भ्या॒मे॒क॒वि॑शा॒भ्यां॑ वै॒रा॒जा॒भ्यां॑  
 शा॒र॒दा॒भ्या॑म्प॒य॒स्या॑ बृ॒ह॒स्प॒त॒ये॑ पा॒ङ्गाय॑ त्रि॒ण॒वाय॑ शा॒क्व॒राय॑ है॒म॒न्ति॒काय॑  
 च॒रुः॑ सं॒वि॒त्र आ॑ति॒च्छ॒न्द॒साय॑ त्रय॒स्त्रि॑शा॒य॑ रै॒व॒ताय॑ शै॒शिरा॑य॒

द्वादशकपालोऽदित्यै विष्णुपत्न्यै चरु रग्नेयै वैश्वानराय  
द्वादशकपालोऽनुमत्यै चरुः काय एककपालः ॥१४॥

यो वा अग्रावग्निः प्रहियते यश्च सोमो राजा तयोरेष आतिथ्यं  
यदग्नीषोमीयोऽथैष रुद्रो यश्चीयते यत्संचितेऽग्रावेतानि हवींषि न  
निर्वपेदेष एव रुद्रोऽशान्त उपोत्थाय प्रजाम्पशून्यजमानस्याभि मन्येत  
यत्संचितेऽग्रावेतानि हवींषि निर्वपति भागधेयेनैवैनं शमयति नास्य  
रुद्रोऽशान्त उपोत्थाय प्रजाम्पशूनभि मन्यते दश हवींषि भवन्ति नव वै  
पुरुषे प्राणा नाभिर्दशमी प्राणानेव यजमाने दधात्यथो दशाक्षरा  
विराडन्नविराड्विराज्येवान्नाद्ये प्रति तिष्ठत्यु तुभिर्वा एष छन्दोभिः  
स्तोमैः पृष्ठैश्चेतव्य इत्याहुर्यदेतानि हवींषि निर्वपत्युतुभिरेवैनं छन्दोभिः  
स्तोमैः पृष्ठैश्चिनुते दिशः सुषुवाणेनाभिजित्या इत्याहुर्यदेतानि हवींषि  
निर्वपति दिशाम्भिजित्या एतया वा इन्द्रं देवा अयाजयन्तस्मादिन्द्रसुव  
एतया मनुमनुष्यास्तस्मान्मनुसुवो यथेन्द्रो देवानां यथा  
मनुर्मनुष्याणामेवम्भवति य एवं विद्वानेतयेष्ट्या यजते दिग्वतीः  
पुरोऽनुवाक्या भवन्ति सर्वासां दिशाम्भिजित्यै ॥१५॥

यः प्राणतो निमिषतो महित्वैक इद्राजा जगतो बभूव । य ईशै अस्य  
द्विपदश्चतुष्पदः कस्मै देवाय हविषा विधेम ॥  
उपयामगृहीतोऽसि प्रजापतये त्वा जुष्टं गृह्णामि तस्य ते द्यौर्महिमा  
नक्षत्राणि रूपमादित्यस्ते तेजस्तस्मै त्वा महिम्ने प्रजापतये स्वाहा ॥१६॥

य आत्सुदा बलुदा यस्य विश्व उपासते प्रशिषुं यस्य देवाः । यस्य

च्छायामृतं यस्य मृत्युः कस्मै देवाय हविषा विधेम ॥  
 उपयामगृहीतोऽसि प्रजापतये त्वा जुष्टं गृह्णामि तस्य ते पृथिवी  
 महिमौषधयो वनस्पतयो रूपमग्निस्ते तेजस्तस्मै त्वा महिम्ने प्रजापतये  
 स्वाहा ॥१७॥

आ ब्रह्मन्ब्राह्मणो ब्रह्मवर्चसी जायता मास्मिन्नाष्ट्रे राजन्य इषव्यः शूरो  
 महारथो जायतां दोग्धी धेनुर्वोढान्द्वा नाशुः सप्तिः पुरन्धिर्योषा  
 जिष्णू रथेष्ठाः सभेयो युवास्य यजमानस्य वीरो जायतां निकामेनिकामे  
 नः पर्जन्यो वर्षतु फलिन्यो न ओषधयः पच्यन्तां योगक्षेमो नः कल्पताम्  
 ॥१८॥

आक्रान्वाजी पृथिवीमग्निं युजमकृत वाज्यर्वाक्रान्वाज्यन्तरिक्षं वायुं  
 युजमकृत वाज्यर्वा द्यां वाज्याक्रंस्त सूर्यं युजमकृत वाज्यर्वाग्निस्ते  
 वाजिन्युङ्ङनु त्वारभे स्वस्ति मा सम्पारय वायुस्ते वाजिन्युङ्ङनु  
 त्वारभे स्वस्ति मा सम्पारयादित्यस्ते वाजिन्युङ्ङनु त्वारभे स्वस्ति मा  
 सम्पारय प्राणधृगंसि प्राणम्मे दृह व्यानधृगंसि व्यानं मे  
 दृहा पानधृगस्यपानं मे दृह चक्षुरसि चक्षुर्मयि धेहि श्रोत्रमसि श्रोत्रं  
 मयि धेह्या युरस्यायुमयि धेहि ॥ १९ ॥

जज्ञि बीजं वर्षां पर्जन्यः पक्ता सस्यं सुप्पिला ओषधयः स्वधिचरणेयं  
 सूपसदनोऽग्निः स्वध्यक्षमन्तरिक्षं सुपावः पर्वमानः सूपस्थाना द्यौः  
 शिवमसौ तपन्यथापूर्वमहोरात्रे पञ्चदशिनोर्धमासा स्त्रिशिनो मासाः  
 क्लृप्ता ऋतवः शान्तः संवत्सरः ॥ २० ॥

आग्नेयौऽष्टाकपालः सौम्यश्चरुः सावित्रौष्टाकपालः पौष्णश्चरुः रौद्रश्चरुः र्ग्रये  
वैश्वानराय द्वादशकपालो मृगाखरे यदि  
नागच्छेद्ग्रयेऽहोमुचेऽष्टाकपालः सौर्यम्पयो वायव्यं आज्यभागः ॥ २१ ॥

अग्रयेऽहोमुचेऽष्टाकपाल इन्द्रायाहोमुच एकादशकपालो  
मित्रावरुणाभ्यामागोमुग्भ्याम्पयस्या वायोसावित्र आगोमुग्भ्यां  
चरु रश्विभ्यामागोमुग्भ्यां धाना मरुद्भ्य एनोमुग्भ्यः सप्तकपालो विश्वेभ्यो  
देवेभ्य एनोमुग्भ्यो द्वादशकपालोऽनुमत्यै चरु र्ग्रये वैश्वानराय  
द्वादशकपालो द्यावापृथिवीभ्यामहोमुग्भ्यां द्विकपालः ॥ २२ ॥

अग्रये समनमत्पृथिव्यै समनमद्यथाग्निः पृथिव्या समनमदेवम्मह्यम्भद्राः  
संनतयः सं नमन्तु वायवे समनमदन्तरिक्षाय समनमद्यथा वायुरन्तरिक्षेण  
सूर्याय समनम द्विवे समनमद्यथा सूर्यो दिवा चन्द्रमसे  
समनम नक्षत्रेभ्यः समनमद्यथा चन्द्रमा नक्षत्रैर्वरुणाय समनम दुद्भ्यः  
समनमद्यथा वरुणोऽद्भिः साम्ने समनम दृचे समनमद्यथा सामर्चा ब्रह्मणे  
समनमत्क्षत्राय समनमद्यथा ब्रह्म क्षत्रेण राज्ञे समनम द्विशे समनमद्यथा  
राजा विशा रथाय समनम दश्वेभ्यः समनमद्यथा रथोऽश्वैः प्रजापतये  
समनम द्यूतेभ्यः समनमद्यथा प्रजापतिभूतैः समनमदेवम्मह्यम्भद्राः  
संनतयः सं नमन्तु ॥ २३ ॥

ये ते पन्थानः सवितः पूर्व्यासौऽरेणवो वितता अन्तरिक्षे । तेभिर्नो अद्य  
पृथिभिः सुगेभी रक्षा च नो अधि च देव ब्रूहि ॥



नमोऽग्रये पृथिविद्विते लोकस्पृते लोकमस्मै यजमानाय देहि नमो  
वायवेऽन्तरिक्षद्विते लोकस्पृते लोकमस्मै यजमानाय देहि नमः सूर्याय  
दिविद्विते लोकस्पृते लोकमस्मै यजमानाय देहि ॥२४॥

यो वा अश्वस्य मेध्यस्य शिरो वेदं शीर्षणवान्मेध्यो भवत्युषा वा अश्वस्य  
मेध्यस्य शिरः सूर्यश्चक्षुर्वार्तः प्राणश्चन्द्रमाः श्रोत्रं दिशः पादा  
अवान्तरदिशाः पर्शवोऽहोरात्रे निमेषोऽर्धमासाः पर्वाणि मासाः  
संधानान्यृतवोऽङ्गानि संवत्सर आत्मा रश्मयः केशा नक्षत्राणि रूपं  
तारका अस्थानि नभो मांसान्योषधयो लोमानि वनस्पतयो वाला  
अग्निमुखं वैश्वानरो व्यातं समुद्र उदरमन्तरिक्षम्पायुर्द्यावापृथिवी आण्डौ  
ग्रावा शेषः सोमो रेतो यज्जञ्जभ्यते तद्वि द्योतते यद्विधूनुते तत्स्तनयति  
यन्मेहति तद्वर्षति वागेवास्य वा गहर्वा अश्वस्य जायमानस्य महिमा  
पुरस्ताज्जायते रात्रिरेनम्महिमा पश्चादनु जायत एतौ वै  
महिमानावश्वमभितः सम्बभूवतुर्हयो देवानवहृदवसुरान्वाजी  
गन्धर्वानश्वो मनुष्यान्त्समुद्रो वा अश्वस्य योनिः समुद्रो बन्धुः ॥२५॥

इति सप्तमकारण्डे पञ्चमः प्रपाठकः ५

इति सप्तमं कारण्डं सम्पूर्णम् ७

इति तैत्तिरीयसंहिता समाप्ता